

全 唐 诗

（第二十一部）

第七百六十一卷

卷 761_1 【题黄居寀秋山图】

徐光溥

天与黄筌艺奇绝，笔精回感重瞳悦。运思潜通造化工，
挥毫定得神仙诀。秋来奉诏写秋山，写在轻绡数幅间。
高低向背无遗势，重峦叠嶂何孱颜。目想心存妙尤极，
研巧核能状不得。珍禽异兽皆自驯，奇花怪木非因植。
崎岖石磴绝游踪，薄雾冥冥藏半峰。娑萝掩映迷仙洞，
薜荔累垂缴古松。月榭参桥，僧老坐撻筇。
屈原江上婵娟竹，陶潜篱下芳菲菊。良宵只恐鹧鸪啼，
晴波但见鸳鸯浴。暮烟羃羃锁村坞，一叶扁舟横野渡。
飒飒白蘋欲起风，黯黯红蕉犹带雨。曲沼芙蓉香馥郁，
长汀芦荻花敕敕。雁过孤峰帖远青，鹿傍小溪饮残绿。
秋山秀兮秋江静，江光山色相辉映。雪迸飞泉溅钓矶，
云分落叶拥樵径。张璪松石徒称奇，边鸾花鸟何足窥。
白旻鹰逞凌风势，薛稷鹤夸警露姿。方原画山空巉岩，
峭壁枯槎人见嫌。孙位画水多汹涌，惊湍怒涛人见恐。
若教对此定妍媸，必定伏膺怀愧悚。再三展向冕旒侧。
便是移山回石间力。大李小李灭声华，献之恺之无颜色。
仿佛垂纶渭水滨，吾皇睹之思良臣。依稀荷锺傅岩野，

· 全唐诗 ·

吾皇睹之求贤者。从兹仄展复悬旌，宵衣旰食安天下。
才当老人星应候，愿与南山俱献寿。微臣稽首贡长歌，
丹青景化同天和。

卷 761_2 【同刘侍郎咏笋】

徐光溥

迸出班犀数十株，更添幽景向蓬壶。
出来似有凌云势，用作丹梯得也无？

卷 761_3 【贯休应梦罗汉画歌（一作禅月大师歌）】

欧阳炯

西岳高僧名贯休，孤情峭拔凌清秋。天教水墨画罗汉，
魁岸古容生笔头。时捎大绢泥高壁，闭目焚香坐禅室。
忽然梦里见真仪，脱下袈裟点神笔。高握节腕当空掷，
窸窣毫端任狂逸。逡巡便是两三躯，不似画工虚费日。
怪石安拂嵌复枯，真僧列坐连趺跏。形如瘦鹤精神健，
顶似伏犀头骨粗。倚松根，傍岩缝，曲录腰身长欲动。
看经弟子拟闻声，瞌睡山童疑有梦。不知夏腊几多年，
一手支颐偏袒肩。口开或若共人语，身定复疑初坐禅。
案前卧象低垂鼻，崖畔戏猿斜展臂。芭蕉花里刷轻红，
苔藓文中晕深翠。硬筇杖，矮松床，雪色眉毛一寸长。

· 全唐诗 ·

绳开梵夹两三片，线补衲衣千万行。林间乱叶纷纷堕，
一印残香断烟火。皮穿木屐不曾拖，笋织蒲团镇长坐。
休公休公逸艺无人加，声誉喧喧遍海涯。五七字句一千首，
大小篆书三十家。唐朝历历多名士，萧子云兼吴道子。
若将书画比休公，只恐当时浪生死。
休公休公始自江南来入秦，于今到蜀无交亲。
诗名画手皆奇绝，觑你凡人争是人。瓦棺寺里维摩诘，
舍卫城中辟支佛。若将此画比量看，总在人间为第一。

卷 761_4 【题景焕画应天寺壁天王歌】

欧阳炯

锦城东北黄金地，古迹何人兴此寺。白眉长老重名公，
曾识会稽山处士。寺门左壁图天王，威仪部从来何方。
鬼神怪异满壁走，当檐飒飒生秋光。我闻天王分理四天下，
水晶宫殿琉璃瓦。彩仗时驱狒狒装，金鞭频策骐驎马。
毗沙大像何光辉，手擎巨塔凌云飞。地神对出宝瓶子，
天女倒披金缕衣。唐朝说著名公画，周昉毫端善图写。
张僧繇是有神人，吴道子称无敌者。奇哉妙手传孙公，
能如此地留神踪。斜窥小鬼怒双目，直倚越狼高半胸。
宝冠动总生威容，趋跄左右来倾恭。臂横鹰爪尖纤利，
腰缠虎皮斑剥红。飘飘但恐入云中，步骤还疑归海东。
蟒蛇拖得浑身堕，精魅搦来双眼空。当时此艺实难有，
镇在宝坊称不朽。东边画了空西边，留与后人教敌手。
后人见者皆心惊，尽为名公不敢争。谁知未满三十载，

· 全唐诗 ·

或有异人来间生。匡山处士名称朴，头骨高奇连五岳。
曾持象简累为官，又有蛇珠常在握。昔年长老遇奇踪，
今日门师识景公。兴来便请泥高壁，乱抢笔头如疾风。
逡巡队仗何颠逸，散漫奇形皆涌出。交加器械满虚空，
两面或然如斗敌。圣王怒色览东西，剑刃一挥皆整齐。
腕头狮子咬金甲，脚底夜叉击络鞮。马头壮健多筋节，
乌髯弯环如屈铁。遍身蛇虺乱纵横，绕颌髑髅干子裂。
眉粗眼竖发如锥，怪异令人不可知。科头巨卒欲生鬼，
半面女郎安小儿。况闻此寺初兴置，地脉沈沈当正气。
如何请得二山人，下笔咸成千古事。君不见明皇天宝年，
画龙致雨非偶然。包含万象藏心里，变现百般生眼前。
后来画品列名贤，唯此二人堪比肩。人间是物皆求得，
此样欲于何处传。尝忧壁底生云雾，揭起寺门天上去。

卷 761_5 【渔父歌二首】

欧阳炯

摆脱尘机上钓船，免教荣辱有流年。无系绊，没愁煎，
须信船中有散仙。

风浩寒溪照胆明，小君山上玉蟾生。荷露坠，翠烟轻，
拨刺游鱼几处惊。

· 全唐诗 ·

卷 761_6 【大游仙诗（一作欧阳炯）】

欧阳炯

赤城霞起武陵春，桐柏先生解守真。白石桥高曾纵步，
朱阳馆静每存神。囊中隐诀多仙术，肘后方书济俗人。
自领蓬莱都水监，只忧沧海变成尘。

卷 761_7 【杨柳枝】

欧阳炯

软碧摇烟似送人，映花时把翠蛾颦。
青青自是风流主，慢飒金丝待洛神。

卷 761_8 【句】

欧阳炯

古人重到今人爱，万局都无一局同。

· 全唐诗 ·

卷 761_9 【感怀诗】

刘义度

昨日方髻髻，如今满颌髯。紫阁无心恋，青山有意潜。

卷 761_10 【同徐学士咏笋】

刘羲叟

徐徐出土非人种，枝叶难投日月壶。
为是因缘生此地，从他长养譬如无。

卷 761_11 【复留侯从效问南汉刘岩改名龔字音义】

詹敦仁

伏羲初画卦，苍氏乃制字。点画有偏旁，阴阳贵协比。
古者不嫌名，周公始称讳。始讳犹未酷，后习转多忌。
或援他代易，或变文回避。滥觞久滋蔓，伤心日益炽。
孙休命子名，吴国尊王意。单茵雨升僻，𡵓𡵓菽称异。
梁复踵已非，时亦迹旧事。𡵓杰自其一，蜀闯是其二。
鄙哉化啓名，陋矣麦龔义。大唐有天下，武后拥神器。
私制迄无取，古音实相类。历壘 罔星， 忠厓 堊。

· 全唐诗 ·

囿及罍，作史难详备。唐祚值倾危，刘龔怀僭伪。
吁嗟毒蛟辈，睥睨飞龙位。龔岩虽同音，形体殊乖致。
废学愧未弘，来问辱不弃。奇字难雄博，摛文伏韩智。
因诵鄙所闻，敢布诸下吏。

卷 761_12 【柳堤诗】

詹敦仁

种稻三十顷，种柳百余株。稻可供饘粥，柳可爨庖厨。
息耒柳阴下，读书稻田隅。以乐尧舜道，同是耕莘夫。

卷 761_13 【劝王氏入贡，宠予以官，作辞命篇】

詹敦仁

争霸图王事总非，中原失统可伤悲。往来宾主如邮传，
胜负干戈似局棋。周粟纵荣宁忍食，葛庐频顾谩劳思。
江山有待早归去，好向鹓林择一枝。

卷 761_14 【余迁泉山城，留侯招游郡圃作此】

詹敦仁

当年巧匠制茅亭，台馆翬飞匝郡城。万灶貔貅戈甲散，

· 全唐诗 ·

千家罗绮管弦鸣。柳腰舞罢香风度，花脸妆匀酒晕生。
试问亭前花与柳，几番衰谢几番荣。

卷 761_15 【留侯受南唐节度使知郡事，辟予为属，以诗谢之】

詹敦仁

晋江江畔趁春风，耕破云山几万重。
两足一犁无外事，使君何啻五侯封。

卷 761_16 【遣子访刘乙】

詹敦仁

扫石耕山旧子真，布衣草履自随身。
石崖壁立题诗处，知是当年凤阁人。

卷 761_17 【永嘉乱，衣冠南渡，流落南泉，作忆昔吟】

詹琲

忆昔永嘉际，中原板荡年。衣冠坠涂炭，輿辂染腥膻。
国势多危厄，宗人苦播迁。南来频洒泪，渴骥每思泉。

· 全唐诗 ·

卷 761_18 【癸卯闽乱，从弟监察御史敬凝迎仕别作】

詹琲

一别几经春，栖迟晋水滨。鹄鹑长在念，鸿雁忽来宾。
五斗嫌腰折，朋山刺眼新。善辞如复我，四海五湖身。

卷 761_19 【追和秦隐君辞荐之韵，上陈侯乞归凤山】

詹琲

谁言悦口是甘肥，独酌鹅儿啖翠微。蝇利薄于青纸扇，
羊裘暖甚紫罗衣。心随倦鸟甘栖宿，目送征鸿远奋飞。
击壤太平朝野客，凤山深处 生辉。

卷 761_20 【云】

幸夤

因登巨石知来处，勃勃元生绿藓痕。静即等闲藏草木，
动时顷刻遍乾坤。横天未必朋元恶，捧日还曾瑞至尊。
不独朝朝在巫峡，楚王何事谩劳魂。

· 全唐诗 ·

卷 761_21 【句】

幸夔逊

苦教作镇居中国，争得泥金在泰山。

才闻暖律先偷眼，既待和风始展眉。

蒙君知重惠琼实，薄起金刀钉玉深。

嚼处春冰敲齿冷，咽时雪液沃心寒。

深妆玉瓦平无垄，乱拂芦花细有声。

日回禽影穿疏木，风递猿声入小楼。

卷 761_22 【诗】

丁元和

九重天子人中贵，五等诸侯阃外尊。

争似布衣云水客，不将名字挂乾坤。

· 全唐诗 ·

卷 761_23 【咏蜀都城上芙蓉花】

张立

四十里城花发时，锦囊高下照坤维。
虽妆蜀国三秋色，难入豳风七月诗。

卷 761_24 【又咏】

张立

去年今日到城都，城上芙蓉锦绣舒。
今日重来旧游处，此花憔悴不如初。

卷 761_25 【句】

张立

朝廷不用忧巴蜀，称霸何曾是蜀人。

· 全唐诗 ·

第七百六十二卷

卷 762_1 【括苍山】

刘昭禹

尽日行方半，诸山直下看。白云随步起，危径极天盘。
瀑顶桥形小，溪边店影寒。往来空太息，玄鬓改非难。

卷 762_2 【忆天台山】

刘昭禹

常记游灵境，道人情不低。岩房容偃息，天路许相携。
霞散曙峰外，虹生凉瀑西。何当尘役了，重去听猿啼。

卷 762_3 【冬日暮国清寺留题】

刘昭禹

天台山下寺，冬暮景如屏。树密风长在，年深像有灵。

· 全唐诗 ·

高钟疑到月，远烧欲连星。因共真僧话，心中万虑宁。

卷 762_4 【灵溪观】

刘昭禹

鳌海西边地，宵吟景象宽。云开孤月上，瀑喷一山寒。
人异发常绿，草灵秋不干。无由此栖息，魂梦在长安。

卷 762_5 【怀华山隐者】

刘昭禹

先生入太华，杳杳绝良音。秋梦有时见，孤云无处寻。
神清峰顶立，衣冷瀑边吟。应笑干名者，六街尘土深。

卷 762_6 【赠惠律大师】

刘昭禹

秋是忆山日，禅窗露洒余。几悬华顶梦，应寄沃洲书。
风月资吟笔，杉篁笼静居。满城谁不重，见著紫衣初。

· 全唐诗 ·

卷 762_7 【经费冠卿旧隐】

刘昭禹

节高终不起，死恋九华山。圣主情何切，孤云性本闲。
名传中国外，坟在乱松间。依约曾栖处，斜阳鸟自还。

卷 762_8 【闻蝉】

刘昭禹

一雨一番晴，山林冷落青。莫侵残日噪，正在异乡听。
孤馆宿漳浦，扁舟离洞庭。年年当此际，那免鬓凋零。

卷 762_9 【送休公归衡】

刘昭禹

草履初登南岳船，铜瓶犹贮北山泉。
衡阳旧寺春归晚，门锁寒潭几树蝉。

· 全唐诗 ·

卷 762_10 【句】

刘昭禹

句向夜深得，心从天外归。

危楼聊侧耳，高柳又鸣蝉。

藓色围波井，花阴上竹楼。

对面雷瞋树，当街雨趁人。

春光怀玉阙，万里起初程。

江上呼风去，天边挂席飞。

漆灯寻黑洞，之字上危峰。

卷 762_11 【铜柱辞】

李宏皋

招灵铸柱垂英烈，手执干戈征百越。诞今铸柱庇黔黎，
指画风雷开五溪。五溪之险不足恃，我旅争登若平地。
五溪之众不足平，我师轻蹶如春冰。溪人畏威思纳质，

· 全唐诗 ·

弃污归明求立誓。誓山川兮告鬼神，保子孙兮千万春。

卷 762_12 【题桃源】

李宏皋

山翠参差水渺茫，秦人昔在楚封疆。当时避世乾坤窄，
此地安家日月长。草色几经坛杏老。岩花犹带涧桃香。
他年倘遂平生志，来著霞衣侍玉皇。

卷 762_13 【李皋试诗】

何仲举

似玉来投狱，抛家去就枷。可怜两片木，夹却一枝花。

卷 762_14 【句】

何仲举

碧云章句才离手，紫府神仙尽点头。

树迎高鸟归深野，云傍斜阳过远山。

· 全唐诗 ·

卷 762_15 【耕夫谣】

徐仲雅

张绪逞风流，王衍事轻薄。出门逢耕夫，颜色必不乐。
肥肤如玉洁，力拗丝不折。半日无耕夫，此辈总饿杀。

卷 762_16 【赠齐己】

徐仲雅

我唐有僧号齐己，未出家时宰相器。爰见梦中逢五丁，
毁形自学无生理。骨瘦神清风一襟，松老霜天鹤病深。
一言悟得生死海，芙蓉吐出琉璃心。闷见有唐风雅缺，
敲破冰天飞白雪。清塞清江却有灵，遗魂泣对荒郊月。
格何古，天工未生谁知主。混沌凿开鸡子黄，
散作纯风如胆苦。意何新，织女星机挑白云。
真宰夜来调暖律，声声吹出嫩青春。调何雅，
涧底孤松秋雨洒。嫦娥月里学步虚，桂风吹落玉山下。
语何奇，血泼乾坤龙战时。祖龙跨海日方出，
一鞭风雨万山飞。己公己公道如此，浩浩寰中如独自。
一簟松风冷如冰，长伴巢由伸脚睡。

· 全唐诗 ·

卷 762_17 【赠江处士】

徐仲雅

门在松阴里，山僧几度过。药灵丸不大，棋妙子无多。
薄雾笼寒径，残风恋绿萝。金乌兼玉兔，年几奈公何。

卷 762_18 【东华观偃松】

徐仲雅

半已化为石，有灵通碧湘。生逢尧雨露，老直汉风霜。
月滴蟾心水，龙遗脑骨香。始于毫末后，曾见几兴亡。

卷 762_19 【咏棕树】

徐仲雅

叶似新蒲绿，身如乱锦缠。任君千度剥，意气自冲天。

卷 762_20 【宫词】

徐仲雅

内人晓起怯春寒，轻揭珠帘看牡丹。

· 全唐诗 ·

一把柳丝收不得，和风搭在玉栏杆。

卷 762_21 【句】

徐仲雅

屋面尽生人耳朵，篱头多是老翁须。

平分造化双苞去，拆破春风两面开。

云路半开千里月，洞门斜掩一天春。

凿开青帝春风国，移下姮娥夜月楼。

珠玑影冷偏粘草，兰麝香浓却损花。

山色晓堆罗黛雨，草梢春戛麝香风。

衰兰寂寞含愁绿，小杏妖娆弄色红。

旁搜水脉湘心满，遍揭泉根梵底通。

水滴残青瘦，石脂倾尽白云空。

深浦送回芳草日，急滩牵断绿杨风。

藕梢逆入银塘里，蘋迹潜来玉井中。

· 全唐诗 ·

败菊篱疏临野渡，落梅村冷隔江枫。

剪开净涧分苗稼，划破涟漪下钓筒。

卷 762_22 【分水岭】

伍彬

前贤功及物，禹后杳难俦。不改古今色，平分南北流。

寒冲山影岸，清绕荻花洲。尽是朝宗去，潺潺早晚休。

卷 762_23 【句】

伍彬

稚子出看莎径没，渔翁来报竹桥流。

踪迹未辞鸳鹭客，梦魂先到鹧鸪村。

卷 762_24 【留宿廖融山斋】

杨徽之

清和春尚在，欢醉日何长。谷鸟随柯转，庭花夺酒香。

· 全唐诗 ·

初晴岩翠滴，向晚树阴凉。别有堪吟处，相留宿草堂。

卷 762_25 【句】

杨徽之

新霜染枫叶，皎月借芦花。

废宅寒塘水，荒坟宿草烟。

卷 762_26 【登祝融峰】

王元

草叠到孤顶，身齐高鸟翔。势疑撞翼轸，翠欲滴潇湘。
云湿幽崖滑，风梳古木香。晴空聊纵目，杳杳极穷荒。

卷 762_27 【怀翁宏】

王元

独夜思君切，无人知此情。沧州归未得，华发别来生。
孤馆木初落，高空月正明。远书多隔岁，独念没前程。

· 全唐诗 ·

卷 762_28 【听琴】

王元

拂尘开素匣，有客独伤时。古调俗不乐，正声君自知。
寒泉出涧涩，老桧倚风悲。纵有来听者，谁堪继子期。

卷 762_29 【哭李韶】

王元

韶也命何奇，生前与世违。贫栖古梵刹，终著旧麻衣。
雅句僧抄遍，孤坟客吊稀。故园今孰在，应见梦中归。

卷 762_30 【题邓真人遗址】

王元

三千功满仙升去，留得山前旧隐基。但见白云长掩映，
不知浮世几兴衰。松稍风触霓旌动，棕叶霜沾鹤翅垂。
近代无人寻异事，野泉喷月泻秋池。

· 全唐诗 ·

卷 762_31 【句】

王元

伴行惟瘦鹤，寻步入深云。

卷 762_32 【谢翁宏以诗百篇见示】

廖融

高奇一百篇，造化见工全。积思游沧海，冥搜入洞天。
神珠迷罔象，端玉匪雕镌。休叹不得力，离骚千古传。

卷 762_33 【赠天台逸人】

廖融

移桧托禅子，携家上赤城。拂琴天籁寂，奇枕海涛生。
云白寒峰晚，鸟歌春谷晴。又闻求桂楫，载月十洲行。

卷 762_34 【古桧】

廖融

何人见植初，老树梵王居。山鬼暗栖托，樵夫难破除。

· 全唐诗 ·

声高秋汉迥，影倒月潭虚。尽日无僧倚，清风长有余。

卷 762_35 【题伍彬屋壁】

廖融

圆塘绿水平，鱼跃紫莼生。要路贫无力，深村老退耕。
犊随原草远，蛙傍堑篱鸣。拨棹茶川去，初逢谷雨晴。

卷 762_36 【梦仙谣】

廖融

琪木扶疏系辟邪，麻姑夜宴紫皇家。银河旌节摇波影，
珠阁笙箫吸月华。翠凤引游三岛路，赤龙齐驾五云车。
星稀犹倚虹桥立，拟就张骞搭汉槎。

卷 762_37 【退宫妓】

廖融

神仙风格本难俦，曾从前皇翠辇游。红踑躅繁金殿暖，
碧芙蓉笑水宫秋。宝箏钿剥阴尘覆，锦帐香消画烛幽。
一旦色衰归故里，月明犹梦按梁州。

· 全唐诗 ·

卷 762_38 【句】

廖融

圭灶先知晓，盆池别见天，
古寺寻僧饭，寒岩衣鹿裘。
云穿捣药屋，雪压钓鱼舟。

卷 762_39 【赠廖融】

王正己

病起正当秋阁迥，酒醒迎对夜涛寒。
炉中药熟分僧饭，枕上琴闲借客弹。

卷 762_40 【句】

王正己

洗盂秋涧日华动，捣药夜坐秋气深。

· 全唐诗 ·

卷 762_41 【送廖融处士南游】

翁宏

病卧瘴云间，莓苔渍竹关。孤吟牛渚月，老忆洞庭山。
壮志潜消尽，淳风竟未还。今朝忽相遇，执手一开颜。

卷 762_42 【春残】

翁宏

又是春残也，如何出翠帏。落花人独立，微雨燕双飞。
寓目魂将断，经年梦亦非。那堪向愁夕，萧飒暮蝉辉。

卷 762_43 【秋残】

翁宏

又是秋残也，无聊意若何。客程江外远，归思夜深多。
岘首飞黄叶，湘湄走白波。仍闻汉都护，今岁合休戈。

· 全唐诗 ·

卷 762_44 【句】

翁宏

万木横秋里，孤舟半夜猿。

漏光残井甃，缺影背山椒。

风回山火断，潮落岸冰高。

卷 762_45 【过衡山赠廖处士】

张观

未向漆园为傲吏，定应明代作征君。传家奕世无金玉，
乐道经年有典坟。带雨小舟横别涧，隔花幽犬吠深云。
到头终为苍生起，休恋耕烟楚水滨。

卷 762_46 【竹枝词二首】

孙光宪

门前春水白蘋花，岸上无人小艇斜。
商女经过江欲暮，散抛残食饲神鸦。

· 全唐诗 ·

乱绳千结绊人深，越罗万丈表长寻。
杨柳在身垂意绪，藕花落尽见莲心。

卷 762_47 【杨柳枝词四首】

孙光宪

阖门风暖落花干，飞遍江城雪不寒。
独有晚来临水驿，闲人多凭赤栏干。

有池有榭即濛濛，浸润翻成长养功。
恰似有人长点检，著行排立向春风。

根柢虽然傍浊河，无妨终日近笙歌。
毵毵金带谁堪比，还共黄莺不较多。

万株枯槁怨亡隋，似吊吴台各自垂。
好是淮阴明月里，酒楼横笛不胜吹。

卷 762_48 【采莲】

孙光宪

菡萏香连十顷陂，小姑贪戏采莲迟。
晚来弄水船头湿，更脱红裙裹鸭儿。

· 全唐诗 ·

卷 762_49 【八拍蛮】

孙光宪

孔雀尾拖金线长，怕人飞起入丁香。
越女沙头争拾翠，相呼归去背斜阳。

卷 762_50 【句】

孙光宪

晓厨烹淡菜，春杼种橦花。

卷 762_51 【咏蒲鞋】

刘章

吴江浪漫白蒲春，越女初挑一样新。才自绣窗离玉指，
便随罗袜上香尘。石榴裙下从容久，玳瑁筵前整顿频。
今日高楼鸳瓦上，不知抛掷是何人。

· 全唐诗 ·

卷 762_52 【夜坐】

路洵美

帘卷竹轩清，四邻无语声。漏从吟里转，月自坐来明。
草木露华湿，衣裳寒气生。难逢知鉴者，空悦此时情。

卷 762_53 【荆台道院】

梁震

桑田一变赋归来，爵禄焉能浼我哉。
黄犊依然花竹外，清风万古凛荆台。

· 全唐诗 ·

第七百六十三卷

卷 763_1 【宁州道中】

杨夔

城枕萧关路，胡兵日夕临。唯凭一炬火，以慰万人心。
春老雪犹重，沙寒草不深。如何驱匹马，向此独闲吟。

卷 763_2 【寻九华王山人】

杨夔

下马扣荆扉，相寻春半时。扪萝盘磴险，叠石渡溪危。
松夹莓苔径，花藏薜荔篱。卧云情自逸，名姓厌人知。

卷 763_3 【金陵逢张乔】

杨夔

殊乡会面时，辛苦两情知。有志年空过，无媒命共奇。

· 全唐诗 ·

吟余春漏急，语旧酒巡迟。天爵如堪倚，休惊鬓上丝。

卷 763_4 【送邹尊师归洞庭】

杨夔

众岛在波心，曾居旧隐林。近闻飞檄急，转忆卧云深。
卖药唯供酒，归舟只载琴。遥知明月夜，坐石自开襟。

卷 763_5 【送日东僧游天台】

杨夔

一瓶离日外，行指赤城中。去自重云下，来从积水东。
攀萝躋石径，挂锡憩松风。回首鸡林道，唯应梦想通。

卷 763_6 【题甘露寺】

杨夔

高殿拂云霓，登临想虎溪。风匀帆影众，烟乱鸟行迷。
北倚波涛阔，南窥井邑低。满城尘漠漠，隔岸草萋萋。
虚阁延秋霁，澄江响暮鼙。客心还惜去，新月挂楼西。

· 全唐诗 ·

卷 763_7 【送张相公出征】

杨夔

得意在当年，登坛秉国权。汉推周勃重，晋让赵宣贤。
儒德尼丘降，兵铃太白传。援毫飞凤藻，发匣吼龙泉。
历火金难耗，零霜桂益坚。从来称玉洁，此更让朱妍。
鸳鹭臻门下，貔貅拥帐前。去知清朔漠，行不费陶甄。
献画符中旨，推诚契上玄。愿将班固笔，书颂勒燕然。

卷 763_8 【题郑山人郊居】

杨夔

谷口今逢避世才，入门潇洒绝尘埃。渔舟下钓乘风去，
药酝留宾待月开。数片石从青嶂得，一条泉自白云来。
竹轩相对无言语，尽日南山不欲回。

卷 763_9 【题宣州延庆寺益公院（咸通中入讲极承恩泽）】

杨夔

嘿坐能除万种情，腊高兼有赐衣荣。讲经旧说倾朝听，
登殿曾闻降辇迎。幽径北连千嶂碧，虚窗东望一川平。

· 全唐诗 ·

长年门外无尘客，时见元戎驻旆旌。

卷 763_10 【寄当阳袁皓明府】

杨夔

高人为县在南京，竹绕琴堂水绕城。地古既资携酒兴，
务闲偏长看山情。松轩待月僧同坐，药圃寻花鹤伴行。
百里甚堪留惠爱，莫教空说鲁恭名。

卷 763_11 【送杜郎中入茶山修贡】

杨夔

一道澄澜彻底清，仙郎轻棹出重城。采蘋虚得当时称，
述职那同此日荣。剑戟步经高障黑，绮罗光动百花明。
谢公携妓东山去，何似乘春奉诏行。

卷 763_12 【送郑谷】

杨夔

春江潏潏清且急，春雨濛濛密复疏。
一曲狂歌两行泪，送君兼寄故乡书。

· 全唐诗 ·

卷 763_13 【自叙】

杜建徽

中剑斫耳缺，被箭射胛过。为将须有胆，有胆即无贾。

卷 763_14 【游西湖】

沈韬文

，菰米蘋花似故乡。
不是不归归未得，好风明月一思量。

卷 763_15 【赠和龙妙空禅师】

王继勋

白面山南灵庆院，茅斋道者雪峰禅。只栖云树两三亩，
不下烟萝四五年。猿鸟认声呼唤易，龙神降伏住持坚。
谁知今日秋江畔，独步医王阐法筵。

· 全唐诗 ·

卷 763_16 【题建造寺】

刘乙

曾看画图劳健美，如今亲见画犹粗。减除天半石初泐，
欠却几株松未枯。题像阁人渔浦叟，集生台鸟谢城乌。
我来一听支公论，自是吾身幻得吾。

卷 763_17 【句】

刘乙

扫石云随帚，耕山鸟傍人。

卷 763_18 【和赠和龙妙空禅师】

夏鸿

翰林遗迹镜潭前，孤峭高僧此处禅。出为信门兴化日，
坐当吾国太平年。身同莹澈尼珠净，语并锋铓慧剑坚。
道果已圆名已遂，即看千匝绕香筵。

· 全唐诗 ·

卷 763_19 【题青草湖神祠】

刘山甫

坏墙风雨几经春，草色盈庭一座尘。
自是神明无感应，盛衰何得却由人。

卷 763_20 【汉宗庙乐舞辞】

张昭

高庙明灵再启图，金根玉辂幸神都。巢阿丹凤衔书命，
入昴飞星献宝符。正抚薰弦娱赤子，忽登仙驾泣苍梧。
荐樱鹤馆笳箫咽，酌鬯金楹剑珮趋。星俎云螭兼鲁礼，
朱干象箭杂巴渝。氤氲龙麝交青琐，仿佛锡銮下蕊珠。
荐豆奉觞亲玉几，配天合祖耀璿枢。受釐饮酒皇欢洽，
仰俟余灵泰九区。

卷 763_21 【农家】

颜仁郁

夜半呼儿趁晓耕，羸牛无力渐艰行。
时人不识农家苦，将谓田中谷自生。

· 全唐诗 ·

卷 763_22 【山居】

颜仁郁

柏树松阴覆竹斋，罢烧药灶纵高怀。
世间应少山间景，云绕青松水绕阶。

卷 763_23 【春日寓感】

王延彬

两衙前后讼堂清，软锦披袍拥鼻行。雨后绿苔侵履迹，
春深红杏锁莺声。因携久酝松醪酒，自煮新抽竹笋羹。
也解为诗也为政，侬家何似谢宣城。

卷 763_24 【哭徐夔】

王延彬

延寿溪头叹逝波，古今人事半销磨。
昔除正字今何在，所谓人生能几何。

· 全唐诗 ·

第七百六十四卷

卷 764_1 【塞上】

谭用之

秋风汉北雁飞天，单骑那堪绕贺兰。
碛暗更无岩树影，地平时有野烧瘢。
貂披寒色和衣冷，剑佩胡霜隔匣寒。
早晚横戈似飞尉，拥旄深入异田单。

钵略城边日欲西，游人却忆旧山归。
牛羊集水烟黏步，雕鹗盘空雪满围。
猎骑静逢边气薄，戍楼寒对暮烟微。
横行总是男儿事，早晚重来似汉飞。

卷 764_2 【赠索处士】

谭用之

不将桂子种诸天，长得寻君水石边。
玄豹夜寒和雾隐，骊龙春暖抱珠眠。
山中宰相陶弘景，洞里真人葛稚川。
一度相思一惆怅，水寒烟澹落花前。

· 全唐诗 ·

卷 764_3 【别雒下一二知己】

谭用之

金鼎光辉照雪袍，雒阳春梦忆波涛。尘埃满眼人情异，
风雨前程马足劳。接塞峨眉通蜀险，过山仙掌倚秦高。
别来无限幽求子，应笑区区味六韬。

卷 764_4 【约张处士游梁】

谭用之

莫学区区老一经，夷门关吏旧书生。晋朝灭后无中散，
韩国亡来绝上卿。龙变洞中千谷冷，剑横天外八风清。
好携长策干时去，免逐渔樵度太平。

卷 764_5 【送友人归青社】

谭用之

雕鹗途程在碧天，彩衣东去复何言。二千宾客旧知己，
十二山河新故园。吟看桂生溪月上，醉听鲲化海涛翻。
好期圣代重相见，莫学袁生老竹轩。

· 全唐诗 ·

卷 764_6 【送丁道士归南中】

谭用之

孤云无定鹤辞巢，自负焦桐不说劳。服药几年期碧落，
验符何处咒丹毫。子陵山晓红云密，青草湖平雪浪高。
从此人稀见踪迹，还应选地种仙桃。

卷 764_7 【月夜怀寄友人】

谭用之

剑气徒劳望斗牛，故人别后阻仙舟。残春谩道深倾酒，
好月那堪独上楼。何处是非随马足，由来得丧白人头。
清风未许重携手，几度高吟寄水流。

卷 764_8 【闲居寄陈山人】

谭用之

闲居何处得闲名，坐掩衡茅损性灵。破梦晓钟闻竹寺，
沁心秋雨浸莎庭。瓮边难负千杯绿，海上终眠万仞青。
珍重先生全太古，应看名利似浮萍。

· 全唐诗 ·

卷 764_9 【忆南中】

谭用之

碧江头与白云门，别后秋霜点鬓根。长记学禅青石寺，
最思共醉落花村。林间竹有湘妃泪，窗外禽多杜宇魂。
未棹扁舟重回首，采薇收橘不堪论。

卷 764_10 【寄友人】

谭用之

病多慵引架书看，官职无才思已阑。穴凤瑞时来却易，
人龙别后见何难。琴樽风月闲生计，金玉松筠旧岁寒。
早晚烟村碧江畔，挂罾重对蓼花滩。

卷 764_11 【别江上一二友生】

谭用之

国风千载务重华，须逐浮云背若耶。无地可归堪种玉，
有天教上且乘槎。白纶巾卸苏门月，红锦衣裁御苑花。
他日成都却回首，东山看取谢鲲家。

· 全唐诗 ·

卷 764_12 【寄岐山林逢吉明府】

谭用之

岐山高与陇山连，制锦无私服晏眠。鸂鶒语中分百里，
凤凰声里过三年。秦无旧俗云烟媚，周有遗风父老贤。
莫役生灵种杨柳，一枝枝折灞桥边。

卷 764_13 【感怀呈所知】

谭用之

十年流落赋归鸿，谁傍昏衢驾烛龙。竹屋乱烟思梓泽，
酒家疏雨梦临邛。千年别恨调琴懒，一片年光览镜慵。
早晚休歌白石烂，放教归去卧群峰。

卷 764_14 【江上闻笛】

谭用之

谁为梅花怨未平，一声高唤百龙惊。风当阊阖庭初静，
月在姑苏秋正明。曲尽绿杨涵野渡，管吹青玉动江城。
临流不欲殷勤听，芳草王孙旧有情。

· 全唐诗 ·

卷 764_15 【寄孟进士】

谭用之

依旧池边草色芳，故人何处忆山阳。书回科斗江帆暮，
曲罢鸾虞海树苍。吟望晓烟思桂渚，醉依残月梦余杭。
别来南国知谁在，空对檐榆一断肠。

卷 764_16 【寄阎记室】

谭用之

织锦歌成下翠微，岂劳西去问支机。未开水府珠先见，
不掘丰城剑自辉。鳌逐玉蟾攀桂上，马随青帝踏花归。
相逢半是云霄客，应笑歌牛一布衣。

卷 764_17 【幽居寄李秘书】

谭用之

几年帝里阻烟波，敢向明时叩角歌。看尽好花春卧稳，
醉残红日夜吟多。印开夕照垂杨柳，画破寒潭老芰荷。
昨夜前溪有龙斗，石桥风雨少人过。

· 全唐诗 ·

卷 764_18 【贻钓鱼李处士】

谭用之

罢吟鹦鹉草芊芊，又泛鸳鸯水上天。一棹冷涵杨柳雨，
片帆香挂芰荷烟。绿摇江澹萍离岸，红点云疏橘满川。
何处邈将归画府，数茎红蓼一渔船。

卷 764_19 【河桥楼赋得群公夜宴】

谭用之

芙蓉帘幕扇秋红，蛮府新郎夜宴同。满座马融吹笛月，
一楼张翰过江风。杯黏紫酒金螺重，谈转凋珰玉麈空。
深荷良宵慰憔悴，德星池馆在江东。

卷 764_20 【寄左先辈】

谭用之

狂歌白鹿上青天，何似兰塘钓紫烟。万卷祖龙坑外物，
一泓孙楚耳中泉。翩翩蛮榼薰晴浦，轂轳鱼车响夜船。
学取青莲李居士，一生杯酒在神仙。

· 全唐诗 ·

卷 764_21 【贻费道人】

谭用之

谁如南浦傲烟霞，白葛衣轻称帽纱。碧玉蜉蝣迎客酒，
黄金穀轳钓鱼车。吟歌云鸟归樵谷，卧爱神仙入画家。
他日凤书何处觅，武陵烟树半桃花。

卷 764_22 【寄许下前管记王侍御】

谭用之

昔年南去得娱宾，顿逊杯前共好春。蚁泛羽觞蛮酒腻，
凤衔瑶句蜀笺新。花怜游骑红随辔，草恋征车碧绕轮。
别后青青郑南陌，不知风月属何人。

卷 764_23 【秋日圃田送人随计】

谭用之

仆射陂前是传邮，去程雕鹗弄高秋。吟抛芍药裁诗圃，
醉下茱萸饮酒楼。向日迴飞驹皎皎，临风谁和鹿呦呦。
明年二月仙山下，莫遣桃花逐水流。

· 全唐诗 ·

卷 764_24 【途次宿友人别墅】

谭用之

千里崤函一梦劳，岂知云馆共萧骚。半帘绿透偎寒竹，
一榻红侵坠晚桃。蛮酒客稀知味长，蜀琴风定觉弦高。
感君岩下闲招隐，细缕金盘脍错刀。

卷 764_25 【春日期巢湖旧事】

谭用之

暖掠红香燕燕飞，五云仙珮晓相携。花开鹦鹉韦郎曲，
竹亚虬龙白帝溪。富贵万场归紫酒，是非千载逐芳泥。
不知多少开元事，露泣春丛向日低。

卷 764_26 【再游韦曲山寺】

谭用之

鹄岩烟断玉巢空，罨画春塘太白低。马踏翠开垂柳寺，
人耕红破落花蹊。千年胜概咸原上，几代荒凉绣岭西。
碧吐红芳旧行处，岂堪回首草萋萋。

· 全唐诗 ·

卷 764_27 【寄徐拾遗】

谭用之

长竿一系白龙吟，谁和骅骝发素琴。野客碧云魂易断，
故人芳草梦难寻。天从补后星辰稳，海自潮来岛屿深。
好向明庭拾遗事，莫教玄豹老泉林。

卷 764_28 【秋宿湘江遇雨】

谭用之

江上阴云锁梦魂，江边深夜舞刘琨。秋风万里芙蓉国，
暮雨千家薜荔村。乡思不堪悲橘柚，旅游谁肯重王孙。
渔人相见不相问，长笛一声归岛门。

卷 764_29 【贻南康陈处士陶】

谭用之

白玉堆边蒋径横，空涵二十四滩声。老无征战轩辕国，
贫有茅茨帝舜城。丹凤昼飞群木冷，一龙秋卧九江清。
时人莫笑非经济，还待中原致太平。

· 全唐诗 ·

卷 764_30 【渭城春晚】

谭用之

秦树朦胧春色微，香风烟暖树依依。边城夜静月初上，
芳草路长人未归。折柳且堪吟晚槛，弄花何处醉残晖。
钓乡千里断消息，满目碧云空自飞。

卷 764_31 【山中春晚寄贾员外】

谭用之

不随黄鹤起烟波，应笑无成返薜萝。看尽好花春卧稳，
醉残红日夜吟多。高添雅兴松千尺，暗养清音竹数科。
珍重仙曹旧知己，往来星骑一相过。

卷 764_32 【贻净居寺新及第】

谭用之

秋池云下白莲香，池上吟仙寄竹房。闲颂国风文字古，
静消心火梦魂凉。三春蓬岛花无限，八月银河路更长。
此境空门不曾有，从头好语与医王。

· 全唐诗 ·

卷 764_33 【江边秋夕】

谭用之

千钟紫酒荐菖蒲，松岛兰舟潋滟居。曲内橘香江客笛，
字中岚气岳僧书。吟期汗漫驱金虎，坐约丹青跨玉鱼。
七色花虬一声鹤，几时乘兴上清虚。

卷 764_34 【送僧中孚南归】

谭用之

琵琶峡口月溪边，玉乳头陀忆旧川。一锡冷涵兰径路，
片帆香挂橘洲烟。苔封石锦栖霞室，水迸衣珠喷玉蝉。
莫道翩翩去如梦，本来吟鸟在林泉。

卷 764_35 【江馆秋夕】

谭用之

耿耿银河雁半横，梦欹金碧辘轳轻。满窗谢练江风白，
一枕齐纨海月明。杨柳败梢飞叶响，芰荷香柄折秋鸣。
谁人更唱阳关曲，牢落烟霞梦不成。

· 全唐诗 ·

卷 764_36 【秋夜同友人话旧】

谭用之

露下银河雁度频，囊中垆火几时真。数茎白发生浮世，
一盏寒灯共故人。云外簟凉吟峤月，岛边花暖钓江春。
何当归去重携手，依旧红霞作近邻。

卷 764_37 【古剑】

谭用之

铸时天匠待英豪，紫焰寒星匣倍牢。三尺何年拂尘土，
四溟今日绝波涛。雄应垓下收蛇阵，滞想溪头伴豹韬。
惜是真龙懒抛掷，夜来冲斗气何高。

卷 764_38 【寄王侍御】

谭用之

鸟尽弓藏良可哀，谁知归钓子陵台。炼多不信黄金耗，
吟苦须惊白发催。喘月吴牛知夜至，嘶风胡马识秋来。
燕歌别后休惆怅，黍已成畦菊已开。

· 全唐诗 ·

卷 764_39 【别何处士陵俊老】

谭用之

三皇上人春梦醒，东侯老大麒麟生。洞连龙穴全山冷，
窗透鳌波尽室清。计拙耻居岩麓老，气狂惭与斗牛平。
谁人为向青编上，直傍巢由写一名。

卷 764_40 【句】

谭用之

流水物情谙世态，落花春梦厌尘劳。

织槛锦纹苔乍结，堕书花印菊初残。

光阴老去无成事，富贵不来争奈何。

眠云无限好知己，应笑不归花满樽。

· 全唐诗 ·

第七百六十五卷

卷 765_1 【泊姑熟口】

王周

杳杳金陵路，难禁欲断魂。雨晴山有态，风晚水无痕。
远色千樯岸，愁声一笛村。如何遣怀抱，诗毕自开尊。

卷 765_2 【湖口县】

王周

柴桑分邑载图经，屈曲山光展画屏。
最是芦洲东北望，人家残照隔烟汀。

卷 765_3 【岳州众湖阻风二首】

王周

众湖湖口系兰船，睡起中餐又却眠。

· 全唐诗 ·

风伯如何解回怒，数宵檣倚碧芦烟。

偶系扁舟枕绿莎，旋移深处避惊波。
晓来闲共渔人话，此去巴陵路几多？

卷 765_4 【问春】

王周

游丝垂幄雨依依，枝上红香片片飞。
把酒问春因底意，为谁来后为谁归。

卷 765_5 【春答】

王周

花枝千万趁春开，三月瓓珊即自回。
剩向东园种桃李，明年依旧为君来。

卷 765_6 【西塞山二首（今谓之道士矶，即兴国军大冶县所隶也）】

王周

西塞名山立翠屏，浓岚横入半江青。

· 全唐诗 ·

千寻铁锁无由问，石壁空存道者形。

匹妇顽然莫问因，匹夫何去望千春。
翻思蛄蛄传诗什，举世曾无化石人。

卷 765_7 【使风】

王周

风起即千里，风回翻问津。沈思宦游者，何啻使风人。

卷 765_8 【石首山】

王周

首出崔嵬占上游，迥存浓翠向荆州。
空闻别有回山力，却见长江曲尺流。

卷 765_9 【金口步（在江北汉阳军，下必铁也）】

王周

两山斗咽喉，群石矗牙齿。行客无限愁，横吞一江水。

· 全唐诗 ·

卷 765_10 【采桑女二首】

王周

渡水采桑归，蚕老催上机。扎扎得盈尺，轻素何人衣。

采桑知蚕饥，投梭惜夜迟。谁夸罗绮丛，新画学月眉。

卷 765_11 【渡溪】

王周

渡溪溪水急，水溅罗衣湿。日暮犹未归，盈盈水边立。

卷 765_12 【落叶】

王周

素律铄欲脆，青女妒复稀。月冷天风吹，叶叶干红飞。

卷 765_13 【宿疏陂驿】

王周

秋染棠梨叶半红，荆州东望草平空。

· 全唐诗 ·

谁知孤宦天涯意，微雨萧萧古驿中。

卷 765_14 【再经秭归二首】

王周

总角曾随上峡船，寻思如梦可凄然。
夜来孤馆重来宿，枕底滩声似旧年。

秭归城邑昔曾过，旧识无人奈老何。
独有凄清难改处，月明闻唱竹枝歌。

卷 765_15 【霞】

王周

拂拂生残晖，层层如裂帛。天风剪成片，疑作仙人衣。

卷 765_16 【巫山公署壁有无名氏戏书二韵（施州路一百八盘）】

王周

南陵直上路盘盘，平地凌云势万端。
堪笑巴民不厌足，更嫌山少画山看。

· 全唐诗 ·

卷 765_17 【道院】

王周

白日人稀到，帘垂道院深。雨苔生古壁，雪雀聚寒林。
忘虑凭三乐，消闲信五禽。谁知是官府，烟缕满炉沈。

卷 765_18 【会吟岑山人（戊寅仲冬六日）】

王周

渝州江上忽相逢，说隐西山最上峰。
略坐移时又分别，片云孤鹤一枝筇。

卷 765_19 【巴江】

王周

巴江江水色，一带浓蓝碧。仙女瑟瑟衣，风梭晚来织。

卷 765_20 【小园桃李始花，偶以成咏】

王周

桃李栽成艳格新，数枝留得小园春。

· 全唐诗 ·

半红半白无风雨，随分天容解笑人。

卷 765_21 【公居】

王周

公居门馆静，旅寄万州城。山共秋烟紫，霜并夜月清。
无愁干酒律，有句入诗评。何必须林下，方驰吏隐名。

卷 765_22 【富池口】

王周

扁舟闲引望，望极更盘桓。山密碍江曲，雨多饶地寒。
短莎烟冉冉，惊浪雪漫漫。难写愁何限，乡关在一端。

卷 765_23 【夔州病中】

王周

隐几经旬疾未痊，孤灯孤驿若为眠。
郡楼昨夜西风急，一一更筹到枕前。

· 全唐诗 ·

卷 765_24 【题厅壁】

王周

永日无他念，孤清吏隐心。竹声并雪碎，溪色共烟深。
数息闲凭几，缘情默寄琴。谁知同寂寞，相与结知音。

卷 765_25 【过武宁县（九月十九日）】

王周

行过武宁县，初晴物景和。岸回惊水急，山浅见天多。
细草浓蓝泼，轻烟匹练拖。晚来何处宿，一笛起渔歌。

卷 765_26 【路次覆盆驿】

王周

曾上青泥蜀道难，架空成路入云寒。
如何却向巴东去，三十六盘天外盘。

· 全唐诗 ·

卷 765_27 【藕池阻风，寄同行抚牧裘驾】

王周

船檣相望荆江中，岸芦汀树烟濛濛。
路间堤缺水如箭，未知何日生南风。

卷 765_28 【无题二首】

王周

冰雪肌肤力不胜，落花飞絮绕风亭。
不知何事秋千下，蹙破愁眉两点青。

梨花如雪已相迷，更被惊乌半夜啼。
帘卷玉楼人寂寂，一钩新月未沈西。

卷 765_29 【泊巴东】

王周

偶泊巴东古县前，宦情乡思两绵绵。
不堪蜡炬烧残泪，雨打船窗半夜天。

· 全唐诗 ·

卷 765_30 【道中未开木杏花】

王周

粉英香萼一般般，无限行人立马看。
村女浴蚕桑柘绿，枉将颜色忍春寒。

卷 765_31 【西山晚景】

王周

公局长清淡，池亭晚景中。蔗竿闲倚碧，莲朵静淹红。
半引弯弯月，微生飏飏风。无思复无虑，此味几人同。

卷 765_32 【自和】

王周

一片残阳景，朦胧淡月中。兰芽纤嫩紫，梨颊抹生红。
琴阮资清格，冠簪养素风。烟霄半知足，吏隐少相同。

· 全唐诗 ·

卷 765_33 【齿落词】

王周

己卯至庚辰，仲夏晦之暮。吾齿右排上，一齿脱而去。
呼吸缺吾防，咀嚼欠吾助。年龠惜不返，日驭走为蠹。
唇亡得无寒，舌在从何诉。辅车宜长依，发肤可增惧。
不须考前古，聊且为近喻。有如云中雨，雨散绝回顾。
有如枝上叶，叶脱难再附。白发非独愁，红颜岂私驻。
何必郁九回，何必牵百虑。开尊复开怀，引笔作长句。

卷 765_34 【淘金碛】

王周

画船晚过淘金碛，不见黄金惟见石。
犹恐黄金价未高，见得锱铢几多力。

卷 765_35 【施南路偶书】

王周

大石岭头梅欲发，南陵陂上雪初飞。
苦无酒解愁成阵，又附兰桡向秣归。

· 全唐诗 ·

卷 765_36 【大石岭驿梅花（己卯十一月十三日）】

王周

仙中姑射接瑶姬，成阵清香拥路岐。
半出驿墙谁画得，雪英相倚两三枝。

卷 765_37 【赠怱师】

王周

水中有片月，照耀婵娟姿。庭前有孤柏，竦秀岁寒期。
坚然物莫迁，寂焉心为师。声发响必答，形存影即随。
雪花安结子，雪叶宁附枝。兰死不改香，井寒岂生澌。
晨炉烟袅袅，病发霜丝丝。丈室冰凛冽，一衲云离披。
顾此名利场，得不惭冠绥。

卷 765_38 【游仙都观】

王周

冷杉枯柏路盘空，毛发生寒略略风。
两汉真仙在何处，巡香行绕蕊珠宫。

· 全唐诗 ·

卷 765_39 【志峡船具诗·梢】

王周

制之居首尾，俾之辨斜正。首动尾聿随，斜取正为定。
有如提吏笔，有如执时柄。有如秉师律，有如宣命令。
守彼方与直，得其刚且劲。既能济险难，何畏涉辽夐。
招招俾作主，泛泛实司命。风乌愧斟酌，画鹢空辉映。
古人存丰规，猗欤聊引证。

卷 765_40 【志峡船具诗·櫓】

王周

用之大曰櫓，冠乎小者楫。通津既能济，巨浸即横涉。
身之使者颊，虎之拏者爪。鱼之拨者鬣，弩之进者筴。
此实为相须，相须航一叶。

卷 765_41 【志峡船具诗·舵】

王周

箭飞峡中水，锯立峡中石。峡与水为隘，水与石相击。
湍为生险艰，声发甚霹雳。三老航一叶，百丈空千尺。

· 全唐诗 ·

苍黄徒尔为，倏忽何可测。篙之小难制，戢之独有力。
猗嗟戢之为，彬彬坚且直。有如用武人，森森矗戈戟。
有如敢言士，落落吐胸臆。拯危居坦夷，济险免兢惕。
志彼哲匠心，俾其来者识。

卷 765_42 【志峡船具诗·百丈】

王周

少尝侍先君，余闲诵白氏。始得入峡诗，深味作诗旨。
云有万仞山，云有千丈水。自念坎壈时，尤多兢慎理。
山束峡如口，水漱石如齿。孤舟行其中，薄冰犹坦履。
孱颜屹焉立，汹涌勃然起。百丈为前牵，万险即平砥。
破之以笕筰，续之以麻枲。砺之坚以节，引之直如矢。
杼轴连半空，长短随两涘。铁锁枉驰名，锦缆谩称美。
长绳岂能系，朽索何足拟。苟非 之为，胡可力行此。

卷 765_43 【早春西园】

王周

引步携筇竹，西园小径通。雪敲梅蒂绿，春入杏梢红。
静意崖穿溜，孤愁笛破空。如何将此景，收拾向图中。

· 全唐诗 ·

卷 765_44 【金盘草诗（生宁江巫山南陵林木中）】

王周

今春从南陵，得草名金盘。金盘有仁性，生在林一端。
根节岁一节，食之甘而酸。风俗竞采掇，俾人防急难。
巴中蛇虺毒，解之如走丸。巨叶展六出，软干分长竿。
摇摇绿玉活，袅袅香荷寒。世云暑酷月，郁有神物看。
天之产于此，意欲生民安。今之为政者，何不反此观。
知彼苛且猛，慎勿虐而残。一物苟失所，万金惟可叹。
莫并蒿与莱，岂羨芝及兰。勤渠护根本，栽植当庭栏。
寄言好生者，休说神仙丹。

卷 765_45 【和程刑部三首·公会亭】

王周

公事公言地，标名姓必臧。江山如得助，谈笑若为妨。
均赋乡原肃，详刑郡邑康。官箴居座右，夙夜算难忘。

卷 765_46 【和程刑部三首·碧鲜亭】

王周

飏飏笼清籁，萧萧锁翠阴。向高思尽节，从直美虚心。

· 全唐诗 ·

迴砌滋苍蘚，幽窗伴素琴。公余时引步，一径静中深。

卷 765_47 【和程刑部三首·清涟閣】

王周

照影翻窗綺，层纹滉额波。丝青迷岸柳，茸绿蘸汀莎。
片雪翘饥鹭，孤香卷嫩荷。凭栏堪入画，时听竹枝歌。

卷 765_48 【自喻】

王周

予念天之生，生本空疏器。五岁稟慈训，愤悱读书志。
七岁辨声律，勤苦会诗赋。九岁执公卷，倜傥干名意。
乞荐乡老书，幸会春官试。折桂愧巍峨，依莲何气味。
性拙绝不佞，才短无余地。前年会知己，荐章实非据。
宁见民说平，空荷君恩寄。瞿唐抵巴渝，往来名揽轡。
孤舟一水中，艰险实可畏。群操百丈牵，临难无苟避。
瀆向江底发，水在石中沸。槌鼓称打宽，系纆呼下纬。
善恶胡可分，死生何足讳。骑衡与垂堂，非不知前喻。
临渊与履冰，非不知深虑。我今縻搢绅，善地谁人致。
城狐与社鼠，巧佞谁从庇。奴颜与婢膝，丑直谁从媚。
妻儿夤限越，容颜几憔悴。致身霄汉人，哂嚙尽贤智。

· 全唐诗 ·

卷 765_49 【巫山庙】

王周

庙前溪水流潺潺，庙中修竹声珊珊。
襄王一梦杳难问，晚晴天气归云闲。

卷 765_50 【下瞿塘寄时同年】

王周

春寒天气下瞿塘，大壤溪前柳线长。
须信孤云似孤宦，莫将乡思附归艎。

卷 765_51 【和杜运使巴峡地暖节物与中土异黯然有感诗三首】

王周

随柳参差破绿芽，此中依约欲飞花。
春光是处伤离思，何况归期未有涯。

始看菊蕊开篱下，又见梅花寄岭头。
揽辔巴西官局冷，几凭春酒沃乡愁。

· 全唐诗 ·

花品姚黄冠洛阳，巴中春早羨孤芳。
不知别有栽培力，流咏新诗与激昂。

卷 765_52 【施南太守以猿儿为寄作诗答之（得之黔中，生即头白）】

王周

虞人初获西江西，长臂难将意马齐。
今日未啼头已白，不堪深入白云啼。

卷 765_53 【巫庙】

王周

巴水走若箭，峡山开如屏。汹涌匹练白，鸛峯浓蓝青。
崖空蓄云雨，滩恶惊雷霆。神仙宅幽邃，庙貌横杳冥。
隐约可一梦，缥缈余千龄。名利有所役，舟楫无暂停。
悉窣垂髫髻，祠祷希安宁。鸦鸦尔何物，飞飞来庙庭。
纷纷飏寥泝，远近随虚舲。铁石砺觜爪，金碧辉光翎。
翔集托阴险，鵠啄贪膾腥。日既恃威福，岁久为精灵。
依草与附木，诬诡殊不经。城狐与社鼠，琐细何足听。
况乎人假人，心阔吞沧溟。

· 全唐诗 ·

第七百六十六卷

卷 766_1 【贵游】

刘兼

绣衣公子宴池塘，淑景融融万卉芳。珠翠照天春未老，
管弦临水日初长。风飘柳线金成穗，雨洗梨花玉有香。
醉后不能离绮席，拟凭青帝系斜阳。

卷 766_2 【梦归故园】

刘兼

桐叶飞霜落井栏，菱花藏雪助衰颜。夜窗飒飒摇寒竹，
秋枕迢迢梦故山。临水钓舟横荻岸，隔溪禅侣启柴关。
觉来依旧三更月，离绪乡心起万端。

旧馆秋寒夜梦长，水帘疏影入回塘。宦情率尔拖鱼艇，
客恨依然在燕梁。白鹭独飘山面雪，红蕖全谢镜心香。
起来不语无人会，醉倚东轩半夕阳。

· 全唐诗 ·

卷 766_3 【蜀都春晚感怀】

刘兼

蜀都春色渐离披，梦断云空事莫追。宫阙一城荒作草，
王孙犹自醉如泥。谁家玉笛吹残照，柳市金丝拂旧堤。
可惜锦江无锦濯，海棠花下杜鹃啼。

卷 766_4 【对雨】

刘兼

幽庭凝碧亦涟漪，檐霤声繁聒梦归。半岫金乌才委照，
一川石燕又交飞。濯枝霏霰榴花吐，吹渚飘飏暑气微。
因忆故园闲钓处，苍苔斑驳满渔矶。

卷 766_5 【春霁】

刘兼

春霁江山似画图，醉垂鞭袂出康衢。猖狂乱打貔貅鼓，
懒慢迟修鸳鹭书。老色渐来欺鬓发，闲情将欲傲簪裾。
苔钱遍地知多少，买得花枝不落无。

· 全唐诗 ·

卷 766_6 【秋夕书怀】

刘兼

荒僻淹留岁已深，解龟无计恨难任。守方半会蛮夷语，
贺厦全忘燕雀心。夜静倚楼悲月笛，秋寒欹枕泣霜砧。
宦情总逐愁肠断，一箸鲈鱼直万金。

直气从来不入时，掩关慵更钓磻溪。斯文未丧宣尼叹，
吾道将穷阮籍悲。轻粉覆霜凝夜砌，乱金铺菊织秋篱。
南阳卧久无人问，薄命非才有可疑。

卷 766_7 【春宵】

刘兼

春云春日共朦胧，满院梨花半夜风。宿酒未醒珠箔卷，
艳歌初阕玉楼空。五湖范蠡才堪重，六印苏秦道不同。
再取素琴聊假寐，南柯灵梦莫相通。

卷 766_8 【秋夕书怀呈戎州郎中】

刘兼

素律初回枕簟凉，松风飘泊入华堂。谭鸡寂默纱窗静，

· 全唐诗 ·

梦蝶萧条玉漏长。归去水云多阻隔，别来情绪足悲伤。
霜砧月笛休相引，只有离襟泪两行。

风送秋荷满鼻香，竹声敲玉近虚廊。梦回故国情方黯，
月过疏帘夜正凉。菱镜也知移艳态，锦书其奈隔年光。
鸾胶处处难寻觅，断尽相思寸寸肠。

卷 766_9 【晚楼寓怀】

刘兼

薄暮疏林宿鸟还，倚楼垂袂复凭栏。月沈江底珠轮净，
云锁峰头玉叶寒。刘毅暂贫虽壮志，冯唐将老自低颜。
无言独对秋风立，拟把朝簪换钓竿。

卷 766_10 【征妇怨】

刘兼

金闺寂寞罢妆台，玉箸阑干界粉腮。花落掩关春欲暮，
月圆敲枕梦初回。鸾胶岂续愁肠断，龙剑难挥别绪开。
曾寄锦书无限意，塞鸿何事不归来。

· 全唐诗 ·

卷 766_11 【对镜】

刘兼

青镜重磨照白须，白须撚闲意何如。故园迢递千山外，
荒郡淹留四载余。风送竹声侵枕簟，月移花影过庭除。
秋霜满领难消释，莫读离骚失意书。

卷 766_12 【春燕】

刘兼

多时窗外语呢喃，只要佳人卷绣帘。大厦已成须庆贺，
高门频入莫憎嫌。花间舞蝶和香趁，江畔春泥带雨衔。
栖息数年情已厚，营巢争肯傍他檐。

卷 766_13 【春晚寓怀】

刘兼

一承兑泽莅方州，八度春光照郡楼。好景几将官吏醉，
名山时领管弦游。空花任尔频侵眼，老雪从他渐满头。
归去杜陵池阁在，只能欢笑不能愁。

· 全唐诗 ·

卷 766_14 【中春宴游】

刘兼

二月风光似洞天，红英翠萼簇芳筵。楚王云雨迷巫峡，
江令文章媚蜀笺。歌黛入颦春袖敛，舞衣新绣晓霞鲜。
酒阑香袂初分散，笑指渔翁钓暮烟。

卷 766_15 【春晚闲望】

刘兼

东风满地是梨花，只把琴心殢酒家。立处晚楼横短笛，
望中春草接平沙。雁行断续晴天远，燕翼参差翠幕斜。
归计未成头欲白，钓舟烟浪思无涯。

卷 766_16 【秋夕书事】

刘兼

摇落江天万木空，雁行斜戛塞垣风。征闺捣月离愁远，
旧馆眠云旅梦通。郢客岂能陪下里，皋禽争肯恋樊笼。
此心旷荡谁相会，尽在南华十卷中。

· 全唐诗 ·

卷 766_17 【莲塘霁望】

刘兼

新秋菡萏发红英，向晚风飘满郡馨。万叠水纹罗乍展，
一双鸂鶒绣初成。采莲女散吴歌阁，拾翠人归楚雨晴。
远岸牧童吹短笛，蓼花深处信牛行。

卷 766_18 【送从弟舍人入蜀】

刘兼

嘉陵江畔饯行车，离袂难分十里余。慷慨莫夸心似铁，
留连不觉泪成珠。风光川谷梅将发，音信云天雁未疏。
立马举鞭无限意，会稀别远拟何如。

卷 766_19 【新回车院筵上作】

刘兼

回车院子未回车，三载疲民咏袴襦。借寇已承英主诏，
乞骸须上老臣书。黄金蜀柳笼朱户，碧玉湘筠映绮疏。
因问满筵诗酒客，锦江何处有鲈鱼。

· 全唐诗 ·

卷 766_20 【寄长安郑员外】

刘兼

屈指良交十四人，隙驹风烛渐为尘。当初花下三秦客，
只有天涯二老身。乘醉几同游北内，寻芳多共谒东邻。
此时阻隔关山远，月满江楼泪满巾。

卷 766_21 【咸阳怀古】

刘兼

高秋咸镐起霜风，秦汉荒陵树叶红。七国斗鸡方贾勇，
中原逐鹿更争雄。南山漠漠云常在，渭水悠悠事旋空。
立马举鞭遥望处，阿房遗址夕阳东。

卷 766_22 【春怨】

刘兼

绣林红岸落花钿，故去新来感自然。绝塞杪春悲汉月，
长林深夜泣湘弦。锦书雁断应难寄，菱镜鸾孤貌可怜。
独倚画屏人不会，梦魂才别戍楼边。

· 全唐诗 ·

卷 766_23 【登楼寓望】

刘兼

凭高多是偶洊澜，红叶何堪照病颜。万叠云山供远恨，
一轩风物送秋寒。背琴鹤客归松径，横笛牛童卧蓼滩。
独倚郡楼无限意，夕阳西去水东还。

卷 766_24 【江岸独步】

刘兼

醉卓寒筇傍水行，渔翁不会独吟情。龟能顾印谁相重，
鹤偶乘轩自可轻。簪组百年终长物，文章千古亦虚名。
是非得丧皆闲事，休向南柯与梦争。

卷 766_25 【江楼望乡寄内】

刘兼

独上江楼望故乡，泪襟霜笛共凄凉。云生陇首秋虽早，
月在天心夜已长。魂梦只能随蛱蝶，烟波无计学鸳鸯。
蜀笺都有三千幅，总写离情寄孟光。

· 全唐诗 ·

卷 766_26 【命妓不至】

刘兼

琴中难挑孰怜才，独对良宵酒数杯。苏子黑貂将已尽，
宋弘青鸟又空回。月穿净牖霜成隙，风卷残花锦作堆。
鼓枕梦魂何处去，醉和春色入天台。

卷 766_27 【宣赐锦袍设上赠诸郡客】

刘兼

十月芙蓉花满枝，天庭驿骑赐寒衣。将同玉蝶侵肌冷，
也遣金鹏遍体飞。夜卧始知多忝窃，昼行方觉转光辉。
深冬若得朝丹阙，太华峰前衣锦归。

卷 766_28 【晨鸡】

刘兼

朱冠金距彩毛身，昧爽高声已报晨。作瑞莫惭先贡楚，
擅场须信独推秦。淮南也伴升仙犬，函谷曾容借晓人。
此日卑栖随饮啄，宰君驱我亦相驯。

· 全唐诗 ·

卷 766_29 【芳春】

刘兼

微雨微风隔画帘，金炉檀炷冷慵添。桃花满地春牢落，
柳絮成堆雪弃嫌。宝瑟不能邀卓氏，彩毫何必梦江淹。
宦情归兴休相挠，隼旆渔舟总未厌。

卷 766_30 【春游】

刘兼

柳成金穗草如茵，载酒寻花共赏春。
先入醉乡君莫问，十年风景在三秦。

摇摇离绪不能持，满郡花开酒熟时。羞听黄莺求善友，
强随绿柳展愁眉。隔云故国山千叠，傍水芳林锦万枝。
圣主未容归北阙，且将勤俭抚南夷。

卷 766_31 【重阳感怀】

刘兼

重阳不忍上高楼，寒菊年年照暮秋。万叠故山云总隔，

· 全唐诗 ·

两行乡泪血和流。黄茅莽莽连边郡，红叶纷纷落钓舟。
归计未成年渐老，茱萸羞戴雪霜头。

载花乘酒上高山，四望秋空八极宽。蜀国江山存不得，
刘家豚犬取何难。张仪旧壁苍苔厚，葛亮荒祠古木寒。
独对斜阳更惆怅，锦江东注似波澜。

卷 766_32 【宴游池馆】

刘兼

绮筵金碧照芳菲，酒满瑶卮水满池。去岁南岐离郡日，
今春东蜀看花时。俭莲发脸当筹著，绪柳生腰按柘枝。
座客半酣言笑狎，孔融怀抱正怡怡。

卷 766_33 【寄高书记】

刘兼

齐朝庆裔祖敖曹，麟角无双凤九毛。声价五侯争辟命，
文章一代振风骚。醉琴自寄陶家意，梦枕谁听益郡刀。
补衮应星曾奏举，北山南海孰为高？

· 全唐诗 ·

卷 766_34 【再见从弟舍人】

刘兼

屈指依稀十五年，鸾台秘阁位相悬。分飞淮甸雁行断，
重见江楼蟾影圆，滞迹未偕朝北阙，高才方命入西川。
愿君通理须还早，拜庆慈亲几杖前。

卷 766_35 【春昼醉眠】

刘兼

朱栏芳草绿纤纤，敲枕高堂卷画帘。处处落花春寂寂，
时时中酒病恹恹。塞鸿信断虽堪讶，梁燕词多且莫嫌。
自有卷书销永日，霜华未用鬓边添。

卷 766_36 【中夏昼卧】

刘兼

寂寂无聊九夏中，傍檐依壁待清风。
壮图奇策无人问，不及南阳一卧龙。

· 全唐诗 ·

卷 766_37 【春夕寓兴】

刘兼

忘忧何必在庭萱，是事悠悠竟可宽。酒病未能辞锦里，
春狂又拟入桃源。风吹杨柳丝千缕，月照梨花雪万团。
闲泥金徽度芳夕，幽泉石上自潺湲。

卷 766_38 【春夜】

刘兼

薄薄春云笼皓月，杏花满地堆香雪。
醉垂罗袂倚朱栏，小数玉仙歌未阕。

卷 766_39 【访饮妓不遇，招酒徒不至】

刘兼

小桥流水接平沙，何处行云不在家。毕卓未来轻竹叶，
刘晨重到殢桃花。琴樽冷落春将尽，帟幌萧条日又斜。
回首却寻芳草路，金鞍拂柳思无涯。

· 全唐诗 ·

卷 766_40 【春宴河亭】

刘兼

柳摆轻丝拂嫩黄，槛前流水满池塘。一筵金翠临芳岸，
四面烟花出粉墙。舞袖逐风翻绣浪，歌尘随燕下雕梁。
蛮笺象管休凝思，且放春心入醉乡。

卷 766_41 【蜀都道中】

刘兼

剑关云栈乱峥嵘，得丧何由险与平。千载龟城终失守，
一堆鬼录漫留名。季年必不延昏主，薄赏那堪激懦兵。
李特后来多二世，纳降归拟尽公卿。

卷 766_42 【万葛树】

刘兼

叶如羽盖岂堪论，百步清阴锁绿云。善政已闻思召伯，
英风偏称号将军。静铺讲席麟经润，高拂 枝兔影分。
更有岁寒霜雪操，莫将樗栎拟相群。

· 全唐诗 ·

卷 766_43 【春夕遣怀】

刘兼

穷通分定莫凄凉，且放欢情入醉乡。范蠡扁舟终去相，
冯唐半世只为郎。风飘玉笛梅初落，酒泛金樽月未央。
休把虚名挠怀抱，九原丘陇尽侯王。

卷 766_44 【西斋】

刘兼

西斋新竹两三茎，也有风敲碎玉声。
莫恨移来栏槛远，譬如元本此间生。

卷 766_45 【新蝉】

刘兼

齐女屏帏失旧容，侍中冠冕有芳踪。翅翻晚鬓寻香露，
声引秋丝逐远风。旅馆听时髭欲白，戍楼闻处叶多红。
只知送恨添愁事，谁见凌霄羽蜕功。

· 全唐诗 ·

卷 766_46 【寄滑州文秀大师】

刘兼

分飞屈指十三年，菡萏峰前别社莲。薄宦偶然来左蜀，
孤云何事在南燕。一封瑶简音初达，两处金沙色共圆。
珍重汤休惠佳句，郡斋吟久不成眠。

卷 766_47 【中春登楼】

刘兼

金杯不以涤愁肠，江郡芳时忆故乡。两岸烟花春富贵，
一楼风月夜凄凉。王章莫耻牛衣泪，潘岳休惊鹤鬓霜。
归去莲花归未得，白云深处有茅堂。

古今通塞莫咨嗟，谩把霜髯敌岁华。失手已惭蛇有足，
用心休为鼠无牙。九天云净方怜月，一夜风高便厌花。
独倚郡楼人不会，钓舟春浪接平沙。

卷 766_48 【自遣】

刘兼

未上亨衢独醉吟，赋成无处博黄金。家人莫问张仪舌，

· 全唐诗 ·

国士须知豫让心。照乘始堪沽善价，阳春争忍混凡音。
鹄鹏鳞翼途程在，九万风云海浪深。

卷 766_49 【偶有下殇，因而自遣】

刘兼

彭寿殇龄共两空，幻泡缘影梦魂中。缺圆宿会长如月，
飘忽浮生疾似风。修短百年先后定，贤愚千古是非同。
南柯太守知人意，休问陶陶塞上翁。

卷 766_50 【倦学】

刘兼

乐广亡来冰镜稀，宓妃嫫母混妍媸。且于雾里藏玄豹，
休向窗中问碧鸡。百氏典坟空自苦，一堆萤雪竟谁知。
门前春色芳如画，好掩书斋任所之。

卷 766_51 【去年今日】

刘兼

去年今日到荣州，五骑红尘入郡楼。貔虎只知迎太守，

· 全唐诗 ·

蚩夷不信是儒流。奸豪已息时将泰，疲瘵全苏岁又周。
圣主若容辞重禄，便归烟水狎群鸥。

卷 766_52 【昼寝】

刘兼

花落青苔锦数重，书淫不觉避春慵。恣情枕上飞庄蝶，
任尔云间骋陆龙。玉液未能消气魄，牙签方可涤昏蒙。
起来已被诗魔引，窗外寒敲翠竹风。

卷 766_53 【郡斋寓兴】

刘兼

依约樊川似旭川，郡斋风物尽萧然。秋庭碧藓铺云锦，
晚阁红蕖簇水仙。醉笔语狂挥粉壁，歌梁尘乱拂花钿。
情怀放荡无羁束，地角天涯亦信缘。

卷 766_54 【郡楼闲望书怀】

刘兼

郡城楼阁绕江滨，风物清秋入望频。铜鼓祭龙云塞庙，

· 全唐诗 ·

芦花飘市雪粘人。莲披净沼群香散，鹭点寒烟玉片新。
归去杜陵池馆在，且将朝服拂埃尘。

卷 766_55 【玉烛花】

刘兼

袅袅香英三四枝，亭亭红艳照阶墀。正当晚槛初开处，
却似春闱就试时。少女不吹方熠燿，东君偏惜未离披。
夜深斜倚朱栏外，拟把邻光借与谁？

卷 766_56 【从弟舍人惠茶】

刘兼

曾求芳茗贡芜词，果沐颁沾味甚奇。龟背起纹轻炙处，
云头翻液乍烹时。老丞倦闷偏宜矣，旧客过从别有之。
珍重宗亲相寄惠，水亭山阁自携持。

卷 766_57 【再看光福寺牡丹】

刘兼

去年曾看牡丹花，蛱蝶迎人傍彩霞。今日再游光福寺，

· 全唐诗 ·

春风吹我入仙家。当筵芬馥歌唇动，倚槛娇羞醉眼斜。
来岁未朝金阙去，依前和露载归衙。

卷 766_58 【海棠花】

刘兼

淡淡微红色不深，依依偏得似春心。烟轻虢国颦歌黛，
露重长门敛泪衿。低傍绣帘人易折，密藏香蕊蝶难寻。
良宵更有多情处，月下芬芳伴醉吟。

卷 766_59 【新竹】

刘兼

近窗卧砌两三丛，佐静添幽别有功。影镂碎金初透月，
声敲寒玉乍摇风。无凭费叟烟波碧，莫信湘妃泪点红。
自是子猷偏爱尔，虚心高节雪霜中。

卷 766_60 【木芙蓉】

刘兼

素灵失律诈风流，强把芳菲半载偷。是叶葳蕤霜照夜，

· 全唐诗 ·

此花烂熳火烧秋。谢莲色淡争堪种，陶菊香秾亦合羞。
谁道金风能肃物，因何厚薄不相侔。

卷 766_61 【送二郎君归长安】

刘兼

我儿辞去泪双流，蜀郡秦川两处愁。红叶满山归故国，
黄茅遍地住他州。荷衣晓挂惭官吏，菱镜秋窥讶鬓髭。
好向云泉营旧隐，莫教庄叟畏牺牛。

卷 766_62 【送文英大师】

刘兼

屈指平阳别社莲，蟾光一百度曾圆。孤云自在知何处，
薄宦参差亦信缘。山郡披风方穆若，花时分袂更凄然。
摇鞭相送嘉陵岸，回首群峰隔翠烟。

卷 766_63 【酬勾评事】

刘兼

闲庭欹枕正悲秋，忽觉新编浣远愁。才薄只愁安雁户，

· 全唐诗 ·

年高空忆复渔舟。鹭翘皓雪临汀岸，莲袅红香匝郡楼。
对景却惭无藻思，南金荆玉卒难酬。

卷 766_64 【初至郡界】

刘兼

嘉陵江畔接荣川，两岸旌旗下濑船。郡印已分炎瘴地，
朝衣犹惹御炉烟。莲塘小饮香随艇，月榭高吟水压天。
锦字莫嫌归路远，华夷一统太平年。

卷 766_65 【到郡后有寄】

刘兼

蜀路新修尽坦平，交亲深幸再逢迎。正当返袂思乡国，
却似归家见弟兄。沾泽只惭尧綍重，溯流还喜范舟轻。
欲将感恋裁书旨，多少鱼笺写得成。

卷 766_66 【长春节】

刘兼

圣朝佳节遇长春，跪捧金炉祝又焚。宝藏发来天地秀，

· 全唐诗 ·

兵戈销后帝皇尊。太平基址千年永，混一车书万古存。
更有馨香满芳槛，和风迟日在兰荪。

卷 766_67 【登郡楼书事】

刘兼

偶奉纶书莅旭川，郡楼嘉致尽依然。松欹鸟道云藏寺，
月满渔舟水浸天。望帝古祠花簇簇，锦城归路草芊芊。
有时倚槛垂双袂，故国风光似眼前。

卷 766_68 【旭川祁宰思家而卒，因述意呈秦川知己】

刘兼

岁稔民康绝讼论，政成公暇自由身。朝看五马闲如社，
夜拥双姬暖似春。家计不忧凭冢子，官资无愧是朝臣。
岂同龌龊祁员外，至死悲凉一妇人。

卷 766_69 【登郡楼书怀】

刘兼

烟雨楼台渐晦冥，锦江澄碧浪花平。卞和未雪荆山耻，

· 全唐诗 ·

庄舄空伤越国情。天际寂寥无雁下，云端依约有僧行。
登高欲继离骚咏，魂断愁深写不成。

边郡荒凉悲且歌，故园迢递隔烟波。琴声背俗终如是，
剑气冲星又若何。朝客渐通书信少，钓舟频引梦魂多。
北山更有移文者，白首无尘归去么。

莫嗔阮氏哭途穷，万代深沈恨亦同。瑞玉岂知将抵鹊，
铅刀何事却屠龙。九夷欲适嗟吾道，五柳终归效古风。
独倚郡楼无限意，满江烟雨正冥濛。

卷 766_70 【偶闻官吏举请，辄有一篇寄从弟舍人】

刘兼

官吏潜陈借寇词，宦情乡梦两相违。青城锦水无心住，
紫阁莲峰有意归。张翰鲈鱼因醉忆，孟光书信近春稀。
黄茅瘴色看看起，贪者犹疑别是机。

卷 766_71 【诚是非】

刘兼

巧舌如簧总莫听，是非多自爱憎生。三人告母虽投杼，
百犬闻风只吠声。辨玉且宽和氏罪，诬金须认不疑情。

· 全唐诗 ·

因思畴昔游谈者，六国交驰亦受烹。

卷 766_72 【简竖儒】

刘兼

蹄涔岂信有沧浪，萤火何堪并太阳。渊奥未曾探禹穴，
矜夸便拟越丘墙。小巫神气终须怯，下里音声必不长。
近日冰壶多晦昧，虎皮羊质也观光。

卷 766_73 【贻诸学童】

刘兼

横经叉手步还趋，积善方知庆有余。五个小雏离学院，
一行新雁入贫居。攘羊告罪言何直，舐犊牵情理岂虚。
劝汝立身须苦志，月中丹桂自扶疏。

· 全唐诗 ·

第七百六十七卷

卷 767_1 【吴·黄金车】

孙元晏

分擘山河即渐开，许昌基业已倾颓。
黄金车与斑斓耳，早个须知入谏来。

卷 767_2 【吴·赤壁】

孙元晏

会猎书来举国惊，只应周鲁不教迎。
曹公一战奔波后，赤壁功传万古名。

卷 767_3 【吴·鲁肃指囷】

孙元晏

破产移家事亦难，佐吴从此霸江山。

· 全唐诗 ·

争教不立功勋得，指出千阡如等闲。

卷 767_4 【吴·甘宁斫营】

孙元晏

夜深偷入魏军营，满寨惊忙火似星。
百口宝刀千匹绢，也应消得与甘宁。

卷 767_5 【吴·徐盛】

孙元晏

欲把江山鼎足分，邢真衔册到江南。
当时将相谁堪重，徐盛将军最不甘。

卷 767_6 【吴·鲁肃】

孙元晏

斫案兴言断众疑，鼎分从此定雄雌。
若无子敬心相似，争得乌林破魏师。

· 全唐诗 ·

卷 767_7 【吴·武昌】

孙元晏

西塞山高截九垓，谿谣终日自相催。
武昌鱼美应难恋，历数须归建业来。

卷 767_8 【吴·顾雍】

孙元晏

赞国经纶更有谁，蔡公相叹亦相师。
贵为丞相封侯了，归后家人总不知。

卷 767_9 【吴·吕蒙】

孙元晏

幼小家贫实可哀，愿征行去志难回。
不探虎穴求身达，争得人间富贵来。

· 全唐诗 ·

卷 767_10 【吴·介象】

孙元晏

好道君王遇亦难，变通灵异几多般。
介先生有神仙术，钓得鲈鱼在玉盘。

卷 767_11 【吴·濡须坞】

孙元晏

风揭洪涛响若雷，枕波为垒险相隈。
莫言有个濡须坞，几度曹公失志回。

卷 767_12 【吴·周泰】

孙元晏

名与诸公又不同，金疮痕在满身中。
不将御盖宣恩泽，谁信将军别有功。

· 全唐诗 ·

卷 767_13 【吴·张纘】

孙元晏

东部张公与众殊，共施经略赞全吴。
陈琳漫自称雄伯，神气应须怯大巫。

卷 767_14 【吴·太史慈】

孙元晏

圣德招贤远近知，曹公心计却成欺。
陈韩昔日尝投楚，岂是当归召得伊。

卷 767_15 【吴·孙坚后】

孙元晏

委存张公翊圣材，几将贤德赞文台。
争教不霸江山得，日月征曾入梦来。

· 全唐诗 ·

卷 767_16 【吴·陆统】

孙元晏

将军身歿有儿孤，虎子为名教读书。
更向宫中教骑马，感君恩重合何如。

卷 767_17 【吴·青盖】

孙元晏

历数将终势已摧，不修君德更堪哀。
被他青盖言相误，元是须教入晋来。

卷 767_18 【晋·七宝鞭】

孙元晏

天命须知岂偶然，乱臣徒欲用兵权。
圣谟庙略还应别，浑不消他七宝鞭。

· 全唐诗 ·

卷 767_19 【晋·庾悦鹅炙】

孙元晏

春暖江南景气新，子鹅炙美就中珍。
庾家厨盛刘公困，浑弗相贻也恼人。

卷 767_20 【晋·谢玄】

孙元晏

百万兵来逼合肥，谢玄为将统雄师。
旌旗首尾千余里，浑不消他一局棋。

卷 767_21 【晋·谢混】

孙元晏

尚主当初偶未成，此时谁合更关情。
可怜谢混风华在，千古翻传禁脔名。

· 全唐诗 ·

卷 767_22 【晋·陆玩】

孙元晏

陆公高论亦由衷，谦让还惭未有功。
天下忠良人欲尽，始应交我作三公。

卷 767_23 【晋·王坦之】

孙元晏

晋祚安危只此行，坦之何必苦忧惊。
谢公合定寰区在，争遣当时事得成。

卷 767_24 【晋·蒲葵扇】

孙元晏

抛舍东山岁月遥，几施经略挫雄豪。
若非名德喧寰宇，争得蒲葵价数高。

· 全唐诗 ·

卷 767_25 【晋·王郎】

孙元晏

太尉门庭亦甚高，王郎名重礼相饶。
自家妻父犹如此，谁更逢君得折腰。

卷 767_26 【晋·刘毅】

孙元晏

绕床堪壮喝卢声，似铁容仪众尽惊。
二十七人同举义，几人全得旧功名。

卷 767_27 【晋·王恭】

孙元晏

春风濯濯柳容仪，鹤氅神情举世推。
可惜教君仗旄钺，枉将心地托牢之。

· 全唐诗 ·

卷 767_28 【晋·谢公赌墅】

孙元晏

发遣将军欲去时，略无情挠只贪棋。
自从乞与羊昙后，赌墅功成更有谁。

卷 767_29 【晋·苻坚投箸】

孙元晏

投箸填江语未终，谢安乘此立殊功。
三台星烂乾坤在，且与张华死不同。

卷 767_30 【晋·卫玠】

孙元晏

叔宝羊车海内稀，山家女婿好风姿。
江东士女无端甚，看杀玉人浑不知。

· 全唐诗 ·

卷 767_31 【晋·郭璞脱襦】

孙元晏

吟坐因思郭景纯，每言穷达似通神。
到头分命难移改，解脱青襦与别人。

卷 767_32 【晋·庾楼】

孙元晏

江州楼上月明中，从事同登眺远空。
玉树忽薶千载后，有谁重此继清风？

卷 767_33 【晋·新亭】

孙元晏

容易乘虚逼帝畿，满江艨艟与旌旗。
卢循若解新亭上，胜负还应未可知。

· 全唐诗 ·

卷 767_34 【宋·大岷】

孙元晏

大岷才过喜可知，指空言已副心期。
公孙计策嗟无用，天与南朝作霸基。

卷 767_35 【宋·放宫人】

孙元晏

纳谏廷臣免犯颜，自然恩可霸江山。
姚兴侍女方承宠，放出宫闱若等闲。

卷 767_36 【宋·借南苑】

孙元晏

人主词应不偶然，几人曾说笑掀天。
不知南苑今何在，借与张公三百年。

· 全唐诗 ·

卷 767_37 【宋·谢澹云霞友】

孙元晏

仗气凌人岂可亲，只将范泰是知闻。
缘何唤作云霞友，却恐云霞未似君。

卷 767_38 【宋·乌衣巷】

孙元晏

古迹荒基好叹嗟，满川吟景只烟霞。
乌衣巷在何人住，回首令人忆谢家。

卷 767_39 【宋·袁粲】

孙元晏

负才尚气满朝知，高卧闲吟见客稀。
独步何人识袁尹，白杨郊外醉方归。

· 全唐诗 ·

卷 767_40 【宋·刘伯龙】

孙元晏

位重何如不厌贫，伯龙孤子只修身。
固知生计还须有，穷鬼临时也笑人。

卷 767_41 【宋·王方平】

孙元晏

拂衣耕钓已多时，江上山前乐可知。
著却貂裘将采药，任他人唤作渔师。

卷 767_42 【宋·黄罗襦】

孙元晏

戚属群臣尽见猜，预忧身后又堪哀。
到头委付何曾是，虚把罗襦与彦回。

· 全唐诗 ·

卷 767_43 【宋·谢朓】

孙元晏

谢家诸子尽兰香，各震芳名满帝乡。
惟有千金更堪重，只将高卧向齐王。

卷 767_44 【宋·羊玄保】

孙元晏

运命将来各有期，好官才阙即思之。
就中堪爱羊玄保，偏受君王分外知。

卷 767_45 【齐·谢朓】

孙元晏

解玺传呼诏侍中，却来高卧岂疏慵。
此时忠节还希有，堪羨君王特地容。

· 全唐诗 ·

卷 767_46 【齐·小儿执烛】

孙元晏

谢公情量已难量，忠宋心诚岂暂忘。
执烛小儿浑放去，略无言语与君王。

卷 767_47 【齐·王僧祐】

孙元晏

肯与公卿作等伦，澹然名德只推君。
任他车骑来相访，箫鼓盈庭似不闻。

卷 767_48 【齐·王僧虔】

孙元晏

位高名重不堪疑，恳让仪同帝亦知。
不学常流争进取，却忧门有二台司。

· 全唐诗 ·

卷 767_49 【齐·明帝褰蒸】

孙元晏

至尊尊贵异人间，御膳天厨岂等闲。
惜得褰蒸无用处，不如安霸取江山。

卷 767_50 【齐·郁林王】

孙元晏

强哀强惨亦从伊，归到私庭喜可知。
喜字漫书三十六，到头能得几多时。

卷 767_51 【齐·何氏小山】

孙元晏

显达何曾肯系心，筑居郊外好园林。
赚他谢朓出山去，赢得高名直至今。

· 全唐诗 ·

卷 767_52 【齐·王伦之】

孙元晏

豫章太守重词林，图画陈蕃与华歆。
更莫子将并孺子，为君千载作知音。

卷 767_53 【齐·潘妃】

孙元晏

曾步金莲宠绝伦，岂甘今日委埃尘。
玉儿还有怀恩处，不肯将身嫁小臣。

卷 767_54 【齐·王亮】

孙元晏

后见梁王未免哀，奈何无计拯倾颓。
若教彼相颠扶得，争遣明公到此来。

· 全唐诗 ·

卷 767_55 【梁·分宫女】

孙元晏

涤荡齐宫法令新，分张宫女二千人。
可怜无限如花貌，重见世间桃李春。

卷 767_56 【梁·马仙埤】

孙元晏

齐朝太守不甘降，忠节当时动四方。
义士要教天下见，且留君住待袁昂。

卷 767_57 【梁·勅敌】

孙元晏

传闻天子重儒才，特为皇华绮宴开。
今日方惊遇勅敌，此人元自北朝来。

· 全唐诗 ·

卷 767_58 【梁·蔡樽】

孙元晏

紫茄白苣以为珍，守任清真转更贫。
不饮吴兴郡中水，古今能有几多人？

卷 767_59 【梁·楚祠】

孙元晏

曾与萧侯醉玉杯，此时神影尽倾颓。
莫云千古无灵圣，也向西川助敌来。

卷 767_60 【梁·谢朓小舆】

孙元晏

小舆升殿掌钧台，不免无繆却忆回。
应恨被他何胤误，悔先容易出山来。

· 全唐诗 ·

卷 767_61 【梁·八关斋】

孙元晏

依凭金地甚虔诚，忍溺空王为圣明。
内殿设斋申祷祝，岂无功德及台城。

卷 767_62 【梁·庾信】

孙元晏

苦心词赋向谁谈，沦落周朝志岂甘。
可惜多才庾开府，一生惆怅忆江南。

卷 767_63 【陈·王僧辨】

孙元晏

彼此英雄各有名，石头高卧拟争衡。
当时堪笑王僧辨，待欲将心托圣明。

· 全唐诗 ·

卷 767_64 【陈·武帝蚌盘】

孙元晏

金翠丝黄略不舒，蚌盘清宴意何如？
岂知三阁繁华日，解为君王妙破除。

卷 767_65 【陈·虞居士】

孙元晏

苦谏将军总不知，几随烟焰作尘飞。
东山居士何人识，惟有君王却许归。

卷 767_66 【陈·姚察】

孙元晏

曾佐徐陵向北游，剖陈疑事动名流。
却归掌选清何甚，一匹花练不肯收。

· 全唐诗 ·

卷 767_67 【陈·宣帝伤将卒】

孙元晏

前后兵师战胜回，百余城垒尽归来。
当时将卒应知感，况得君王为举哀。

卷 767_68 【陈·临春阁】

孙元晏

临春高阁上侵云，风起香飘数里闻。
自是君王正沈醉，岂知消息报隋军。

卷 767_69 【陈·结绮阁】

孙元晏

结绮高宜眺海涯，上凌丹汉拂云霞。
一千朱翠同居此，争奈恩多属丽华。

· 全唐诗 ·

卷 767_70 【陈·望仙阁】

孙元晏

多少沈檀结筑成，望仙为号倚青冥。
不知孔氏何形状，醉得君王不解醒。

卷 767_71 【陈·三阁】

孙元晏

三阁相通绮宴开，数千朱翠绕周回。
只知断送君王醉，不道韩擒已到来。

卷 767_72 【陈·狎客】

孙元晏

八宫妃尽赋篇章，风揭歌声锦绣香。
选得十人为狎客，有谁能解谏君王。

· 全唐诗 ·

卷 767_73 【陈·淮水】

孙元晏

文物衣冠尽入秦，六朝繁盛忽埃尘。
自从淮水干枯后，不见王家更有人。

卷 767_74 【陈·江令宅】

孙元晏

不向南朝立谏名，旧居基在事分明。
令人惆怅江中令，只作篇章过一生。

卷 767_75 【陈·后庭舞】

孙元晏

嫵婉回风态若飞，丽华翘袖玉为姿。
后庭一曲从教舞，舞破江山君未知。

· 全唐诗 ·

第七百六十八卷

卷 768_1 【班婕妤（一作严武诗）】

严识玄

贱妾如桃李，君王若岁时。秋风一已劲，摇落不胜悲。
寂寂苍苔满，沈沈绿草滋。繁华非此日，指攀竞何辞。

卷 768_2 【赋得御制句朔野阵云飞】

何象

塞日穿痕断，边鸿背影飞。缥缈浮黄屋，阴沈护御衣。

卷 768_3 【宿金河戍】

张震

朝发铁麟驿，夕宿金河戍。奔波急王程，一日千里路。
但见容鬓改，不知岁华暮。悠悠沙漠行，王事弥多故。

· 全唐诗 ·

卷 768_4 【补新宫（新宫三章，章八句）】

丘光庭

奂奂新宫，礼乐其融。尔德惟贤，尔 维忠。
为忠以公，斯筵是同。人之醉我，与我延宾。

奂奂新宫，既奂而轮。其固如山，其俨如云。
其寢斯安， 分。我既考落，以燕群臣。

奂奂新宫，既祭既延。我 鏞，于以醉贤。
有礼无愆，我有斯宫。斯宫以安，康后万年。

卷 768_5 【补茅鸱（茅鸱四章，章八句）】

丘光庭

茅鸱茅鸱，无集我冈。汝食汝饱，莫我为祥。
愿弹去汝，来彼凤凰。来彼凤凰，其仪有章。

茅鸱茅鸱，无啄我雀。汝食汝饱，莫我肯略。
愿弹去汝，来彼瑞鹊。来彼瑞鹊，其音可乐。

茅鸱茅鸱，无搏鸛鷀。汝食汝饱，莫我为休。
愿弹去汝，来彼鴈鵠。来彼鴈鵠，食子其周。

· 全唐诗 ·

茅鴟茅鴟，无□画我陵。汝食汝饱，莫我好声。
愿弹去汝，来彼苍鹰。来彼苍鹰，祭鸟是徵。

卷 768_6 【瑕瑜不相掩】

武翊黄

抱璞应难辨，妍媸每自融。贞姿偏特达，微玷遇磨砻。
泾渭流终异，瑕瑜自不同。半曾光透石，未掩气如虹。
缜密诚为智，包藏岂谓忠。停看分美恶，今得值良工。

卷 768_7 【袁江口怀王司勋王吏部】

李祐

京华不啻三千里，客泪如今一万双。
若个最为相忆处，青枫黄竹入袁江。

卷 768_8 【赠进士李守微】

韩屿

一定童颜老岁华，贫寒游历贵人家。炼成正气功应大，
养得元神道不差。舄曳鹤毛干毳氎，杖携筇节瘦槎牙。

· 全唐诗 ·

如何蓬阁不归去，落尽蟠桃几度花。

卷 768_9 【马上有见】

李茂复

行尽疏林见小桥，绿杨深处有红蕉。
无端眼界无分别，安置心头不肯销。

卷 768_10 【自叹】

李茂复

落日西山近一竿，世间恩爱极难拚。
近来不作颠狂事，免被冤家恶眼看。

卷 768_11 【赠吴圆（抒情诗）】

李曜

经年理郡少欢娱，为习干戈间饮徒。
今日临行尽交割，分明收取媚川珠。

· 全唐诗 ·

卷 768_12 【答李曜】

吴圆

曳履优容日日欢，须言达德倍洊澜。
韶光今已输先手，领得蟠珠掌上看。

卷 768_13 【和訾家洲宴游】

陆弘休

新春蕊绽訾家洲，信是南方最胜游。酒满百分殊不怕，
人添一岁更堪愁。莺声暗逐歌声艳，花态还随舞态羞。
莫惜今朝同酩酊，任他龟鹤与蜉蝣。

卷 768_14 【题贾岛墓】

安锜

倚恃才难继，昂藏貌不恭。骑驴冲大尹，夺卷忤宣宗。
驰誉超先辈，居官下我侬。司仓旧曹署，一见一心忡。

· 全唐诗 ·

卷 768_15 【赠别营妓卿卿】

油蔚

怜君无那是多情，枕上相看直到明。日照绿窗人去住，
鸦啼红粉泪纵横。愁肠只向金闺断，白发应从玉塞生。
为报花时少惆怅，此生终不负卿卿。

卷 768_16 【巢燕】

胡玢

燕来巢我檐，我屋非高大。所贵儿童善，保尔无殃祸。
莫巢孀妇家，孀妇怨孤坐。妒尔长双飞，打尔危巢破。

卷 768_17 【庐山桑落洲】

胡玢

莫问桑田事，但看桑落洲。数家新住处，昔日大江流。
古岸崩欲尽，平沙长未休。想应百年后，人世更悠悠。

· 全唐诗 ·

卷 768_18 【石楠树】

胡玢

本自清江石上生，移栽此处称闲情。青云士尽识珍木，
白屋人多唤俗名。重布绿阴滋藓色，深藏好鸟引雏声。
余今一日千回看，每度看来眼益明。

卷 768_19 【句】

胡玢

轮中别有物，光外更无空。

卷 768_20 【酒胡子】

卢注

同心相遇思同欢，擎出酒胡当玉盘。盘中觥觥不自定，
四座清宾注意看。可亦不在心，否亦不在面，
徇客随时自圆转。酒胡五藏属他人，十分亦是无情劝。
尔不耕，亦不饥。尔不蚕，亦有衣。有眼不能分黼黻，
有口不能明是非。鼻何尖，眼何碧，仪形本非天地力。
雕镌匠意苦多端，翠帽朱衫巧妆饰。长安斗酒十千酤，

· 全唐诗 ·

刘伶平生为酒徒。刘伶虚向酒中死，不得酒池中拍浮。
酒胡一滴不入眼，空令酒胡名酒胡。

卷 768_21 【西施】

卢注

惆怅兴亡系绮罗，世人犹自选青娥。
越王解破夫差国，一个西施已是多。

卷 768_22 【题西施浣纱石】

胡幽贞

一朝入紫宫，万古遗芳尘。至今溪边花，不敢娇青春。

卷 768_23 【归四明】

胡幽贞

海色连四明，仙舟去容易。天籍岂辄问，不是卑朝士。

· 全唐诗 ·

卷 768_24 【送人游邵州】

狄焕

春江正渺渺，送别两依依。烟里棹将远，渡头人未归。
渔家侵叠浪，岛树挂残晖。况入湖湘路，那堪花乱飞。

卷 768_25 【题柳】

狄焕

天南与天北，此处影婆娑。翠色折不尽，离情生更多。
雨余笼灞岸，烟暝夹隋河。自有佳名在，秦松继得么。

卷 768_26 【咏南岳径松】

狄焕

一阵雨声归岳峤，两条寒色下潇湘。
客吟晚景停孤棹，僧踏清阴彻上方。

· 全唐诗 ·

卷 768_27 【句】

狄焕

数点当秋霁，不知何处峰。

更无声接续，空有影相随。

卷 768_28 【浔阳观水（一作韩喜诗）】

韩溉

朝宗汉水接阳台，唢呀填坑吼作雷。莫见九江平稳去，
还从三峡嶮巇来。南经梦泽宽浮日，西出岷山劣泛杯。
直至沧溟涵贮尽，沈深不动浸昭回。

卷 768_29 【水（一作韩喜诗）】

韩溉

方圆不定性空求，东注沧溟早晚休。高截碧塘长耿耿，
远飞青嶂更悠悠。潇湘月浸千年色，梦泽烟含万古愁。
别有岭头呜咽处，为君分作断肠流。

· 全唐诗 ·

卷 768_30 【松】

韩偓

倚空高槛冷无尘，往事闲徵梦欲分。
翠色本宜霜后见，寒声偏向月中闻。
啼猿想带苍山雨，归鹤应和紫府云。
莫向东园竞桃李，春光还是不容君。

卷 768_31 【柳】

韩偓

雪尽青门弄影微，暖风迟日早莺归。
如凭细叶留春色，须把长条系落晖。
彭泽有情还郁郁，隋堤无主自依依。
世间惹恨偏饶此，可是行人折赠稀。

卷 768_32 【竹】

韩偓

树色连云万叶开，王孙不厌满庭栽。
凌霜尽节无人见，终日虚心待凤来。
谁许风流添兴咏，自怜潇洒出尘埃。
朱门处处多闲地，正好移阴覆翠苔。

· 全唐诗 ·

卷 768_33 【鹊】

韩偓

才见离巢羽翼开，尽能轻飏出尘埃。人间树好纷纷占，
天上桥成草草回。几度送风临玉户，一时传喜到妆台。
若教颜色如霜雪，应与清平作瑞来。

卷 768_34 【灯（一作韩喜诗）】

韩偓

分影由来恨不同，绿窗孤馆两何穷。荧煌短焰长疑暗，
零落残花旋委空。几处隔帘愁夜雨，谁家当户怯秋风。
莫言明灭无多重，曾比人生一世中。

卷 768_35 【句】

韩偓

门掩落花人别后，窗含残月酒醒时。

· 全唐诗 ·

卷 768_36 【春怨（一作伊州歌）】

金昌绪

打起黄莺儿，莫教枝上啼。啼时惊妾梦，不得到辽西。

卷 768_37 【放猿】

曾麻几

孤猿锁槛岁年深，放出城南百丈林。
绿水任从联臂饮，青山不用断肠吟。

· 全唐诗 ·

第七百六十九卷

卷 769_1 【观兄弟同夜成婚】

郑轨

棠棣开双萼，夭桃照两花。分庭含佩响，隔扇偶妆华。
迎风俱似雪，映绮共如霞。今宵二神女，并在一仙家。

卷 769_2 【夏弹琴（一作刘希戡诗，又作刘希夷诗）】

刘戡

碧山本岑寂，素琴何清幽。弹为风入松，崖谷飒已秋。
庭鹤舞白雪，泉鱼跃洪流。予欲娱世人，明月难暗投。
感叹未终曲，泪下不可收。呜呼钟子期，零落归荒丘。
死而若有知，魂兮从我游。

卷 769_3 【过函谷关】

杨齐哲

地险崤函北，途经分陕东。逶迤众山尽，荒凉古塞空。

· 全唐诗 ·

河光流晓日，树影散朝风。圣德今无外，何处是关中。

卷 769_4 【伤死奴】

刘夷道

丹籍生涯浅，黄泉归路深。不及江陵树，千秋长作林。

卷 769_5 【侍宴赋得起坐弹鸣琴二首（此下俱互见杨师道集）】

杨希道

北林鹊夜飞，南轩月初进。调弦发清徵，荡心祛徧吝。
变作离鸿声，还入思归引。长叹未终极，秋风飘素鬓。

丝传园客意，曲奏楚妃情。罕有知音者，空劳流水声。

卷 769_6 【咏琴】

杨希道

久擅龙门质，孤竦峰阳名。齐娥初发弄，赵女正调声。
嘉客勿遽反，繁弦曲未成。

· 全唐诗 ·

卷 769_7 【咏笙】

杨希道

短长插凤翼，洪细摹鸾音。能令楚妃叹，复使荆王吟。
切切孤竹管，来应云和琴。

卷 769_8 【咏舞】

杨希道

二八如同雪，三春类早花。分行向烛转，一种逐风斜。

卷 769_9 【咏妓（此下诗俱互见王绩集）】

王勣

妖姬饰靓妆，窈窕出兰房。日照当轩影，风吹满路香。
早时歌扇薄，今日舞衫长。不应令曲误，持此试周郎。

卷 769_10 【益州城西张超亭观妓】

王勣

落日明歌席，行云逐舞人。江前飞暮雨，梁上下轻尘。

· 全唐诗 ·

冶服看疑画，妆台望似春。高车勿遽返，长袖欲相亲。

卷 769_11 【辛司法宅观妓】

王勣

南国佳人至，北堂罗荐开。长裙随凤管，促柱送鸾杯。
云光身后落，雪态掌中回。到愁金谷晚，不怪玉山颓。

卷 769_12 【秋池一枝莲】

郭恭

秋至皆零落，凌波独吐红。托根方得所，未肯即随风。

卷 769_13 【婕妤怨】

张烜

贱妾裁纨扇，初摇明月姿。君王看舞席，坐起秋风时。
玉树清御路，金陈翳垂丝。昭阳无分理，愁寂任前期。

· 全唐诗 ·

卷 769_14 【长门怨（一作张循之诗）】

张修之

长门落景尽，洞房秋月明。玉阶草露积，金屋网尘生。
妾妒今应改，君恩昔未平。寄语临邛客，何时作赋成。

卷 769_15 【王昭君】

梁献

图画失天真，容华坐误人。君恩不可再，妾命在和亲。
泪点关山月，衣销边塞尘。一闻阳鸟至，思绝汉宫春。

卷 769_16 【芳树】

符子珪

芳树宜三月，曈曈艳绮年。香交珠箔气，阴占绿庭烟。
小叶风吹长，繁花露濯鲜。遂令秣李儿，折取簪花钿。

· 全唐诗 ·

卷 769_17 【观妓】

李何

向晚小乘游，朝来新上头。从来许长袖，未有客难留。

卷 769_18 【邯郸侠少年】

郑縱

夜渡浊河津，衣中剑满身。兵符劫晋鄙，匕首刺秦人。
执事非无胆，高堂念有亲。昨缘秦苦赵，来往大梁频。

卷 769_19 【玉阶怨】

郑縱

昔日同飞燕，今朝似伯劳。情深争掷果，宠罢怨残桃。
别殿春心断，长门夜树高。虽能不自悔，谁见旧衣褰。

卷 769_20 【婕妤怨】

郑縱

南国承欢日，东方候晓时。那能妒褒姒，只爱笑唐儿。

· 全唐诗 ·

宝叶随云髻，珠丝锻履綦。不知飞燕意，何事苦相疑。

卷 769_21 【入塞曲】

郑縦

留滞边庭久，归思岁月赊。黄云同入塞，白首独还家。
宛马随秦草，胡人问汉花。还伤李都尉，独自没黄沙。

卷 769_22 【赏残花】

纥干著

零落多依草，芳香散著人。低檐一枝在，犹占满堂春。

卷 769_23 【古仙词】

纥干著

珠幡绛节晓霞中，汉武清斋待少翁。
不向人间恋春色，桃花自满紫阳宫。

· 全唐诗 ·

卷 769_24 【感春词】

纥干著

未得鸣珂谒汉宫，江头寂寞向春风。
悲歌一曲心应醉，万叶千花泪眼中。

卷 769_25 【灞上】

纥干著

鸣鞭晚日禁城东，渭水晴烟灞岸风。
都傍柳阴回首望，春天楼阁五云中。

卷 769_26 【凌云寺】

李习

古寺临江间碧波，石梯深入白云窠。
僧禅寂寂无人迹，满地落花春又过。

· 全唐诗 ·

卷 769_27 【凤栖怨】

颜舒

佳人名莫愁，珠箔上花钩。清镜鸳鸯匣，新妆翡翠楼。
捣衣明月夜，吹管白云秋。惟恨金吾子，年年向陇头。

卷 769_28 【春女怨】

朱绂

独坐纱窗刺绣迟，紫荆花下啜黄鹂。
欲知无限伤春意，尽在停针不语时。

卷 769_29 【失题】

徐璧

双燕今朝至，何时发海滨。窥檐向人语，如道故乡春。

卷 769_30 【催妆】

徐安期

传闻烛下调红粉，明镜台前别作春。

· 全唐诗 ·

不须面上浑妆却，留著双眉待画人。

卷 769_31 【隔壁闻奏伎（一作陈萧琳诗）】

裴延

徒闻管弦切，不见舞腰回。赖有歌梁合，尘飞一半来。

卷 769_32 【咏剪花】

裴延

花寒未聚蝶，色艳已惊人。悬知陌上柳，应妒手中春。

卷 769_33 【叹美人照镜】

陈述

插花枝共动，含笑靥俱生。衫分两处色，钏响一边声。
就中还妒影，恐夺可怜名。

· 全唐诗 ·

卷 769_34 【开缄怨】

朱琳

夫婿边庭久，幽闺恨几重。玉琴知别日，金镜识愁容。
懒寄云中服，慵开海上封。年年得衣惯，且试莫裁缝。

卷 769_35 【杂言】

谢陶

天不与人言，祸福能自至。水火虽活人，暂不得即死。
蹈之焚斯须，凭之溺容易。水火与祸福，岂有先言耳。

卷 769_36 【书事】

何赞

果决生涯向路中，西投知己话从容。云遮剑阁三千里，
水隔瞿塘十二峰。阔步文翁坊里月，闲寻杜老宅边松。
到头须卜林泉隐，自愧无能继卧龙。

· 全唐诗 ·

卷 769_37 【雁塔（开元八年，清河傅岩题此诗于雁塔）】

解彦融

峥嵘彻倒景，刻峭俯无地。勇进攀有缘，即嶮恐迷坠。
窅然丧五蕴，蠢尔怀万类。实际罔他寻，波罗必可致。
南山缭上苑，祇树连岩翠。北斗临帝城，扶宫切太清。
餐和裨日用，味道懿天明。绿野冷风浹，紫微佳气晶。
驯禽演法要，忍草藉经行。本愿从兹适，方知物世轻。

· 全唐诗 ·

第七百七十卷

卷 770_1 【昭君怨（一作董思恭诗）】

董初

新年犹尚小，那堪远聘秦。裾衫沾马汗，眉黛染胡尘。
举眼无相识，路逢皆异人。唯有梅将李，犹带故乡春。

卷 770_2 【南山（一作贺朝诗）】

贺朝清

湖北雨初晴，湖南山尽见。岩岩石帆影，如得海风便。
仙穴茅山峰，彩云时一见。邀君共探此，异篆残几卷。

卷 770_3 【赋得游人久不归（一作刘孝孙诗，又作贺朝诗）】

贺朝清

乡关眇天末，引领怅怀归。羁旅久淫滞，物色屡芳菲。

· 全唐诗 ·

稍觉私意尽，行看鬢髮稀。如何千里外，伫立沾裳衣。

卷 770_4 【白紵辞（此二首又见贞元进士杨衡集中）】

杨衡

玉纓翠珮杂轻罗，香汗微渍朱颜酡。为君起唱白紵歌，
清声袅云思繁多，凝笳哀琴时相和。金壶半倾芳夜促，
梁尘霏霏暗红烛。令君安坐听终曲，坠叶飘花难再复。

蹑珠履，步琼筵，轻身起舞红烛前。芳姿艳态妖且妍，
回眸转袖暗催弦。凉风萧萧漏水急，月华泛滥红莲湿，
牵裙揽带翻成泣。

卷 770_5 【还渭南感旧二首】

唐暄

寢室悲长簟，妆楼泣镜台。独悲桃李节，不共一时开。
魂兮若有感，仿佛梦中来。

常时华室静，笑语度更筹。恍惚人事改，冥漠委荒丘。
阳原叹薤露，阴壑悼藏舟。清夜妆台月，空想画眉愁。

· 全唐诗 ·

卷 770_6 【赠亡妻张氏】

唐暄

峰阳桐半死，延津剑一沈。如何宿昔内，空负百年心。

卷 770_7 【题司空山观】

李韶

梁代真人上紫微，水盘山脚五云飞。
松杉老尽无消息，犹得千年一度归。

卷 770_8 【戏题盱眙壁】

韦鹏翼

岂肯闲寻竹径行，却嫌丝管好蛙声。
自从煮鹤烧琴后，背却青山卧月明。

· 全唐诗 ·

卷 770_9 【题杨少卿书后】

安鸿渐

端溪石砚宣城管，王屋松烟紫兔毫。
更得孤卿老书札，人间无此五般高。

卷 770_10 【自紫阳观至华阳洞，宿侯尊师草堂简同游】

李延陵

石林媚烟景，句曲盘江甸。南向佳气浓，峰峰遥隐见。
渐临华阳口，微路入葱蒨。七曜悬洞宫，五云抱山殿。
银函意谁发，金液徒堪荐。千载桃花春，秦人深不见。
东溪喜相遇，贞白如会面。青鸟来去闲，红霞朝夕变。
一从化真骨，万里乘飞电。萝月延步虚，松花醉闲宴。
幽人即长往，茂宰应交战。明发归琴堂，知君懒为县。

卷 770_11 【题钟雅青纱枕】

秦尚运

阴香装艳入青纱，还与欹眠好事家。
梦里却成山色雨，沈山不敢斗青华。

· 全唐诗 ·

卷 770_12 【题搔口】

张仲谋

尝闻烧尾便擎空，只过天门更一重。
大禹未生门未凿，可能天下总无龙。

卷 770_13 【山寺见杨少卿书壁，因题其尾】

冯少吉

少卿真迹满僧居，只恐钟王也不如。
为报远公须爱惜，此书书后更无书。

卷 770_14 【经杜甫旧宅】

殷陶

浣花溪里花多处，为忆先生在蜀时。
千古只应留旧宅，千金无复换新诗。
沙棚水槛鸥飞尽，树压村桥马过时。
山月不知人事变，夜来江上与谁期。

· 全唐诗 ·

卷 770_15 【行县至浮查寺（一作罗昉诗）】

罗炯

二十年前此布衣，鹿鸣西上虎符归。行时宾从光前事，
到处松杉长旧围。野老竞遮官道拜，沙鸥遥避隼旗飞。
春风一宿琉璃地，自有泉声惬素机。

卷 770_16 【敕和元相公家园即事寄王相公】

韩雄

共列中台贵，能齐物外心。回车青阁晚，解带碧芳深。
夜水随畦入，晴花度竹寻。题诗更相应，一字重千金。

卷 770_17 【仲秋太常寺观公辂车拜陵】

苗仲方

南宫初开律，金风已戒凉。拜陵将展敬，车辂俨成行。
士庶观祠礼，公卿习旧章。郊原佳气引，园寝瑞烟长。
卤簿辞丹阙，威仪列太常。圣心何所寄，惟德在难忘。

· 全唐诗 ·

卷 770_18 【寻易尊师不遇】

陈岷

烂熳红霞光照衣，苔封白石路微微。
华阳洞里何人在，落尽松花不见归。

卷 770_19 【早过梨岭，喜雪书情呈崔判官】

张起

度岭逢朝雪，行看马迹深。轻标南国瑞，寒慰北人心。
皎洁停丹嶂，飘飘映绿林。共君歌乐土，无作白头吟。

卷 770_20 【春情】

张起

画阁余寒在，新年旧燕归。梅花犹带雪，未得试春衣。

卷 770_21 【赠窦蔡二记室入蜀】

陈政

昆山积良宝，大厦构众材。马卿委官去，邹子背淮来。

· 全唐诗 ·

风流信多美，朝夕豫平台。逸翮独不群，清才复遒上。
六辅昔推名，二江今振响。英华虽外发，磨琢终内朗。
四海奋羽仪，清风久播驰。沈郁林难厕，青山翻易阻。
回首望烟霞，谁知慕俦侣。飘然不系舟，为情自可求。
若奉西园夜，浩想北园愁。无因逐萍藻，从尔泛清流。

卷 770_22 【采菊】

李建业

簇簇竞相鲜，一枝开几番。味甘资麴蘖，香好胜兰荪。
古道风摇远，荒篱露压繁。盈筐时采得，服饵近知门。

卷 770_23 【水精环】

罗维

王室符长庆，环中得水精。任圆循不极，见素质仍贞。
信是天然瑞，非因朴斫成。无瑕胜玉美，至洁过冰清。
未肯齐珉价，宁同杂佩声。能衔任黄雀，亦欲应时明。

卷 770_24 【看牡丹】

殷益

拥毳对芳丛，由来趣不同。发从今日白，花是去年红。

· 全唐诗 ·

艳色随朝露，馨香逐晚风。何须待零落，然后始知空。

卷 770_25 【赋得垣衣】

李得

漠漠复霏霏，为君垣上衣。昭阳辇下草，应笑此生非。
掩蔼青春去，苍茫白露稀。犹胜萍逐水，流浪不相依。

卷 770_26 【冬晚对雪忆胡处士】

王邵

寒更传唱晚，清镜览衰颜。隔牖风惊竹，开帘雪满山。
洒空深巷静，积素广庭闲。借问袁安舍，翛然尚闭关。

卷 770_27 【池上】

曹修古

荷叶罩芙蓉，圆青映嫩红。佳人南陌上，翠盖立春风。

· 全唐诗 ·

卷 770_28 【对赵颖歌】

朱子真

人间几日变桑田，谁识神仙洞里天。
短促虽知有殊异，且须欢醉在生前。

卷 770_29 【赋百舌鸟】

严郭

此禽轻巧少同伦，我听长疑舌满身。星未没河先报晓，
柳犹粘雪便迎春。频嫌海燕巢难定，却讶林莺语不真。
莫倚清风更多事，玉楼还有晏眠人。

卷 770_30 【孤雁】

张子明

只影翩翩下碧湘，傍池鸳鹭宿银塘。虽逢夜雨迷深浦，
终向晴天著旧行。忆伴几回思片月，蛻翎多为系繁霜。
江南塞北俱关念，两地飞归是故乡。

· 全唐诗 ·

卷 770_31 【水殿抛球曲二首】

李谨言

侍宴黄昏晓未休，玉阶夜色月如流。
朝来自觉承恩最，笑倩傍人认绣球。

堪恨隋家几帝王，舞裯揉尽绣鸳鸯。
如今重到抛球处，不是金炉旧日香。

卷 770_32 【铜雀妓】

吴烛

秋色西陵满绿芜，繁弦急管强欢娱。
长舒罗袖不成舞，却向风前承泪珠。

卷 770_33 【戏示诸妓】

张保嗣

绿罗裙上标三棒，红粉腮边泪两行。
抄手向前咨大使，这回不敢恼儿郎。

· 全唐诗 ·

卷 770_34 【末秋到家】

潘图

归来无所利，骨肉亦不喜。黄犬却有情，当门卧摇尾。

卷 770_35 【送人往宣城】

潘佐

江畔送行人，千山生暮氛。谢安团扇上，为画敬亭云。

卷 770_36 【洛阳河亭奉酬留守郡公追送（一作李益诗）】

李逸

离亭饯落晖，腊酒减征衣。岁晚烟霞重，川寒云树微。
戎装千里至，旧路十年归。还似汀洲雁，相逢又背飞。

卷 770_37 【送道士曾昭莹】

沈麟

南北东西事，人间会也无。昔曾栖玉笥，今也返玄都。

· 全唐诗 ·

雪片随天阔，泉声落石孤。丹青人有约，去采石菖蒲。

卷 770_38 【赠别徐侃】

安凤

一自离乡国，十年在咸秦。泣尽卞和血，不逢一故人。
今日旧友别，羞此漂泊身。离情吟诗处，麻衣掩泪频。
泪别各分袂，且及来年春。

卷 770_39 【顾城】

李伦

世久荒墟在，白云几代耕。市廛新草绿，里社故烟轻。
不谨罹天讨，来苏岂忿兵。谁云殷鉴远，今古在人程。

卷 770_40 【金钱花】

卢子发

轮廓休夸四字书，红窠写出对庭除。
时时买得佳人笑，本色金钱却不如。

· 全唐诗 ·

卷 770_41 【故白岩禅师院】

王梦周

能师还世名还在，空闭禅堂满院苔。
花树不随人寂寞，数株犹自出墙来。

卷 770_42 【题九天使者庙（又见讖记卷）】

孙咸

独入玄宫礼至真，焚香不为贱贫身。秦淮两岸沙埋骨，
湓浦千家血染尘。庐阜烟霞谁是主，虎溪风月属何人。
九江太守勤王事，好放天兵渡要津。

卷 770_43 【房公旧竹亭闻琴】

李瀚

石室寒飚警，孙枝雅器裁。坐来山水操，弦断吊尘埃。

· 全唐诗 ·

卷 770_44 【清溪馆作】

钱戴

指途清溪里，左右唯深林。云蔽望乡处，雨愁为客心。
遇人多物役，听鸟时幽音。何必沧浪水，庶兹浣尘襟。

卷 770_45 【晚春宴】

韦道逊

日斜宾馆晚，春轻麦候初。檐暄巢幕燕，池跃戏莲鱼。
石声随流响，桐影傍岩疏。谁能千里外，独寄八行书。

卷 770_46 【长沙六快诗】

王揆

湖外风物奇，长沙信难续。衡峰排古青，湘水湛寒绿。
舟楫通大江，车轮会平陆。昔贤官是邦，仁泽流丰沃。
今贤官是邦，剗啖人脂肉。怀昔甘棠花，伤今猛虎毒。
然此一郡内，所乐人才六。漕与二宪僚，守连两通属。
高堂日暮会，深夜继以烛。帟幕皆绮紈，器皿尽金玉。
歌喉若珠累，舞腰如素束。千态与万状，六人欢不足。

· 全唐诗 ·

因成快活诗，荐之尧舜目。

卷 770_47 【广州王园寺伏日即事寄北中亲友】

王言史

南越逢初伏，东林度一朝。曲池煎畏景，高阁绝微飙。
竹簟移先洒，蒲葵破复摇。地偏毛瘴近，山毒火威饶。
裊汗絺如濯，亲床枕并烧。堕枝伤翠羽，菱叶惜红蕉。
且困流金炽，难成独酌谣。望霖窥润础，思吹候纤条。
旅恨生乌浒，乡心系浴桥。谁怜在炎客，一夕壮容销。

· 全唐诗 ·

第七百七十一卷

卷 771_1 【春日】

宋雍

轻花细叶满林端，昨夜春风晓色寒。
黄鸟不堪愁里听，绿杨宜向雨中看。

卷 771_2 【失题】

宋雍

斜雨飞丝织晚风，疏帘半卷野亭空。
荷花开尽秋光晚，零落残红绿沼中。

卷 771_3 【古意】

戴休斑

穷秋朔风起，沧海愁阴涨。虏骑掠河南，汉兵屯灞上。

· 全唐诗 ·

羽书惊沙漠，刁斗喧亭障。关塞何苍茫，遥烽递相望。
弱龄负奇节，侠客多招访。投笔弃繻生，提戈逐飞将。
拔剑照霜白，怒发冲冠壮。会立万里功，视君封侯相。

卷 771_4 【勸曹生】

卢鉉

桑扈交飞百舌忙，祖亭闻乐倍思乡。尊前有恨惭卑宦，
席上无憀爱艳妆。莫为狂花迷眼界，须求真理定心王。
游蜂采掇何时已，只恐多言议短长。

卷 771_5 【琴歌】

赵抃

绿琴制自桐孙枝，十年窗下无人知。清声不与众乐杂，
所以屈受尘埃欺。七弦脆断虫丝朽，辨别不曾逢好手。
琴声若似琵琶声，卖与时人应已久。玉徽冷落无光彩，
堪恨钟期不相待。凤啭吟幽鹤舞时，撚弄铮摐声亦在。
向曾守贫贫不彻，贱价与人人不别。前回忍泪却收来，
泣向秋风两条血。乃知凡俗难可名，轻者却重重者轻。
真龙不圣土龙圣，凤凰哑舌鸂鶒鸣。何殊此琴哀怨苦，
寂寞沈埋在幽户。万重山水不肯听，俗耳乐闻人打鼓。
知君立身待分义，驱喝风雷在平地。一生从事不因人，

· 全唐诗 ·

健步窅云皆自致。不辞重拂弦上尘，市廛不买多谗人。
莫辞憔悴与买取，为君一曲号青春。

卷 771_6 【废长行（辨其惑于无益之戏而不务恤民也）】

赵抃

紫牙镂合方如斗，二十四星衔月口。贵人迷此华筵中，
运木手交如阵斗。不算劳神运枯木，且废为官恤惻独。
门前有吏吓孤穷，欲诉门深抱冤哭。耳厌人催坐衙早，
才闻此戏身先到。理人似爱长行心，天下安平多草草。
何当化局为明镜，挂在高堂辨邪正。何当化子作笔锋，
常在手中行法令。莫令终日迷如此，不治生民负天子。

卷 771_7 【玉女词】

张安石

绮荐银屏空积尘，柳眉桃脸暗销春。
不须更学阳台女，为雨为云趁恼人。

卷 771_8 【苦别】

张安石

向前不信别离苦，而今自到别离处。

· 全唐诗 ·

两行粉泪红阑干，一朵芙蕖带残露。

卷 771_9 【石城】

蒋吉

系缆石城下，恣吟怀暂开。江人桡艇子，将谓莫愁来。

卷 771_10 【汉东道中】

蒋吉

九十九冈遥，天寒雪未消。羸童牵瘦马，不敢过危桥。

卷 771_11 【高溪有怀】

蒋吉

驻马高溪侧，旅人千里情。雁山山下水，还作此泉声。

卷 771_12 【寄进士贾希】

蒋吉

恨苦泪不落，耿然东北心。空囊与瘦马，羁绁意应深。

· 全唐诗 ·

卷 771_13 【出塞】

蒋吉

瘦马羸童行背秦，暮鸦撩乱入残云。
北风吹起寒营角，直至榆关人尽闻。

卷 771_14 【旅泊】

蒋吉

霜月正高鹦鹉洲，美人清唱发红楼。
乡心暗逐秋江水，直到吴山脚下流。

卷 771_15 【次青云驿】

蒋吉

马转栎林山鸟飞，商溪流水背残晖。
行人几在青云路，底事风尘犹满衣。

· 全唐诗 ·

卷 771_16 【大庾驿有怀】

蒋吉

一囊书重百余斤，邮吏宁知去计贫。
莫讶偏吟望乡句，明朝便见岭南人。

卷 771_17 【题商山修路僧院】

蒋吉

此地修行山几枯，草堂生计只瓶盂。
支郎既解除艰险，试看人心平得无。

卷 771_18 【题长安僧院】

蒋吉

出门争走九衢尘，总是浮生不了身。
惟有水田衣下客，大家忙处作闲人。

· 全唐诗 ·

卷 771_19 【次商於感旧寄卢中丞】

蒋吉

昔年簪组隘丘门，今日旌幢一院存。
何事商於泪如雨，小儒偏受陆家恩。

卷 771_20 【樵翁】

蒋吉

独入深山信脚行，惯当麋虎不曾惊。
路傍花发无心看，惟见枯枝刮眼明。

卷 771_21 【四老庙】

蒋吉

无端舍钓学干名，不得溪山养性情。
自省此身非达者，今朝羞拜四先生。

· 全唐诗 ·

卷 771_22 【昭君冢】

蒋吉

曾为汉帝眼中人，今作狂胡陌上尘。
身死不知多少载，冢花犹带洛阳春。

卷 771_23 【闻歌竹枝】

蒋吉

巡堤听唱竹枝词，正是月高风静时。
独向东南人不会，弟兄俱在楚江湄。

卷 771_24 【重门曲】

周澣

憔悴容华怯对春，寂寥宫殿锁闲门。
此身却羡宫中树，不失芳时雨露恩。

· 全唐诗 ·

卷 771_25 【山下水】

周湊

背云冲石出深山，浅碧泠泠一带寒。
不独有声流出此，会归沧海助波澜。

卷 771_26 【逢邻女】

周湊

日高邻女笑相逢，慢束罗裙半露胸。
莫向秋池照绿水，参差羞杀白芙蓉。

卷 771_27 【废宅】

周湊

牢落画堂空锁尘，荒凉庭树暗消春。
豪家莫笑此中事，曾见此中人笑人。

· 全唐诗 ·

第七百七十二卷

卷 772_1 【奉和登会昌山应制（一作钱起诗）】

赵起

睿想入希夷，真游到具茨。玉鸾登嶂远，云辂出花迟。
泉壑凝神处，阳和布泽时。六龙多顺动，四海正雍熙。

卷 772_2 【冬日与群公泛舟焦山】

王瓚

江外水不冻，今年寒复迟。众芳且未歇，近腊仍衿衣。
载酒适我情，兴来趣渐微。方舟大川上，环酌对落晖。
两片青石棱，波际无因依。三山安可到，欲到风引归。
沧溟壮观多，心目豁暂时。况得穷日夕，乘槎何所之。

纵步不知远，夕阳犹未回。好花随处发，流水趁人来。

· 全唐诗 ·

卷 772_3 【度揭鸿岭（漳州）】

慕容韦

闽越曾为塞，将军旧置营。我歌空感慨，西北望神京。

卷 772_4 【湘江】

黄文

潇湘江头三月春，柳条弄日摇黄金。鸕鶿一声在何许，
黄陵庙前烟霭深。丹青欲画无好手，稳提玉勒沈吟久。
马蹄不为行客留，心挂长林屡回首。

卷 772_5 【题龙阳县青草湖】

唐温如

西风吹老洞庭波，一夜湘君白发多。
醉后不知天在水，满船清梦压星河。

· 全唐诗 ·

卷 772_6 【訾家洲】

欧阳宾

旧业分明桂水头，人归业尽水东流。
春风日暮江头立，不及渔人有钓舟。

卷 772_7 【题吉州龙溪】

何敬

龙溪之山秀而峙，龙溪之水清无底。狂风激烈翻春涛，
薄雾冥濛溢清泚。奔流百折银河通，落花滚滚浮霞红。
四时佳境不可穷，仿佛直与桃源通。

卷 772_8 【过睦州青溪渡】

杨彝

天阔衔江雨，冥冥上客衣。潭清鱼可数，沙晚雁争飞。
川谷留云气，鹈鹕傍钓矶。飘零江海客，欹侧一帆归。

· 全唐诗 ·

卷 772_9 【闾閻城懷古】

裴瑤

五湖春水接遙天，國破君亡不記年。
惟有妖娥曾舞處，古台寂寞起愁煙。

卷 772_10 【葦谷】

鄭玉

水會三川漾碧波，雕陰人唱采花歌。
舊時白翟今荒壤，葦谷淒淒風雨多。

卷 772_11 【登岳陽樓】

麻溫其

湖邊景物屬秋天，樓上風光似去年。仙侶緱生留福地，
湘娥帝子寄哀弦。雲門自統軒台外，木葉偏飛楚客前。
極目江山何處是，一帆萬里信歸船。

· 全唐诗 ·

卷 772_12 【经望湖驿】

韦镒

大漠无屯云，孤峰出乱柳。前驱白登道，顾失飞狐口。
遥忆代王城，俯临恒山后。累累多古墓，寂寞为墟久。
岂不固金汤，终闻击铜斗。交欢初仗信，接宴翻贻咎。
埋宝贼夫人，磨笄伤彼妇。功成行且薄，义立名不朽。
莫慎纤微端，其何社稷守。身歿国遂亡，此立人君丑。

卷 772_13 【杪秋洞庭怀王道士】

谢太虚

漂泊日复日，洞庭今更秋。青桃亦何意，此夜催人愁。
惆怅客中月，裴回江上楼。心知楚天远，目送沧波流。
谢客久已灭，微言无处求。空余白云在，客兴随孤舟。
千里杳难尽，一身常独游。故园复何许，江汉徒迟留。

卷 772_14 【君山祠】

周岳秀

万顷湖波浸碧天，旌封香火几千年。风涛澎湃鱼龙舞，

· 全唐诗 ·

栋宇峥嵘燕雀迁。远岫光中浓淡树，斜阳影里往来船。
江河愿借吹嘘便，应有神功在目前。

卷 772_15 【新乐府】

马逢

温谷春生至，宸游近甸荣。云随天上转，风入御筵轻。
翠盖浮佳气，朱楼依太清。朝臣冠剑退，宫女管弦迎。

卷 772_16 【部落曲】

马逢

蕃军傍塞游，代马喷风秋。老将垂金甲，阏支著锦裘。
雕戈蒙豹尾，红旆插狼头。日暮天山下，鸣笳汉使愁。

卷 772_17 【从军】

马逢

汉马千蹄合一群，单于鼓角隔山闻。
沙埽风起红楼下，飞上胡天作阵云。

· 全唐诗 ·

卷 772_18 【宫词二首（一作顾况诗）】

马逢

金吾持戟护轩檐，天乐传教万姓瞻。
楼上美人相倚看，红妆透出水晶帘。

玉楼天半起笙歌，风送宫人笑语和。
月影殿开闻晓漏，水晶帘卷近秋河。

· 全唐诗 ·

第七百七十三卷

卷 773_1 【长门失宠】

萧意

自从别銮殿，长门几度春。不知金屋里，更贮若为人。

卷 773_2 【下山逢故夫】

徐之才

踟蹰下山妇，共申别离久。为问织缣人，何必长相守。

卷 773_3 【虏患】

张陵

今日汉家探使回，蚁叠胡兵来未歇。
春风渭水不敢流，总作六军心上血。

· 全唐诗 ·

卷 773_4 【夏日闺怨】

蔡瑰

桃径李蹊绝芳园，炎氛炽日满愁轩。枝上鸟惊朱槿落，
池中鱼戏绿蘋翻。君恋京师久留滞，妾怨高楼积年岁。
非关曾入楚王宫，直为相思腰转细。卧簟乘闲乍逐凉，
熏炉畏热懒焚香。雨沾柳叶如啼眼，露滴莲花似汗妆。
全由独自羞看影，艳是孤眠疑夜永。无情拂镜不成妆，
有时却扇还风静。近日书来道欲归，鸳鸯文锦字息机。
但恐愁容不相识，为教恒著别时衣。

卷 773_5 【咏破扇】

唐怡

轮如明月尽，罗似薄云穿。无由重掩笑，分在秋风前。

卷 773_6 【述怀】

唐怡

万事皆零落，平生不可思。惟余酒中趣，不减少年时。

· 全唐诗 ·

卷 773_7 【咏烛寄人】

潘求仁

烛与人相似，通宵遽白煎。不应须下泪，只是为人然。

卷 773_8 【薛王花烛行】

阎德隐

王子仙车下凤台，紫缨金勒驭龙媒。
出，环佩锵锵天上来。鹄鹊楼前云半卷，鸳鸯殿上月裴回。
玉盘错落银灯照，珠帐玲珑宝扇开。盈盈二八谁家子，
红粉新妆胜桃李。从来六行比齐姜，自许千门奉楚王。
楚王宫里能服饰，顾盼倾城复倾国。合欢锦带蒲萄花，
连理香裙石榴色。金炉半夜起氛氲，翡翠被重苏合熏。
不学曹王遇神女，莫言罗敷邀使君。同心婉婉若琴瑟，
更笑天河有灵匹。一朝福履盛王门，百代光辉增帝室。
富贵荣华实可怜，路傍观者谓神仙。只应早得淮南术，
会见双飞入紫烟。

卷 773_9 【三月歌】

阎德隐

洛阳城路九春衢，洛阳城外柳千株。

· 全唐诗 ·

能得来时作眼觅，天津桥侧锦屠苏。

卷 773_10 【妾薄命】

刘元叔

自从离别守空闺，遥闻征战赴云梯。夜夜思君辽海北，
年年弃妾渭桥西。阳春白日照空暖，紫燕衔花向庭满。
彩鸾琴里怨声多，飞鹊镜前妆梳断。谁家夫婿不从征，
应是渔阳别有情。莫道红颜燕地少，家家还似洛阳城。
旦逐新人殊未归，还令秋至夜霜飞。北斗星前横旅雁，
南楼月下捣寒衣。夜深闻雁肠欲绝，独坐缝衣灯又灭。
暗啼罗帐空自怜，梦度阳关向谁说。每怜容貌宛如神，
如何薄命不如人。待君朝夕燕山至，好作明年杨柳春。

卷 773_11 【古别离】

常理

君御狐白裘，妾居绡绮帟。粟钿金夹膝，花错玉搔头。
离别生庭草，征衣断戍楼。蟭蛸网清曙，菡萏落红秋。
小胆空房怯，长眉满镜愁。为传儿女意，不用远封侯。

· 全唐诗 ·

卷 773_12 【妾薄命】

常理

十五玉童色，双蛾青弯弯。鸟衔樱桃花，此时刺绣闲。
娇小恣所爱，误人金指环。艳花句引落，灭烛屏风关。
妾怕愁中画，君偷薄里还。初谓来心平若案，
谁知别意险如山。乍啼罗袖娇遮面，不忍看君莫惜颜。

卷 773_13 【虞姬怨】

冯待征

妾本江南采莲女，君是江东学剑人。逢君游侠英雄日，
值妾年华桃李春。年华灼灼艳桃李，结发簪花配君子。
行逢楚汉正相持，辞家上马从君起。岁岁年年事征战，
侍君帷幕损红颜。不惜罗衣沾马汗，不辞红粉著刀环。
相期相许定关中，鸣銮鸣佩入秦宫。谁误四面楚歌起，
果知五星汉道雄。天时人事有兴灭，智穷计屈心摧折。
泽中马力先战疲，帐下蛾眉 。君王是日无神彩，
贱妾此时容貌改。拔山意气都已无，渡江面目今何在。
终天隔地与君辞，恨似流波无息时。使妾本来不相识，
岂见中途怀苦悲。

· 全唐诗 ·

卷 773_14 【越谿怨】

冷朝光

越王宫里如花人，越水谿头采白蘋。
白蘋未尽人先尽，谁见江南春复春。

卷 773_15 【吴宫怨】

卫万

君不见吴王宫阁临江起，不见珠帘见江水。
晓气晴来双阙间，潮声夜落千门里。句践城中非旧春，
姑苏台下起黄尘。只今唯有西江月，曾照吴王宫里人。

卷 773_16 【春游吟】

李章

初春遍芳甸，十里蔼盈瞩。美人摘新英，步步玩春绿。
所思杳何处，宛在吴江曲。可怜不得共芳菲，
日暮归来泪满衣。

· 全唐诗 ·

卷 773_17 【婕妤怨】

王沈

长信梨花暗欲栖，应门上钥草萋萋。
春风吹花乱扑户，班绝车声不至啼。

卷 773_18 【夜夜曲】

王偃

北斗星移银汉低，班姬愁思凤城西。
青槐陌上行人绝，明月楼前乌夜啼。

卷 773_19 【明君词】

王偃

北望单于日半斜，明君马上泣胡沙。
一双泪滴黄河水，应得东流入汉家。

· 全唐诗 ·

卷 773_20 【拟古东飞伯劳歌】

李暇

秦王龙剑燕后琴，珊瑚宝匣镂双心。谁家女儿抱香枕，
开衾灭烛愿侍寝。琼窗半上金缕帟，轻罗掩面不遮羞。
青绮帟中坐相忆，红鸾镜里见愁色。檐花照月莺对栖，
空将可怜暗中啼。

卷 773_21 【怨诗三首】

李暇

罗敷初总髻，蕙芳正娇小。月落始归船，春眠恒著晓。
何处期郎游，小苑花台间。相忆不可见，且复乘月还。
别前花照路，别后露垂叶。歌舞须及时，如何坐悲妾。

卷 773_22 【碧玉歌】

李暇

碧玉上官妓，出入千花林。珠被玳瑁床，感郎情意深。

· 全唐诗 ·

卷 773_23 【见美人闻琴不听】

李播

洛浦风流雪，阳台朝暮云。闻琴不肯听，似妒卓文君。

卷 773_24 【赋诗】

辛弘智

君为河边草，逢春心剩生。妾如台上镜，得照始分明。

卷 773_25 【自君之出矣】

辛弘智

自君之出矣，梁尘静不飞。思君如满月，夜夜减容辉。

卷 773_26 【自君之出矣（又一首）】

辛弘智

自君之出矣，宝镜为谁明。思君如陇水，常闻呜咽声。

· 全唐诗 ·

第七百七十四卷

卷 774_1 【题春梦秋归故里】

吉师老

故国归路赊，春晚在天涯。明月夜来梦，碧山秋到家。
开窗闻落叶，远墅见晴鸦。惊起晓庭际，莺啼桃杏花。

卷 774_2 【看蜀女转昭君变】

吉师老

妖姬未著石榴裙，自道家连锦水滨。檀口解知千载事，
清词堪叹九秋文。翠眉颦处楚边月，画卷开时塞外云。
说尽绮罗当日恨，昭君传意向文君。

卷 774_3 【放猿】

吉师老

放尔千山万水身，野泉晴树好为邻。

· 全唐诗 ·

啼时莫近潇湘岸，明月孤舟有旅人。

卷 774_4 【鸳鸯】

吉师老

江岛濛濛烟霭微，绿芜深处刷毛衣。
渡头惊起一双去，飞上文君旧锦机。

卷 774_5 【巫峡听猿】

吴商浩

巴江猿啸苦，响入客舟中。孤枕破残梦，三声随晓风。
连云波澹澹，和雾雨濛濛。巫峡去家远，不堪魂断空。

卷 774_6 【长安春赠友人】

吴商浩

繁华堪泣帝城春，粉堞青楼势碍云。花对玉钩帘外发，
歌飘尘土路边闻。几多远客魂空断，何处王孙酒自醺。
各有归程千万里，东风时节恨离群。

· 全唐诗 ·

卷 774_7 【塞上即事】

吴商浩

身似星流迹似蓬，玉关孤望杳溟濛。寒沙万里平铺月，
晓角一声高卷风。战士殁边魂尚哭，单于猎处火犹红。
分明更想残宵梦，故国依然在甬东。

卷 774_8 【宿山驿】

吴商浩

文战何堪功未图，又驱羸马指天衢。露华凝夜渚莲尽，
月彩满轮山驿孤。岐路辛勤终日有，乡关音信隔年无。
好同范蠡扁舟兴，高挂一帆归五湖。

卷 774_9 【北邙山】

吴商浩

北邙山草又青青，今日销魂事可明。绿酒醉来春未歇，
白杨风起柳初晴。冈原旋葬松新长，年代无人阙半平。
堪取金炉九还药，不能随梦向浮生。

· 全唐诗 ·

卷 774_10 【秋塘晓望】

吴商浩

钟尽疏桐散曙鸦，故山烟树隔天涯。
西风一夜秋塘晓，零落几多红藕花。

卷 774_11 【水楼感事】

吴商浩

高柳蜩啼雨后秋，年光空感泪如流。
满湖菱荇东归晚，闲倚南轩尽日愁。

卷 774_12 【泊舟】

吴商浩

身逐烟波魂自惊，木兰舟上一帆轻。
云中有寺在何处，山底宿时闻磬声。

· 全唐诗 ·

卷 774_13 【湘云】

吴商浩

满湘江云莹空，纷纷长对水溶溶。
日西遥望自归处，尽挂九疑千万峰。

卷 774_14 【秋闺】

沈祖仙

白马三军客，青娥十载思。玉庭霜落夜，罗幌月明时。
炉冷蜘蛛喜，灯高熠耀期。愁多不可曙，流涕坐空帟。

卷 774_15 【秋闺】

邵士彦

斜日空庭暮，幽闺积恨盈。细风吹帐冷，微月度窗明。
怨坐啼相续，愁眠梦不成。调琴欲有弄，畏作断肠声。

· 全唐诗 ·

卷 774_16 【捣衣】

吴大江

沙塞秋应晚，金闺恨已空。那堪裂纨素，时许出房栊。
杵影弄寒月，砧声调夜风。裁缝双泪尽，万里寄云中。

卷 774_17 【题慈恩塔】

荆叔

汉国山河在，秦陵草树深。暮云千里色，无处不伤心。

卷 774_18 【三湘有怀】

萧静

柳絮飞来别洛阳，梅花落后到三湘。
世情已逐浮云散，离恨空随江水长。

卷 774_19 【九日对酒】

元凜

嘉辰复遇登高台，良朋笑语倾金罍。烟摊秋色正堪玩，

· 全唐诗 ·

风惹菊香无限来。未保乱离今日后，且谋欢洽玉山颓。
谁知靖节当时事，空学狂歌倒载回。

卷 774_20 【中秋夜不见月】

元凛

蟾轮何事色全微，赚得佳人出绣帏。四野雾凝空寂寞，
九霄云锁绝光辉。吟诗得句翻停笔，玩处临尊却掩扉。
公子倚栏犹怅望，懒将红烛草堂归。

卷 774_21 【雷塘】

徐振

九重城阙悲凉尽，一聚园林怨恨长。花忆所为犹自笑，
草知无道更应荒。诗名占得风流在，酒兴催教运祚亡。
若问皇天惆怅事，只应斜日照雷塘。

卷 774_22 【古意】

徐振

扰扰都城晓又昏，六街车马五侯门。

· 全唐诗 ·

箕山渭水空明月，可是巢由绝子孙。

卷 774_23 【寄人】

张昉

酷怜风月为多情，还到春时别恨生。
倚柱寻思倍惆怅，一场春梦不分明。

卷 774_24 【武昌阻风】

方泽

江上春风留客舟，无穷归思满东流。
与君尽日闲临水，贪看飞花忘却愁。

卷 774_25 【秋夜宿淮口】

景池

露白草犹青，淮舟倚岸停。风帆几处客，天地两河星。
树静禽眠草，沙寒鹿过汀。明朝谁结伴，直去泛沧溟。

· 全唐诗 ·

卷 774_26 【赠乔尊师】

张鸿

长忌时人识，有家云涧深。性惟耽嗜酒，贫不破除琴。
静鼓三通齿，频汤一味参。知师最知我，相引坐桎阴。

卷 774_27 【村行】

姚揆

天淡雨初晴，游人恨不胜。乱山啼蜀魄，孤棹宿巴陵。
影暗村桥柳，光寒水寺灯。罢吟思故国，窗外有渔罍。

卷 774_28 【颍川客舍】

姚揆

素琴孤剑尚闲游，谁共芳尊话唱酬。乡梦有时生枕上，
客情终日在眉头。云拖雨脚连天去，树夹河声绕郡流。
回首帝京归未得，不堪吟倚夕阳楼。

· 全唐诗 ·

卷 774_29 【独不见】

王训

日晚宜春暮，风软上林朝。对酒近初节，开楼荡夜谣。
石桥通小涧，竹路上青霄。持底谁见许，长愁成细腰。

卷 774_30 【归去来引】

张炽

归去来，归期不可违。相见旋明月，浮云共我归。

卷 774_31 【结客少年场行】

虞羽客

幽并侠少年，金络控连钱。窃符方救赵，击筑正怀燕。
轻生辞凤阙，挥袂上祁连。陆离横宝剑，出没骋征旃。
蒙轮恒顾敌，超乘忽争先。摧枯逾百战，拓地远三千。
骨都魂已散，楼兰首复传。龙城含宿雾，瀚海接遥天。
歌吹金微返，振旅玉门旋。烽火今已息，非复照甘泉。

· 全唐诗 ·

卷 774_32 【塞上】

郑渥

出门何处问西东，指画翻为语论同。到此客头潜觉白，
未秋山叶已飘红。帐前影落传书雁，日下声交失马翁。
早晚回鞭复南去，大衣高盖汉乡风。

卷 774_33 【洛阳道】

郑渥

客亭门外路东西，多少喧腾事不齐。杨柳惹鞭公子醉，
芟麻掩泪鲁人迷。通宵尘土飞山月，是处经营夹御堤。
顷刻知音几存殁，半回依约认轮蹄。

· 全唐诗 ·

第七百七十五卷

卷 775_1 【宜春郡城闻猿】

崔江

怨抱霜枝向月啼，数声清绕郡城低。
那堪日夜有云雨，便似巫山与建溪。

卷 775_2 【谪宜阳到荆渚】

李伋

汉江江水水连天，被谪宜阳路几千。
为问野人山鸟语，问予归棹是何年。

卷 775_3 【九疑山（山在萍乡，上有九疑仙观）】

刘望

鼎湖冠剑有遗踪，晋汉真人羽化同。九转药成丹灶冷，

· 全唐诗 ·

五车云去玉堂空。仙家日月蓬壶里，尘世烟花梦寐中。
徒有旧山流水畔，老松枝叶苦吟风。

卷 775_4 【郡城放猿献卫使君】

易思

千岩万壑与云连，放出雕笼任自然。叶洒惊风啼暮雨，
月凝残雪饮流泉。临岐莫似三声日，避射须依绕树年。
应解感恩寻太守，攀萝时复到楼前。

卷 775_5 【题袁州龙兴寺】

易思

百尺古松松下寺，宝幡朱盖画珊珊。
闲庭甘露几回落，青石绿苔犹未干。

卷 775_6 【山中送弟方质】

易思

山中殷勤弟别兄，兄还送弟下山行。
芦花飞处秋风起，日暮不堪闻雁声。

· 全唐诗 ·

卷 775_7 【寻易尊师不遇】

易思

烂熳红霞光照衣，苔封白石路微微。
华阳洞里人何在，落尽松花不见归。

卷 775_8 【秋日寄弟】

赵防

凉风飒庭户，渐疑华发侵。已经杨柳谢，犹听蟋蟀吟。
雨助滩声出，云连野色深。鹄鹑今在远，年酒共谁斟。

卷 775_9 【杨岐山】

刘廓

千峰围古寺，深处敞楼台。景异寻常处，人须特达来。
松杉寒更茂，岚霭昼还开。欲续丰碑语，含毫恨不才。

· 全唐诗 ·

卷 775_10 【南源山】

姚偓

修径投幽隐，轻裘怯暮寒。闲僧能解榻，倦客得休鞍。
白雨鸣山麓，青灯语夜阑。明朝梯石路，更仗笋舆安。

卷 775_11 【下第夜吟】

戴衢

扰扰东西南北情，何人于此悟浮生。
还缘无月春风夜，暂得独闻流水声。

卷 775_12 【句】

戴衢

坐落千门日，吟残午夜灯。

卷 775_13 【咏月】

李建枢

昨夜圆非今夜圆，却疑圆处减婵娟。

· 全唐诗 ·

一年十二度圆缺，能得几多时少年。

卷 775_14 【谢人惠琴材】

谢邕

风撼桐丝带月明，羽人乘醉截秋声。七弦妙制饶仙品，
三尺良材称道情。池小未开春浪泛，岳低犹欠暮云生。
何因乞与元中术，临化无妨膝上横。

卷 775_15 【谢僧寄拄杖】

谢邕

峭壁猿啼采处深，一枝奇异出孤岑。感师千里寄来意，
发我片云归去心。窗外冷敲檐冻折，溪边闲点戏鱼沈。
他年必藉相携力，蹇步犹能返故林。

卷 775_16 【失题二首】

唐备

天若无雪霜，青松不如草。地若无山川，何人重平道。

· 全唐诗 ·

一日天无风，四溟波尽息。人心风不吹，波浪高百尺。

卷 775_17 【道傍木】

唐备

狂风拔倒树，树倒根已露。上有数枝藤，青青犹未悟。

卷 775_18 【失题（一作陈叔宝诗）】

方棫

午醉醒来晚，无人梦自惊。夕阳如有意，长傍小窗明。

卷 775_19 【失题】

范夜

举意三江竭，兴心四海枯。南游李邕死，北望宋珪殂。

卷 775_20 【失题】

卢群玉

酒泻银瓶倒底清，夜深丝竹凤凰鸣。

· 全唐诗 ·

红妆醉起一花落，更引春风无限情。

卷 775_21 【投卢尚书】

卢群玉

无力不任为走役，有文安敢滞清平。
从来若把耕桑定，免恃雕虫误此生。

卷 775_22 【失题二首】

杨行敏

骛骀嘶叫知无定，骐驎低垂自有心。
山上高松溪畔竹，清风才动是知音。

杜鹃花里杜鹃啼，浅紫深红更傍溪。
迟日霏光搜客思，晓来山路恨如迷。

卷 775_23 【吴江别王长史】

张怀

多年襆被玉山岑，鬓雪欺人忽满簪。骛马虽然贪短豆，

· 全唐诗 ·

野麋终是忆长林。鲈鱼未得乘归兴，鸥鸟惟应信此心。
见说新桥好风景，会须乘月濯烦襟。

卷 775_24 【题天台石桥】

赵湘

白石峰犹在，横桥一径微。多年无客过，落日有云归。
水净苔生发，山寒树著衣。如何方广寺，千古去人稀。

卷 775_25 【寄朗陵兄】

杨持

刺举官犹屈，风谣政已成。行看换龟组，奏最谒承明。

卷 775_26 【咏麻溪在历阳西一里】

李聪

泠泠一带清溪水，远派 通历阳市。
涓涓出自碧湖中，流入楚江烟雾里。

· 全唐诗 ·

卷 775_27 【耒阳杜工部祠堂】

徐介

手接汨罗水，天心知所存。固教工部死，来伴大夫魂。
流落同千古，风骚共一源。消凝伤往事，斜日隐颓垣。

卷 775_28 【登单于台】

李士元

悔上层楼望，翻成极目愁。路沿葱岭去，河背玉关流。
马散眠沙碛，兵闲倚戍楼。残阳三会角，吹白旅人头。

卷 775_29 【登阁】

李士元

乱后独来登大阁，凭阑举目尽伤心。长堤过雨人行少，
废苑经秋草自深。破落侯家通永巷，萧条宫树接疏林。
总输释氏青莲馆，依旧重重布地金。

· 全唐诗 ·

第七百七十六卷

卷 776_1 【山中作】

冯道之

草堂在岩下，卜居聊自适。桂气满阶庭，松阴生枕席。
远瞻惟鸟度，旁信无人迹。霭霭云生峰，潺潺水流石。
颇寻黄卷理，庶就丹砂益。此即契吾生，何为苦尘役。

卷 776_2 【短歌二首】

徐谦

穷通皆是运，荣辱岂关身。不愿门前客，看时逢故人。
意气青云里，爽朗烟霞外。不羨一囊钱，唯重心襟会。

卷 776_3 【塞下曲】

杨达

秋日并州路，黄榆落故关。孤城吹角罢，数骑射雕还。

· 全唐诗 ·

帐幕遥临水，牛羊自下山。行人正垂泪，烽火起云间。

卷 776_4 【明妃怨】

杨达

汉国明妃去不还，马驼弦管向阴山。
匣中纵有菱花镜，羞对单于照旧颜。

卷 776_5 【送邹尊师归洞庭（一作杨达诗）】

杨逵

众岛在波心，曾居旧隐林。近闻飞檄急，转忆卧云深。
卖药唯供酒，归舟只载琴。遥知明月夜，坐石自开襟。

卷 776_6 【送张兵曹赴营田】

魏兼恕

河曲今无战，王师每务农。选才当重委，足食乃深功。
草色孤城外，云阴绝漠中。萧关休叹别，归望在乘骢。

· 全唐诗 ·

卷 776_7 【晚霁登汝南大云阁】

贾彦璋

禅宫新歇雨，香阁晚登临。邑树晴光起，川苗佳气深。
水包城下岸，云细郢中岑。自叹牵卑日，聊开望远心。

卷 776_8 【宿香山阁】

贾彦璋

暝望香山阁，梯云宿半空。轩窗闭潮海，枕席拂烟虹。
朱网防栖鸽，纱灯护夕虫。一闻鸡唱晓，已见日瞳瞳。

卷 776_9 【苏著作山池】

贾彦璋

水树子云家，峰瀛宛不赊。芥浮舟是叶，莲发岫为花。
酌蚁开春瓮，观鱼凭海查。游苏多石友，题赠满瑶华。

· 全唐诗 ·

卷 776_10 【王龙骧墓】

贾彦璋

昔擅登坛宠，爰光典午朝。刀悬临益梦，龙启渡江谣。
茂绩当年举，英魂此地销。唯余孤垄上，日夕起松飙。

卷 776_11 【折杨柳】

欧阳瑾

垂柳拂妆台，葳蕤叶半开。年华枝上见，边思曲中来。
嫩色宜新雨，轻花伴落梅。朝朝倦攀折，征戍几时回。

卷 776_12 【江南曲】

李叔卿

湖上女，江南花，无双越女春浣纱。风似箭，月如弦，
少年吴儿晓进船。郢家子弟谢家郎，乌巾白袷紫香囊。
菱歌思欲绝，楚舞断人肠。歌舞未终涕双陨，
旧宫坡陀才嶙隐。西山暮雨过江来，北渚春云沿海尽。
渡口水流缓，妾归宵剩迟。含情为君再理曲，
月华照出澄江时。

· 全唐诗 ·

卷 776_13 【芳树】

李叔卿

春看玫瑰树，西邻即宋家。门深重暗叶，墙近度飞花。
影拂桃阴浅，香传李径斜。靓妆愁日暮，流涕向窗纱。

卷 776_14 【送杨谏议赴河西节度判官兼呈韩王二侍御】

熊曜

贤哉征西将，幕府多俊人。筹议秉刀尺，话言在经纶。
先鞭羨之子，走马辞咸秦。庭论许名实，数公当即真。
行行弄文翰，婉婉光使臣。今者所从谁，不闻歌苦辛。
黄云萧关道，白日惊沙尘。虏寇有时猎，汉兵行复巡。
王师已无战，传檄奉良臣。

卷 776_15 【登巴陵开元寺西阁赠衡岳僧方外】

李宾

衡岳有开士，五峰秀贞骨。见君万里心，海水照秋月。
大臣南溟去，问道皆请谒。洒以甘露言，清凉润肌发。
湖海落天镜，香阁凌银阙。登眺餐惠风，心花期启发。

· 全唐诗 ·

卷 776_16 【登瓦官寺阁】

李宾

晨登瓦官阁，极眺金陵城。钟山对北户，淮水入南荣。
漫漫雨花落，嘈嘈天乐鸣。两廊振法鼓，四角吹风筝。
杳无霄汉上，仰攀日月行。山空霸气灭，地古寒阴生。
寥廓云海晚，苍茫宫观平。门余闾阖字，楼识凤凰名。
雷作百川动，神扶万拱倾。灵光一向贵，长此镇吴京。

卷 776_17 【金陵怀古】

唐尧臣

晋末英雄起，神器沦荒服。胡月蚀中原，白日升暘谷。
金陵实形胜，关山固重复。巨壑隍北壖，长江堑西隩。
凿山拟嵩华，穿地象伊穀。草昧席罗图，芟路戴黄屋。
一时因地险，五世享天禄。礼乐何煌煌，文章纷郁郁。
多士春林秀，作颂清风穆。出入三百年，朝事几翻覆。
揜抢如云勃，鲸鲵旋自曝。倦闻金鼎移，骤睹灵龟卜。
吁嗟王气尽，坐悲天运倏。天道何茫茫，善淫乃相复。
行路偏衣半，遂亡大梁族。日隐汀洲上，登舳舻川陆。
月回吴山树，风闻楚江鹄。因依兰蕙丛，采撷不盈掬。

· 全唐诗 ·

卷 776_18 【咏浮沔为辛明府作】

郑缙

行潦散轻沔，清规吐未收。雨来波际合，风起浪中浮。
晶晃明苔砌，参差绕芥舟。影疑星泛晓，光似露涵秋。
皎皎珠同净，漂漂梗共流。洁容无变染，圆知有谦柔。
欲作微涓效，先从淡水游。

卷 776_19 【莺（一作孙处玄诗）】

郑缙

欲啭声犹涩，将飞羽未调。高风不借便，何处得迁乔。

卷 776_20 【鹦鹉】

吴英秀

莫把金笼闭鹦鹉，个个聪明解人语。
忽然更向君前言，三十六宫愁几许。

· 全唐诗 ·

卷 776_21 【马】

陈凝

未明龙骨骏，幸得到神州。自有千金价，宁忘伯乐酬。
虽知殊款段，莫敢比骅骝。若遇追风便，当轩一举头。

卷 776_22 【凤】

伊梦昌

好是山家凤，歌成非楚鸡。毫光洒风雨，纹彩动云霓。
竹实不得饱，桐孙何足栖。岐阳今好去，律吕正凄凄。

卷 776_23 【送韦员外赴朔方】

郑严

白露边秋早，皇华戎事催。已推仙省妙，更是幕中才。
出钱倾朝列，深功伫帝台。坐闻长策利，终见勒铭回。

· 全唐诗 ·

卷 776_24 【险竿行】

柳曾

山险惊摧辘，水险能覆舟。奈何平地不肯立，
走上百尺高竿头。我不知尔是人耶复猿耶，
使我为尔长叹嗟。我闻孝子不许国，忠臣不爱家。
尔今轻命重黄金，忠孝两亏徒尔夸。始以险技悦君目，
终以贪心媚君禄。百尺高竿百度缘，一足参差一家哭。
险竿儿，听我语，更有险徒险于汝。重于权者失君恩，
落向天涯海边去。险竿儿，尔须知，险途欲往尔可思。
上得不下下不得，我谓此辈险于险竿儿。

卷 776_25 【琵琶行】

牛殳

何人斲得一片木，三尺春冰五音足。一弹决破真珠囊，
迸落金盘声断续。飘飘飏飏寒丁丁，虫豸出蛰神鬼惊。
秋鸿叫侣代云黑，猩猩夜啼蛮月明。潏潏汨汨声不定，
胡雏学汉语未正。若似长安月蚀时，满城敲鼓声磷磷。
青山飞起不压物，野水流来欲湿人。伤心忆得陈后主，
春殿半酣细腰舞。黄莺百舌正相呼，玉树后庭花带雨。
二妃哭处山重重，二妃没后云溶溶。夜深霜露锁空庙，
零落一丛斑竹风。金谷园中草初绿，石崇一弄思归曲。

· 全唐诗 ·

当时二十四友人，手把金杯听不足。又似贾客蜀道间，
千铎万磬鸣空山。未若此调呦呦兮啁啁，嘈嘈兮啾啾。
引之于山，兽不能走。吹之于水，鱼不能游。
方知此艺不可有，人间万事凭双手。若何为我再三弹，
送却花前一尊酒。

卷 776_26 【方响歌】

牛殳

乐中何乐偏堪赏，无过夜深听方响。缓击急击曲未终，
暴雨飘飘生坐上。铿铿铛铛寒重重，盘涡蹙派鸣蛟龙。
高楼漏滴金壶水，碎电打著山寺钟。又似公卿入朝去，
环珮鸣玉长街路。忽然碎打入破声，石崇推倒珊瑚树。
长短参差十六片，敲击宫商无不遍。此乐不教外人闻，
寻常只向堂前宴。

卷 776_27 【经太华】

卫光一

太华五千寻，重岩合沓起。势飞白云外，影倒黄河里。
上有千莲叶，服之久不死。山高采难得，叹息徒仰止。

· 全唐诗 ·

卷 776_28 【季夏入北山】

林璠

整驾俟明发，逶迤历险途。天形逼峰尽，地势入溪无。
树绕圆潭密，云横叠障孤。谁怜后时者，六月未南图。

卷 776_29 【适思】

颜胄

芳岁不我与，飒然凉风生。繁华扫地歇，蟋蟀充堂鸣。
感物增忧思，奋衣出游行。行值古墓林，白骨下纵横。
田竖鞭髑髅，村童扫精灵。精灵无奈何，像设安所荣。
石人徒瞑目，表柱烧无声。试读碑上文，乃是昔时英。
位极君诏葬，勋高盈忠贞。宠终禁樵采，立嗣修坟茔。
运否前政缺，群盗多蚊虻。即此丘垄坏，铁心为沾纓。
当其崇树日，岂意侵夺并。冥漠生变故，凄凉结幽明。
悲端岂自我，外物纷相萦。所适非所见，前登江上城。
倚楼临绿水，一望解伤情。

· 全唐诗 ·

第七百七十七卷

卷 777_1 【古意】

邢象玉

家中酒新熟，园里叶初荣。伫杯欲取醉，悵然思友生。
忽闻有奇客，何姓复何名。嗜酒陶彭泽，能琴阮步兵。
何须问寒暑，径共坐山亭。举袂祛啼鸟，扬巾扫落英。
心神无俗累，歌咏有新声。新声是何曲，沧浪之水清。

卷 777_2 【采莲曲】

张敬徽

游女泛江晴，莲红水复清。竞多愁日暮，争疾畏船倾。
波动疑钗落，风生觉袖轻。相看未尽意，归浦棹歌声。

卷 777_3 【采莲】

徐玄之

越艳荆姝惯采莲，兰桡画楫满长川。秋来江上澄如练，

· 全唐诗 ·

映水红妆如可见。此时莲浦珠翠光，此日荷风罗绮香。
纤手周游不暂息，红英烂熳殊未极。夕鸟栖林人欲稀，
长歌哀怨采莲归。

卷 777_4 【同崔员外温泉宫即事】

郭汭

辇辂移双阙，宸游整六师。天回紫微座，日转羽林旗。
雷气寒戈戟，军容壮武貔。弓鸣射雁处，泉暖跃龙时。
惠化成观俗，讴谣入赋诗。同欢王道盛，相与咏雍熙。

卷 777_5 【题沈黎城】

权彻

苏子卧北海，马翁渡南洲。迹恨事乃立，功达名遂休。
夜闻羽书至，召募此边州。铁骑耀楚甲，玉匣横吴钩。
雪厚群山冻，蓬飞荒塞秋。久戍蜀辞苦，数战期封侯。
不学竖儒辈，谈经空白头。

卷 777_6 【登乐游原怀古】

豆卢回

缅惟汉宣帝，初谓皇曾孙。虽在襁褓中，亦遭巫蛊冤。

· 全唐诗 ·

至哉丙廷尉，感激义弥敦。驰逐莲勺道，出入诸陵门。
一朝风云会，竟登天位尊。握符升宝历，负宸御华轩。
赫奕文物备，葳蕤休瑞繁。卒为中兴主，垂名于后昆。
雄图奄已谢，余址空复存。昔为乐游苑，今为狐兔园。
朝见牧竖集，夕闻栖鸟喧。萧条灞亭岸，寂寞杜陵原。
霁罢野烟起，苍茫岚气昏。二曜屡回薄，四时更凉温。
天道尚如此，人理安可论。

卷 777_3 【静女歌】

张南容

静女乐于静，动合古人则。妙年工诗书，弱岁勤组织。
端居愁若痴，谁复理容色。十五坐幽闺，四邻不相识。
天天邻家子，百花装首饰。日月淇上游，笑人不逾阕。
河水自浊济自清，仙台蛾眉秦镜明。为照齐王门下丑，
何如汉帝掌中轻。

卷 777_4 【古兴二首】

沈徽

蔓草自细微，女萝始天天。夤缘至百尺，荣耀非一朝。
敷色高碧岭，流芳薄丹霄。如何摧秀木，正为余波漂。
茎叶落岩迹，英蕤从风飘。洪柯不足恃，况乃托陵苕。

· 全唐诗 ·

长安富豪右，信是天下枢。戚里笙歌发，禁门冠盖趋。
攀云无丑土，唾地尽成珠。日晏下双阙，烟花乱九衢。
恩荣在片言，零落亦须臾。何意还自及，曲池今已芜。

卷 777_5 【晚望（一作夕次华阴北亭）】

林琨

清晨孤亭里，极目对前岑。远与天水合，长霞生夕林。
苍然平楚意，杳霭半秋阴。落日川上尽，关城云外深。
方予事岩壑，及此欲抽簪。诗就蓬山道，还兹契宿心。

卷 777_6 【阳春歌】

吴象之

帘低晓露湿，帘卷莺声急。欲起把箜篌，如凝彩弦涩。
孤眠愁不转，点泪声相及。净扫阶上花，风来更吹入。

卷 777_7 【少年行】

吴象之

承恩借猎小平津，使气常游中贵人。

· 全唐诗 ·

一掷千金浑是胆，家无四壁不知贫。

卷 777_8 【晚至乡亭】

郑德玄

长亭日已暮，驻马暂盘桓。山川杳不极，徒侣默相看。
云夕荆台暗，风秋郢路寒。客心一如此，谁复采芳兰。

卷 777_9 【舟行旦发】

张轸

夜帆时未发，同侣暗相催。山晓月初下，江鸣潮欲来。
稍分扬子岸，不辨越王台。自客水乡里，舟行知几回。

卷 777_10 【奉和夏日游山应制】

蔡文恭

首夏林壑清，薄暮烟霞上。连岩耸百仞，绝壑临千丈。
照灼晚花鲜，潺湲夕流响。悠然动睿思，息驾寻真赏。
挹彼涡川作，怀兹洛滨想。窃吹等齐竽，何用承恩奖。

· 全唐诗 ·

卷 777_11 【旅泊江津言怀】

贾宗

征途几迢递，客子倦西东。乘流如泛梗，逐吹似惊蓬。
飘飘万里外，辛苦百年中。异县心期阻，他乡风月同。
云归全岭暗，日落半江红。自然堪进泪，非是泣途穷。

卷 777_12 【大梁行】

唐尧客

客有成都来，为我弹鸣琴。前弹别鹤操，后奏大梁吟。
大梁伤客情，荒台对古城。版筑有陈迹，歌吹无遗声。
雄哉魏公子，畴日好罗英。秀士三千人，煌煌列众星。
金槌夺晋鄙，白刃刎侯嬴。邯郸救赵北，函谷走秦兵。
君子荣且昧，忠信莫之明。间谍忽来及，雄图靡克成。
千龄万化尽，但见汴水清。旧国多孤垒，夷门荆棘生。
苍梧彩云没，湘浦绿池平。闻有东山去，萧萧班马鸣。
河洲掣宿莽，日夕泪沾纓。因之唁公子，慷慨此歌行。

卷 777_13 【秋日送别】

朱晦

荒郊古陌时时断，野水浮云处处秋。

· 全唐诗 ·

唯有河边衰柳树，蝉声相送到扬州。

卷 777_14 【送人归山】

石召

相逢唯道在，谁不共知贫。归路分残雨，停舟别故人。
霜明松岭晓，花暗竹房春。亦有栖闲意，何年可寄身。

卷 777_15 【早行遇雪】

石召

荒郊昨夜雪，羸马又须行。四顾无人迹，鸡鸣第一声。

卷 777_16 【送安养阎主簿还竹寺】

林珙

分手怨河梁，南征历汉阳。江山追宋玉，云雨梦襄王。
醉里宜城近，歌中郢路长。更寻栖枳处，犹是念仇香。

· 全唐诗 ·

卷 777_17 【晚投南村】

卫叶

客行逢日暮，原野散秋晖。南陌人初断，西林鸟尽归。
暗蓬沙上转，寒叶月中飞。村落无多在，声声近捣衣。

· 全唐诗 ·

第七百七十八卷

卷 778_1 【题季子庙】

李季华

季子让社稷，又能听国风。宁知千载后，蘋藻冷祠宫。

卷 778_2 【听琴】

王玄

拂尘开按匣，何事独颦眉。古调俗不乐，正声君自知。

卷 778_3 【失鹭鸶】

李归唐

惜养来来岁月深，笼开不见意沈吟。
也知只在秋江上，明月芦花何处寻。

· 全唐诗 ·

卷 778_4 【铜雀妓】

朱光弼

魏王铜雀妓，日暮管弦清。一见西陵树，心悲舞不成。

卷 778_5 【宫词】

朱光弼

梦里君王近，宫中河汉高。秋风能再热，团扇不辞劳。

卷 778_6 【惆怅诗九首】

顾甄远

魂黯黯兮情脉脉，帘风清兮窗月白。
梦惊枕上炉烬销，不见蕊珠宫里客。

禁漏声稀蟾魄冷，纱厨筠簟波光净。
独坐愁吟暗断魂，满窗风动芭蕉影。

别恨离肠空恻恻，风动虚轩池水白。
莫言灵圃步难寻，有心终效偷桃客。

· 全唐诗 ·

愁遇人间好风景，焦桐韵满华堂静。
鉴鸾钗燕恨何穷，忍向银床空抱影。

绿槐影里傍青楼，陌上行人空举头。
烟水露花无处问，摇鞭凝睇不胜愁。

役尽心神销尽骨，恩情未断忽分离。
平生此恨无言处，只有衣襟泪得知。

浓醪艳唱愁难破，骨瘦魂消病已成。
若为多罗年少死，始甘人道有风情。

泪满罗衣酒满卮，一声歌断怨伤离。
如今两地心中事，直是瞿昙也不知。

横泥杯觞醉复醒，愁牵时有小诗成。
早知惹得千般恨，悔不天生解薄情。

卷 778_7 【登清居台】

魏炤

迤迤清居台，连延白云外。侧聆天上语，下视飞鸟背。

· 全唐诗 ·

卷 778_8 【游昌化精舍】

柳明献

宝台侵汉远，金地接霞高。何必游天外，忻此契卢敖。

卷 778_9 【善卷先生坛】

蔡昆

几到坛边登阁望，因思遗迹咏今朝。
当时为有重华出，不是先生傲帝尧。

卷 778_10 【句】

蔡昆

飘飘随暮雨，飒飒落秋山。（《落叶》，王正字《诗格》）

卷 778_11 【题鄜州相思铺（一作令狐楚诗）】

令狐挺

谁把相思号此河，塞垣车马往来多。

· 全唐诗 ·

只应自古征人泪，洒向空川作逝波。

卷 778_12 【凤归云二首】

滕潜

金井栏边见羽仪，梧桐枝上宿寒枝。
五陵公子怜文彩，画与佳人刺绣衣。

饮啄蓬山最上头，和烟飞下禁城秋。
曾将弄玉归云去，金翮斜开十二楼。

卷 778_13 【药圃】

夏侯子云

绿叶红英遍，仙经自讨论。偶移岩畔菊，锄断白云根。

卷 778_14 【读孝经】

方愚

星彩满天朝北极，源流是处赴东溟。
为臣为子不忠孝，辜负宣尼一卷经。

· 全唐诗 ·

卷 778_15 【赠葛氏小娘子】

潘雍

曾闻仙子住天台，欲结灵姻愧短才。
若许随君洞中住，不同刘阮却归来。

卷 778_16 【送孙舍人归湘州】

梁陟

盛才倾世重，清论满朝归。作隼他年计，为鸳此日飞。
比肩移日近，抗首出郊畿。为报清漳水，分明照锦衣。

卷 778_17 【再登河阳城怀古】

朱延

客游倦旅思，憩驾陟崇墉。元凯标奇迹，安仁擅美踪。
远近浊河流，出没青山峰。伫想空不极，怀古怅无从。

· 全唐诗 ·

卷 778_18 【题莹上人院】

寇埴

舍筏求香偈，因泉演妙音。是明捐俗网，何独在山林。
缭绕藤轩密，逶迤竹径深。为传同学志，兹宇可清心。

卷 778_19 【燕衔泥（一作冯著诗）】

冯渚

双燕碌碌飞入屋，屋中老人喜燕归，裴回绕我床头飞。
去年为尔逐黄雀，雨多屋漏泥土落。尔莫厌老翁茅屋低，
梁头作窠梁下栖。尔不见东家黄鹂鸣啧啧，
蛇盘瓦沟鼠穿壁。豪家大屋尔莫居，骄儿少妇采尔雏。
井旁写水泥自足，衔泥上屋随尔欲。

· 全唐诗 ·

第七百七十九卷

卷 779_1 【日暖万年枝】

王约

霭霭彤庭里，沈沈玉砌陲。初升九华日，潜暖万年枝。
煦妪光偏好，青葱色转宜。每因韶景丽，长沐惠风吹。
隐映当龙阙，氛氲隔凤池。朝阳光照处，唯有近臣知。

卷 779_2 【日暖万年枝】

郭求

旭日升溟海，芳枝散曙烟。温仁临树久，煦妪在条偏。
阳德符君惠，嘉名表圣年。若承恩渥厚，常属栋梁贤。
生植虽依地，光华只信天。不才堪仄陋，徒望向荣先。

卷 779_3 【日暖万年枝】

郑师贞

禁树敷荣早，偏将丽日宜。光摇连北阙，影泛满南枝。

· 全唐诗 ·

得地方知照，逢时异赫曦。叶和盈数积，根是永年移。
宵露犹残润，薰风更共吹。余晖诚可托，况近凤凰池。

卷 779_4 【日华川上动】

石殷士

曙霞攒旭日，浮景弄晴川。晃曜层潭上，悠扬极浦前。
岸高时拥媚，波远渐澄鲜。萍实空随浪，珠胎不照渊。
早暄依曲渚，微动触轻涟。孰假咸池望，幽情得古篇。

卷 779_5 【闻击壤】

石殷士

尧年听野老，击壤复何云。自谓欢由己，宁知德在君。
气平闲易畅，声贺作难分。耕凿方随日，恩威比望云。
簪桴均下调，和木等南薰。无落于吾事，谁将帝力闻。

卷 779_6 【初日照华清宫】

柴宿

灵山初照泽，远近见离宫。影动参差里，光分缥缈中。

· 全唐诗 ·

鲜飙收晚翠，佳气满晴空。林润温泉入，楼深复道通。
璇题生炯晃，珠缀引月胧。凤辇何时幸，朝朝此望同。

卷 779_19 【瑜不掩瑕】

柴宿

朗玉微瑕在，分明异璞瑜。坚贞宁可杂，美恶自能殊。
待价知弥久，称忠定不诬。光辉今见黜，毫发外呈符。
岂假良工指，堪为达士模。他山傥磨琢，慕爱是洪炉。

卷 779_20 【秋日悬清光】

陶拱

秋至云容敛，天中日景清。悬空寒色净，委照曙光盈。
泫泫看弥上，辉辉望最明。烟霞轮乍透，葵藿影初生。
鉴下应无极，升高自有程。何当回盛彩，一为表精诚。

卷 779_21 【三让月成魄（不得泛说乡饮之事）】

刘王虬

为礼依天象，周旋逐月成。教人三让美，为客一宵生。

· 全唐诗 ·

初进轮犹暗，终辞影渐明。幸陪宾主位，取舍任亏盈。

卷 779_22 【海上生明月】

朱华

皎皎秋中月，团圆海上生。影开金镜满，轮抱玉壶清。
渐出三山岳，将凌一汉横。素娥尝药去，乌鹊绕枝惊。
照水光偏白，浮云色最明。此时尧砌下，蓂莢自将荣。

卷 779_23 【月夜梧桐叶上见寒露】

戴察

萧疏桐叶上，月白露初团。滴沥清光满，荧煌素彩寒。
风摇愁玉坠，枝动惜珠干。气冷疑秋晚，声微觉夜阑。
凝空流欲遍，润物净宜看。莫厌窥临倦，将睎聚更难。

卷 779_24 【清露被皋兰】

孙顾

九皋兰叶茂，八月露华清。稍与秋阴合，还将晓色并。
向空罗细影，临水泫微明。的皪添幽兴，芊绵动远情。

· 全唐诗 ·

夕芳人未采，初降鹤先惊。为感生成惠，心同葵藿倾。

卷 779_25 【宿烟含白露】

孙 顔

析析有新意，微微曙色幽。露含疏月净，光与晓烟浮。
迴野遥凝素，空林望已秋。著霜寒未结，凝叶滴还流。
比玉偏清洁，如珠讵可收。裴回阡陌上，瞻想但淹留。

卷 779_26 【送薛大夫和蕃】

孙 顔

亚相独推贤，乘轺向远边。一心倾汉日，万里望胡天。
忠信皇恩重，要荒圣德传。戎人方屈膝，塞月复婵娟。
别思流莺晚，归朝候雁先。当书外垣传，回奏赤墀前。

卷 779_27 【风光草际浮】

陈 璿

春风泛摇草，旭日遍神州。已向花间积，还来叶上浮。
晓光缘圃丽，芳气满街流。澹荡依朱萼，飏飏带玉沟。

· 全唐诗 ·

向空看转媚，临水见弥幽。况被崇兰色，王孙正可游。

卷 779_28 【风光草际浮】

裴杞

澹荡和风至，芊绵碧草长。徐吹遥扑翠，半偃乍浮光。
叶似翻宵露，丛疑扇夕阳。逶迤明曲渚，照耀满回塘。
白芷生还暮，崇兰泛更香。谁知揽结处，含思向余芳。

卷 779_29 【风光草际浮】

陈祐

香发王孙草，春生君子风。光摇低偃处，影散艳阳中。
稍稍移蘋末，微微转蕙丛。浮烟倾绿野，远色澹晴空。
泛彩池塘媚，含芳景气融。清晖谁不挹，几许赏心同。

卷 779_30 【风光草际浮】

吴秘

草色春沙里，风光晓正幽。轻明摇不散，郁昱丽仍浮。
吹缓苗难转，晖闲叶本柔。碧凝烟彩入，红是日华流。

· 全唐诗 ·

耐可披襟对，谁应满掬收。恭闻掇芳客，为此尚淹留。

卷 779_31 【风光草际浮】

张复元

纤纤春草长，迟日度风光。霏靡含新彩，霏微笼远芳。
殊姿媚原野，佳色满池塘。最好垂清露，偏宜带艳阳。
浅深浮嫩绿，轻丽拂余香。好助莺迁势，乘时冀便翔。

卷 779_32 【冬至日祥风应候】

穆寂

节逢清景至，占气二仪中。独喜登台日，先知应候风。
呈祥光舜化，表庆感尧聪。既与乘时叶，还将入律同。
微微万井遍，习习九门通。更绕炉烟起，殷勤报岁功。

卷 779_33 【清风戒寒】

穆寂

风清物候残，萧洒报将寒。扫得天衢静，吹来眼界宽。
条鸣方有异，虫思乱无端。就树收鲜蛄，冲池起涩澜。

· 全唐诗 ·

过山岚可掬，度月色宜看。华实从兹始，何嗟岁序殚。

卷 779_34 【风草不留霜】

王景中

繁霜当永夜，寒草正惊风。飘素衰蘋末，流光晚蕙丛。
悠扬方泛影，皎洁却飞空。不定离披际，难凝翳荟中。
低昂闲散质，肃杀想成功。独感玄晖咏，依依此夕同。

卷 779_35 【春云】

邓倚

摇曳自西东，依林又逐风。势移青道里，影泛绿波中。
夕霁方明日，朝阳复蔽空。度关随去马，出塞引归鸿。
色任寒暄变，光将远近同。为霖如见用，还得助成功。

卷 779_36 【登云梯】

汤洙

谢客常游处，层峦枕碧溪。经过殊俗境，登陟象云梯。
步步劳山屐，行行蹑涧霓。迴临天路广，俯眺夕阳低。

· 全唐诗 ·

赏咏情弥惬，风尘事已睽。前修如可慕，投足固思齐。

卷 779_37 【登云梯】

殷琮

碧落远澄澄，青山路可升。身轻疑易蹋，步独觉难凭。
迢迢排将近，回翔势渐登。上宁愁屈曲，高更喜超腾。
江树遥分蔼，山岚宛若凝。赤城容许到，敢惮百千层。

卷 779_38 【秋山极天净】

朱延龄

雨洗高秋净，天临大野闲。葱茏清万象，缭绕出层山。
日落千峰上，云销万壑间。绿萝霜后翠，红叶雨来殷。
散彩辉吴甸，分形压楚关。欲寻霄汉路，延首愿登攀。

· 全唐诗 ·

第七百八十卷

卷 780_1 【春台晴望】

郑蕡

追赏层台迥，登临四望频。熙熙山雨霁，处处柳条新。
草长秦城夕，花明汉苑春。晴林翻去鸟，紫陌阅行人。
旅客风尘厌，山家梦寐亲。迁莺思出谷，鸛翥待芳辰。

卷 780_2 【天骥呈材】

郑蕡

毛骨合天经，拳奇步骤轻。曾邀于阗驾，新出贰师营。
喷勒金铃响，追风汗血生。酒亭留去迹，吴坂认嘶声。
力可通衢试，材堪圣代呈。王良如顾盼，垂耳欲长鸣。

卷 780_3 【律中应钟（一作裴次元诗）】

裴元

律穷方数寸，室暗在三重。伶管灰先动，秦正节已逢。

· 全唐诗 ·

商声辞玉笛，羽调入金钟。密叶翻霜彩，轻冰敛水容。
望鸿南去绝，迎气北来浓。愿托无凋性，寒林自比松。

卷 780_4 【闰月定四时】

杜周士

得闰因贞岁，吾君敬授时。体元承夏道，推历法尧咨。
直取归余改，非如再失欺。葭灰初变律，斗柄正当离。
寒暑功前定，春秋气可推。更怜幽谷羽，鸣跃尚须期。

卷 780_5 【闰月定四时】

乐伸

圣代承尧历，恒将闰正时。六旬余可借，四序应如期。
分至宁愆素，盈虚信不欺。斗杓重指甲，灰琯再推离。
羲氏兼和氏，行之又则之。愿言符大化，永永作元龟。

卷 780_6 【闰月定四时】

徐至

积数归成闰，羲和职旧司。分铢标斗建，盈缩正人时。

· 全唐诗 ·

节候潜相应，星辰自合期。寸阴宁越度，长历信无欺。
定向铜壶辨，还从玉律推。高明终不谬，委鉴本无私。

卷 780_7 【新阳改故阴】

纥干讽

律管才推候，寒郊忽变阴。微和方应节，积惨已辞林。
暗觉余渐断，潜惊丽景侵。禁城佳气换，北陆翠烟深。
有截知遐布，无私荷照临。韶光如可及，莺谷免幽沈。

卷 780_8 【春水绿波】

朱休

芳时淑气和，春水澹烟波。滉漾滋兰杜，沦涟长芰荷。
晚光扶翠潋，潭影写青莎。归雁追飞尽，纤鳞游泳多。
朝宗终到海，润下每盈科。愿假中流便，从兹发棹歌。

卷 780_9 【海水不扬波】

李沛

明朝崇大道，寰海免波扬。既合千年圣，能安百谷王。

· 全唐诗 ·

天心随泽广，水德共灵长。不挠鱼弥乐，无澜苇可航。
化流沾率土，恩浸及殊方。岂只朝宗国，惟闻有越裳。

卷 780_10 【四水合流】

李沛

禹凿山川地，因通四水流。萦回过凤阙，会合出皇州。
天影长波里，寒声古渡头。入河无昼夜，归海有谦柔。
顺物宜投石，逢时可载舟。羡鱼犹未已，临水欲垂钩。

卷 780_11 【登圣善寺阁望龙门】

成嶧

高阁聊登望，遥分禹凿门。刹连多宝塔，树满给孤园。
香境超三界，清流振陆浑。报慈弘孝理，行道得真源。
空净祥烟霁，时光受日温。愿从初地起，长奉下生尊。

卷 780_12 【秋霁望庐山瀑布】

夏侯楚

常思瀑布幽，晴眺喜逢秋。一带连青嶂，千寻倒碧流。

· 全唐诗 ·

湿云应误鹤，翻浪定惊鸥。星浦虹初下，炉峰烟未收。
岩高时褭褭，天净起悠悠。傥见朝宗日，还须济巨舟。

卷 780_13 【济川用舟楫】

胡权

渺渺水连天，归程想几千。孤舟辞曲岸，轻楫济长川。
迴指波涛雪，回瞻岛屿烟。心迷沧海上，目断白云边。
泛滥虽无定，维持且自专。还如圣明代，理国用英贤。

卷 780_14 【洛出书】

郭邕

德合天贶呈，龙飞圣人作。光宅被寰区，图书荐河洛。
象登四气顺，文辟九畴错。氤氲瑞彩浮，左右灵仪廓。
微造功不宰，神行利攸博。一见皇家庆，方知禹功薄。

卷 780_15 【洛出书】

张钦敬

浮空九洛水，瑞圣千年质。奇象八卦分，图书九畴出。

· 全唐诗 ·

含微卜筮远，抱数阴阳密。中得天地心，傍探鬼神吉。
昔闻夏禹代，今献唐尧日。谬此叙彝伦，寰宇贺清谧。

卷 780_16 【洛出书】

叔孙玄观

清洛含温溜，玄龟荐宝书。波开绿字出，瑞应紫宸居。
物著群灵首，文成列卦初。美珍翔阁凤，庆迈跃舟鱼。
俾似惟何远，休皇复在诸。东都主人意，歌颂望乘舆。

卷 780_17 【玉壶冰】

王季友

玉壶知素结，止水复中澄。坚白能虚受，清寒得自凝。
分形同晓镜，照物掩宵灯。璧映圆光入，人惊爽气凌。
金罍何足贵，瑶席几回升。正值求珪瓚，提携共饮冰。

卷 780_18 【美玉】

南巨川

抱玉将何适，良工正在斯。有瑕宁自掩，匪石幸君知。

· 全唐诗 ·

雕琢嗟成器，缁磷志不移。饰樽光宴赏，入珮奉威仪。
象德曾留记，如虹窃可奇。终希逢善价，还得桂林枝。

卷 780_19 【琢玉】

丁居晦

卞玉何时献，初疑尚在荆。琢来闻制器，价衒胜连城。
虹气冲天白，云浮入信贞。珮为廉节德，杯作侈奢名。
露璞方期辨，雕文幸既成。他山岂无石，宁及此时呈。

卷 780_20 【白珪无玷】

辛宏

片玉表坚贞，逢时宝自呈。色鲜同雪白，光润夺冰清。
皎皎无瑕玷，锵锵有珮声。昆山标重价，垂棘振香名。
抱璞心常苦，全真道未行。琢磨忻大匠，还冀动连城。

卷 780_21 【蛟人潜织】

康翊仁

珠馆冯夷室，灵蛟信所潜。幽闲云碧牖，滉漾水精帘。

· 全唐诗 ·

机动龙梭跃，丝萦藕淬添。七襄牛女恨，三日大人嫌。
透手击吴练，凝冰笑越缣。无因听札札，空想濯纤纤。

卷 780_22 【瑕瑜不相掩】

陈中师

出石温然玉，瑕瑜素在中。妍媸因异彩，音韵信殊风。
让美心方并，求疵意本同。光华开缜密，清润仰磨砢。
秀质非攘善，贞姿肯废忠。今来傥成器，分别在良工。

卷 780_23 【夏玉有余声】

管雄甫

夏玉音难尽，凝人思转清。依稀流户牖，仿佛在檐楹。
更逐松风起，还将涧水并。乐中和旧曲，天际转余声。
漂渺浮烟远，温柔入耳轻。想如君子佩，时得上堂鸣。

卷 780_24 【珠还合浦】

邓陟

至宝含冲粹，清虚映浦湾。素辉明荡漾，圆彩色玢斑。

· 全唐诗 ·

昔逐诸侯去，今随太守还。影摇波里月，光动水中山。
鱼目徒相比，骊龙乍可攀。愿将车饰用，长得耀君颜。

卷 780_25 【浊水求珠】

吕价

至宝诚难得，潜光在浊流。深沈当处晦，皎洁庶来求。
缀履将还用，褰裳必更收。蚌胎应自别，鱼目岂能侔。
日彩逢高鉴，星光讵暗投。不因今日取，泥滓出无由。

卷 780_26 【暗投明珠】

苑誠

至宝欣怀日，良兹岂可侔。神光非易鉴，夜色信难投。
错落珍寰宇，圆明隔浅流。精灵辞合浦，素彩耀神州。
抱影希人识，承时望帝求。谁言按剑者，猜忌却生雠。

卷 780_27 【暗投明珠】

罗泰

媚川时未识，在掌共传名。报德能欺暗，投人自欲明。

· 全唐诗 ·

月临幽室朗，星没晓河倾。的皪骊龙颔，荧煌彩凤呈。
守恩辞合浦，擅美掩连城。鱼目应难近，谁知按剑情。

卷 780_28 【暗投明珠】

崔藩

至宝看怀袖，明珠出后收。向人光不定，离掌势难留。
皎澈虚临夜，孤圆冷莹秋。乍来惊月落，疾转怕星流。
有泪甘瑕弃，无媒自暗投。今朝感恩处，将欲报隋侯。

卷 780_29 【泗滨得石磬】

李勋

浮磬潜清深，依依呈碧浔。出水见贞质，在悬含玉音。
对此喜还叹，几秋还到今。器古契良觌，韵和谐宿心。
何为值明鉴，适得离幽沈。自兹入清庙，无复泥沙侵。

· 全唐诗 ·

第七百八十一卷

卷 781_1 【玄元皇帝应见贺圣祚无疆】

赵铎

圣主今司契，神功格上玄。岂唯求傅野，更有叶钧天。
审梦西山下，焚香北阙前。道光尊圣日，福应集灵年。
咫尺真容近，巍峨大象悬。觞从百寮献，形为万方传。
声教唯皇矣，英威固邈然。惭无美周颂，徒上祝尧篇。

卷 781_2 【太常寺观舞圣寿乐】

徐元鼎

舞字传新庆，人文迈旧章。冲融和气洽，悠远圣功长。
盛德流无外，明时乐未央。日华增顾眄，风物助低昂。
翥凤方齐首，高鸿忽断行。云门与兹曲，同是奉陶唐。

· 全唐诗 ·

卷 781_3 【太清宫闻滴漏】

严巨川

玉漏移中禁，齐车入太清。渐知催辨色，复听续余声。
乍逐微风转，时因杂珮轻。青楼人罢梦，紫陌骑将行。
残魄栖初尽，余寒滴更生。惭非朝谒客，空有振衣情。

卷 781_4 【仲秋太常寺观公卿辂车拜陵】

严巨川

南吕初开律，金风已戒凉。拜陵将展敬，车辂俨成行。
士庶观祠礼，公卿习旧章。郊原佳气引，园寝瑞烟长。
卤簿辞丹阙，威仪列太常。圣心何所寄，惟德在无忘。

卷 781_5 【贡举人谒先师闻雅乐】

吕炅

礼圣来群彦，观光在此时。闻歌音乍远，合乐和还迟。
调朗能谐竹，声微又契丝。轻泠流篴簴，缭绕动纓綈。
九变将随节，三终必尽仪。国风由是正，王化自雍熙。

· 全唐诗 ·

卷 781_6 【望凌烟阁】

刘公兴

画阁凌虚构，遥瞻在九天。丹楹崇壮丽，素壁绘勋贤。
霭霭浮元气，亭亭出瑞烟。近看分百辟，远揖误群仙。
图列青云外，仪刑紫禁前。望中空霁景，骧首几留连。

卷 781_7 【观北番谒庙】

王卓

肃肃层城里，巍巍祖庙清。圣恩覃布濩，异域献精诚。
冠盖分行列，戎夷变姓名。礼终齐百拜，心洁尽忠贞。
瑞气千重色，箫韶九奏声。仗移迎日转，旆动逐风轻。
休运威仪盛，丰年俎豆盈。不堪惭颂德，空此望簪缨。

卷 781_8 【舞干羽两阶】

石倚

干羽能柔远，前阶舞正陈。欲称文德盛，先表乐声新。
肃肃行初列，森森气益振。动容和律吕，变曲静风尘。
化美超千古，恩波及七旬。已知天下服，不独有苗人。

· 全唐诗 ·

卷 781_9 【御制段太尉碑】

叶元良

多难全高节，时清轸圣君。园茔标石篆，雨露降天文。
义激忠贞没，词伤兰蕙焚。国人皆堕泪，王府已铭勋。
揭出临新陌，长留对古坟。睿情幽感处，应使九泉闻。

卷 781_10 【恩赐魏文贞公诸孙旧第，以导直臣】

裴大章

邢茅虽旧锡，邸第是初荣。迹往伤遗事，恩深感直声。
云孙方庆袭，池馆忽春生。古甃开泉井，新禽绕画楹。
自然垂带砺，况复激忠贞。必使千年后，长书竹帛名。

卷 781_11 【恩赐耆老布帛（一作李绛诗）】

崔宗

涣汗中天发，殊私海外存。衰颜逢圣代，华发受皇恩。
烛物明尧日，垂衣辟禹门。惜时悲落景，赐帛慰余魂。
厚泽沾祥咏，微生保子孙。盛明今尚齿，欢洽九衢樽。

· 全唐诗 ·

卷 781_12 【东都父老望幸】

郑馥

鸾舆秦地久，羽卫洛阳空。彼土虽凭固，兹川乃得中。
龙颜覲白日，鹤发仰清风。望幸诚逾邈，怀来意不穷。
昔因封泰岳，今伫蹑维嵩。天地心无异，神祇理亦同。
翠华翔渭北，玉检候关东。众愿其难阻，明君早勒功。

卷 781_13 【言行相顾】

吴叔达

圣人垂政教，万古请常传。立志言为本，修身行乃先。
相须宁得阙，相顾在无偏。荣辱当于己，忠贞必动天。
大名如副宝，至道亦通玄。千里犹能应，何云迕者焉。

卷 781_14 【言行相顾】

孟翱

将使言堪复，常闻行欲先。比珪斯不玷，修己直如弦。
跬步非全进，吹嘘稟自然。当令夫子察，无宿仲由贤。
正遇兴邦际，因怀入署年。坐知清监下，相顾有人焉。

· 全唐诗 ·

卷 781_15 【人不易知】

郑昉

如面诚非一，深心岂易知。入秦书十上，投楚岁三移。
和玉翻为泣，齐竽或滥吹。周行虽有寘，殷鉴在前规。
寅亮推多士，清通固赏奇。病诸方号哲，敢相反成疵。
冬日承余爱，霜云喜暂披。无令见瞻后，回照复云疲。

卷 781_16 【早春送郎官出宰】

袁求贤

仙郎今出宰，圣主下忧民。紫陌轩车送，丹墀雨露新。
趋程犹犯雪，行县正逢春。粉署时回首，铜章已在身。
鸣琴化欲展，起草恋空频。今日都门外，悠悠别汉臣。

卷 781_17 【钱王将军赴云中】

孟匡明

一师凭庙略，分阃佐元戎。势亚彤弓宠，时推金印雄。
关山横代北，旌节壮河东。日转前茅影，春生细柳风。
饮冰君命速，挥涕贱筵空。伫听阴山静，谁争万里功。

· 全唐诗 ·

卷 781_18 【西戎即叙】

李子昂

悬首藁街中，天兵破犬戎。营收低陇月，旗偃度湟风。
肃杀三边劲，萧条万里空。元戎咸服罪，余孽尽输忠。
圣理符轩化，仁恩契禹功。降逾洞庭险，臬拟郅支穷。
已散军容捷，还资庙算通。今朝观即叙，非与献獒同。

· 全唐诗 ·

第七百八十二卷

卷 782_1 【禁中春松】

员南溟

郁郁贞松树，阴阴在紫宸。葱茏偏近日，青翠更宜春。
雅韵风来起，轻烟雾后新。叶深栖语鹤，枝亚拂朝臣。
全节长依地，凌云欲致身。山苗荫不得，生植荷陶钧。

卷 782_2 【玉烛】

员南溟

历象璿玑正，休征玉烛明。四时佳气满，五纬太阶平。
律吕风光至，烟云瑞色呈。年和知岁稔，道泰喜秋成。
寰海皇恩被，乾坤至化清。自怜同野老，帝力讵能名。

卷 782_3 【文宣王庙古松】

李胄

列植成均里，分行古庙前。阴森非一日，苍翠自何年。

· 全唐诗 ·

寒影烟霜暗，晨光枝叶妍。近檐阴更静，临砌色相鲜。
每愧闻钟磬，多惭接豆筵。更宜教胄子，于此学贞坚。

卷 782_4 【华林园早梅】

郑述诚

晓日东楼路，林端见早梅。独凌寒气发，不逐众花开。
素彩风前艳，韶光雪后催。蕊香沾紫陌，枝亚拂青苔。
止渴曾为用，和羹旧有才。含情欲攀折，瞻望几裴回。

卷 782_5 【龙池春草】

宋迪

凤阙韶光遍，龙池草色匀。烟波全让绿，堤柳不争新。
翻叶迎红日，飘香借白蘋。幽姿偏占暮，芳意欲留春。
已胜生金埒，长思藉玉轮。翠华如见幸，正好及兹辰。

卷 782_6 【龙池春草】

万俟造

暖积龙池绿，晴连御苑春。迎风茎未偃，裊露色犹新。

· 全唐诗 ·

苒苒分阶砌，离离杂荇蘋。细丛依远渚，疏影落轻沦。
迟引萦花蝶，偏宜拾翠人。那怜献赋者，惆怅惜兹辰。

卷 782_7 【贡院楼北新栽小松】

钱众仲

爱此凌霜操，移来独占春。贞心初得地，劲节始依人。
笼月烟犹薄，当轩色转新。枝低无宿羽，叶静不留尘。
每与芝兰近，常惭雨露均。幸因逢顾盼，生植及兹辰。

卷 782_8 【玉壶冰】

钱众仲

冬律初阴结，寒冰贮玉壶。霜姿虽异禀，虹气亦相符。
对月光宜并，临池影不孤。贞坚方共济，同处岂殊途。
色莹连城璧，形分照乘珠。提携今在此，抱素节宁渝。

卷 782_9 【潘安仁戴星看河阳花发】

吕敞

行春潘令至，勤恤戴星光。为政宵忘寝，临人俗冀康。

· 全唐诗 ·

晓花迎径发，新蕊满城香。秀色沾轻露，鲜辉丽早阳。
津桥见来往，空雾拂衣裳。桃李今无数，从兹愿比方。

卷 782_10 【龟兹闻莺】

吕敞

边树正参差，新莺复陆离。娇非胡俗变，啼是汉音移。
绣羽花间覆，繁声风外吹。人言曾不辨，鸟语却相知。
出谷情何寄，迁乔义取斯。今朝乡陌伴，几处坐高枝。

卷 782_11 【好鸟鸣高枝】

郑袞

养翮非无待，迁乔信自卑。影高迟日度，声远好风随。
云拂千寻直，花催百啭奇。惊人时向晚，求友听应知。
委质经三岁，先鸣在一枝。上林如可托，弱羽愿差池。

卷 782_12 【金谷园花发怀古】

张公义

今日春风至，花开石氏园。未全红艳折，半与素光翻。

· 全唐诗 ·

点缀疏林遍，微明古径繁。窥临莺欲语，寂寞李无言。
谷变迷铺锦，台余认树萱。川流人事共，千载竟谁论。

卷 782_13 【织鸟】

张何

季春三月里，戴胜下桑来。映日华冠动，迎风绣羽开。
候惊蚕事晚，织向女工裁。旅宿依花定，轻飞绕树回。
欲过高阁柳，更拂小庭梅。所寄一枝在，宁忧弋者猜。

卷 782_14 【出笼鹞】

濮阳瓘

玉铍分花袖，金铃出彩笼。摇心长捧日，逸翰镇生风。
一点青霄里，千声碧落中。星眸随狡兔，霜爪落飞鸿。
每念提携力，常怀搏击功。以君能惠好，不敢没遥空。

卷 782_15 【试越裳贡白雉】

王若岩

素翟宛昭彰，遥遥自越裳。冰晴朝映日，玉羽夜含霜。

· 全唐诗 ·

岁月三年远，山川九泽长。来从碧海路，入见白云乡。
作瑞兴周后，登歌美汉皇。朝天资孝理，惠化且无疆。

卷 782_16 【敕赐三相马】

张随

上苑骅骝出，中宫诏命传。九天班锡礼，三相代劳年。
顾主声犹发，追风力正全。鸣珂龙阙下，喷玉凤池前。
四足疑云灭，双瞳比镜悬。为因能致远，今日表求贤。

卷 782_17 【河中献捷】

张随

叛将忘恩久，王师不战通。凯歌千里内，喜气二仪中。
寇尽条山下，兵回汉苑东。将军初执讯，明主欲论功。
落日烟尘静，寒郊壁垒空。苍生幸无事，自此乐尧风。

卷 782_18 【天骥呈材】

徐仁嗣

至德符天道，龙媒应圣明。追风奇质异，喷玉彩毛轻。

· 全唐诗 ·

躩躩形难状，连拳势乍呈。效材矜逸态，绝影表殊名。
岐路宁辞远，关山岂惮行。盐车虽不驾，今日亦长鸣。

卷 782_19 【天骥呈材】

卢征

异产应尧年，龙媒顺制牵。权奇初得地，躩躩欲行天。
讵假调金埒，宁须动玉鞭。嘶风深有恋，逐日定无前。
周满夸常驭，燕昭恨不传。应知流赭汗，来自海西偏。

卷 782_20 【雪夜听猿吟】

顾伟

寒岩飞暮雪，绝壁夜猿吟。历历和群雁，寥寥思客心。
绕枝犹避箭，过岭却投林。风冷声偏苦，山寒响更深。
听时无有定，静里固难寻。一宿扶桑月，聊看怀好音。

卷 782_21 【寒蝉树】

沈鹏

一叶初飞日，寒蝉益易惊。入林惭织细，依树愧身轻。

· 全唐诗 ·

大干时容息，乔枝或借鸣。心由饮露静，响为逐风清。
忝有翮分翼，应怜喙喉声。不知微薄影，早晚挂纓纓。

卷 782_22 【临川羡鱼】

薛少殷

曾是归家客，今年且未旋。游鳞方有待，织网岂能捐。
向水烟波夕，吟风岁月迁。莓苔生古岸，葭菼变清川。
不逐沧波叟，还宗内外篇。良辰难自掷，此日愿忘筌。

卷 782_23 【临川羡鱼】

张元正

有客百愁侵，求鱼正在今。广川何渺漫，高岸几登临。
风水宁相阻，烟霞岂惮深。不应同逐鹿，讵肯比从禽。
结网非无力，忘筌自有心。永存芳饵在，伫立思沈沈。

· 全唐诗 ·

第七百八十三卷

卷 783_1 【答王无功入长安咏秋蓬见示】

辛学士

托根虽异所，飘叶早相依。因风若有便，更共入云飞。

卷 783_2 【哭李远】

卢尚书

昨日舟还浙水湄，今朝丹旆欲何为。才收北浦一竿钓，
未了西斋半局棋。洛下已传平子赋，临川争写谢公诗。
不堪旧里经行处，风木萧萧邻笛悲。

卷 783_3 【湘中怨讽】

郑仆射

青鹞苦幽独，隔江相对稀。夜寒芦叶雨，空作一声归。

· 全唐诗 ·

卷 783_4 【登汾上阁】

郑中丞

汾桂秋水阔，宛似到阊门。惆怅江湖思，惟将南客论。

卷 783_5 【为御史衔命出关谏狱，道中看华山有诗】

韩常侍

野麋蒙象暂如犀，心不惊鸥角骇鸡。
一路好山无伴看，断肠烟景寄猿啼。

卷 783_6 【寄织锦篇与薛郎中（时为补阙，谢病归山）】

韩常侍

锦字龙梭织锦篇，凤凰文采间非烟。
并他时世新花样，虚费工夫不直钱。

卷 783_7 【和人忆鹤】

韩常侍

拂拂云衣冠紫烟，已为丁令一千年。

· 全唐诗 ·

留君且伴居山客，幸有松梢明月天。

卷 783_8 【句】

韩常侍

情多不似家山水，夜夜声声旁枕流。

卷 783_9 【赠米都知】

梁补阙

供奉三朝四十年，圣时流落发衰残。
贪将乐府歌明代，不把清吟换好官。

卷 783_10 【题安国观】

卢尚书

夕照纱窗起暗尘，青松绕殿不知春。
君看白首诵经者，半是宫中歌舞人。

· 全唐诗 ·

卷 783_11 【自商山宿隐居（一作灵一诗）】

苏广文

闻道桃源堪避秦，寻幽数日不逢人。烟霞洞里无鸡犬，
风雨林中有鬼神。黄公石上三芝秀，陶令门前五柳春。
醉卧白云闲入梦，不知何物是吾身。

卷 783_12 【夜归华川因寄幕府】

苏广文

山村寥落野人稀，竹里衡门掩翠微。溪路夜随明月入，
亭皋春伴白云归。嵇康懒慢仍耽酒，范蠡逋逃又拂衣。
汀畔数鸥闲不起，只应知我已忘机。

卷 783_13 【春日过田明府遇焦山人】

苏广文

陶公归隐白云溪，买得春泉溉药畦。夜静林间风虎啸，
月明竹上露禽栖。陈仓邑吏惊烽火，太白山人讶鼓鼙。
相见只言秦汉事，武陵溪里草萋萋。

· 全唐诗 ·

卷 783_14 【题升山】

任生

城外升山寺，城中望宛然。及登无半日，欲到已经年。

卷 783_15 【投曹文姬诗（文姬，长安中倡女，工翰墨，时号书仙）】

任生

玉皇前殿掌书仙，一染尘心下九天。
莫怪浓香薰骨腻，云衣曾惹御炉烟。

卷 783_16 【绝句】

吴公

去国投兹土，编茅隐旧踪。年年秋水上，独对数株松。

卷 783_17 【献卢常侍】

曹生

拜玉亭前闲送客，此时孤恨感离乡。

· 全唐诗 ·

寻思往岁绝纓事，肯向朱门泣夜长。

卷 783_18 【赋新月】

繆氏子

初月如弓未上弦，分明挂在碧霄边。
时人莫道蛾眉小，三五团圆照满天。

卷 783_19 【悼妓诗】

京兆韦氏子

惆怅金泥簇蝶裙，春来犹见伴行云。
不教布施刚留得，浑似初逢李少君。

· 全唐诗 ·

第七百八十四卷

卷 784_1 【长宁公主宅流杯】

景龙文馆士

凭高瞰迥足怡心，菌阁桃源不暇寻。
余雪依林成玉树，残霏点岫即瑶岑。

卷 784_2 【侍宴桃花园咏桃花应制】

神龙从臣

源水丛花无数开，丹跗红萼间青梅。
从今结子三千岁，预喜仙游复摘来。

卷 784_3 【玉龙子诗】

天宝时人

圣运潜符瑞玉龙，自兴云雨更无踪。

· 全唐诗 ·

不如渭水沙中得，争保銮舆复九重。

卷 784_4 【寄兄】

僖宗北省官

涉江今日恨偏多，援笔长吁欲奈何。
倘使泪流西去得，便应添作锦江波。

卷 784_5 【题屈原祠】

洪州将军

苍藤古木几经春，旧祀祠堂小水滨。
行客谩陈三酎酒，大夫元是独醒人。

卷 784_6 【题端正树】

贞元文士

昔日偏沾雨露荣，德皇西幸赐嘉名。
马嵬此去无多地，合向杨妃冢上生。

· 全唐诗 ·

卷 784_7 【寄内诗】

河北士人

握笔题诗易，荷戈征戍难。惯从鸳被暖，怯向雁门寒。
瘦尽宽衣带，啼多渍枕檀。试留青黛著，回日画眉看。

卷 784_8 【代妻答诗（一作女郎葛鸦儿作）】

河北士人

蓬鬓荆钗世所稀，布裙犹是嫁时衣。
胡麻好种无人种，合是归时底不归？

卷 784_9 【丙申岁诗】

元和举子

元和天子丙申年，三十三人同得仙。
袍似烂银文似锦，相将白日上青天。

· 全唐诗 ·

卷 784_10 【刺安南事诗】

懿宗朝举子

南荒不择吏，致我交趾覆。联绵三四年，致我交趾辱。
懦者斗则退，武者兵益黩。军容满天下，战将多金玉。
刮得齐民疮，分为猛士禄。雄雄许昌师，忠武冠其族。
去为万骑风，住为一川肉。时有残卒回，千门万户哭。
哀声动閭里，怨气成山谷。谁能听鼓声，不忍看金镞。
念此堪泪流，悠悠颍川绿。

卷 784_11 【歌】

白衫举子

执板狂歌乞个钱，尘中流浪且随缘。
直饶到老常如此，犹胜危时弄化权。

卷 784_12 【睹野花思京师旧游】

唐末朝士

曾过街西看牡丹，牡丹才谢便心阑。
如今变作村园眼，鼓子花开也喜欢。

· 全唐诗 ·

卷 784_13 【哥舒歌】

西鄙人

北斗七星高，哥舒夜带刀。至今窥牧马，不敢过临洮。

卷 784_14 【答人】

太上隐者

偶来松树下，高枕石头眠。山中无历日，寒尽不知年。

卷 784_15 【向竹吟】

黄山隐

积尘为太山，掬水成东海。富贵有时乖，希夷无日改。
绛节出崆峒，霓衣发光彩。古者有七贤，六个今何在。

卷 784_16 【歌】

婺州山中人

静居青嶂里，高啸紫烟中。尘世连仙界，琼田前路通。

· 全唐诗 ·

卷 784_17 【五子之歌】

同谷子

邦惟固本自安宁，临下常须驭朽惊。
何事十旬游不返，祸胎从此召殷兵。

酒色声禽号四荒，那堪峻宇又雕墙。
静思今古为君者，未或因兹不灭亡。

唯彼陶唐有翼方，少年都不解思量。
如今算得当时事，首为盘游乱纪纲。

明明我祖万邦君，典则贻将示子孙。
惆怅太康荒坠后，覆宗绝祀灭其门。

仇雠万姓遂无依，颜厚何曾解忸怩。
五子既歌邦已失，一场前事悔难追。

卷 784_18 【献公佐诗】

崔公佐客

破额幞头衫也穿，使君犹许对华筵。
今朝幸倚文章守，遮莫青蛾笑揭天。

· 全唐诗 ·

卷 784_19 【赠妓茂英】

洛中举子

忆昔当初过柳楼，茂英年小尚娇羞。隔窗未省闻高语，
对镜曾窥学上头。一别中原俱老大，再来南国见风流。
弹弦酌酒话前事，零落碧云生暮愁。

卷 784_20 【又赠】

洛中举子

少插花枝少下筹，须防女伴妒风流。
坐中若打占相令，除却尚书莫点头。

卷 784_21 【寄故姬】

江陵士子

阴云幂幂下阳台，惹著襄王更不回。五度看花空有泪，
一心如结不曾开。纤萝自合依芳树，覆水宁思返旧杯。
惆怅高丽坡底宅，春光无复下山来。

· 全唐诗 ·

卷 784_22 【吟】

织锦人

学织缭绫功未多，乱拈机杼错抛梭。
莫教官锦行家见，把此文章笑杀他。

卷 784_23 【句】

织锦人

如今不重文章士，莫把文章夸向人。

卷 784_24 【送南中尉】

吏部选人

羨君初拜职，嗟我独无名。且是正员尉，全胜兼试卿。

卷 784_25 【题紫微观】

建业卜者

昨日朝天过紫微，醺坛风冷杏花稀。

· 全唐诗 ·

碧桃泥我传消息，何事人间更不归。

卷 784_26 【题邓仙客墓】

天峽游人

鹤老芝田鸡在笼，上清那与俗尘同。
既言白日升仙去，何事人间有殡宫。

卷 784_27 【题故翠微宫】

骊山游人

翠微寺本翠微宫，楼阁亭台几十重。
天子不来僧又去，樵夫时倒一株松。

卷 784_28 【吟】

衡州舟子

野鹄滩西一棹孤，月光遥接洞庭湖。
堪嗟回雁峰前过，望断家山一字无。

· 全唐诗 ·

卷 784_29 【月夜】

华山老人

涧水泠泠声不绝，溪流茫茫野花发。
自去自来人不知，归时常对空山月。

卷 784_30 【终南（一作陈季卿诗）】

终南山翁

霜鹤鸣时夕风急，乱鸦又向寒林集。
此君辍棹悲且吟，独对莲花一峰立。

卷 784_31 【大庆堂赐宴元珣有诗呈吴越王】

吴越人

非为亲贤展绮筵，恒常宁敢恣游盘。绿搓杨柳绵初软，
红晕樱桃粉未干。谷鸟乍啼声似涩，甘霖方霁景犹寒。
笙歌风紧人酣醉，却绕珍丛烂熳看。

· 全唐诗 ·

卷 784_32 【又和】

吴越人

櫻桃花下会亲贤，风远铜壶转露盘。蝶下粉墙梅乍折，
蚁浮金斝酒难干。云和缓奏泉声咽，珠箔低垂水影寒。
狂简斐然吟咏足，却邀群彦重吟看。

卷 784_33 【再和】

吴越人

我有嘉宾宴乍欢，画帘纹细凤双盘。影笼沼沚修篁密，
声透笙歌羯鼓干。散后便依书筐寐，渴来潜想玉壶寒。
櫻桃零落红桃媚，更俟旬余共醉看。

卷 784_34 【重和】

吴越人

冷宴殷勤展小园，舞鞦柔软彩虬盘。簪花尽日疑头重，
病酒经宵觉口干。嘉树倚楼青琐暗，晚云藏雨碧山寒。
文章天子文章别，八采卢郎未可看。

· 全唐诗 ·

卷 784_35 【御制春游长句】

吴越人

天意分明道已光，春游嘉景胜仙乡。玉炉烟直风初静，
银汉云销日正长。柳带似眉全展绿，杏苞似脸半开香。
黄莺历历啼红树，紫燕关关语画梁。低槛晚晴笼翡翠，
小池波暖浴鸳鸯。马嘶广陌贪新草，人醉花堤怕夕阳。
比屋管弦呈妙曲，连营罗绮斗时妆。全吴霸越千年后，
独此升平显万方。

· 全唐诗 ·

第七百八十五卷

卷 785_1 【明月湖醉后蔷薇花歌】

无名氏

万朵当轩红灼灼，晚阴照水尘不著。西施醉后情不禁，
侍儿扶下蕊珠阁。柔条嫩蕊轻菩颰，一低一昂合又开。
深红浅绿状不得，日斜池畔香风来。红能柔，绿能软，
浓淡参差相宛转。舞蝶双双谁唤来，轻绡片片何人剪。
白发使君思帝乡，驱妻领女游花傍。持杯忆著曲江事，
千花万叶垂宫墙。复有同心初上第，日暮华筵移水际。
笙歌日日徵教坊，倾国名倡尽佳丽。我曾此处同诸生，
飞盂落盏纷纵横。将欲得到上天路，刚向直道中行去。
一朝失势当如此，万事如灰壮心死。谁知奏御数万言，
翻割龟符四千里。丈夫达则贤，穷则愚。胡为紫，胡为朱？
莫思身外穷通事，且醉花前一百壶。

卷 785_2 【春二首】

无名氏

裊裊东风吹水国，金鸦影暖南山北。蒲抽小剑割湘波，

· 全唐诗 ·

柳拂长眉舞春色。白铜堤下烟苍苍，林端细蕊参差香。
绿桑枝下见桃叶，回看青云空断肠。

乌足迟迟日宫里，天门击鼓龙蛇起。风师剪翠换枯条，
青帝授蓝染江水。蜂蝶缤纷抱香蕊，锦鳞跳掷红云尾。
绣衣白马不归来，双成倚槛春心醉。

卷 785_3 【夏】

无名氏

赤帝旗迎火云起，南山石裂吴牛死。绣楹夜夜箔虾须，
象榻重重簟湘水。彤彤日脚烧冰井，古陌尘飞野烟静。
汉帝高堂汗若珠，班姬明月无停影。

卷 785_4 【秋】

无名氏

月色驱秋下穹昊，梁间燕语辞巢早。古苔凝紫贴瑶阶，
露槿啼红堕江草。越客羁魂挂长道，西风欲揭南山倒。
粉娥恨骨不胜衣，映门楚碧蝉声老。

· 全唐诗 ·

卷 785_5 【冬】

无名氏

苍茫枯磧阴云满，古木号空昼光短。云拥三峰岳色低，
冰坚九曲河声断。浩汗霜风刮天地，温泉火井无生意。
泽国龙蛇冻不伸，南山瘦柏销残翠。

卷 785_6 【鸡头】

无名氏

湖浪参差叠寒玉，水仙晓展钵盘绿。淡黄根老栗皱圆，
染青刺短金罍熟。紫罗小囊光紧蹙，一掬真珠藏猬腹。
丛丛引觥傍莲洲，满川恐作天鸡哭。

卷 785_7 【红蔷薇（一作庄南杰诗）】

无名氏

九天碎霞明泽国，造化工夫潜剪刻。浅碧眉长约细枝，
深红刺短钩春色。晴日当楼晓香歇，锦带盘空欲成结。
谢豹声催麦陇秋，春风吹落猩猩血。

· 全唐诗 ·

卷 785_8 【斑竹簟】

无名氏

龙鳞满床波浪湿，血光点点湘娥泣。一片晴霞冻不飞，
深沈尽讶蛟人立。百朵排花蜀缬明，珊瑚枕滑葛衣轻。
闲窗独卧晓不起，冷浸羁魂锦江里。

卷 785_9 【听琴】

无名氏

六律铿锵间宫徵，伶伦写入梧桐尾。七条瘦玉叩寒星，
万派流泉哭纤指。空山雨脚随云起，古木灯青啸山鬼。
田文堕泪曲未终，子规啼血哀猿死。

卷 785_10 【石榴】

无名氏

蝉啸秋云槐叶齐，石榴香老庭枝低。流霞色染紫罌粟，
黄蜡纸苞红瓠犀。玉刻冰壶含露湿，斓斑似带湘娥泣。
萧娘初嫁嗜甘酸，嚼破水精千万粒。

· 全唐诗 ·

卷 785_11 【秦家行】

无名氏

彗孛飞光照天地，九天瓦裂屯冤气。鬼哭声声怨赵高，
宫花滴尽扶苏泪。祸起萧墙不知戢，羽书催筑长城急。
剑上忠臣血未干，沛公已向函关入。

卷 785_12 【小苏家】

无名氏

双月讴哑辗秋碧，细风斜掩神仙宅。麦门冬长马鬣青，
茱萸蕊绽蝇头赤。流苏斗帐悬高壁，彩凤盘龙缴香额。
堂内月娥横剪波，倚门肠断虾须隔。

卷 785_13 【斑竹】

无名氏

浓绿疏茎绕湘水，春风抽出蛟龙尾。色抱霜花粉黛光，
枝撑蜀锦红霞起。交戛敲欹无俗声，满林风曳刀枪横。
殷痕苦雨洗不落，犹带湘娥泪血腥。袅娜梢头扫秋月，
影穿林下疑残雪。我今惭愧子猷心，解爱此君名不灭。

· 全唐诗 ·

卷 785_14 【天竺国胡僧水晶念珠】

无名氏

天竺胡僧踏云立，红精素贯皎人泣。细影疑随焰火销，
圆光恐滴袈裟湿。夜梵西天千佛声，指轮次第驱寒星。
若非叶下滴秋露，则是井底圆春冰。凄清妙丽应难并，
眼界真如意珠静。碧莲花下独提携，坚洁何如幻泡影。

卷 785_15 【白雪歌】

无名氏

皇穹何处飞琼屑，散下人间作春雪。五花马踏白云衢，
七香车碾瑶墀月。苏岩乳洞拥山家，润藤古栗盘银蛇。
寒郊复叠铺柳絮，古碛烂熳吹芦花。流泉不下孤汀咽，
断臂老猿声欲绝。鸟啄冰潭玉镜开，风敲檐溜水晶折。
拂户初疑粉蝶飞，看山又讶白鸥归。孙康冻死读书闾，
火井不暖温泉微。

卷 785_16 【琵琶】

无名氏

粉胸绣臆谁家女，香拨星星共春语。七盘岭上走鸾铃，

· 全唐诗 ·

十二峰头弄云雨。千悲万恨四五弦，弦中甲马声骈阗。
山僧扑破琉璃钵，壮士击折珊瑚鞭。珊瑚鞭折声交戛，
玉盘倾泻真珠滑。海神驱趁夜涛回，江娥蹙踏春冰裂。
满坐红妆尽泪垂，望乡之客不胜悲。曲终调绝忽飞去，
洞庭月落孤云归。

卷 785_17 【伤哉行】

无名氏

兔走乌飞不相见，人事依稀速如电。王母天桃一度开，
玉楼红粉千回变。车驰马走咸阳道，石家旧宅空荒草。
秋雨无情不惜花，芙蓉一一惊颠倒。劝君莫谩栽荆棘，
秦皇虚费驱山力。英风一去更无言，白骨沈埋暮山碧。

卷 785_18 【留赠偃师主人】

无名氏

孤城漏未残，徒侣拂征鞍。洛北去愁远，淮南归梦阑。
晓灯回壁暗，晴雪卷帘寒。更尽主人酒，出门行路难。

· 全唐诗 ·

卷 785_19 【长门】

无名氏

怅望黄金屋，恩衰似越逃。花生针眼刺，月送剪肠刀。
地近欢娱远，天低雨露高。时看回辇处，泪脸湿天桃。

卷 785_20 【宴李家宅】

无名氏

画屏深掩瑞云光，罗绮花飞白玉堂。银榼酒倾鱼尾倒，
金炉灰满鸭心香。轻摇绿水青蛾敛，乱触红丝皓腕狂。
今日恩荣许同听，不辞沈醉一千觞。

卷 785_21 【长信宫】

无名氏

细草侵阶乱碧鲜，宫门深锁绿杨天。珠帘欲卷抬秋水，
罗幌微开动冷烟。风引漏声过枕上，月移花影到窗前。
独挑残烛魂堪断，却恨青蛾误少年。

· 全唐诗 ·

卷 785_22 【骊山感怀】

无名氏

武帝寻仙驾海游，禁门高闭水空流。深宫带日年年色，
翠柏凝烟夜夜愁。鸾凤影沈归万古，歌钟声断梦千秋。
晚来惆怅无人会，云雨能飞傍玉楼。

卷 785_23 【绝句】

无名氏

石沈辽海阔，剑别楚山长。会合知无日，离心满夕阳。

卷 785_24 【听唱鹧鸪】

无名氏

金谷歌传第一流，鹧鸪清怨碧云愁。
夜来省得曾闻处，万里月明湘水流。

· 全唐诗 ·

卷 785_25 【杂诗（第八首一作白居易诗）】

无名氏

劝君莫惜金缕衣，劝君须惜少年时。
有花堪折直须折，莫待无花空折枝。

青天无云月如烛，露泣梨花白如玉。
子规一夜啼到明，美人独在空房宿。

空赐罗衣不赐恩，一薰香后一销魂。
虽然舞袖何曾舞，常对春风裛泪痕。

不洗残妆凭绣床，也同女伴绣鸳鸯。
回针刺到双飞处，忆著征夫泪数行。

眼想心思梦里惊，无人知我此时情。
不如池上鸳鸯鸟，双宿双飞过一生。

一去辽阳系梦魂，忽传征骑到中门。
纱窗不肯施红粉，徒遣萧郎问泪痕。

莺啼露冷酒初醒，罨画楼西晓角鸣。
翠羽帐中人梦觉，宝钗斜坠枕函声。

行人南北分征路，流水东西接御沟。

· 全唐诗 ·

终日坡前怨离别，谩名长乐是长愁。

偏倚绣床愁不起，双垂玉箸翠鬟低。
卷帘相待无消息，夜合花前日又西。

悔将泪眼向东开，特地愁从望里来。
三十六峰犹不见，况伊如燕这身材。

满目笙歌一段空，万般离恨总随风。
多情为谢残阳意，与展晴霞片片红。

两心不语暗知情，灯下裁缝月下行。
行到阶前知未睡，夜深闻放剪刀声。

近寒食雨草萋萋，著麦苗风柳映堤。
早是有家归未得，杜鹃休向耳边啼。

水纹珍簟思悠悠，千里佳期一夕休。
从此无心爱良夜，任他明月下西楼。

数日相随两不忘，郎心如妾妾如郎。
出门便是东西路，把取红笺各断肠。

无定河边暮角声，赫连台畔旅人情。
函关归路千余里，一夕秋风白发生。

花落长川草色青，暮山重叠两冥冥。

· 全唐诗 ·

逢春便觉飘蓬苦，今日分飞一涕零。

洛阳才子邻箫恨，湘水佳人锦瑟愁。
今昔两成惆怅事，临邛春尽暮江流。

浙江轻浪去悠悠，望海楼吹望海愁。
莫怪乡心随魄断，十年为客在他州。

卷 785_26 【初过汉江】

无名氏

襄阳好向岷亭看，人物萧条值岁阑。
为报习家多置酒，夜来风雪过江寒。

卷 785_27 【读庾信集】

无名氏

四朝十帝尽风流，建业长安两醉游。
惟有一篇杨柳曲，江南江北为君愁。

· 全唐诗 ·

第七百八十六卷

卷 786_1 【题长乐驿壁】

无名氏

三十骅骝一哄尘，来时不锁杏园春。
杨花满地如飞雪，应有偷游曲水人。

卷 786_2 【绝句】

无名氏

传闻天子访沈沦，万里怀书西入秦。
早知不用无媒客，恨别江南杨柳春。

卷 786_3 【题取经诗（载《翻译名义集》，云唐义净三藏作）】

无名氏

晋宋齐梁唐代间，高僧求法离长安。去人成百归无十，

· 全唐诗 ·

后者安知前者难。路远碧天唯冷结，沙河遮日力疲殫。
后贤如未谙斯旨，往往将经容易看。

卷 786_4 【题水心寺水轩】

无名氏

分飞南渡春风晚，却返家林事业空。
无限离情似杨柳，万条垂向楚江东。

卷 786_5 【王昭君】

无名氏

猗兰恩宠歇，昭阳幸御稀。朝辞汉阙去，夕见胡尘飞。
寄信秦楼下，因书秋雁归。

卷 786_6 【王昭君（一作崔国辅诗）】

无名氏

一回望月一回悲，望月月移人不移。
何时得见汉朝使，为妾传书斩画师。

· 全唐诗 ·

卷 786_7 【粉笺题诗】

无名氏

三月江南花满枝，风轻帘幕燕争飞。
游人休惜夜秉烛，杨柳阴浓春欲归。

卷 786_8 【咏美人骑马】

无名氏

骏马娇仍稳，春风灞岸晴。促来金镫短，扶上玉人轻。
帽束云鬟乱，鞭笼翠袖明。不知从此去，何处更倾城。

卷 786_9 【六言诗】

无名氏

把酒留君听琴，那堪岁暮离心。霜叶无风自落，
秋天不雨多阴。人愁荒村路远，马怯寒溪水深。
望尽青山犹在，不知何处相寻。

· 全唐诗 ·

卷 786_10 【胡笳曲】

无名氏

月明星稀霜满野，毡车夜宿阴山下。
汉家自失李将军，单于公然来牧马。

卷 786_11 【桃源行送友人】

无名氏

武陵川径入幽遐，中有鸡犬秦人家，家傍流水多桃花。
桃花两边种来久，流水一道何时有。垂条落蕊暗春风，
夹岸芳菲至山口。岁岁年年能寂寥，林下青苔日为厚。
时有仙鸟来衔花，曾无世人此携手。可怜不知若为名，
君往从之多所更。古驿荒桥平路尽，崩湍怪石小溪行。
相见维舟登览处，红堤绿岸宛然成。多君此去从仙隐，
令人晚节悔营营。

卷 786_12 【唐衢墓（一作贾岛诗）】

无名氏

京洛先生三尺坟，阴风惨惨土和云。

· 全唐诗 ·

从来有感君皆哭，今日无君谁哭君？

卷 786_13 【宫词】

无名氏

花萼楼前春正浓，濛濛柳絮舞晴空。
金钱掷罢娇无力，笑倚栏干屈曲中。

卷 786_14 【抛球诗（一作李谨言诗）】

无名氏

侍宴黄昏未肯休，玉阶夜色月如流。
朝来自诧承恩最，笑倩傍人认绣球。

卷 786_15 【艳歌】

无名氏

月里嫦娥不画眉，只将云雾作罗衣。
不知梦逐青鸾去，犹把花枝盖面归。

· 全唐诗 ·

卷 786_16 【杨柳枝】

无名氏

万里长江一带开，岸边杨柳几千栽。
锦帆未落西风起，惆怅龙舟去不回。

卷 786_17 【河中石刻】

无名氏

雨滴空阶晓，无心换夕香。井梧花落尽，一半在银床。

卷 786_18 【古砚】

无名氏

癖性爱古物，终岁求不得。昨朝得古砚，兰河滩之侧。
波涛所击触，背面生隙隙。质状朴且丑，令人作不得。

卷 786_19 【绝句】

无名氏

钓罢孤舟系苇梢，酒开新瓮鲊开包。

· 全唐诗 ·

自从江浙为渔父，二十余年手不叉。

卷 786_20 【题童氏画】

无名氏

林下材华虽可尚，笔端人物更清妍。
如何不出深闺里，能以丹青写外边。

卷 786_21 【失题】

无名氏

春朝散微雨，庭树开芸绿。上有怀春鸟，间关断复续。
谓言 野中，定是珠城曲。我自牵时幸，以惭羁旅束。
尔不鸣幽林，来此将何欲。

卷 786_22 【姜宣弹小胡笳引歌】

无名氏

雷氏金徽琴，王君宝重轻千金。三峡流中将得来，
明窗拂席幽匣开。朱弦宛转盘凤足，骤击数声风雨回。
哀笳慢指董家本，姜宣得之妙思忖。泛徽胡雁咽萧萧，

· 全唐诗 ·

绕指辘轳圆袞袞。吞恨含情乍轻激，故国关山心历历。
潺湲疑是舞鸂鶒，砉騞如闻发鸣镝。流宫变徵渐幽咽，
别鹤欲飞猿欲绝。秋霜满树叶辞风，寒雏坠地乌啼血。
哀弦已罢春恨长，恨长何如怀我乡。我乡安在长城窟，
闻君肤奏心飘忽。何时窄袖短貂裘，胭脂山下弯明月。

卷 786_23 【罗浮山】

无名氏

四百余峰海上排，根连蓬岛荫天台。
百灵若为移中土，蒿华都为一小堆。

卷 786_24 【汤周山】

无名氏

汤周二大仙，庐此得升天。风俗因兴庙，春秋不记年。
锦云张紫盖，琴溜泻鸣泉。丹灶犹存鼎，仙花发故园。

卷 786_25 【永州舜庙诗】

无名氏

游湘有余怨，岂是圣人心。行路猿啼古，祠宫梦草深。

· 全唐诗 ·

素风传旧俗，异迹闭荒林。巡狩去不返，烟云愁至今。
九嶷天一半，山尽海沈沈。

卷 786_26 【绝句】

无名氏

绿杨阴转画桥斜，舟有笙歌岸有花。
尽日会稽山色里，蓬莱清浅水仙家。

卷 786_27 【三学山盘陀石上刻诗】

无名氏

拔地山峦秀，排空殿阁斜。云供数州雨，树献九天花。
夜月摩峰顶，秋钟彻海涯。长松拂星汉，一一是仙槎。

卷 786_28 【合水县玉泉石崖刻】

无名氏

山脉逗飞泉，泓澄傍岩石。乱垂寒玉筱，碎洒珍珠滴。
澄波涵万象，明镜泻天色。有时乘月来，赏咏还自适。

· 全唐诗 ·

卷 786_29 【纪游东观山（山在桂林府城外三里）】

无名氏

瑰奇恣搜讨，贝阙青瑶房。才隘疑永巷，俄敞如华堂。
玉梁窈浮溪，琼户正当窗。仙佛肖仿佛，钟鼓鐃击撞。
𪚩𪚩左顾龟，狺狺欲吠龙。丹灶俨亡恙，芝田霭生香。
搏噬千怪聚，绚烂五色光。更无一尘涴，但觉六月凉。
玲珑穿屡折，诘曲通三湘。神鬼若剜刻，乾坤真混茫。
入如深夜暗，出喜曦日光。隔世惊瞬息，异境难揣量。

卷 786_30 【题焚经台】

无名氏

门径萧萧长绿苔，一回登此一徘徊。青牛谩说函关去，
白马亲从印土来。确实是非凭烈焰，要分真伪筑高台。
春风也解嫌狼藉，吹尽当年道教灰。

· 全唐诗 ·

第七百八十七卷

卷 787_1 【日暮山河清】

无名氏

天高爽气晶，驰景忽西倾。山列千重静，河流一带明。
想同金镜澈，宁让玉壶清。纤翳无由出，浮埃不复生。
荣纤分汉苑，表里见秦城。逸兴终难系，抽毫仰此情。

卷 787_2 【秋日悬清光】

无名氏

寥廓凉天静，晶明白日秋。圆光含万象，碎影入闲流。
迥与青冥合，遥同江甸浮。昼阴殊众木，斜影下危楼。
宋玉登高怨，张衡望远愁。余辉如可托，云路岂悠悠。

卷 787_3 【落日山照曜】

无名氏

裴回空山下，晼晚残阳落。圆影过峰峦，半规入林薄。

· 全唐诗 ·

余光澈群岫，乱彩分重壑。石镜共澄明，岩光同照灼。
栖禽去杳杳，夕烟生漠漠。此境谁复知，独怀谢康乐。

卷 787_4 【月映清淮流】

无名氏

淮月秋偏静，含虚夜转明。桂花窥镜发，蟾影映波生。
澹滟轮初上，裴回魄正盈。遥塘分草树，近浦写山城。
桐柏流光逐，蟾蜍濯景清。孤舟方利涉，更喜照前程。

卷 787_5 【寿星见】

无名氏

玄象今何应，时和政亦平。祥为一人寿，色映九霄明。
皎洁垂银汉，光芒近斗城。合规同月满，表瑞得天清。
甘露盈条降，祥烟向日生。无如此嘉祉，率土荷秋成。

卷 787_6 【华山庆云见】

无名氏

圣主祠名岳，高风发庆云。金柯初缭绕，玉叶渐氛氲。

· 全唐诗 ·

气色含珠日，光明吐翠雾。依稀来鹤态，仿佛列仙群。
万树流光影，千潭写锦文。苍生忻有望，祥瑞在吾君。

卷 787_7 【清风戒寒】

无名氏

萧飒清风至，悠然发思端。入林翻别叶，绕树败红兰。
晓拂轻霜度，宵分远籁攒。稍依帘隙静，遍觉座隅寒。
乍逐惊蓬振，偏催急漏残。遥知洞庭水，此夕起波澜。

卷 787_8 【空水共澄鲜】

无名氏

悠然四望通，渺渺水无穷。海鹤飞天际，烟林出镜中。
云消澄遍碧，霞起澹微红。落日浮光满，遥山翠色同。
樵声喧竹屿，棹唱入莲丛。远客舟中兴，烦襟暂一空。

卷 787_9 【寒流聚细文】

无名氏

晓野方闲眺，横溪赏乱流。寒文趋浦急，圆折逐烟浮。

· 全唐诗 ·

不谓飘疏雨，非关浴远鸥。观鱼鳞共细，间石影疑稠。
猎猎风冷夕，潺潺濑响秋。仙槎如共泛，天汉适淹留。

卷 787_10 【长安早春】

无名氏

杳霭三春色，先从帝里芳。折杨犹恨短，测景已忻长。
莺和红楼乐，花连紫禁香。跃鱼惊太液，佳气接温汤。
风送飞珂响，尘蒙翠辇光。熙熙晴煦远，徒欲奉尧觞。

卷 787_11 【嘉禾合颖】

无名氏

天祚皇王德，神呈瑞谷嘉。感时苗特秀，证道叶方华。
气转腾佳色，云披映早霞。薰风浮合颖，湛露净祥花。
六穗垂兼倒，孤茎袅复斜。影同唐叔献，称庆比周家。

卷 787_12 【膏泽多丰年】

无名氏

帝德方多泽，莓莓井径同。八方甘雨布，四远报年丰。

· 全唐诗 ·

廩庆千厢在，山流万壑通。候时勤稼穡，击壤乐农功。
畎亩人无惰，田庐岁不空。何须忧伏腊，千载贺尧风。

卷 787_13 【玉壶冰】

无名氏

玄律阴风劲，坚冰在玉壶。暗中花更出，晓后色全无。
涸沍谁能伴，凄清讵可渝。任圆空似璧，照物不成珠。
素质情方契，孤明道岂殊。幽人若相比，还得咏生刍。

卷 787_14 【望禁苑祥光】

无名氏

佳气生天苑，葱茏几效祥。树遥三殿际，日映九城傍。
山雾宁同色，卿云未可彰。眺汾疑鼎气，临渭想荣光。
当并春陵发，应开圣历长。微臣时一望，短羽欲飞翔。

卷 787_15 【晨光动翠华】

无名氏

早朝开紫殿，佳气逐清晨。北阙华旌在，东方曙景新。

· 全唐诗 ·

影连香雾合，光媚庆云频。鸟羽飘初定，龙文照转真。
直疑冠佩入，长爱冕旒亲。摇动祥云里，朝朝映侍臣。

卷 787_16 【观南郊回仗】

无名氏

传警千门寂，南效彩仗回。但惊龙再见，谁识日双开。
德泽施云雨，恩光变烬灰。阅兵貔武振，听乐凤凰来。
候刻移宸辇，尊时集观台。多惭远臣贱，不得礼容陪。

卷 787_17 【谒见日将至双阙】

无名氏

晓色临双阙，微臣礼位陪。远惊龙凤睹，谁识冕旒开。
蔼蔼千年盛，颙颙万国来。天文标日月，时令布云雷。
迥出黄金殿，全分白玉台。雕虫意何取，瞻恋不知回。

卷 787_18 【尚书郎上直闻春漏】

无名氏

地即尚书省，人惟鸳鹭行。审时传玉漏，直夜递星郎。

· 全唐诗 ·

历历闻仙署，泠泠出建章。自空来断续，随月散凄锵。
物静知声远，寒轻觉夜长。听余残月落，曙色满东方。

卷 787_19 【华清宫望幸】

无名氏

骊岫接新丰，嵒峩驾碧空。凿山开秘殿，隐雾蔽仙宫。
绛阙犹栖凤，雕梁尚带虹。温泉曾浴日，华馆旧迎风。
肃穆瞻云辇，深沈闭绮栊。东郊望幸处，瑞气霭濛濛。

卷 787_20 【御题国子监】

无名氏

宸翰符玄造，荣题国子门。笔锋回日月，字势动乾坤。
檐下云光绕，梁间鹊影翻。张英圣莫拟，索靖妙难言。
为著盘龙迹，能彰舞凤蹲。更随垂露像，常以沐皇恩。

卷 787_21 【郊坛听雅乐】

无名氏

泰坛恭祀事，彩仗下寒坰。展礼陈嘉乐，斋心动众灵。

· 全唐诗 ·

韵长飘更远，曲度静宜听。泛响何清越，随风散杳冥。
彻悬和气聚，旋退晓山青。本自钧天降，还疑列洞庭。

卷 787_22 【册上公太常奏雅乐】

无名氏

司乐陈金石，逶迤引上公。奏音人语绝，清韵佩声通。
应律烟云改，来仪鸟兽同。得贤因举颂，修礼便观风。
圣寿三称内，天欢九奏中。寂寥高曲尽，犹自满宸聪。

卷 787_23 【听霜钟】

无名氏

渺渺飞霜夜，寥寥远岫钟。出云疑断续，入户乍春容。
度枕频惊梦，随风几韵松。悠扬来不已，杳霭去何从。
仿佛烟岚隔，依稀岩峤重。此时聊一听，余响绕千峰。

卷 787_24 【听霜钟】

无名氏

寥亮来丰岭，分明辨古钟。应霜如自击，中节每相从。

· 全唐诗 ·

静听非闲扣，潜应蕴圣踪。风间时断续，云外更春容。
虚警和清籁，雄鸣隔乱峰。因之论知己，感激更难逢。

卷 787_25 【笙磬同音】

无名氏

笙磬闻何处，凄锵宛在东。激扬音自彻，高下曲宜同。
历历俱盈耳，泠泠递散空。兽因繁奏舞，人感至和通。
讵间洪纤韵，能齐搏拊功。四悬今尽美，一听辨移风。

卷 787_26 【玉卮无当】

无名氏

共惜连城宝，翻为无当卮。讵惭君子贵，深讶拙工隳。
泛蚁功全少，如虹色不移。可怜珍砾石，何计辨糟醅。
江海诚难满，盘筵莫妄施。纵乖斟酌意，犹得奉光仪。

卷 787_27 【府试古镜】

无名氏

旧是秦时镜，今来古匣中。龙盘初挂月，凤舞欲生风。

· 全唐诗 ·

石黛曾留殿，朱光适在宫。应祥知道泰，监物觉神通。
肝胆诚难隐，妍媸信易穷。幸居君子室，长愿免尘蒙。

卷 787_28 【焚裘】

无名氏

今主临前殿，惩奢爇异裘。忽看阳焰发，如睹吉光流。
丽彩辞宸扆，余香在御楼。火随余烬灭，气逐远烟浮。
素朴回风变，雕华逐志休。永垂恭俭德，千古揖皇猷。

卷 787_29 【送薛大夫和蕃】

无名氏

戎王归汉命，魏绛谕皇恩。旌旆辞双阙，风沙上五原。
往途遵塞道，出祖耀都门。策令天文盛，宣威使者尊。
澄波看四海，入贡伫诸蕃。秋杪迎回骑，无劳枉梦魂。

卷 787_30 【观剑南献捷】

无名氏

遐圻新破虏，名将旧登坛。戎馘西南至，毡裘长幼观。

· 全唐诗 ·

边疆氛已息，矛戟血犹残。紫陌欢声动，丹墀喜气盘。
唐虞方德易，卫霍比功难。共睹俘囚入，赓歌万国安。

卷 787_31 【云母屏风隔坐】

无名氏

彩障成云母，丹墀隔上公。才彰二纪盛，荣播一朝同。
近玉初齐白，临花乍散红。凝姿分缥缈，转佩辨玲珑。
意惬恩偏厚，名新宠更崇。谁知历千古，犹自仰清风。

卷 787_32 【白受采】

无名氏

晶晶金方色，迁移妙不穷。轻衣尘迹化，净壁绩文通。
沙变蓝溪渍，冰渝墨沼空。似甘言受和，由礼学资忠。
皎洁形无定，玄黄用莫同。素心如可教，愿染古人风。

卷 787_33 【人不易知】

无名氏

权衡谅匪易，愚智信难移。九德皆殊进，三端岂易施。

· 全唐诗 ·

同称昆岫宝，共握桂林枝。郑鼠今奚别，齐竽或滥吹。
瑶台有光鉴，屡照不应疲。片善当无掩，先鸣贵在斯。
龙门峻且极，骥足庶来驰。太息李元礼，期君幸一知。

卷 787_34 【晦日同志昆明池泛舟】

无名氏

灵沼疑河汉，萧条见斗牛。烟生知岸近，水净觉天秋。
落月低前树，清辉满去舟。兴因孤屿起，心为白蘋留。
晓吹兼渔笛，闲云伴客愁。龙津如可上，长啸且乘流。

卷 787_35 【礼闈阶前春草生】

无名氏

河畔虽同色，南宫淑景先。微开曳履处，常对讲经前。
得地风尘隔，依林雨露偏。已逢霜候改，初寄日华妍。
影与丛兰杂，荣将众卉连。哲人如不薤，生意在芳年。

卷 787_36 【秋风生桂枝】

无名氏

寒桂秋风动，萧萧自一枝。方将击林变，不假舞松移。

· 全唐诗 ·

散翠幽花落，摇青密叶离。哀猿惊助裹，花露滴争垂。
遗韵连波聚，流音万木随。常闻小山里，逋客最先知。

卷 787_37 【幽人折芳桂】

无名氏

厚地生芳桂，遥林耸干长。叶开风里色，花吐月中光。
曙鸟啼余翠，幽人爱早芳。动时垂露滴，攀处拂衣香。
古调声犹苦，孤高力自强。一枝终是折，荣耀在东堂。

卷 787_38 【霜菊】

无名氏

秋尽北风去，律移寒气肃。淅沥降繁霜，离披委残菊。
华滋尚照灼，幽气含纷郁。的的冒空园，萋萋被幽谷。
骚人有遗咏，陶令曾盈掬。傥使怀袖中，犹堪袭余馥。

卷 787_39 【金谷园花发怀古】

无名氏

春风生梓泽，迟景映花林。欲问当时事，因伤此日心。

· 全唐诗 ·

繁华人已歿，桃李意何深。涧咽歌声在，云归盖影沈。
地形同万古，笑价失千金。遗迹应无限，芳菲不可寻。

卷 787_40 【骊龙】

无名氏

有美为鳞族，潜蟠得所从。标奇初韞宝，表智即称龙。
大壑长千里，深泉固九重。奋髯云乍起，矫首浪还冲。
荀氏传高誉，庄生冀绝踪。仍知流泪在，何幸此相逢。

卷 787_41 【鹤鸣九皋】

无名氏

胎化呈仙质，长鸣在九皋。排空散清唳，映日委霜毛。
万里思寥廓，千山望郁陶。香凝光不见，风积韵弥高。
凤侣攀何及，鸡群思忽劳。升天如有应，飞舞出蓬蒿。

卷 787_42 【霜隼下晴皋】

无名氏

九皋霜气劲，翔隼下初晴。风动闲云卷，星驰白草平。

· 全唐诗 ·

棱棱方厉疾，肃肃自纵横。掠地秋毫迥，投身逸翮轻。
高墉全失影，逐雀作飞声。薄暮寒郊外，悠悠万里情。

卷 787_43 【河鲤登龙门】

无名氏

年久还求变，今来有所从。得名当是鲤，无点可成龙。
备历艰难遍，因期造化容。泥沙宁不阻，钓饵莫相逢。
击浪因成势，纤鳞莫继踪。若令摇尾去，雨露此时浓。

· 全唐诗 ·

第七百八十八卷

卷 788_1 【改九子山为九华山联句】

李白

妙有分二气，灵山开九华。--李白
层标遏迟日，半壁明朝霞。--高霁
积雪曜阴壑，飞流喷阳崖。--韦权舆
青莹玉树色，缥缈羽人家。--李白

卷 788_2 【夏夜李尚书筵送宇文石首赴县联句】

杜甫

爱客尚书贵，之官宅相贤。--杜甫
酒香倾坐侧，帆影驻江边。--李之芳
翟表郎官瑞，鳧看令宰仙。--崔彧
雨稀云叶断，夜久烛花偏。--杜甫
数语欹纱帽，高文掷彩笺。--李之芳
兴饶行处乐，离惜醉中眠。--崔彧
单父长多暇，河阳实少年。--杜甫
客居逢自出，为别几凄然。--李之芳

· 全唐诗 ·

卷 788_3 【登岷山观李左相石尊联句】

颜真卿

李公登饮处，因石为洼尊。--颜真卿
人事岁年改，岷山今古存。--刘全白
榛芜掩前迹，苔藓余旧痕。--裴循
叔子尚遗德，山公此回轩。--张荐
维舟陪高兴，感昔情弥敦。--吴筠
蔼蔼贤哲事，依依离别言。--强蒙
岷嶽横道周，迢递连山根。--范缙
余烈暖林野，众芳揖兰荪。--王纯
德晖映岩足，胜赏延高原。--魏理
远水明匹练，因晴见吴门。--王修甫
陪游追盛美，揆德欣讨论。--颜岷
器有成形用，功资造化元。--左辅元
流霞方泔淡，别鹤遽翩翻。--刘茂
旧规倾逸赏，新兴丽初暾。--颜浑
醉后接_离倒，归时骆骑喧。--杨德元
迟回向遗迹，离别益伤魂。--韦介
览事古兴属，送人归思繁。--皎然
怀贤久徂谢，赠远空攀援。--崔弘
八座钦懿躅，高名播乾坤。--史仲宣
松深引闲步，葛弱供险扪。--陆羽
花气酒中馥，云华衣上屯。--权器
森沈列湖树，牢落望效园。--陆士修

· 全唐诗 ·

白日半岩岫，清风满丘樊。--裴幼清
旌麾间翠幄，箫鼓来朱轡。--柳淡
闲路蹑云影，清心澄水源。--释尘外
萍连浦中屿，竹绕山下村。--颜颢
景落全溪暗，烟凝半岭昏。--颜须
去日往如复，换年凉代温。--颜頊
登临继风骚，义激旧府恩。--李崕

卷 788_4 【水堂送诸文士戏赠潘丞联句】

颜真卿

居人未可散，上客须留著。莫唱阿鞞回，应云夜半乐。
--颜真卿
诗教刻烛赋，酒任连盘酌。从他白眼看，终恋青山郭。
--潘述
林栖非姓许，寺住那名约。会异永和年，才同建安作。
--陆羽
何烦问更漏，但遣催弦索。共说长句能，皆言早归恶。
--权器
那知殊出处，还得同笑谑。雅韵虽暂欢，禅心肯抛却。
--皎然
一宿同高会，几人归下若。帘开北陆风，烛焯南枝鹊。
--李崕
文场苦叨窃，钓渚甘漂泊。弱质幸见容，菲才诚重诺。
--潘述

· 全唐诗 ·

卷 788_5 【与耿漳水亭咏风联句】

颜真卿

清风何处起，拂槛复萦洲。--裴幼清
回入飘华幕，轻来叠晚流。--杨凭
桃竹今已展，羽翼且从收。--杨凝
经竹吹弥切，过松韵更幽。--左辅元
直散青蘋末，偏随白浪头。--陆士修
山山催雨过，浦浦发行舟。--权器
动树蝉争噪，开帘客罢愁。--陆羽
度弦方解愠，临水已迎秋。--颜真卿
凉为开襟至，清因作颂留。--皎然
周回随远梦，骚屑满离忧。--耿漳
岂独销繁暑，偏能入迥楼。--乔(失姓)
王风今若此，谁不荷明休。--陆涓

卷 788_6 【又溪馆听蝉联句】

颜真卿

高树多凉吹，疏蝉足断声。--杨凭
已催居客感，更使别人惊。--杨凝
晚夏犹知急，新秋别有情。--权器
危湍和不似，细管学难成。--陆羽

· 全唐诗 ·

当黻附金重，无贪曜火明。--颜真卿
青松四面落，白发一重生。--耿漳
向夕音弥厉，迎风翼更轻。--乔(失姓)
单嘶出迥树，余响思空城。--裴幼清
嘒唳松间坐，萧寥竹里行。--伯成(失姓)
如何长饮露，高洁未能名。--皎然

卷 788_7 【送耿漳拾遗联句】

颜真卿

尧舜逢明主，严徐得侍臣。分行接三事，高兴柏梁新。
--颜真卿
楚国千山道，秦城万里人。镜中看齿发，河上有烟尘。
--耿漳
望阙飞青翰，朝天忆紫宸。喜来欢宴洽，愁去咏歌频。
--颜真卿
顾盼情非一，睽携处亦频。吴兴贤太守，临水最殷勤。
--耿漳

卷 788_8 【五言月夜啜茶联句】

颜真卿

泛花邀坐客，代饮引情言。--陆士修

· 全唐诗 ·

醒酒宜华席，留僧想独园。--张荐
不须攀月桂，何假树庭萱。--李崕
御史秋风劲，尚书北斗尊。--崔万
流华净肌骨，疏瀹涤心原。--颜真卿
不似春醪醉，何辞绿菽繁。--皎然
素瓷传静夜，芳气清闲轩。--陆士修

卷 788_9 【五言夜宴咏灯联句】

颜真卿

桂酒牵诗兴，兰缸照客情。--陆士修
讵惭珠乘朗，不让月轮明。--张荐
破暗光初白，浮云色转清。--颜真卿
带花疑在树，比燎欲分庭。--皎然
顾已惭微照，开帘识近汀。--袁高

卷 788_10 【三言喜皇甫曾侍御见过南楼玩月】

颜真卿

喜嘉客，辟前轩。天月净，水云昏。--颜真卿
雁声苦，蟾影寒。闻裊浥，滴檀栾。--陆羽
欢宴处，江湖间。--皇甫曾
卷翠幕，吟嘉句。恨清光，留不住。--李崕

· 全唐诗 ·

高驾动，清角催。惜归去，重裴回。--皎然
露欲晞，客将醉。犹宛转，照深意。--陆士修

卷 788_11 【七言重联句】

颜真卿

顷持宪简推高步，独占诗流横素波。--颜真卿
不是中情深惠好，谁能千里远经过。--颜真卿
诗书宛似陪康乐，少长还同宴永和。--皇甫曾
夜酌此时看碾玉，晨趋几日重鸣珂。--皇甫曾
万井更深空寂寞，千方雾起隐嵯峨。--李崕
荧荧远火分渔浦，历历寒枝露鸟窠。--李崕
汉朝旧学君公隐，鲁国今从弟子科。--陆羽
只自倾心惭煦濡，何曾将口恨蹉跎。--陆羽
独赏谢吟山照耀，共知殷叹树婆娑。--皎然
华毂苦嫌云路隔，衲衣长向雪峰何。--皎然

卷 788_12 【五言送李侍御联句】

颜真卿

吾友驻行轮，迟迟惜上春。--颜真卿
东西出钱路，惆怅独归人。--皎然
欢会期他日。驱驰恨此身。--张荐

· 全唐诗 ·

须知贡公望，从此愿相因。 -- 李崕

卷 788_13 【五言玩初月重游联句】

颜真卿

春溪与岸平，初月出谿明。 -- 张荐
璧彩寒仍洁，金波夜转清。 -- 李崕
孤光远近满，练色往来轻。 -- 颜真卿
望望随兰棹，依依出柳城。 -- 皎然

卷 788_14 【五言重送横飞联句】

颜真卿

春田草未齐，春水满长溪。 -- 李崕
出饯风初暖，攀光日渐西。 -- 颜真卿
归期江上远，别思月中迷。 -- 皎然

卷 788_15 【五言夜集联句】

颜真卿

寒花护月色，坠叶占风音。 -- 皎然

· 全唐诗 ·

兹夕无尘虑，高云共片心。 -- 颜真卿

卷 788_16 【三言拟五杂组联句】

颜真卿

五杂组，盘上苴。往复还，头懒梳。不得已，罾里鱼。

-- 李崱

五杂组，郊外芜。往复还，枥上驹。不得已，谷中愚。

-- 殷佐明

五杂组，绣与锦。往复还，兴又寝。不得已，病伏枕。

-- 颜真卿

五杂组，酒与肉。往复还，东篱菊。不得已，醉便宿。

-- 袁高

五杂组，闾闾间。往复还，门上关。不得已，鬓毛斑。

-- 陆士修

五杂组，绣纹线。往复还，春来燕。不得已，入征战。

-- 蒋志

卷 788_17 【三言重拟五杂组联句】

颜真卿

五杂组，四豪客。往复还，阡与陌。不得已，长沙谪。

-- 张荐

· 全唐诗 ·

五杂组，五辛盘。往复还，马上鞍。不得已，左降官。

--李崕

五杂组，甘咸醋。往复还，乌与兔。不得已，韶光度。

--颜真卿

五杂组，五色丝。往复还，回文诗。不得已，失喜期。

--皎然

卷 788_18 【七言大言联句】

颜真卿

高歌阊风步瀛洲，--皎然

燂鹏爚鲲餐未休。--颜真卿

四方上下无外头，--李崕

一啜顿涸沧溟流。--张荐

卷 788_19 【七言小言联句】

颜真卿

长路迢迢吞吐丝。--颜真卿

螭螟蚊睫察难知。--皎然

· 全唐诗 ·

卷 788_20 【七言乐语联句】

颜真卿

苦河既济真僧喜，--李崕
新知满座笑相视。--颜真卿
戍客归来见妻子，--皎然
学生放假偷向市。--张荐

卷 788_21 【七言囋语联句】

颜真卿

拈馐舐指不知休，--李崕
欲炙侍立涎交流。--颜真卿
过屠大嚼肯知羞，--皎然
食店门外强淹留。--张荐

卷 788_22 【七言滑语联句】

颜真卿

雨里下山蹋榆皮，--颜真卿
莓苔石桥步难移。--皎然

· 全唐诗 ·

茱萸酱醋吃煮葵，--刘全白
缝靴蜡线油涂锥。--李崕
急逢龙背须且骑。--李益

卷 788_23 【七言醉语联句】

颜真卿

逢糟遇曲便酩酊，--刘全白
覆车坠马皆不醒。--颜真卿
倒著接_离发垂领，--皎然
狂心乱语无人并。--陆羽

· 全唐诗 ·

第七百八十九卷

卷 789_1 【建元寺昼公与崔秀才见过联句，与郑奉礼说同作】

皇甫曾

人闲宜岁晚，道者访幽期。独与寒山别，行当暮雪时。

--皇甫曾

柏台辞汉主，竹寺寄潜师。荷策知君待，开门笑我迟。

--皎然

暮阶县雨足，寒吹绕松枝。理辩尘心妄，经分梵字疑。

--郑说

久承黄纸诏，曾赋碧云诗。然诺惊相许，风流话所思。

--崔子向

筌忘心已默，髻发夜何其。愿结求羊侣，名山从所之。

--皇甫曾

卷 789_2 【建元寺西院寄李员外纵联句】

皇甫曾

寄隐霜台客，相思粉署人。--崔子向

· 全唐诗 ·

诚知阡陌近，无奈别离频。 --皇甫曾
夜色迷双树，钟声警四邻。 --郑说
散才徒仰鲍，归梦远知秦。 --台上
雨带清笳发，花惊夕漏春。 --皎然
招摇随步锡，仿佛听行轮。 --崔子向
要路推高足，空林寄一身。 --皇甫曾
盛名知独擅，良会忆相亲。 --郑说
稍涤心中垢，都遗陌上尘。 --崔子向
今宵此堂集，何事少遗民。 --皎然

卷 789_3 【中元日鲍端公宅遇吴天师联句】

严维

道流为柱史，教戒下真仙。 --严维
共契中元会，初修内景篇。 --鲍防
游方依地僻，卜室喜墙连。 --谢良辅
宝笥开金篆，华池漱玉泉。 --杜弈
怪龙随羽翼，青节降云烟。 --李清
昔去遗丹灶，今来变海田。 --刘蕃
养形奔二景，炼骨度千年。 --谢良弼
骑竹投陂里，携壶挂牖边。 --郑概
洞中尝入静，河上旧谈玄。 --陈元初
伊洛笙歌远，蓬壶日月偏。 --樊珣
青骡蓊训引，白犬伯阳牵。 --丘丹
法受相君后，心存象帝先。 --吕渭

· 全唐诗 ·

道成能缩地，功满欲升天。--范淹
何意迷孤性，含情恋数贤。--吴筠

卷 789_4 【酒语联句，各分一字】

严维

山简酣歌倒接^离，--刘蕃
看朱成碧无所知。--鲍防
耳鸣目眩驷马驰，--谢良辅
口称童叟腹鸱夷。--严维
兀然落帽灌酒卮，--沈仲昌
太常吏部相对时。--严维
藉糟枕麴浮酒池，--丘丹
瓮间篱下卧不移。--吕渭
叫呼不应无事悲，--郑概
千日一醒知是谁。--陈元初
左倾右倒人避之。--迴(失姓)

卷 789_5 【一字至九字诗联句】

严维

东，西，--鲍防
步月，寻溪。--严维

· 全唐诗 ·

鸟已宿，猿又啼。--郑概
狂流碍石，迸笋穿溪。--成用
望望人烟远，行行萝径迷。--陈元初
探题只应尽墨，持赠更欲封泥。--陈元初
松下流时何岁月，云中幽处屡攀跻。--张叔政
乘兴不知山路远近，缘情莫问日过高低。--贾弇
静听林下潺潺足湍濑，厌问城中喧喧多鼓鼙。--周颂

卷 789_6 【宣上人病中相寻联句】

李益

策杖迎诗客，归房理病身。闲收无效药，遍寄有情人。
--广宣
草木分千品，方书问六陈。还知一室内，我尔即天亲。
--李益

卷 789_7 【八月十五夜宣上人独游安国寺山庭院步人迟...乘兴联句】

李益

九重城接天花界，三五秋生一夜风。--广宣
行听漏声云散后，遥闻天语月明中。--广宣
含凉阁迥通仙掖，承露盘高出上宫。--李益

· 全唐诗 ·

谁问独愁门外客，清谈不与此宵同。 --李益

卷 789_8 【重阳夜集兰陵居与宣上人联句】

李益

蟋蟀催寒服，茱萸滴露房。酒巡明刻烛，篱菊暗寻芳。

--李益

新月和秋露，繁星混夜霜。登高今夕事，九九是天长。

--广宣

卷 789_9 【与宣供奉携瘦尊归杏溪园联句】

李益

千畦抱瓮园，一酌瘦尊酒。唯有沃洲僧，时过杏溪叟。

--李益

追欢君适性，独饮我空口。儒释事虽殊，文章意多偶。

--广宣

卷 789_10 【兰陵僻居联句】

李益

潘岳闲居赋，陶潜独酌谣。二贤成往事，三径是今朝。

· 全唐诗 ·

--广宣

生幸逢唐运，昌时奉帝尧。进思谐启沃，退混即渔樵。

--李益

蠹简封延阁，雕阑闕上霄。相从清旷地，秋露挹兰苕。

--杜羔

卷 789_11 【天津桥南山中各题一句】

李益

野坐分苔席，--李益

山行绕菊丛。--韦执中

云衣惹不破，--诸葛觉

秋色望来空。--贾岛

卷 789_12 【红楼下联句】

李益

佛刹接重城，红楼切太清。紫云连照耀，丹槛郁峥嵘。

--广宣

棖栋烟虹入，轩窗日月平。参差五陵晚，分背八川明。

--李益

松韵风初过，莲陂浪欲倾。敬瞻疑涌见，围绕学无生。

--杜羔

· 全唐诗 ·

卷 789_13 【赋应门照绿苔】

李益

宫阙何年月，应门何岁苔。清光一以照，白露共裴回。

--李益

珠履久行绝，玉房重未开。妾心正如此，昭阳歌吹来。

--法振

卷 789_14 【寄司空曙李端联句】

耿漳

长安一分首，万里隔烟波。--王早

海上青山暮，天涯白发多。--耿漳

寻僧因看竹，访道或求鹅。--辛晃

云树无猿鸟，阴崖足薜萝。--耿漳

醉中留越客，兴里眄庭柯。--辛晃

黄叶身仍逐，丹霄背未摩。--耿漳

别愁连旦暮，归梦绕关河。--辛晃

高柳寒蝉对，空阶夜雨和。--耿漳

年华空荏苒，名宦转蹉跎。--辛晃

南陌东城路，春来几度过。--耿漳

· 全唐诗 ·

卷 789_15 【连句多暇赠陆三山人】

耿漳

一生为墨客，几世作茶仙。--耿漳
喜是攀阑者，惭非负鼎贤。--陆羽
禁门闻曙漏，顾渚入晨烟。--耿漳
拜井孤城里，携笼万壑前。--陆羽
闲喧悲异趣，语默取同年。--耿漳
历落惊相偶，衰羸猥见怜。--陆羽
诗书闻讲诵，文雅接兰荃。--耿漳
未敢重芳席，焉能弄彩笺。--陆羽
黑池流研水，径石涩苔钱。--耿漳
何事亲香案，无端狎钓船。--陆羽
野中求逸礼，江上访遗编。--耿漳
莫发搜歌意，予心或不然。--陆羽

卷 789_16 【道州春日感兴】

李景俭

始见花满枝，又看花满地。--李景俭
且持增气酒，莫滴伤心泪。--吕温
深诚长郁结，芳晨自妍媚。--吕恭
啸歌聊永日，谁知此时意。--李景俭

· 全唐诗 ·

卷 789_17 【中秋夜听歌联句】

武元衡

此夕来奔月，何时去上天。--崔备
云鬟方自照，玉腕更呈鲜。--裴度
燕婉人间意，飘飘物外缘。--柳公绰
诗裁明月扇，歌索想夫怜。--武元衡
暗染荀香久，长随楚梦偏。--卢放
会当来彩凤。仿佛逐神仙。--卢士玫

· 全唐诗 ·

第七百九十卷

卷 790_1 【春池泛舟联句】

裴度

凤池新雨后，池上好风光。--刘禹锡
取酒愁春尽，留宾喜日长。--裴度
柳丝迎画舸，水镜写雕梁，--崔群
潭洞迷仙府，烟霞认醉乡。--贾餗
莺声随笑语，竹色入壶觞。--张籍
晚景含澄澈，时芳得艳阳。--刘禹锡
飞凫拂轻浪，绿柳暗回塘。--裴度
逸韵追安石，高居胜辟强。--崔群
杯停新令举，诗动彩笺忙。--贾餗
顾谓同来客，欢游不可忘。--张籍

卷 790_2 【西池落泉联句】

裴度

东阁听泉落，能令野兴多。--行式

· 全唐诗 ·

散时犹带沫，淙处即跳波。--裴度
偏洗磷磷石，还惊泛泛鹅。--张籍
色清尘不染，光白月相和。--白居易
喷雪萦松竹，攒珠溅芰荷。--刘禹锡
对吟时合响，触树更摇柯。--张籍
照圃红分药，侵阶绿浸莎。--白居易
日斜车马散，余韵逐鸣珂。--刘禹锡

卷 790_3 【首夏犹清和联句】

裴度

记得谢家诗，清和即此时。--白居易
余花数种在，密叶几重垂。--裴度
芳谢人人惜，阴成处处宜。--刘禹锡
水萍争点缀，梁燕共追随。--行式
乱蝶怜疏蕊，残莺恋好枝。--张籍
草香殊未歇，云势渐多奇。--白居易
单服初宁体，新篁已出篱。--裴度
与春为别近，觉日转行迟。--刘禹锡
绕树风光少，侵阶苔藓滋。--行式
惟思奉欢乐，长得在西池。--张籍

· 全唐诗 ·

卷 790_4 【蔷薇花联句】

裴度

似锦如霞色，连春接夏开。--刘禹锡
波红分影入，风好带香来。--裴度
得地依东阁，当阶奉上台。--行式
浅深皆有态，次第暗相催。--刘禹锡
满地愁英落，缘堤惜棹回。--裴度
芳浓濡雨露，明丽隔尘埃。--行式
似著胭脂染，如经巧妇裁。--白居易
奈花无别计，只有酒残杯。--张籍

卷 790_5 【喜遇刘二十八偶书两韵联句】

裴度

病来佳兴少，老去旧游稀。笑语纵横作，杯觞络绎飞。
--裴度
清谈如水玉，逸韵贯珠玑。高位当金铉，虚怀似布衣。
--刘禹锡
已容狂取乐，仍任醉忘机。舍眷将何适，留欢便是归。
--白居易
凤仪常欲附，蚊力自知微。愿假尊壘末，膺门自此依。
--李绅

· 全唐诗 ·

卷 790_6 【刘二十八自汝赴左冯，涂经洛中相见联句】

裴度

不归丹掖去，铜竹漫云云。唯喜因过我，须知未贺君。

--裴度

诗闻安石咏，香见令公熏。欲首函关路，来披缑岭云。

--白居易

貂蝉公独步，鸳鹭我同群。插羽先飞酒，交锋便战文。

--李绅

镇嵩知表德，定鼎为铭勋。顾鄙容商洛，徵欢候汝坟。

--刘禹锡

频年多谗浪，此夕任喧纷。故态犹应在，行期未要闻。

--裴度

游藩荣已久，捧袂惜将分。讵厌杯行疾，唯愁日向曛。

--白居易

穷阴初莽苍，离思渐氤氲。残雪午桥岸，斜阳伊水滨。

--李绅

上谟尊右掖，全略静东军。万顷徒称量，沧溟讵有垠。

--刘禹锡

· 全唐诗 ·

卷 790_7 【度自到洛中与乐天为文酒之会时时构咏乐不可...
因为联句】

裴度

成周文酒会，吾友胜邹枚。唯忆刘夫子，而今又到来。

--裴度

欲迎先倒屣，亦坐便倾杯。饮许伯伦右，诗推公干才。

--白居易

久曾聆郢唱，重喜上燕台。昼话墙阴转，宵欢斗柄回。

--刘禹锡

新声还共听，故态复相诘。遇物皆先赏，从花半未开。

--裴度

起时乌帽侧，散处玉山颓。墨客喧东阁，文星犯上台。

--白居易

咏吟君称首，疏放我为魁。忆戴何劳访，留髭不用猜。

--裴度

奉觞承麹蘖，落笔捧琼瑰。醉弁无妨侧，词锋不可摧。

--白居易

水轩看翡翠，石径践莓苔。童子能骑竹，佳人解咏梅。

--刘禹锡

洛中三可矣，邺下七悠哉。自向风光急，不须弦管催。

--裴度

乐观鱼踊跃，闲爱鹤裴回。烟柳青凝黛，波萍绿拨醅。

--白居易

春榆初改火，律管又飞灰。红药多迟发，碧松宜乱栽。

· 全唐诗 ·

--刘禹锡

马嘶驼陌上，鹄泛凤城隈。色色时堪惜，些些病莫推。

--裴度

涵流寻轧轧，余刃转恢恢。从此知心伏，无因敢自媒。

--刘禹锡

室随亲客入，席许旧寮陪。逸兴嵇将阮，交情陈与雷。

--白居易

洪炉思哲匠，大厦要群材。他日登龙路，应知免曝鳃。

--刘禹锡

卷 790_8 【宴兴化池亭送白二十二东归联句】

裴度

东洛言归去，西园告别来。白头青眼客，池上手中杯。

--裴度

离瑟殷勤奏，仙舟委曲回。征轮今欲动，宾阁为谁开。

--刘禹锡

坐弄琉璃水，行登绿縠堆。花低妆照影，萍散酒吹醅。

--白居易

岸荫新抽竹，亭香欲变梅。随游多笑傲，遇胜且裴回。

--张籍

澄澈连天境，潺湲出地雷。林塘难共赏，鞍马莫相催。

--裴度

信及鱼还乐，机忘鸟不猜。晚晴槐起露，新雨石添苔。

--刘禹锡

· 全唐诗 ·

拟作云泥别，尤思顷刻陪。歌停珠贯断，饮罢玉峰颓。

--白居易

虽有逍遥志，其如磊落才。会当重入用，此去肯悠哉。

--张籍

卷 790_9 【西池送白二十二东归兼寄令狐相公联句】

裴度

促坐宴回塘，送君归洛阳。彼都留上宰，为我说中肠。

--裴度

威凤池边别，冥鸿天际翔。披云见居守，望日拜封章。

--刘禹锡

春尽年华少，舟通景气长。送行欢共惜，寄远意难忘。

--张籍

东道瞻轩盖，西园醉羽觞。谢公深眷眄，商皓信辉光。

--行式

旧德推三友，新篇代八行。（以下缺）

卷 790_10 【杏园联句】

李绛

杏园千树欲随风，一醉同人此暂同。 --群上司空

老态忽忘丝管里，衰颜宜解酒杯中。 --李绛

· 全唐诗 ·

曲江日暮残红在，翰苑年深旧事空。 --白居易
二十四年流落者，故人相引到花丛。 --刘禹锡

卷 790_11 【花下醉中联句】

李绹

共醉风光地，花飞落酒杯。 --李绹
残春犹可赏，晚景莫相催。 --刘禹锡
酒幸年年有，花应岁岁开。 --白居易
且当金韵掷，莫遣玉山颓。 --李绹
高会弥堪惜，良时不易陪。 --庾承宣
谁能拉花住，争换得春回。 --刘禹锡
我辈寻常有，佳人早晚来。 --杨嗣复
寄言三相府，欲散且裴回。 --白居易

卷 790_12 【乐天是月长斋鄙夫此时愁卧里闾非远云雾难披因以...惊禅】

刘禹锡

五月长斋月，文心苦行心。兰葱不入户，薺卜自成林。
--刘禹锡
护戒先辞酒，嫌喧亦彻琴。尘埃宾位静，香火道场深。
--白居易

· 全唐诗 ·

我静驯狂象，餐余施众禽。定知于佛佞，岂复向书淫。

--刘禹锡

阑药凋红艳，庭槐换绿阴。风光徒满目，云雾未披襟。

--白居易

树为清凉倚，池因盥漱临。蘋芳遭燕拂，莲坼待蜂寻。

--刘禹锡

舍下环流水，窗中列远岑。苔斑钱剥落，石怪玉欽岑。

--白居易

鹊顶迎秋秃，莺喉入夏瘖。绿杨垂嫩色，綖棘露长针。

--刘禹锡

散秩身犹幸，趋朝力不任。官将方共拙，年与病交侵。

--白居易

徇乐非时选，忘机似陆沈。鉴容称四皓，扞腹有三壬。

--刘禹锡

携手惭连璧，同心许断金。紫芝虽继唱，白雪少知音。

--白居易

忆罢吴门守，相逢楚水浔。舟中频曲宴，夜后各加斟。

--刘禹锡

浊酒销残漏，弦声间远砧。酡颜舞长袖，密坐接华簪。

--白居易

持论峰峦峻，战文矛戟森。笑言诚莫逆，造次必相箴。

--刘禹锡

往事应如昨，余欢迄至今。迎君常倒屣，访我辄携衾。

--白居易

阴魄初离毕，阳光正在参。待公休一食，纵饮共狂吟。

--刘禹锡

· 全唐诗 ·

卷 790_13 【秋霖即事联句三十韵】

白居易

萧索穷秋月，苍茫苦雨天。泄云生栋上，行潦入庭前。

--白居易

苔色侵三径，波声想五弦。井蛙争入户，辙鲋乱归泉。

--王起

高霫愁晨坐，空阶惊夜眠。鹤鸣犹未已，蚁穴亦频迁。

--刘禹锡

散漫疏还密，空濛断复连。竹沾青玉润，荷滴白珠圆。

--白居易

地湿灰蛾灭，池添水马怜。有苗沾霢霂，无月弄潺湲。

--王起

篱菊潜开秀，园蔬已罢鲜。断行随雁翅，孤啸耸鸢肩。

--刘禹锡

桥柱黏黄菌，墙衣点绿钱。草荒行药路，沙泛钓鱼船。

--白居易

长者车犹阻，高人榻且悬。金乌何日见，玉爵几时传。

--王起

近井桐先落，当檐石欲穿。趋风诚有恋，披雾邈无缘。

--刘禹锡

廩米陈生黯，庖薪湿起烟。鸣鸡潜报晓，急景暗凋年。

--白居易

盖洒高松上，丝繁细柳边。拂丛时起蝶，堕叶乍惊蝉。

--王起

· 全唐诗 ·

巾角皆争垫，裙裾别似湔。人多蒙翠被，马尽著连乾。

-- 刘禹锡

好客无来者，贫家但悄然。湿泥印鹤迹，漏壁络蜗涎。

-- 白居易

蚊聚雷侵室，鸥翻浪满川。上楼愁幂幂，绕舍厌溅溅。

-- 王起

律候今秋矣，欢娱久旷焉。但令高兴在，晴后奉周旋。

-- 刘禹锡

卷 790_14 【喜晴联句】

白居易

苦雨晴何喜，喜于未雨时。气收云物变，声乐鸟乌知。

-- 白居易

蕙泛光风圃，兰开皎月池。千峰分远近，九陌好追随。

-- 王起

白日开天路，玄阴卷地维。余清在林薄，新照入涟漪。

-- 刘禹锡

碧树凉先落，青芜湿更滋。晒毛经浴鹤，曳尾出泥龟。

-- 白居易

舞去商羊速，飞来野马迟。柱边无润础，台上有游丝。

-- 王起

桥净行尘息，堤长禁柳垂。宫城开睥睨，观阙丽罽毼。

-- 刘禹锡

洛水澄清镇，嵩烟展翠帷。梁成虹乍见，市散蜃初移。

· 全唐诗 ·

--白居易

藉草风犹暖，攀条露已晞。屋穿添碧瓦，墙缺召金锤。

--王起

迴彻来双目，昏烦去四支。霞文晚灿烂，星影夕参差。

--刘禹锡

爽助门庭肃，寒摧草木衰。黄干向阳菊，红洗得霜梨。

--白居易

假盖闲谁惜，弹弦燥更悲。散蹄良马稳，炙背野人宜。

--王起

洞户晨晖入，空庭宿雾披。推林出书目，倾笥上衣施。

--刘禹锡

道路行非阻，轩车望可期。无辞访圭窦，且愿见琼枝。

--白居易

山阁蓬莱客，储宫羽翼师。每优陪丽句，何暇覩英姿。

--王起

玩景方搔首，怀人尚敛眉。因吟仲文什，高兴尽于斯。

--刘禹锡

卷 790_15 【会昌春连宴即事】

白居易

元年寒食日，上巳暮春天。鸡黍三家会，莺花二节连。

--白居易

光风初澹荡，美景渐暄妍。簪组兰亭上，车舆曲水边。

--刘禹锡

· 全唐诗 ·

松声添奏乐，草色助铺筵。雀舫宜闲泛，螺杯任漫传。

--王起

园蔬香带露，厨柳暗藏烟。丽句轻珠玉，清谈胜管弦。

--白居易

陌喧金距斗，树动彩绳悬。姹女妆梳艳，游童衣服鲜。

--刘禹锡

圃香知种蕙，池暖忆开莲。怪石云疑触，夭桃火欲然。

--王起

正欢唯恐散，虽醉未思眠。啸傲人间世，追随地上仙。

--白居易

燕来双颺颺，雁去累翩翩。行乐真吾事，寻芳独我先。

--刘禹锡

滞周惭太史，入洛继先贤。昔恨多分手，今欢谬比肩。

--王起

病犹陪宴饮，老更奉周旋。望重青云客，情深白首年。

--白居易

遍尝珍馐后，许入画堂前。舞袖翻红炬，歌鬟插宝蝉。

--刘禹锡

断金多感激，倚玉贵迁延。说史吞颜注，论诗笑郑笺。

--王起

松筠寒不变，胶漆冷弥坚。兴伴王寻戴，荣同隗在燕。

--白居易

掷卢夸使气，刻烛斗成篇。实艺皆三捷，虚名愧六联。

--刘禹锡

兴阑犹举白，话静每思玄。更说归时好，亭亭月正圆。

--王起

· 全唐诗 ·

卷 790_16 【仆射来示有三春向晚四者难并之说诚哉是言辄...
兼简尚书】

白居易

三春今向晚，四者昔难并。借问低眉坐，何如携手行。

--白居易

旧游多过隙，新宴且寻盟。鹦鹉林须乐，麒麟阁未成。

--王起

分阴当爱惜，迟景好逢迎。林野熏风起，楼台谷雨晴。

--刘禹锡

墙低山半出，池广水初平。桥转长虹曲，舟回小鹢轻。

--白居易

残花犹布绣，密竹自闻笙。欲过芳菲节，难忘宴慰情。

--王起

月轮行似箭，时物始如倾。见雁随兄去，听莺求友声。

--刘禹锡

蕙长书带展，菰嫩剪刀生。坐密衣裳暖，堂虚丝管清。

--白居易

峰峦侵碧落，草木近朱明。与点非沂水，陪膺是洛城。

--王起

拨醅争绿醕，卧酪待朱樱。几处能留客，何人唤解醒。

--刘禹锡

旧仪尊右揆，新命宠春卿。有喜鹊频语，无机鸥不惊。

--白居易

青林思小隐，白雪仰芳名。访旧殊千里，登高赖九城。

· 全唐诗 ·

--王起

鄭侯司管钥，疏傅傲簪纓。纶綍曾同掌，烟霄即上征。

--刘禹锡

册庭尝接武，书殿忝连衡。兰室春弥馥，松心晚更贞。

--白居易

琴招翠羽下，钩掣紫鳞呈，只愿回乌景。谁能避兕觥。

--王起

方知醉兀兀，应是走营营。凤阁鸾台路，从他年少争。

--白居易

· 全唐诗 ·

第七百九十一卷

卷 791_1 【城南联句】

韩愈

竹影金琐碎， -- 孟郊
泉音玉淙琤。琉璃剪木叶， -- 韩愈
翡翠开园英。流滑随仄步， -- 孟郊
搜寻得深行。遥岑出寸碧， -- 韩愈
远目增双明。乾穰纷拄地， -- 孟郊
化虫枯揭茎。木腐或垂耳， -- 韩愈
草珠竞骈睛。浮虚有新劘， -- 孟郊
摧扞饶孤撑。囚飞黏网动， -- 韩愈
盗啖接弹惊。脱实自开坼， -- 孟郊
牵柔谁绕萦。礼鼠拱而立， -- 韩愈
骇牛躅且鸣。蔬甲喜临社， -- 孟郊
田毛乐宽征。露萤不自暖， -- 韩愈
冻蝶尚思轻。宿羽有先晓， -- 孟郊
食鳞时半横。菱翻紫角利， -- 韩愈
荷折碧圆倾。楚膩鱣鮪乱， -- 孟郊
獠羞羸蟹并。桑螵见虚指， -- 韩愈
穴狸闻斗狞。逗翳翅相筑， -- 孟郊

· 全唐诗 ·

摆幽尾交撈。蔓涎角出缩，--韩愈
树啄头敲铿。修箭裛金饵，--孟郊
群鲜沸池羹。岸壳坼玄兆，--韩愈
野粃渐丰萌。窑烟冪疏岛，--孟郊
沙篆印回平。痒肌遭眊刺，--韩愈
啾耳闻鸡生。奇虑恣回转，--孟郊
遐睎纵逢迎。颠林戢远睫，--韩愈
缥气夷空情。归迹归不得，--孟郊
舍心舍还争。灵麻撮狗虱，--韩愈
村稚啼禽猩。红皱晒檐瓦，--孟郊
黄团系门衡。得隼蝇虎健，--韩愈
相残雀豹趟。束枯樵指秃，--孟郊
刈熟担肩赭。涩旋皮卷旆，--韩愈
苦开腹彭亨。机舂潺湲力，--孟郊
吹簸飘飘精。赛馐木盘簇，--韩愈
鞞妖藤索絝。荒学五六卷，--孟郊
古藏四三莖。里儒拳足拜，--韩愈
土怪闪眸侦。蹄道补复破，--孟郊
丝窠扫还成。暮堂蝙蝠沸，--韩愈
破灶伊威盈。追此讯前主，--孟郊
答云皆冢卿。败壁剥寒月，--韩愈
折篴啸遗笙。袪熏霏霏在，--孟郊
慕迹微微呈。剑石犹竦槛，--韩愈
兽材尚擎楹。宝唾拾未尽，--孟郊
玉啼堕犹鎗。窗绡疑閟艳，--韩愈
妆烛已销檠。绿发抽珉髻，--孟郊
青肤耸瑶桢。白蛾飞舞地，--韩愈

· 全唐诗 ·

幽蠹落书棚。惟昔集嘉咏，--孟郊
吐芳类鸣嚶。窥奇摘海异，--韩愈
恣韵激天鲸。肠胃绕万象，--孟郊
精神驱五兵。蜀雄李杜拔，--韩愈
岳力雷车轰。大句斡玄造，--孟郊
高言轧霄峥。芒端转寒燠，--韩愈
神助溢杯觥。巨细各乘运，--韩愈
湍洄亦腾声。凌花咀粉蕊，--孟郊
削缕穿珠纓。绮语洗晴雪，--韩愈
娇辞哢雏莺。酣欢杂弁珥，--孟郊
繁价流金琼。菡萏写江调，--孟郊
菱蕤缀蓝瑛。庖霜脍玄鲫，--韩愈
浙玉炊香粳。朝饷已百态，--孟郊
春醪又千名。哀匏蹙驶景，--韩愈
冽唱凝余晶。解魄不自主，--孟郊
痺肌坐空瞠。扳援贱蹊绝，--韩愈
炫曜仙选更。丛巧竞采笑，--孟郊
骈鲜互探嬰。桑变忽芜蔓，--韩愈
樟裁浪登丁。霞斗讵能极，--孟郊
风期谁复赓。皋区扶帝壤，--韩愈
瑰蕴郁天京。祥色被文彦，--孟郊
良才插杉桎。隐伏饶气象，--韩愈
兴潜示堆坑。擘华露神物，--孟郊
拥终储地祲。訏谟壮締始，--韩愈
辅弼登阶清。坳秀恣填塞，--孟郊
呀灵瀹渟澄。益大联汉魏，--韩愈
肇初迈周嬴。积照涵德镜，--孟郊

· 全唐诗 ·

传经俪金籀。食家行鼎鼐，--韩愈
宠族饫弓旌。奕制尽从赐，--孟郊
殊私得逾程。飞桥上架汉，--韩愈
缭岸俯规瀛。潇碧远输委，--孟郊
湖嵌费携擎。荀苜从大漠，--韩愈
枫楮至南荆。嘉植鲜危朽，--孟郊
膏理易滋荣。悬长巧纽翠，--韩愈
象曲善攒珩。鱼口星浮没，--孟郊
马毛锦斑駮。五方乱风土，--韩愈
百种分鉏耜。葩蕖相妒出，--孟郊
菲茸共舒晴。类招臻倜诡，--韩愈
翼萃伏衿纓。危望跨飞动，--孟郊
冥升躋登閤。春游辄羶靡，--韩愈
彩伴飒嫿嫿。遗灿飘的皪，--孟郊
淑颜洞精诚。娇应如在寤，--韩愈
颓意若含醒。鸛毳翔衣带，--孟郊
鵝肪截佩璜。文升相照灼，--韩愈
武胜屠欃枪。割锦不酬价，--孟郊
构云有高营。通波物鳞介，--韩愈
疏畹富萧蘅。买养驯孔翠，--孟郊
远苞树蕉栟。鸿头排刺芡，--韩愈
鹄鹖攒瑰橙。鹖广杂良牧，--孟郊
蒙休赖先盟。罢旄奉环卫，--韩愈
守封践忠贞。战服脱明介，--孟郊
朝冠飘彩紘。爵勋逮僮隶，--韩愈
簪笏自怀綳。乳下秀疑疑，--孟郊
椒蕃泣喤喤。貌鉴清溢匣，--韩愈

· 全唐诗 ·

眸光寒发硎。馆儒养经史，--孟郊
缀戚觞孙甥。考钟馈穀核，--韩愈
夏鼓侑牢牲。飞膳自北下，--孟郊
函珍极东烹。如瓜煮大卵，--韩愈
比线茹芳菁。海岳错口腹，--孟郊
赵燕锡媼媵。一笑释仇恨，--韩愈
百金交弟兄。货至貊戎市，--孟郊
呼传鹦鵒令。顺居无鬼瞰，--韩愈
抑横免官评。杀候肆凌翦，--孟郊
笼原匝置紉。羽空颠雉鷄，--韩愈
血路迸狐麋。折足去踉蹌，--孟郊
蹙髻怒^{髻并}鬢。跃犬疾翥鸟，--韩愈
呀鹰甚饥虻。算蹄记功赏，--孟郊
裂脑擒揜振。猛毙牛马乐，--韩愈
妖残泉貉惇。窟穷尚嗔视，--孟郊
箭出方惊抨。连箱载已实，--韩愈
碍辙弃仍赢，喘觑锋刃点，--孟郊
困冲株杙盲。扫净豁旷旷，--韩愈
骋遥略苹苹。馋叉饱活禽，--孟郊
恶嚼^嚼腥鯖。岁律及郊至，--韩愈
古音命韶箴。旗旆流日月，--孟郊
帐庐扶栋甍。磊落奠鸿璧，--韩愈
参差席香葍。玄祗祉兆姓，--孟郊
黑柜饌丰盛。庆流蠲瘥疠，--韩愈
威畅捐轡輶。灵燔望高罔，--孟郊
龙驾闻敲磬。是惟礼之盛，--韩愈
永用表其宏。德孕厚生植，--孟郊

· 全唐诗 ·

恩熙完别黥。宅土尽华族，--韩愈
连田间强甿。荫庾森岭桧，--孟郊
啄场翔祥鹏，畦肥翦韭，--韩愈
陶固收盆罌。利养积余健，--孟郊
孝思事严祊。掘云破嶓嶮，--韩愈
采月漉坳泓。寺砌上明镜，--孟郊
僧孟敲晓铎。泥象对骋怪，--韩愈
铁钟孤舂铎。瘿颈闹鸂鶒，--孟郊
蜿垣乱蛭蝻。葚黑老蚕蠹，--韩愈
麦黄韵鹧鸪。韶曙迟胜赏，--孟郊
贤明戒先庚。驰门填偃仄，--韩愈
竞墅辄砢碎。碎纈红满杏，--孟郊
稠凝碧浮觴。蹙绳覲娥婺，--韩愈
斗草擷玃瑯。粉汗泽广额，--孟郊
金星堕连璫。鼻偷困淑郁，--韩愈
眼剽强盯瞠。是节饱颜色，--孟郊
兹疆称都城。书饶罄鱼茧，--韩愈
纪盛播琴箏。奚必事远覲，--孟郊
无端逐羈伧。将身亲魑魅，--韩愈
浮迹侣鸥鶻。腥味空莫屈，--孟郊
天年徒羨彭。惊魂见蛇蚓，--韩愈
触嗅值虾蟆。幸得履中气，--孟郊
忝从拂天枿。归私暂休暇，--韩愈
驱明出庠黉。鲜意竦轻畅，--孟郊
连辉照琼莹。陶暄逐风乙，--韩愈
跃视舞晴蜻。足胜自多诣，--孟郊
心贪敌无勍。始知乐名教，--韩愈

· 全唐诗 ·

何用苦拘伫。毕景任诗趣，--孟郊
焉能守硜硜--韩愈

卷 791_2 【会合联句】

韩愈

离别言无期，会合意弥重。--张籍
病添儿女恋，老丧丈夫勇。--韩愈
剑心知未死，诗思犹孤耸。--孟郊
愁去剧箭飞，欢来若泉涌。--张彻
析言多新贯，摅抱无昔壅。--张籍
念难须勤追，悔易勿轻踵。--韩愈
吟巴山鞞，说楚波堆垄。--孟郊
马辞虎豹怒，舟出蛟鼉恐。--张彻
狂鲸时孤轩，幽狄杂百种。--韩愈
瘴衣常腥腻，蛮器多疏冗。--张籍
剥苔吊斑林，角饭饵沈冢。--韩愈
忽尔衔远命，归欤舞新宠。--孟郊
鬼窟脱幽妖，天居覲清拱。--韩愈
京游步方振，谪梦意犹恫。--张籍
诗书夸旧知，酒食接新奉。--韩愈
嘉言写清越，愈病失朏肿。--孟郊
夏阴偶高庇，宵魄接虚拥。--韩愈
雪弦寂寂听，茗碗纤纤捧。--孟郊
驰辉烛浮萤，幽响泄潜蛰。--韩愈

· 全唐诗 ·

诗老独何心，江疾有余癘。 -- 孟郊
我家本瀟穀，有地介皋巩。休迹忆沈冥，峨冠惭闾閭。
-- 韩愈
升朝高轡逸，振物群听悚。徒言濯幽泌，谁与薤荒茸。
-- 张籍
朝绅郁青绿，马饰曜珪珙。国雖未销铄，我志荡邛隴。
-- 孟郊
君才诚倜傥，时论方汹涌。格言多彪蔚，悬解无桔橦。
-- 韩愈
张生得渊源，寒色拔山冢。坚如撞群金，眇若抽独蛹。
-- 韩愈
伊余何所拟，跛鳖讵能踊。块然堕岳石，飘尔冒巢鬻。
-- 孟郊
龙旆垂天卫，云韶凝禁脔。君胡眠安然，朝鼓声汹汹。
-- 韩愈

卷 791_3 【斗鸡联句】

韩愈

大鸡昂然来，小鸡竦而待。 -- 韩愈
峥嵘颠盛气，洗刷凝鲜彩。 -- 孟郊
高行若矜豪，侧睨如何殆。 -- 韩愈
精光目相射，剑戟心独在。 -- 孟郊
既取冠为胄，复以距为镞。天时得清寒，地利挟爽垲。
-- 韩愈

· 全唐诗 ·

磔毛各嘤痒，怒瘿争礧磊。俄膺忽尔低，植立瞥而改。

--孟郊

膂膊战声喧，缤翻落羽雥。中休事未决，小挫势益倍。

--韩愈

妒肠务生敌，贼性专相醢。裂血失鸣声，啄殷甚饥馁。

--孟郊

对起何急惊，随旋诚巧诒。毒手饱李阳，神槌因朱亥。

--韩愈

恻心我以仁，碎首尔何罪。独胜事有然，旁惊汗流浼。

--孟郊

知雄欣动颜，怯负愁看贿。争观云填道，助叫波翻海。

--韩愈

事爪深难解，嗔睛时未怠。一喷一醒然，再接再厉乃。

--孟郊

头垂碎丹砂，翼拓拖锦彩。连轩尚贾余，清厉比归凯。

--韩愈

选俊感收毛，受恩惭始隗。英心甘斗死，义肉耻庖宰。

--孟郊

君看斗鸡篇，短韵有可采。

--孟郊

卷 791_4 【纳凉联句】

韩愈

递啸取遥风，微微近秋朔。--孟郊

金柔气尚低，火老候愈浊。--韩愈

· 全唐诗 ·

熙熙炎光流，竦竦高云擢。 -- 韩愈
闪红惊蚰虬，凝赤耸山岳。目林恐焚烧，耳井忆灏灏。

-- 孟郊

仰惧失交泰，非时结冰雹。化邓渴且多，奔河诚已恚。

-- 孟郊

喝道者谁子，叩商者何乐。洗矣得滂沱，感然鸣鸞鷟。

-- 孟郊

嘉愿苟未从，前心空缅邈。清砌千回坐，冷环再三握。

-- 孟郊

烦怀却星星，高意还卓卓。 -- 孟郊

龙沈剧煮鳞，牛喘甚焚角。蝉烦鸣转喝，乌噪饥不啄。

-- 韩愈

昼蝇食案繁，宵蚋肌血渥。单絺厌已褫，长⁺⁺卷还捉。

-- 韩愈

幸兹得佳朋，于此荫华桷。青荧文簟施，淡漱甘瓜濯。

-- 韩愈

大壁旷凝净，古画奇駁萃。凄如狷寒门，皓若攒玉璞。

-- 韩愈

扫宽延鲜飏，汲冷渍香穉。筐实摘林珍，盘殽馈禽曷。

-- 韩愈

空堂喜淹留，贫馔羞齷齪。 -- 韩愈

殷勤相劝勉，左右加砻斫。贾勇发霜刃，争先曜冰槩。

-- 孟郊

微然草根响，先被诗情觉。感衰悲旧改，工异逞新貌。

-- 孟郊

谁言宾朋老，犹自将心学。危檐不敢凭，朽机惧倾扑。

-- 孟郊

· 全唐诗 ·

青云路难近，黄鹤足仍鉞。未能饮渊泉，立滞叫芳药。

--孟郊

与子昔睽离，嗟余苦屯剥。直道败邪径，拙谋伤巧诤。

--韩愈

炎湖度氛氲，热石行荦砢。瘠肌夏尤甚，疟渴秋更数。

--韩愈

君颜不可覩，君手无由搦。今来沐新恩，庶见返鸿朴。

--韩愈

儒庠恣游息，圣籍饱商榷。危行无低徊，正言免咿喔。

--韩愈

车马获同驱，酒醪欣共漉。惟忧弃菅蒯，敢望侍帷幄。

--韩愈

此志且何如，希君为追琢。

--韩愈

卷 791_5 【秋雨联句】

韩愈

万木声号呼，百川气交会。--孟郊

庭翻树离合，牖变景明蔼。--韩愈

涿泻殊未终，飞浮亦云泰。--孟郊

牵怀到空山，属听迤惊濑。--韩愈

檐垂白练直，渠涨清湘大。--孟郊

甘津泽祥禾，伏润肥荒艾。--韩愈

主人吟有欢，客子歌无奈。--孟郊

侵阳日沈玄，剥节风搜兑。--韩愈

· 全唐诗 ·

块圯游峡喧，飍飍卧江汰。 --孟郊
微飘来枕前，高洒自天外。 --韩愈
蛰穴何迫迮，蝉枝扫鸣啾。 --孟郊
援菊茂新芳，径兰销晚馥。 --韩愈
地镜时昏晓，池星竞漂沛。 --孟郊
欢呶寻一声，灌注咽群籁。 --韩愈
儒宫烟火湿，市舍煎熬忧。 --孟郊
卧冷空避门，衣寒屡循带。 --韩愈
水怒已倒流，阴繁恐凝害。 --孟郊
忧鱼思舟楫，感禹勤畎浍。 --韩愈
怀襄信可畏，疏决须有赖。 --孟郊
筮命或冯蓍，卜晴将问蔡。 --韩愈
庭商忽惊舞，墉禁亦亲酌。 --孟郊
氛醺稍疏映，雾乱还拥荟。阴旌时彗流，帝鼓镇訇磕。
--韩愈
枣圃落青玕，瓜畦烂文贝。贫薪不烛灶，富粟空填膺。
--韩愈
秦俗动言利，鲁儒欲何句。深路倒羸骖，弱途拥行轡。
--孟郊
毛羽皆遭冻，离襪不能翔。翻浪洗虚空，倾涛败藏盖。
--孟郊
吾人犹在陈，僮仆诚自郤。因思征蜀士，未免湿戎旆。
--韩愈
安得发商飙，廓然吹宿霭。白日悬大野，幽泥化轻壤。
--韩愈
战场暂一干，贼肉行可脍。 --韩愈
搜心思有效，抽策期称最。岂惟虑收获，亦以求颠沛。

· 全唐诗 ·

-- 孟郊

禽情初啸俦，础色微收霏。庶几谐我愿，遂止无已太。

-- 韩愈

卷 791_6 【征蜀联句】

韩愈

日王忿违傲，有命事诛拔。蜀险豁关防，秦师纵横猾。

-- 韩愈

风旗匝地扬，雷鼓轰天杀。竹兵彼皴脆，铁刃我枪齿截。

-- 孟郊

刑神咤牦旄，阴焰飏犀札。翻霓纷偃蹇，塞野湏块圯。

-- 韩愈

生狞竞掣跌，痴突争填轧。渴斗信赍呶，啖奸何噢喏。

-- 孟郊

更呼相簸荡，交斫双缺齧。火发激铓腥，血漂腾足滑。

-- 韩愈

飞猱无整阵，翩鹞有邪戛。江倒沸鲸鲲，山摇溃獬狨。

-- 孟郊

中离分二三，外变迷七八。逆颈尽徽索，仇头恣髡鬣。

-- 韩愈

怒须犹髻髻，断臂仍瓢瓢。

-- 韩愈

石潜设奇伏，穴觑骋精察。中矢类妖豸，跳锋状惊獬。

-- 孟郊

蹋翻聚林岭，斗起成埃坱。 -- 孟郊

· 全唐诗 ·

旆亡多空杠，轴折鲜联辖。剟肤浹疮痍，败面碎剝刮。

--韩愈

浑奔肆狂勦，捷窜脱趫黠。岩钩踔狙猿，水漉杂鳣蜎。

--韩愈

投窃闹^礧石，填隍^礧嵬密。--韩愈

强睛死不闭，犷眼困逾眊。熬堞煖歔熹，抉门呀拗曷。

--孟郊

天刀封未坼，酋胆慑前揠。跼梁排郁缩，闯窞猊窞窞。

--孟郊

迫胁闻杂驱，咿呦叫冤踣。--孟郊

穷区指清夷，凶部坐雕铄。邛文裁斐亶，巴艳收馆纳。

--韩愈

椎肥牛呼牟，载实驼鸣曷。圣灵闵顽嚚，煮养均草莽。

--韩愈

下书遏雄虺，解罪吊挛瞎。--韩愈

战血时销洗，剑霜夜清刮。汉栈罢器闾，獠江息澎湃。

--孟郊

戍寒绝朝乘，刁暗歇宵警。始去杏飞蜂，及归柳嘶^扎虫。

--孟郊

庙献繁馘级，乐声洞控馘。--孟郊

台图焕丹玄，郊告俨匏籥。念齿慰黻黻，视伤悼癰疽。

--韩愈

休输任讹寝，报力厚秬秠。公欢钟晨撞，室宴丝晓拊。

--韩愈

杯盂酬酒醪，箱篚馈巾帟。小臣昧戎经，维用赞勋勗。

--韩愈

· 全唐诗 ·

卷 791_7 【同宿联句】

韩愈

自从别君来，远出遭巧谮。--韩愈
斑斑落春泪，浩浩浮秋浸。--孟郊
毛奇睹象犀，羽怪见鹏鹖。--韩愈
朝行多危栈，夜卧饶惊枕。--孟郊
生荣今分逾，死弃昔情任。--韩愈
鹪行参绮陌，鸡唱闻清禁。--孟郊
山晴指高标，槐密骛长荫。--韩愈
直辞一以荐，巧舌千皆舐。--孟郊
匡鼎惟说诗，桓谭不读讖。--韩愈
逸韵何嘈嗷，高名俟沽赁。--孟郊
纷葩欢屡填，旷朗忧早渗。--韩愈
为君开酒肠，颠倒舞相饮。--孟郊
曦光霁曙物，景曜铄宵侵。--韩愈
儒门虽大启，奸首不敢闯。义泉虽至近，盗索不敢沁。
--孟郊
清琴试一挥，白鹤叫相暗。欲知心同乐，双茧抽作纆。
--孟郊

· 全唐诗 ·

卷 791_8 【莎栅联句】

韩愈

冰溪时咽绝，风柝方轩举。 -- 韩愈
此处不断肠，定知无断处。 -- 孟郊

卷 791_9 【雨中寄孟刑部几道联句】

韩愈

秋潦淹辙迹，高居限参拜。 -- 韩愈
耿耿蓄良思，遥遥仰嘉话。 -- 孟郊
一晨长隔岁，百步远殊界。 -- 韩愈
商听饶清聿，闷怀空抑噫。 -- 孟郊
美君知道腴，逸步谢天械。 -- 韩愈
吟馨铎纷杂，抱照莹疑怪。 -- 孟郊
撞宏声不掉，输邈澜逾杀。 -- 韩愈
檐泻碎江喧，街流浅溪迈。 -- 孟郊
念初相遭逢，幸免因媒介。祛烦类决痂，愜兴剧爬疥。
-- 韩愈
研文较幽玄，呼博骋雄快。今君轺方驰，伊我羽已铄。
-- 韩愈
温存感深惠，琢切奉明诫。 -- 韩愈
迨兹更凝情，暂阻若婴瘵。欲知相从尽，灵珀拾纤芥。

· 全唐诗 ·

-- 孟郊

欲知相益多，神药销宿惫。德符仙山岸，永立难敲坏。

-- 孟郊

气涵秋天河，有朗无惊湃。 -- 孟郊

祥凤遗蒿鸚，云韶掩夷鞮。争名求鹄徒，腾口甚蝉喝。

-- 韩愈

未来声已赫，始鼓敌前败。斗场再鸣先，遐路一飞届。

-- 韩愈

东野继奇躅，修纶悬众牓。穿空细丘垤，照日陋菅蒯。

-- 韩愈

小生何足道，积愆如触蚤。悵悵抱所诺，翼翼自申戒。

-- 孟郊

圣书空勘读，盗食敢求嘬。惟当骑款段，岂望覲珪玦。

-- 孟郊

弱操愧筠杉，微芳比萧 。何以验高明，柔中有刚爓。

-- 孟郊

卷 791_10 【远游联句】

韩愈

别肠车轮转，一日一万周。 -- 孟郊

离思春冰泮，烂漫不可收。 -- 韩愈

驰光忽以迫，飞辔谁能留。 -- 孟郊

取之讵灼灼，此去信悠悠。 -- 李翱

楚客宿江上，夜魂栖浪头。晓日生远岸，水芳缀孤舟。

· 全唐诗 ·

-- 孟郊

村饮泊好木，野蔬拾新柔。独含凄凄别，中结郁郁愁。

-- 孟郊

人忆旧行乐，鸟吟新得俦。-- 孟郊

灵瑟时窅窅，露猿夜啾啾。愤涛气尚盛，恨竹泪空幽。

-- 韩愈

长怀绝无已，多感良自尤。即路涉献岁，归期眇凉秋。

-- 韩愈

两欢日牢落，孤悲坐绸缪。-- 韩愈

观怪忽荡漾，叩奇独冥搜。海鲸吞明月，浪岛没大沔。

-- 孟郊

我有一寸钩，欲钓千丈流。良知忽然远，壮志郁无抽。

-- 孟郊

魍魅暂出没，蛟螭互蟠纆。昌言拜舜禹，举颶凌斗牛。

-- 韩愈

怀糒馈贤屈，乘桴追圣丘。飘然天外步，岂肯区中囚。

-- 韩愈

楚些待谁吊，贾辞缄恨投。翳明弗可晓，秘魂安所求。

-- 孟郊

气毒放逐域，蓼杂芳菲畴。当春忽凄凉，不枯亦飕飕。

-- 孟郊

貉谣众猥款，巴语相咿嚅。默誓去外俗，嘉愿还中州。

-- 孟郊

江生行既乐，躬犂自相戮。饮醇趣明代，味腥谢荒陬。

-- 孟郊

驰深鼓利楫，趋险惊蜚輶。系石沈靳尚，开弓射鹄毳。

-- 韩愈

· 全唐诗 ·

路暗执屏翳，波惊戮阳侯。广泛信缥缈，高行恣浮游。

--韩愈

外患萧萧去，中悒稍稍瘳。振衣造云阙，跪坐陈清猷。

--韩愈

德风变谗巧，仁气销戈矛。名声照西海，淑问无时休。

--韩愈

归哉孟夫子，归去无夷犹。

--韩愈

卷 791_11 【晚秋郾城夜会联句】

韩愈

从军古云乐，谈笑青油幕。灯明夜观棋，月暗秋城柝。

--李正封

羁客方寂历，惊乌时落泊。语阑壮气衰，酒醒寒砧作。

--韩愈

遇主贵陈力，夷凶匪兼弱。百牢犒舆师，千户购首恶。

--李正封

平生耻论兵，未暮不轻诺。徒然感恩义，谁复论勋爵。

--韩愈

多士被沾污，小夷施毒蠹。何当铸剑戟。相与归台阁。

--李正封

室妇叹鸣鹤，家人祝喜鹊。终朝考蓍龟，何日亲烝飨。

--韩愈

间使断津梁，潜军索林薄。红尘羽书靖，大水沙囊涸。

--李正封

· 全唐诗 ·

铭山子所工，插羽余何忤。未足烦刀俎，只应输管钥。

--韩愈

雨矢逐天狼，电矛驱海若。灵诛固无纵，力战谁敢却。

--李正封

峨峨云梯翔，赫赫火箭著。连空隳雉堞，照夜焚城郭。

--韩愈

军门宣一令，庙算建三略。雷鼓揭千枪，浮桥交万笮。

--李正封

蹂野马云腾，映原旗火铄。疲氓坠将拯，残虏狂可缚。

--韩愈

摧锋若貔兕，超乘如猱獍。逢掖服翻惭，纓胡纓可愕。

--李正封

星陨闻雉雉，师兴随唳鹤。虎豹贪犬羊，鹰鹯憎鸟雀。

--韩愈

烧陂除积聚，灌垒失依托。凭轼谕昏迷，执殳征暴虐。

--李正封

仓空战卒饥，月黑探兵错。凶徒更蹈藉，逆族相啖嚼。

--韩愈

轴轳亘淮泗，旆旌连夏鄂。大野纵氏羌，长河浴骊骆。

--李正封

东西竞角逐，远近施矰缴。人怨童聚谣，天殃鬼行疟。

--韩愈

汉刑支郡黜，周制闲田削。侯社退无功，鬼薪惩不恪。

--李正封

余虽司斧钺，情本尚丘壑。且待献俘囚，终当返耕获。

--韩愈

藁街陈鈇钺，桃塞兴钱鑄。地理画封疆，天文扫寥廓。

· 全唐诗 ·

--李正封

天子悯疮痍，将军禁卤掠。策勋封龙额，归兽获麟脚。

--韩愈

诘诛敬王怒，给复哀人瘼。泽发解兜鍪，酖颜倾凿落。

--李正封

安存惟恐晚，洗雪不论昨。暮鸟已安巢，春蚕看满箔。

--韩愈

声明动朝阙，光宠耀京洛。旁午降丝纶，中坚拥鼓铎。

--李正封

密坐列珠翠，高门涂粉臑。跋朝贺书飞，塞路归鞍跃。

--韩愈

魏阙横云汉，秦关束岩嶠。拜迎罗囊鞬，问遗结囊橐。

--李正封

江淮永清晏，宇宙重开拓。是日号升平，此年名作噩。

--韩愈

洪赦方下究，武飙亦旁魄。南据定蛮陬，北攫空朔漠。

--李正封

儒生惬教化，武士猛刺斫。吾相两优游，他人双落莫。

--韩愈

印从负鼎佩，门为登坛凿。再入更显严，九迁弥謇谔。

--李正封

宾筵尽狐赵，导骑多卫霍。国史擅芬芳，宫娃分绰约。

--韩愈

丹掖列鹓鹭，洪炉衣狐貉。摛文挥月毫，讲剑淬霜锜。

--李正封

命衣备藻火，赐乐兼拊搏。两厢铺氍毹，五鼎调勺药。

--韩愈

· 全唐诗 ·

带垂苍玉佩，辔蹙黄金络。诱接喻登龙，趋驰状倾藿。

--李正封

青娥翳长袖，红颊吹鸣篳。傥不忍辛勤，何由恣欢谑。

--韩愈

惟当早富贵，岂得暂寂寞。但掷雇笑金，仍祈却老药。

--李正封

歿庙配尊罍，生堂合聲鑄。安行庇松篁，高卧枕莞蒹。

--韩愈

洗沐恣兰芷，割烹厌脾臄。喜颜非忸怩，达志无限获。

--李正封

诙谐酒席展，慷慨戎装著。斩马祭旄纛，炰羔礼芒屨。

--韩愈

山多离隐豹，野有求伸蠖。推选阅群材，荐延搜一鶚。

--李正封

左右供谄誉，亲交献谀噓。名声载揄扬，权势实熏灼。

--韩愈

道旧生感激，当歌发酬酢。群孙轻绮纨，下客丰醴酪。

--李正封

穷天贡琛异，匝海赐酺醑。作乐鼓还槌，从禽弓始彊。

--韩愈

取欢移日饮，求胜通宵博。五白气争呼，六奇心运度。

--李正封

恩泽诚布濩，鬻顽已箫勺。告成上云亭，考古垂矩矱。

--韩愈

前堂清夜吹，东第良晨酌。池莲拆秋房，院竹翻夏箨。

--李正封

五狩朝恒岱，三畋宿杨柞。农书乍讨论，马法长悬格。

· 全唐诗 ·

--韩愈

雪下收新息，阳生过京索。尔牛时寝讹，我仆或歌讹。

--李正封

帝载弥天地，臣辞劣萤爝。为诗安能详，庶用存糟粕。

--韩愈

卷 791_12 【石鼎联句】

韩愈

巧匠斫山骨，剜中事煎烹。--刘师服

直柄未当权，塞口且吞声。--侯喜

龙头缩菌蠢，豕腹涨彭亨。--轩辕弥明

外苞干藓文，中有暗浪惊。--刘师服

在冷足自安，遭焚意弥贞。--侯喜

谬当鼎鼐间，妄使水火争。--轩辕弥明

大似烈士胆，圆如战马缨。--刘师服

上比香炉尖，下与镜面平。--侯喜

秋瓜未落蒂，冻芋强抽萌。--轩辕弥明

一块元气闭，细泉幽窦倾。--刘师服

不值输写处，焉知怀抱清。--侯喜

方当洪炉然，益见小器盈。--轩辕弥明

琬琰无刃迹，团团类天成。--刘师服

遥疑龟负图，出曝晓正晴。--侯喜

旁有双耳穿，上有孤髻撑。或讶短尾铍，又似无足铛。

--刘师服

· 全唐诗 ·

可惜寒食球，掷此傍路坑。 -- 侯喜
何当出灰炮，无计离瓶罌。 -- 轩辕弥明
陋质荷斟酌，狭中愧提擎。 -- 刘师服
岂能煮仙药，但未污羊羹。 -- 侯喜
形模妇女笑，度量儿童轻。 -- 轩辕弥明
徒示坚重性，不过升合盛。 -- 刘师服
傍似废穀仰，侧见折轴横。 -- 侯喜
时于蚯蚓窍，微作苍蝇鸣。 -- 轩辕弥明
以兹翻溢愆，实负任使诚。 -- 刘师服
常居顾盼地，敢有漏泄情。 -- 侯喜
宁依暖热弊，不与寒凉并。 -- 轩辕弥明
区区徒自效，琐琐不足呈。 -- 侯喜
回旋但兀兀，开阖惟铿铿。 -- 刘师服
全胜瑚璉贵，空有口传名。岂比俎豆古，不为手所撄。
-- 轩辕弥明
磨砢去圭角，浸润著光精。愿君莫嘲诮，此物方施行。
-- 轩辕弥明

卷 791_13 【有所思联句】

孟郊

相思绕我心，日夕千万重。年光坐婉娩，春泪销颜容。
-- 孟郊
台镜晦旧晖，庭草滋深茸。望夫山上石，别剑水中龙。
-- 韩愈

· 全唐诗 ·

卷 791_14 【遣兴联句】

孟郊

我心随月光，写君庭中央。 -- 孟郊
月光有时晦，我心安所忘。 -- 韩愈
常恐金石契，断为相思肠。 -- 孟郊
平生无百岁，岐路有四方。 -- 韩愈
四方各异俗，适异非所将。 -- 孟郊
驽蹄顾挫秣，逸翮遗稻粱。 -- 韩愈
时危抱独沈，道泰怀同翔。 -- 孟郊
独居久寂默，相顾聊慨慷。 -- 韩愈
慨慷丈夫志，可以曜锋铓。 -- 孟郊
蓬宁知卷舒，孔颜识行藏。 -- 韩愈
殷鉴谅不远，佩兰永芬芳。 -- 孟郊
苟无夫子听，谁使知音扬。 -- 韩愈

卷 791_15 【赠剑客李园联句】

孟郊

天地有灵术，得之者惟君。 -- 孟郊
筑炉地区外，积火烧氛氲。 -- 韩愈
照海铄幽怪，满空歆异氛。 -- 孟郊
山磨电奕奕，水淬龙蜃蜃。 -- 韩愈

· 全唐诗 ·

太一装以宝，列仙篆其文。--孟郊
可用慑百神，岂惟壮三军。--韩愈
有时幽匣吟，忽似深潭闻。--孟郊
风胡久已死，此剑将谁分。--韩愈
行当献天子，然后致殊勋。--孟郊
岂如丰城下，空有斗间云。--韩愈

卷 791_16 【过海联句】

贾岛

沙鸟浮还没，山云断复连。--高丽使
棹穿波底月，船压水中天。--贾岛

· 全唐诗 ·

第七百九十二卷

卷 792_1 【妓席与杜牧之同咏】

张祜

骰子逡巡裹手拈，无因得见玉纤纤。--杜牧
但知报道金钗落，仿佛还应露指尖。--张祜

卷 792_2 【同赵二十二访张明府郊居联句】

杜牧

陶潜官罢酒瓶空，门掩杨花一夜风。--杜牧
古调诗吟山色里，无弦琴在月明中。--赵嘏
远檐高树宜幽鸟，出岫孤云逐晚虹。--杜牧
别后东篱数枝菊，不知闲醉与谁同。--赵嘏

· 全唐诗 ·

卷 792_3 【游长安诸寺联句·靖恭坊大兴善寺·老松青桐联
二...绝句】

段成式

有松堪系马，遇钵更投针。记得汤师句，高禅助朗吟。

--段成式

乘晴入精舍，语默想东林。尽是忘机侣，谁惊息影禽。

--张希复

一雨微尘尽，支郎许数过。方同嗅薝蔔，不用算多罗。

--郑符

卷 792_4 【游长安诸寺联句·靖恭坊大兴善寺·蛤像联二十
字绝句】

段成式

相好全如梵，端倪只为隋。宁同蚌顽恶，但与鹬相持。

--段成式

虽因雀变化，不逐月亏盈。纵有天中匠，神工讵可成。

--张希复

· 全唐诗 ·

卷 792_5 【游长安诸寺联句·靖恭坊大兴善寺·圣柱联句】

段成式

天心惟助善，圣迹此开阳。--段成式
载恐雷轮重，絙疑电索长。--张希复
上冲挟螭螭，不动束银铛。--段成式
饥鸟未曾啄，乖龙宁敢藏。--张希复

卷 792_6 【游长安诸寺联句·长乐坊安国寺·红楼联句（隐侯体）】

段成式

重叠碎晴空，余霞更照红。蝉踪近鵙鹖，鸟道接相风。
--张希复
苔静金轮路，云轻白日宫。壁诗传谢客，门榜占休公。
--段成式

卷 792_7 【游长安诸寺联句·长乐坊安国寺·穗柏联句】

段成式

一院暑难侵，莓苔共影深。标枝争息鸟，余吹正开襟。

· 全唐诗 ·

--段成式

宿雨香添色，残阳石在阴。乘闲动诗意，助静入禅心。

--张希复

卷 792_8 【游长安诸寺联句·长乐坊安国寺·题璘公院】

段成式

静，虚。热际，安居。--郑符

龕灯敛，印香除。东林宾客，西涧图书。檐外垂青豆，

--段成式

经中发白藁。纵辩宗因袞袞，忘言理事如如。--段成式

泉台定将入流否，邻笛足疑清梵余。--段成式

卷 792_9 【游长安诸寺联句·常乐坊赵景公寺·吴画联句】

段成式

惨澹十堵内，吴生纵狂迹。风云将逼人，神鬼如脱壁。

--段成式

其中龙最怪，张甲方汗栗。黑云夜窸窣，焉知不霹雳。

--张希复

此际忽仙子，猎猎衣舄奕。妙瞬乍疑生，参差夺人魄。

--郑符

往往乘猛虎，冲梁耸奇石。苍峭束高泉，角膝惊欹侧。

· 全唐诗 ·

--段成式

冥狱不可视，毛戴腋流液。苟能水成河，刹那沈火宅。

--升上人

卷 792_10 【游长安诸寺联句·常乐坊赵景公寺·题约公院】

段成式

印火荧荧，灯续焰青。--张希复

七俱胝咒，四阿含经。--段成式

各录佳语，聊事素屏。--郑符

丈室安居，延宾不扃。--升上人

卷 792_11 【游长安诸寺联句·大同坊云华寺·偶联句】

段成式

共入夕阳寺，因窥甘露门。--升上人

清香惹苔藓，忍草杂兰荪。--郑符

捷偈飞钳答，新诗倚仗论。--段成式

坏幡标古刹，圣画焕崇垣。--张希复

岂慕穿笼鸟，难防在牖猿。--段成式

一音唯一性，三语更三幡。--张希复

· 全唐诗 ·

卷 792_12 【游长安诸寺联句·道政坊宝应寺·僧房联句】

段成式

古画思匡岭，上方疑傅岩。蝶闲移忍草，蝉晓揭高杉。

--段成式

香字消芝印，金经发茝函。井通松底脉，书坼洞中緌。

--张希复

卷 792_13 【游长安诸寺联句·道政坊宝应寺·小小写真联句】

段成式

如生小小真，犹自未栖尘。--郑符

褕袂将离座，斜柯欲近人。--段成式

昔时知出众，情宠占横陈。--张希复

不遣游张巷，岂教窥宋邻。--郑符

庾楼吹笛裂，弘阁赏歌新。--段成式

蝉怯纤腰步，蛾惊半额颦。--张希复

图形谁有术，买笑讵辞贫。--段成式

复陇迷村径，重泉隔汉津。--郑符

同心知作羽，比目定为鳞。--张希复

残月巫山夕，余霞洛浦晨。--段成式

· 全唐诗 ·

卷 792_14 【游长安诸寺联句·平康坊菩萨寺·书事联句】

段成式

悉为无事者，任被俗流憎。--郑符
客异干时客，僧非出院僧。--段成式
远闻疏牖磬，晓辨密龛灯。--张希复
步触珠幡响，吟窥钵水澄。--郑符
句饶方外趣，游惬社中朋。--段成式
静里已驯鸽，斋中亦好鹰。--张希复
金涂笔是麋，彩溜纸非缯。--升上人
锡杖已克锻，田衣从怀媵。--段成式
占床暂一胁，卷箔赖长肱。--张希复
佛日初开照，魔天破几层。--段成式
咒中陈秘计，论处正先登。--张希复
勇带绽针石，危防丘井藤。--升上人

卷 792_15 【游长安诸寺联句·光宅坊光宅寺·中禅师影堂联句】

段成式

名下固无虚，敖曹貌严毅。洞达见空王，圆融入佛地。
--张希复
一言当要害，忽忽醒诸醉。不动须弥山，多方辩无匮。

· 全唐诗 ·

-- 郑符

坦率对万乘，偈答无所避。尔如毗沙门，外形如脱履。

-- 段成式

但以理为量，不语怪力事。木石摧贡高，慈悲引贪恚。

-- 升上人

当时乏支许，何人契深致。随宜诂说三，直下开不二。

-- 段成式

卷 792_16 【游长安诸寺联句·翊善坊保寿寺·光天帙赞联句】

段成式

观音化身，厥形孔怪。脍脑淫厉，众魔膜拜。-- 张希复

指梦鸿纷，榜列区界。其事明张，何不可解。-- 段成式

阎阿德川，大士先天。众象参罗，福源田田。-- 郑符

百亿花发，百千灯然。胶如络绎，浩汗连绵。-- 张希复

焰摩界戚，洛迦苦雾。正念皈依，众青如彗。-- 段成式

戾宰可汰，痴膜可蜕。稽首如空，睟容若睟。-- 张希复

阐提墨师，睹而面之。寸念不生，未遇乎而。-- 段成式

卷 792_17 【游长安诸寺联句·宣阳坊静域寺·三阶院联句】

段成式

密密助堂堂，隋人歌禰桑。双弧摧孔雀，一矢陨贪狼。

· 全唐诗 ·

--段成式

百步望云立，九规看月张。获蛟徒破浪，中乙漫如墙。

--张希复

还似贯金鼓，更疑穿石梁。因添挽河力，为灭射天狂。

--段成式

绝艺却南牧，英声来鬼方。丽龟何足敌，殪豕未为长。

--郑符

龙臂胜猿臂，星芒超箭芒。虚夸绝高鸟，垂拱议明堂。

--段成式

卷 792_18 【游长安诸寺联句·崇义坊招福院·赠诸上人联句】

段成式

翻了西天偈，烧余梵宇香。撚眉愁俗客，支颊背残阳。

--段成式

洲号惟思沃，山名只记匡。辨中摧世智，定里破魔强。

--张希复

许睿禅心彻，汤休诗思长。朗吟疏磬断，久语贯珠妨。

--段成式

乘兴书芭叶，闲来入豆房。漫题存古壁，怪画匝长廊。

--张希复

· 全唐诗 ·

卷 792_19 【游长安诸寺联句·招国坊崇济寺·奇松联二十字
绝句】

段成式

杉松何相疏，榆柳方迴屑。无人擅谈柄，一枝不敢折。

--段成式

中庭苔藓深，吹余鸣佛禽。至于摧折枝，凡草犹避阴。

--张希复

僻径根从露，闲房枝任侵。一株风正好，来助碧云吟。

--郑符

时时扫窗声，重露滴寒砌。风飏一枝遒，闲窥别生势。

--升上人

偃盖入楼妨，盘根侵井窄。高僧独惆怅，为与澄岚隔。

--段成式

卷 792_20 【游长安诸寺联句·永安坊永寿寺·闲中好】

段成式

闲中好，尽日松为侣。此趣人不知，轻风度僧语。

--郑符

闲中好，尘务不萦心。坐对当窗木，看移三面阴。

--段成式

闲中好，幽磬度声迟。卷上论题肇，画中僧姓支。

· 全唐诗 ·

--张希复

卷 792_21 【游长安诸寺联句·崇仁坊资圣寺·诸画联句（柏梁体）】

段成式

吴生画勇矛戟攒，--段成式
出变奇势千万端。--张希复
苍苍鬼怪层壁宽，--郑符
睹之忽忽毛发寒。--段成式
棱伽之力所疲殫，--段成式
李真周昉优劣难。--郑符
活禽生卉推边鸾，--段成式
花房嫩彩犹未干。--张希复
韩干变态如激湍，--郑符
惜哉壁画世未殫。--段成式
后人新画何汗漫。--张希复

· 全唐诗 ·

第七百九十三卷

卷 793_1 【北禅院避暑联句】

皮日休

欹蒸何处避，来入戴颙宅。逍遥脱单絁，放旷抛轻策。

--皮日休

爬搔林下风，偃仰涧中石。

--皮日休

残蝉烟外响，野鹤沙中迹。到此失烦襟，萧然揖禅伯。

--陆龟蒙

藤悬叠霜蛭，桂倚支云锡。--陆龟蒙

清阴竖毛发，爽气舒筋脉。逐幽随竹书，选胜铺苾席。

--皮日休

鱼跳上紫芡，蝶化缘青壁。

--皮日休

心是玉莲徒，耳为金磬敌。吾宗昔高尚，志在羲皇易。

--陆龟蒙

岂独断韦编，几将刳铁籀。

--陆龟蒙

天书既屡降，野抱难自适。一入承明庐，盱衡论今昔。

--皮日休

流光不容寸，斯道甘枉尺。

--皮日休

既起谢儒玄，亦翻商羽翼。封章帷幄遍，梦寐江湖白。

--陆龟蒙

· 全唐诗 ·

摆落函谷尘，高鼓华阳帟。 --陆龟蒙
诏去云无信，归来鹤相识。半病夺牛公，全慵捕鱼客。
--皮日休
少微光一点，落此芒磔索。 --皮日休
释子问池塘，门人废幽蹟。堪悲东序宝，忽变西方籍。
--陆龟蒙
不见步兵诗，空怀康乐屐。 --陆龟蒙
高名不可效，胜境徒堪惜。墨沼转疏芜，玄斋逾阒寂。
--皮日休
迟迟不可去，凉飈满杉柏。 --皮日休
日下洲岛清，烟生苾刍碧。俱怀出尘想，共有吟诗癖。
--陆龟蒙
终与净名游，还来雪山觅。 --陆龟蒙

卷 793_2 【寂上人院联句】

皮日休

瘦床空默坐，清景不知斜。暗数菩提子，闲看薜荔花。
--皮日休
有情惟墨客，无语是禅家。背日聊依桂，尝泉欲试茶。
--陆龟蒙
石形蹲玉虎，池影闪金蛇。经笥安岩匱，瓶囊挂树桠。
--皮日休
书传沧海外，龕寄白云涯。竹色寒凌箔，灯光静隔纱。
--陆龟蒙

· 全唐诗 ·

趁幽翻小品，逐胜讲南华。莎彩融黄露，莲衣染素霞。

--皮日休

水堪伤聚沫，风合落天葩。若许传心印，何辞古堞赊。

--陆龟蒙

卷 793_3 【独在开元寺避暑，颇怀鲁望，因飞笔联句】

皮日休

烦暑虽难避，僧家自有期。泉甘于马乳，苔滑似龙髯。

--皮日休

任诞襟全散，临幽榻旋移。松行将雅拜，篁阵欲交麾。

--陆龟蒙

望塔青髯识，登楼白鸽知。石经森欲动，珠像俨将怡。

--皮日休

筠簟临杉穗，纱巾透雨丝。静谭蝉噪少，凉步鹤随迟。

--皮日休

烟重回蕉扇，轻风拂桂帷。对碑吴地说，开卷梵天词。

--陆龟蒙

积水鱼梁坏，残花病枕欹。怀君潇洒处，孤梦绕罍罍。

--陆龟蒙

卷 793_4 【寒夜文宴联句】

皮日休

文星今夜聚，应在斗牛间。--皮日休

· 全唐诗 ·

载石人方至，乘槎客未还。--张贲
送觞繁露曲，征句白云颜。--陆龟蒙
节奏惟听竹，从容只话山。--皮日休
理穷倾秘藏，论猛折玄关。--张贲
酃酒分中绿，巴笺擘处殷。--陆龟蒙
清言闻后醒，强韵压来艰。--皮日休
犀柄当风揖，琼枝向月攀。--张贲
松吟方嘹嘹，泉梦忆潺潺。--陆龟蒙
一会文章草，昭明不可删。--皮日休

卷 793_5 【药名联句】

皮日休

为待防风饼，须添薏苡杯。--张贲
香然柏子后，尊泛菊花来。--皮日休
石耳泉能洗，垣衣雨为裁。--陆龟蒙
从容犀局静，断续玉琴哀。--张贲
白芷寒犹采，青箱醉尚开。--皮日休
马衔衰草卧，乌啄蠹根回。--陆龟蒙
雨过兰芳好，霜多桂未摧。--张贲
朱儿应作粉，云母讵成灰。--皮日休
芝可屠龙胆，家曾近燕胎。--陆龟蒙
墙高牵薜荔，障软撼玫瑰。--张贲
鸂鶒啼书户，蜗牛上研台。--皮日休
谁能将藁本，封与玉泉才。--陆龟蒙

· 全唐诗 ·

卷 793_6 【寒夜联句】

陆龟蒙

静境揖神凝，寒华射林缺。--陆龟蒙
清知思绪断，爽觉心源彻。--皮日休
高唱戛金奏，朗咏铿玉节。--陆龟蒙
我思方沆寥，君词复凄切。--皮日休
况闻风篴上，摆落残冻雪。--陆龟蒙
寂尔万籁清，皎然诸霭灭。--皮日休
西窗客无梦，南浦波应结。--陆龟蒙
河光正如剑，月魄方似玦。--皮日休
短烬不禁挑，冷毫看欲折。--陆龟蒙
何夕重相期，浊醪还为设。--皮日休

卷 793_7 【开元寺楼看雨联句】

陆龟蒙

海上风雨来，掀轰杂飞电。登楼一凭槛，满眼蛟龙战。
--陆龟蒙
须臾造化惨，倏忽堪舆变。万户响戈鋌，千家披组练。
--皮日休
群飞抛轮石，杂下攻城箭。点急似摧胸，行斜如中面。
--陆龟蒙

· 全唐诗 ·

细洒魂空冷，横飘目能眩。垂檐珂珮喧，掬瓦珠玑溅。

--皮日休

无言九阍远，瞬息驰应遍。密处正垂緌，微时又悬线。

--陆龟蒙

写作玉界破，吹为羽林旋。翻伤列缺劳，却怕丰隆倦。

--皮日休

遥瞻山露色，渐觉云成片。远树欲鸣蝉，深檐尚藏燕。

--陆龟蒙

残雷隐鳞尽，反照依微见。天光洁似磨，湖彩熟于练。

--皮日休

疏帆逗前渚，晚磬分凉殿。接思强挥毫，窥词几焚研。

--陆龟蒙

佶栗乌皮几，轻明白羽扇。毕景好疏吟，余凉可清宴。

--皮日休

君携下高磴，僧引还深院。驳藓净铺筵，低松湿垂髻。

--陆龟蒙

斋明乍虚豁，林霁逾葱蒨。早晚重登临，欲去多离恋。

--皮日休

卷 793_8 【报恩寺南池联句】

陆龟蒙

古岸涵碧落，--陆龟蒙

虚轩明素波。坐来鱼阵变，--皮日休

吟久菊 多。秋草分杉露，--嵩起

· 全唐诗 ·

危桥下竹坡。远峰青髻并，--陆龟蒙
髯和。赵论寒仍讲，--皮日休
支硎僻亦过。斋心曾养鹤，--嵩起
挥翰好邀鹅。倚石收奇药，--陆龟蒙
临溪藉浅莎。桂花晴似拭，--皮日休
荷镜晓如磨。翠出牛头耸，--嵩起
苔深马迹跛。伞鼓从野醉，--陆龟蒙
巾侧任田歌。跢跢松形矮，--皮日休
般跚桧樾挫。香飞僧印火，--嵩起
泉急使鑪珂。菱钿真堪帖，--陆龟蒙
莼丝亦好拖。几时无一事，--皮日休
相伴著烟萝。--嵩起

卷 793_9 【天台禅院联句】

安守范

偶到天台院，因逢物外僧。--安守范
忘机同一祖，出语离三乘。--杨鼎夫
树老中庭寂，窗虚外境澄。--周述
片时松影下，联续百千灯。--李仁肇

· 全唐诗 ·

第七百九十四卷

卷 794_1 【讲德联句】

皎然

先王设位，以正邦国。建立大官，封植有德。 --潘述
二南敷化，四岳述职。其言不朽，其仪不忒。 --汤衡
暨于嬴刘，乃创程式。罢侯置守，剖竹分域。 --皎然
赫矣皇唐，康哉立极。精选藩翰，庸资正直。 --潘述
爰命我公，东土作则。克己恭俭，疲人休息。 --汤衡
济济闾閭，油油黍稷。既富既教，足兵足食。 --皎然
恤其凋瘵，剪其荆棘。威怀逋叛，扑灭蝥贼。 --潘述
疾恶如雠，闻善不惑。哀矜鰥寡，旌礼儒墨。 --汤衡
乃修堤防，乃浚沟洫。以利通商，以溉嘉谷。 --皎然
征赋以节，计功以时。人胥怀惠，吏不能欺。 --潘述
我政载孚，我邦载绥。猛兽不暴，嘉鱼维滋。 --汤衡
肃恭明神，齐沐不亏。岁或骄阳，雨无愆期。 --皎然
帝嘉有庸，宠命来斯。紫绂载綬，金章陆离。 --潘述
资忠履孝，阅礼敦诗。明德惟馨，自天祐之。 --汤衡

· 全唐诗 ·

卷 794_2 【讲古文联句】

皎然

帝出于震，文明始敷。--潘述
山岳降气，龟龙负图。--裴济
爰有书契，乃立典谟。--皎然
先知孔圣，飞步天衢。--汤衡
汉承秦弊，尊儒尚学。--潘述
百氏六经，九流七略。--裴济
屈宋接武，班马继作。--皎然
或颂燕然，或赞麟阁。--汤衡
降及三祖，始变二雅。--潘述
仲宣闲和，公干萧洒。--皎然
士衡安仁，不史不野。--皎然
左张精奥，嵇阮高寡。--汤衡
暨于江表，其文郁兴。--汤衡
绮丽争发，繁芜则惩。--潘述
词畔春华，思清冬冰。--潘述
景纯跌宕，游仙独步。--汤衡
青云其情，白璧其句。--汤衡
灵运山水，实多奇趣。--潘述
远派孤峰，龙腾凤翥。--潘述
陶令田园，匠意真直。--皎然
春柳寒松，不凋不饰。--皎然
江淹杂体，方见才力。--汤衡

· 全唐诗 ·

拟之信工，似而不逼。--汤衡
鲍昭从军，主意危苦。--潘述
气胜其词，雅愧于古。--潘述
隐侯似病，创制规矩。--皎然
时见琳琅，惜哉榛楛。--皎然
谢朓秀发，词理翩翩。--汤衡
孤标爽迈，深造精研。--汤衡
惠休翰林，别白离坚。--潘述
有会必惬，无惭曩贤。--潘述
吴均颇劲，失于典裁。--皎然
竟乏波澜，徒工边塞。--皎然
彼柳吴兴，高视时辈。--汤衡
汀洲一篇，风流寡对。--汤衡
何逊清切，所得必新。--潘述
缘情既密，象物又真。--潘述
江总征正，未越常伦。--皎然
时合风兴，或无淄磷。--皎然
二杜繁俗，三刘琐碎。--汤衡
陈徐之流，阴张之辈。--汤衡
伊数公者，阡域之外。--潘述
吁此以还，有固斯郤。--潘述

卷 794_3 【项王古祠联句】

皎然

遗庙风尘积，荒途岁月侵。--潘述

· 全唐诗 ·

英灵今寂寞，容卫尚森沈。--皎然
霸楚志何在，平秦功亦深。--汤衡
诸侯归复背，青史古将今。--潘述
星聚分已定，天亡力岂任。--皎然
采蘩如可荐，举酒沥空林。--汤衡

卷 794_4 【还丹可成诗联句】

皎然

羽化自仙骨，延年资养生。--皎然
金经启灵秘，玉液流至精。--潘述
八石思共炼，九丹知可成。--汤衡
吾心苟无妄，神理期合并。--皎然
封灶用六一，置门考休京。--潘述
浮光含日彩，圆质焕云英。--汤衡
持此保寿命，服之颐性情。--皎然
跂予望仙侣，高咏升天行。--潘述
鹤驾方可致，霓裳定将迎。--汤衡
不因五色药，安著七真名。--皎然
挥妙在微密，全功知感诚。--潘述
与君弃城市，携手游蓬瀛。--汤衡

· 全唐诗 ·

卷 794_5 【建安寺西院喜王郎中邁恩命初至联句】

皎然

迹就空门退，官从画省迁。住持良有愿，朝谒穴无缘。

--王邁

身净金绳内，心驰玉宸前。--皎然

荣添一两日，恩降九霄年。--齐翔

慕法能轻冕，追非欲佩弦。--李纵

栖闲那可久，鸳鹭待行联。--崔子向

卷 794_6 【建安寺夜会，对雨怀皇甫侍御曾联句】

皎然

相思非是远，风雨遣情多。--皎然

愿欲披云见，难堪候晓过。--李纵

夜长同岁月，地近极山河。--郑说

戒相初传授，文章旧切磋。--王邁

时称洛下咏，人许郢中歌。--崔子向

惆怅徒延首，其如一水何。--齐翔

· 全唐诗 ·

卷 794_7 【泛长城东溪，暝宿崇光寺，寄处士陆羽联句】

皎然

箬水青似箬，玉山碧于玉。--崔子向
逼霄沓万状，截地分千曲。--皎然
萍解深可窥，林豁遥在瞩。--崔子向
已高物外赏，稍涤区中欲。--皎然
野鹤翔又飞，世人羈且跼。--崔子向
沈吟迹所误，放浪心自足。--皎然
缅怀虚舟客，愿寄生刍束。--崔子向
说诗整颓波，立义激浮俗。--皎然
荆吴备登历，风土随编录。--崔子向
恨与清景别，拟教长路促。--皎然
溪鸟语鹂喽，寺花翻踯躅。--崔子向
印围水坛净，香护莲衣触。--皎然
捧经启纱灯，收衽礼金粟。--崔子向
安得扣关子，玄言对吾属。--皎然

卷 794_8 【与崔子向泛舟自招橘经箬里宿天居寺...联一十六韵以寄之】

皎然

晴日春态深，寄游恣所适。--皎然

· 全唐诗 ·

宁妨花木乱，转学心耳寂。--崔子向
取性怜鹤高，谋闲任山僻。--皎然
倚舷息空曲，舍履行浅碛。--崔子向
渚箬入里逢，野梅到村摘。--皎然
碑残飞雉岭，井翳潜龙宅。--崔子向
坏寺邻寿陵，古坛留劫石。--皎然
穿阶笋节露，拂瓦松梢碧。--崔子向
天界细云还，墙阴杂英积。--皎然
悬灯寄前焰，遥月升圆魄。--崔子向
何意清夜期，坐为高峰隔。--皎然
茗园可交袂，藤涧好停锡。--崔子向
微雨听湿巾，迸流从点席。--皎然
戏猿隔枝透，惊鹿逢人蹊。--崔子向
睹物赏已奇，感时思弥极。--皎然
芳菲如驰箭，望望共君惜。--崔子向

卷 794_9 【渚山春暮，会顾丞茗舍，联句效小庾体】

皎然

谁是惜暮人，相携送春日。因君过茗舍，留客开兰室。
--陆士修
湿苔滑行屐，柔草低藉瑟。鹊喜语成双，花狂落非一。
--崔子向
烟浓山焙动，泉破水舂疾。莫拗挂瓢枝，会移闾书帙。
--皎然

· 全唐诗 ·

颇容樵与隐，岂闻禅兼律。栏竹不求疏，网藤从更密。

--陆士修

池添逸少墨，园杂庄生漆。景晏枕犹敲，酒醒头懒栉。

--崔子向

云教淡机虑，地可遗名实。应待御苑青，幽期踏芳出。

--皎然

卷 794_10 【与李司直令从荻塘联句】

皎然

画舸悠悠荻塘路，真僧与我相随去。--李令从

寒花似菊不知名，霜叶如枫是何树。--李令从

倦客经秋夜共归，情多语尽明相顾。--皎然

遥城候骑来仍少，傍岭哀猿发无数。--皎然

心闲清净得禅寂，兴逸纵横问章句。--李令从

虫声切切草间悲，萤影纷纷月前度。--李令从

撩乱云峰好赋诗，婵娟水月堪为喻。--皎然

与君出处本不同，从此还依旧山住。--皎然

卷 794_11 【远意联句】

皎然

家在炎州往朔方，--疾(失姓)

岂知于阗望潇湘。--澄(失姓)

· 全唐诗 ·

曾经陇底复辽阳，--巨川(失姓)
更忆东去采扶桑。--皎然
楂客三千路未央，--严伯均
烛龙之地日无光。--疾(失姓)
将游莽苍穷大荒，--皎然
车辙马足逐周王。--严伯均

卷 794_12 【暗思联句】

皎然

斜风飘雨三十夜，--疾(失姓)
邻女余光不相借。--巨川(失姓)
迹灭尘生古人画，--皎然
洞房重扉无隙罅，--严伯均
烛灭更深月西谢。--从心(失姓)

卷 794_13 【乐意联句一首】

皎然

良朋益友自远来，--严伯均
万里乡书对酒开。--皎然
子孙蔓衍负奇才，--疾(失姓)
承颜弄鸟咏南陔，--澄(失姓)

· 全唐诗 ·

鼓腹击壤歌康哉。--巨川(失姓)

卷 794_14 【恨意联句】

皎然

同心同县不相见，--疾(失姓)
独采蘼芜咏团扇。--严伯均
莫听东邻捣霜练，--皎然
远忆征人泪如霰。--澄(失姓)
长信空阶芜草遍，--从心(失姓)
明妃初别昭阳殿。--杭(失姓)

卷 794_15 【秋日卢郎中使君幼平泛舟联句一首】

皎然

共载清秋客船，同瞻皂盖朝天。--卢藻
悔使比来相得，如今欲别潸然。--卢幼平
渐惊徒驭分散，愁望云山接连。--皎然
魏阙驰心日日，吴城挥手年年。--陆羽
送远已伤飞雁，裁诗更切嘶蝉。--潘述
空怀鄢杜心醉，永望门栏脰捐。--李恂
别思无穷无限，还如秋水秋烟。--潘述

· 全唐诗 ·

卷 794_16 【重联句一首】

皎然

相将惜别且迟迟，未到新丰欲醉时。--卢幼平
去郡独携程氏酒，入朝可忘习家池。--陆羽
仍怜故吏依依恋，自有清光处处随。--潘述
晚景南徐何处宿，秋风北固不堪辞。--皎然
吴中诗酒饶佳兴，秦地关山引梦思。--卢藻
对酒已伤嘶马去，衔恩只待扫门期。--惲(失姓)

卷 794_17 【与潘述集汤衡宅怀李司直纵联句】

皎然

幽独何以慰，友人顾茅茨。--汤衡
已忘岁月念，载说清闲时。--潘述
旭日舒朱槿，柔风引绿葳。--皎然
迢迢青溪路，耿耿芳树枝。--汤衡
执衽空踟躅，来城自逶迤。--潘述
相思寄采掇，景晏独驱驰。--皎然

· 全唐诗 ·

卷 794_18 【安吉崔明甫山院联句一首】

皎然

人不扰，政已和。世虑寡，山情多。 --皎然
禅客至，墨卿过。兴既洽，情如何。 --崔逵

卷 794_19 【重联句一首】

皎然

肃肃清院，脩脩碧鲜。已见心远，何关地偏。 --皎然
自公退食，升堂草玄。纷纷已隔，云心澹然。 --崔逵

卷 794_20 【重联句一首】

皎然

瀑溜闻窗外，晴风逼座间。 --皎然
挂冠徒有意，芳桂杳难攀。 --崔逵

· 全唐诗 ·

卷 794_21 【重联句一首】

皎然

清高素非宦侣，疏散从来道流。--皎然
今日还轻墨绶，知君意在沧洲。--皎然
浮云任从飘荡，寄隐也信沈浮。--崔逵
不似漳南地僻，道安为我淹留。--崔逵

卷 794_22 【重联句一首】

皎然

刘令兴多常步履，柴桑事少但援琴。--皎然
闲招法侣从山寺，每掇幽芳傍竹林。--皎然
卷帘只爱荆峰色，入座偏宜郢客吟。--崔逵
谁许近来轻印绶，因君昨日悟禅心。--崔逵

卷 794_23 【道观中和潘丞观青溪图联句】

皎然

画得青溪样，宜于紫府观。--皎然
日明烟霭薄，风落水容宽。--崔万

· 全唐诗 ·

画野高低接，商工井邑攒。--潘述
疏川因稼穡，出使问艰难。--皎然

卷 794_24 【春日对雨联句一首】

皎然

春烟带微雨，漠漠连城邑。桐叶生微阴，桃花更宜湿。
--韩章
萧条暗杨柳，散漫下原隰。归路不我从，遥心空伫立。
--皎然
林低山影近，岸转水流急。芳草自堪游，白云如可揖。
--韩章
寻山禅客意，苦雨陶公什。游衍情未终，归飞暮相及。
--皎然
峰高日色转，潭净天光入。却欲学神仙，空思谢朋执。
--韩章
为道贵逍遥，趋时多苦集。琼英若可餐，青紫徒劳拾。
--皎然

卷 794_25 【春日会韩武康章后亭联句】

皎然

后园堪寄赏，日日对春风。客位繁阴下，公墙细柳中。

· 全唐诗 ·

--皎然

坐看青嶂远，心与白云同。--韩章
林暗花烟入，池深远水通。--杨秦卿
井桃新长蕊，栏药未成丛。--仲文(失姓)
松竹宜禅客，山泉入谢公。--皎然
砌香翻芍药，檐静倚梧桐。--韩章
外虑宜帘卷，忘情与道空。--杨秦卿
楚僧招惠远，蜀客挹扬雄。--仲文(失姓)
便寄柴桑隐，何劳访剡东。--皎然

卷 794_26 【康录事宅送僧联句】

皎然

莲衣宜著雨，竹锡好随云。--皎然
见鹤还应养，逢鸥自作群。--崔子向

卷 794_27 【与邢端公李台题庭石联句】

皎然

共题诗句遍，争坐藓文稀。(余缺) --皎然

· 全唐诗 ·

卷 794_28 【冬日建安寺西院，喜昼公自吴兴至，联句一首】

皎然

宗系传康乐，精修学远公。--王邁
相寻当暮岁，行李犯寒风。--李纵
累积浮生里，机惭半偈中。--郑说
传家知业坠，继祖忝声同。--皎然
云与轻帆至，山将本寺空。--崔子向
向来忘起灭，留我宿花宫。--齐翔

卷 794_29 【秋日潘述自长城至霁上与昼公、汤评事游集累日以寄之】

皎然

离念非前期，秋风忽已至。--潘述
芸黄众芳晚，摇荡居人思。--皎然
白霜凄以积，高梧飒而坠。--汤衡
悠然越山川，复此恨离异。--潘述
时景易迁谢，欢 难兼遂。--皎然
惜分缓回舟，怀遥企归驷。--汤衡
休浣情自高，来思日云未。--潘述

· 全唐诗 ·

卷 794_30 【喜昼公寻山回相遇联句一首】

皎然

几年无此会，今日喜相从。--潘述
后夏仍多病，前书达几封。--皎然
水华迎暮雨，松吹引疏钟。--皎然
出谷随初月，寻僧说五峰。--潘述

卷 794_31 【送昼公联句】

皎然

相逢情不厌，惜别意难为。--韩章
吾道应无住，前期未可知。--皎然
轻霜凋古木，寒水缩荒陂。--韩章
宾雁依沙屿，浮云惨路岐。--皎然
林疏看野迥，岸转觉山移。--韩章
寄赏惊摇落，归心叹别离。--皎然
草堂思偃蹇，麈尾去相随。--顾况
勿谓光阴远，禅房会一窥。--郑遨

· 全唐诗 ·

卷 794_32 【与罗隐之联句】

郑遨

一壶天上有名物，两个世间无事人。 -- 郑遨
醉却隐之云叟外，不知何处是天真。 -- 罗隐之

· 全唐诗 ·

第七百九十五卷

句

所愿暂知居者乐，无使时称主者劳。 李日知

令乘骢马去，丞脱绣衣来。 赵仁奖
见《朝野僉载》)

魂逐东流水，坟依独坐山。(《哭陈子昂》)

三代掌纶诰，一身能唱歌。(见《乐府杂录》)

明月飞出海，黄河流上天。(《暮行潼关》)

芙蓉初出水，桃李忽无言。(《观内人楼上踏歌》)

夜夜月为青冢镜，年年雪作黑山花。(《塞上曲》)

雁影数行秋半逢，渔歌一声夜深发。

忽睹邢武辞，泠其金石备。(《宣城总集》云：
唐开元甲子，武平一同河间邢巨同游泾川琴溪，
题绝句，古刻尚存。后一纪，杜伟自柱史谪掾宣城，
陪连帅班景倩来观，题句云云。余逸)

· 全唐诗 ·

霜添柏树冷，气拂桂林寒。

八十年前棠树阴，竟陵太守公先人。（愿与竟陵陆羽尝佐岭南连帅李复幕府。后愿刺竟陵，则复已捐馆，而羽亦前谢。复父斋物先亦为竟陵守，愿因为七言诗陈事。见《方輿胜览》）

阴天闻断雁，夜浦送归人。（《送丘郎中》）

谁言百人会，兄弟也沾陪。（《侍宴》见颜真卿集）

刻舟寻已化，弹铗未酬恩。（河西骑将宋青春有剑，是青龙精。刃所及，若叩铜铁。青春死，为广琛所得。或风雨后进光出室，环烛方丈。哥舒翰求易以他宝，广琛不与，因赠诗。见《酉阳杂俎》）

梦里换春秋。（《咏华清宫》）

莫言闲话是闲话，往往事从闲话来。知

何必剃头为弟子，无家便是出家人。（见张为《主客图》）

常愿追禅理，安能挹化源。（鸿渐酷好浮屠道，晚年乐退静，常悠然赋句，朝士多属和之。见本传）

因缘三纪异，契分四般同。（摯与李行敏同姓，同甲子、同年登第，俱二十五岁，又同门，故云。见《纪事》）

· 全唐诗 ·

在室愧屋漏。（绶子温疾革，诵绶此句曰：
“今不负斯诚矣。”见《唐书》）

桃花浪里成龙去，竹叶山头退鹢飞。（《赠柳棠及第》，
见《纪事》）

庾岭东边吏隐州，溪山竹树亦清幽。（见《方輿胜览》）

地灵无俗草，岩静有仙禽。（《等慈寺北岩》，
见《方輿胜览》）

白鸟远行树，玉虹孤饮潭。（《庐山瀑布》）

四五片霞生绝壁，两三行雁过疏松。（以上见《纪事》）

抛芥子降颠狒狒，折杨枝洒醉猩猩。（见《摭言》）

山近衡阳虽少雁，水连巴蜀岂无鱼。（敬之甥雍陶，蜀川
上第后，薄于亲友，不寄书。敬之让焉，陶得诗愧赧）

水声长在耳，山色不离门。

扫地树留影，拂床琴有声。

落日长安道，秋槐满地花。（以上并见《纪事》）

中丞为国拔贤才，寒俊欣逢藻鉴开。（《赠知贡举陈商》，

· 全唐诗 ·

见《池阳志》)

莫将韦监同殷监，错认容身是保身。(懿宗朝，
澳为吏部侍郎，不受请托，为执政所恶，出为邠宁节度。
时宰复发其部事，罢镇，以秘书监分司东都。
尝戏吟此句，京师权幸闻而尤怒之。见《唐书》)

珠箔卷繁星，金樽泻月明。

身死为修刘稹表，名高因让陆洵书。(《吊欧阳柅》。
柅，詹从子，开成中擢第。司勋郎中陆洵弃官隐吴中，
后赴召复出，柅移书让之，因不出。柅名益闻，
竟赴泽潞刘稹幕辟。稹表指斥时政，朝廷疑柅所草，
流崖州，赐死)

尘飞遗恨尽，花落古宫平。(《洛阳古城》)

红粉笙歌人代远，月明陵树水东流。(《铜雀台》)

露团沙鹤起，人卧钓船流。(见《摭言》)

只向国门安四海，不离乡井拜三公。(《赠王重荣》。
《纪事》：重荣镇河中，燕投此诗，甚加礼敬。
竟以凌轹诸从事，受正平之祸)

芍药花开菩萨面，棕闾叶散野人头。(璘与李群玉相遇
岳麓寺，群玉待之甚浅。曰：“请与公联句。”破题而

· 全唐诗 ·

授之，璘略不伫思，继之云云。群玉遂屈。见《纪事》）
虚心纤质雁衔余，凤吹龙吟定不如。（薛阳陶善吹芦管。
蔚镇淮海，阳陶为浙右小校，监押度支。运米至，蔚召，
令出芦管，于赏心亭奏之。蔚大嘉赏，赠诗此其终篇也）

今朝拜贡盈襟泪，不进新芽是进心。（常州旧贡阳羨茶。
僖宗幸蜀，枳间关驰贡，故有此句。见《常州志》）

万蕴千牌次碧牙，缥笺金字间明霞。（竇善楷书。
天复中，挈家自华至陈，未尝废词翰。其题经藏有此句，
见《宣和书谱》）

一箭不中鹄，五湖归钓鱼。（见《地志》）

烟随红焰断，化作白云飞。（七岁时咏野烧，
识者知其为青云器）

隔岸水牛浮鼻渡，傍溪沙鸟点头行。（见《纪事》）

绮罗因片叶，桃李谩同时。（咏桑，见《诗注总话》）

都缘心似水，故以钵为舟。（《题壁画杯渡道人》）

路指丹阳分虎节，心存双阙恋龙颜。（《赴润州镇赐钱》，
见《江表志》）

甜于泉水茶须信，狂似杨花蝶未知。（《咏雪》）

· 全唐诗 ·

半窗月在犹煎药，几夜灯闲不照书。（《病中》，
并见《江表志》）

至人无梦梦不到，天道恶盈盈有余。（《闲书》）

龙髯已断嫔嫗老，豹尾不来岐路长。（《读武帝内传》）

翻身腾白浪，探爪擢明珠。（永新令请题屏画戏珠龙。
令好受馈遗，元龟写意讥之。令悟，追捕，遂亡入金陵）

因借梦书过竹寺，学耕秋粟绕茆原。（《寄柳宣》）

芭蕉叶上无愁雨，自是多情听断肠。（戎昱诗有
“一夜不眠孤客耳，主人门外有芭蕉。”代为之答）

风雨揭却屋，全家醉不知。（咏渔父，见《江南野录》）

孤猿叫落中岩月，野客吟残半夜灯。

雁飞南浦砧初断，月满西楼酒半醒。

晓来羸骝依前去，目断遥山数点清。（《宿江城》，
并见《锦绣万花谷》）

迈古文章金鸞鷟，出群行止玉麒麟。（《赠邵拙》，
见《马令书》）

· 全唐诗 ·

风便磬声远，日斜楼影长。（游古观，见《郡阁雅谈》）

好是晚来香雨里，担簦亲送绮罗人。（见《诗史》）

莲中花更好，云里月常新。（南唐宫嫔窈娘善舞，
后主作金莲，令窈娘缠足作新月状，舞莲中。
镐诗因窈娘作也。见《道山清话》）

天下传将舞马赋，门前迎得跨驴宾。（《献高侍郎》）

砚贮寒泉碧，庭堆败叶红。（《赠宣城宰》）

燕掠琴弦穿静院，吏收诗草下闲庭。（《赠徐学士》，
见《雅言系述》）

年年闻尔者，未有不伤情。（《蝉》）

出得风尘者，合知岐路人。

拂榻灯未来，开门月先入。

忽生云是匣，高以月为台。

入夜虽无伤物意，向明还有动人心。（《画虎》，
并见《吟窗杂录》）

金茎来白露，玉宇起清风。（《侍宴》，见《吟窗杂录》）

· 全唐诗 ·

红旆渡江霞蘸水，青蛇出匣雪侵衣。（赠池阳守陈德诚）

云散便凝千里望，日斜长占半城阴。（《升元阁》）

只住此山宁有意，向来求佛本无心。（《赠嘉禾峰僧》）

万国不得雨，孤云犹在山。（见《江南野录》）

先生不在此，千载只空山。（题斋壁，见《江南野录》）

建水旧传刘夜坐，螺川新有夏江城。（刘洞有《夜坐》诗，
夏宝松有《宿江城》诗皆见称一时，号刘夜坐、夏江城云）

一雨洗残暑，万家生早凉。（《漳江感怀》）

暮鸟归巢急，寒牛下陇迟。（《村居》）

算吟千百首，方得两三联。

清时不作登龙客，绿鬓闲梳傍草堂。（《赠黄岩》，
并《雅言系述》）

淮船分蚁队，江市聚蝇声。（《夜宿金山》，
见《古今诗话》）

人间不见月，天外自分明。（《中秋不见月》，
见《大定录》）

· 全唐诗 ·

烧平樵路出，潮落海山高。（见《葆光录》）

行人折柳和轻絮，飞燕衔泥带落花。（见《西清诗话》）

轻身都是义，殉主始为忠。（《咏志》）

满堂罗绮兼朱紫，四代儿孙奉老翁。（德昭理家以孝爱闻，
每时序置酒，环列几席者凡四从，故其诗云。
见《备史》）

雪浦二月江湖阔，花发千山道路香。（见《备史》）

海边红日半离水，天外暖风轻到花。（《春日》）

雨声鞭自禁门出，一簇人从天上来。（《赠王枢密处回》，
见《异闻录》）

十字水中分岛屿，数重花外见楼台。（浣花溪江皆创亭榭，
孟昶游之，曰：“曲江金殿锁千门，未及此。”
廷珪赋句，昶称善。见《蜀梼杌》）

无钱将乞樊知客，名纸生毛不为通。（彬初投谒马殷，
知客樊姓者索贿不得，不与通。后为《九州歌》干之，
又不问，因入蜀。见《南部新书》）

桑柘残阳里，儿孙落叶中。（彬有子稚齿，作《田父诗》
云云。廖凝见之，知其不寿，寻果卒。见《郡阁雅谈》）

· 全唐诗 ·

向外疑无地，其中别有天。（《大内盆池》）

方外共推为道友，关中独自占诗家。（《赠滕郎中》）

炎暑郁蒸无处避，凉风消息几时来。（见《古今诗话》）

月沈湘浦冷，花谢汉宫秋。（《挽马希范夫人》，
见《五代史补》）

须把咽喉吞世界，盖因奢侈致危亡。

若须抛却便抛却，莫待风高更亦深。（并《渔父》篇。
见《五代史补》）

夜长灯影灭，天绕鹤声孤。（见《吟窗杂录》）

金箏离弦三尺电，星髓破的一声雷。（射，吟窗杂录）

背日流泉生冻早，逆风归鸟入巢迟。（《山中即事》，
见《雅言系述》）

胜日登楼望，山川一半春。（《桂林逍遥楼》）

也知别有风光主，花蕾枝枝似去年。（《题藏舟浦花》，
见《南部新书》）

金殿圣人看纵笔，玉堂词客尽裁诗。（《赠^巩光》）

· 全唐诗 ·

菱叶乍翻人采后，芰荷初没舸行时。（见《纪事》）

春寒酒力迟，冉冉生微红。（《寒月》）

自然草木性，谁祝元化功。

湓浦风生破胆愁。

血染剑花明帐幕，三千车马出渔阳。

入门堪笑复堪怜，三径苔荒一钓船。（见张为《主客图》）

小桥风月年年事，争奈潘郎去 何。（见《南部新书》）

清猿啼远木，白鸟下前滩。（《秋日江干远望》）

鹤归秋汉远，人去草堂空。（《经王山人旧居》）

虽当南北路，不碍往来人。（《道傍树》）

钓叟无机沙鸟睡，禅师入定白牛闲。（《江寺闲书》）

天涯故友无来信，窗外拒霜空落花。（《暮秋怀故人》，
并见《雅言杂载》）

雨壁长秋菌，风枝落病蝉。（《即事》）

· 全唐诗 ·

老筇支瘦影，寒木凭吟身。

诗债到春无处避，离愁因醉暂时无。（《春日偶题》）

茶香解睡磨铛煮，山色牵怀著屐登。（《即事》）

身闲不恨辞官早，诗好常甘得句迟。（《赠致仕黄损》
见《雅言系述》）

白日故乡远，青山佳句中。（见《酉阳杂俎》）

冥云生易满，秋草长难高。

落星一石几千年，门外何人扣汉川。（《白石镇古城》）

五千里地望皆见，七十二峰中最高。（《祝融峰》）

花烧落第眼，雨破到家程。（下第东归，见《海录碎事》）

架上紫衣闲不著，案头金字坐长看。（《赠温州大云
寺僧鸿楚》，见《高僧传》） 斋

溪从沮水流蟠冢，岭接青泥入剑天。（《青泥山》）

但存方寸地，留与子孙耕。知

小旗村店酒，微雨野塘花。（见《南部新书》）

· 全唐诗 ·

地偏云自去，日暮山更深。

恰似传花人饮散，空抛床下最繁枝。

艳魄香魂如有在，还应羞见堕楼人。

（二生并与武椽游，步非烟死，同赋其事）

扫叶随风便，浇花趁日阴。（《赠隐者》）

闲云生不雨，病叶落非秋。（《夏日》）主

三月能辞千日醉，一生能得几回看。（见《诗话总龟》）

最是五更留不住，向人枕畔著衣裳。（熙载婢妾甚多，
不为防闲，往往私出侍客，客赋诗云云。见《南唐近事》）

悬心秋夜月，万里照乡关。（《思乡》）

玉排复道珊瑚殿，金错危桐翡翠楼。（题三学院经楼）

此花不与众花同，为感高僧护法功。（《大慈寺芍药》，
并《吟窗杂录》）

第七百九十六卷

都来消帝力，全不用兵防。（齐己《风骚旨格》）

道远擎空钵，深山踏落花。（齐己《风骚旨格》）

船中江上景，晚泊早行时。（齐己《风骚旨格》）

山寺钟楼月，江城鼓角风。（齐己《风骚旨格》）

雨过花争出，云空月半生。（齐己《风骚旨格》）

鸟正啼隋柳，人须入楚山。（齐己《风骚旨格》）

高松飘雨雪，一室掩香灯。（齐己《风骚旨格》）

遂有冥心者，还寻此境来。（齐己《风骚旨格》）

又因风雨夜，重到古松门。（齐己《风骚旨格》）

道晦金鸡伏，时来木马鸣。（齐己《风骚旨格》）

· 全唐诗 ·

谁来看山寺，自去扫松门。（齐己《风骚旨格》）

此生还自喜，余事不相侵。（齐己《风骚旨格》）

白鬓无心镊，青山得意多。（齐己《风骚旨格》）

一春能几日，无雨亦多风。（齐己《风骚旨格》）

苦雨秋涛涨，狂风野烧翻。（齐己《风骚旨格》）

须知三尺剑，只为不平磨。（齐己《风骚旨格》）

要路争先进，闲门肯暂过。（齐己《风骚旨格》）

已难消永夜，况复听秋霖。（齐己《风骚旨格》）

大雪路亦宿，深山水也吞。（赠僧，齐己《风骚旨格》）

卷帘黄叶落，锁印子规啼。（齐己《风骚旨格》）

亡国空流水，孤祠掩落花。（齐己《风骚旨格》）

山魅隔窗舞，鵬鸟入帘飞。（齐己《风骚旨格》）

万里八九月，一身西北风。（齐己《风骚旨格》）

磴危攀薜荔，石滑疏莓苔。（齐己《风骚旨格》）

· 全唐诗 ·

日落无行客，天寒有去鸿。（齐己《风骚旨格》）

正思浮世事，又到古城边。（齐己《风骚旨格》）

寻常风雨夜，应有鬼神看。（齐己《风骚旨格》）

寄宿山中寺，相辞海上僧。（齐己《风骚旨格》）

风吹榆莢叶，雨打木瓜花。（炙穀子《诗格》）

是星皆拱北，无水不朝东。（梅尧臣《续金针诗格》）

西风起边雁，一一向潇湘。（梅尧臣《续金针诗格》）

那堪怀远路，犹自上高楼。（梅尧臣《续金针诗格》）

白云风散尽，红叶水流来。（徐寅《雅道机要》）

妾如无异意，君弃也甘心。（徐寅《雅道机要》）

野过云根阔，山高树影长。（徐寅《雅道机要》）

古迹应重别，生缘不暂停。（徐寅《雅道机要》）

一个字未稳，数宵心不闲。（徐寅《雅道机要》）

别地叶频落，去程山已寒。（徐寅《雅道机要》）

· 全唐诗 ·

但取诗名得，何论下第频。（徐寅《雅道机要》）

早起赴前程，邻鸡尚未鸣。（文彧《诗格》）

白地一回雨，儿孙拾得金。（文彧《诗格》）

轩车在何处，雨雪满前山。（文彧《诗格》）

灯微山馆雨，角咽海城秋。（文彧《诗格》）

去帆看已远，临水立多时。（《桂林诗评》）

家贫为客早，路远得书稀。（《桂林诗评》）

瀑布五千仞，草堂瀑布边。（《桂林诗评》）

我忆云门寺，门前千万峰。（《桂林诗评》）

一瓶居无外，万木老禅中。（《桂林诗评》）

秋江洗一钵，寒日晒三衣。（《桂林诗评》）

空山行客少，独树晚蝉多。（《桂林诗评》）

一片月生海，几家人上楼。（待月，王正字《诗中旨格》）

窗寒风渐紧，灯落夜将深。（秋日言怀，王正字诗中旨格）

· 全唐诗 ·

云梦几行去，潇湘一夜空。（送雁，王正字《诗中旨格》）

无风来竹院，有月在莎庭。（蟋蟀，王正字《诗中旨格》）

故园从小别，夜雨近秋闻。（王正字《诗中旨格》）

书剑别南州，炎荒万里游。（王正字《诗中旨格》）

山盘樵径上，人到雪房迟。（王正字《诗中旨格》）

路经秋雨后，人入乱峰来。（王正字《诗中旨格》）

独树知秋早，孤舟觉夜寒。（王正字《诗中旨格》）

马饥餐落叶，鹤宿晒残阳。（王正字《诗中旨格》）

路远春行尽，家贫愁到时。（《吟窗杂录》）

临水通宵坐，知君此兴同。（《吟窗杂录》）

江声兼小雨，暝色入啼猿。（《树萱录》）

藕隐玲珑玉，花藏缥缈容。（《树萱录》）

红树醉秋色，碧溪弹夜弦。（《树萱录》）

网断蛛犹织，梁空燕不归。（《树萱录》）

· 全唐诗 ·

倒身无著处，呵手不成温。（《苦寒》见《事文类聚》）

几多诗弟子，无限酒知闻。（《悼方干》见《海录碎事》）

床上小薰笼，韶州新退红。（《乐府》见陆务观集注）

看时人步涩，展处蝶争来。（《题于兢画牡丹》
兢字德源，长安人，梁宰相也。见《见闻志》）

酒味杂莲气，香冷胜于冰。轮囷如象鼻，潇洒绝青蝇。
（《碧筩杯》，见杨慎《艺林伐山》）

太宗皇帝真长策，赚得英雄尽白头。（《国史补》曰：
进士科得之艰难，其有老死于文场者，亦无所恨，
故诗云。《画墁录》以为赵嘏作）

曾题名处添前字，送出城人乞旧衣。（神龙已来，杏园宴后，
皆于慈恩塔下题名，及第后知闻。或遇未及第时题名处，
则为添前字，故诗云。见《摭言》）

华阳观里钟声集，建福门前鼓动期。（新进士放榜后翌日，
排光范门候过宰相。虽云排建福门，实集于西方馆，
故诗云云。见《南部新书》）

陇右诸侯供语鸟，日南太守送名花。（李德裕营平泉，
远方之人，多以异物奉之，时有题诗云云。见《剧谈录》）

· 全唐诗 ·

八百孤寒齐下泪，一时回首望崖州。（德裕为相，颇为寒进开路。及谪官南去，人咏此。见《摭言》）

让劫已令多士伏，沽名还得世人闻。（陈咏有诗名，善弈棋。昭宗幸陕之岁，策名归蜀，韦庄以诗贺之。乡中有嫉善者，属和韦诗云云，比之滌器当垆也。见《纪事》）

人为子推初禁火，花愁青女再飞霜。（《寒食》，见《事文类聚》）

楝花开后风光好，梅子黄时雨意浓。（江南自初春至初夏，有二十四番花信风，最后为楝花风，故唐人有此句。见《东皋杂录》）

兰汤备浴传荆俗，水马浮江吊屈魂。（唐人《午日》诗。南方竞渡，治其舟使轻利，名飞鳧，名水车，又名水马。见《荆楚岁时记》）

城头椎鼓传花枝，席上抟拳握松子。（见《东皋杂录》）

鸟向不香花里宿，人从无影月中归。（《雪》）

轻著冻痕销水面，密随和气入花根。（《春雪》）

万木尽如花落候，四檐鸣蜀雨来时。（《晴雪》，王安石尝举此三联，云唐人诗）

· 全唐诗 ·

浓绿万枝红一点，动人春色不须多。（王安石在翰苑，见榴花止开一朵，有诗。陈正敏谓此乃唐人诗，非安石所作。见《泊宅编》）

晚菰细切肥牛肚，新笋初尝嫩马蹄。（见《锦绣万花谷》）

蝉离楚树鸣犹少，叶到嵩山落更多。（《风骚旨格》）

风和日暖方开眼，雨润烟浓不举头。（《风骚旨格》）

窗前闲咏鸳鸯句，壁上时观獬廌图。（《风骚旨格》）

可能有关心后，得似无人识面时。（《风骚旨格》）

一点孤灯人梦觉，万重寒叶雨声多。（炙毂子《诗格》）

此心只待相逢说，时复登楼看远山。（炙毂子《诗格》）

九江有浪船难济，三峡无猿客有愁。（炙毂子《诗格》）

四海鱼龙精魄冷，五山鸾凤骨毛寒。（炙毂子《诗格》）

谁家绿酒欢留客，何处红楼睡失明。（炙毂子《诗格》）

雨露施恩无厚薄，蓬蒿随分有枯荣。（梅尧臣续金针诗格）

去年花下留连饮，暖日天桃莺乱啼。（梅尧臣续金针诗格）

· 全唐诗 ·

今日江边容易别，淡烟衰草马频嘶。（梅尧臣续金针诗格）

蛇蝎性灵生便毒，蕙兰根异死犹香。（梅尧臣续金针诗格）

三间茅屋无人到，十里松门独自游。（梅尧臣续金针诗格）

翻忆旧山青碧里，绕庵闲伴野僧禅。（《云》）

不甘五等诸侯荐，直肯九重天子知。（刘素者，字仲华。
好学，不事科举，颇通迂、固、寿、晔之书，
尝有人贻诗云云，然卒不及仕。见《江南野志》）

· 全唐诗 ·

第七百九十七卷

卷 797_1 【离别难】

武后宫人

此别难重陈，花飞复恋人。来时梅覆雪，去日柳含春。
物候催行客，归途淑气新。剡川今已远，魂梦暗相亲。

卷 797_2 【袍中诗】

开元宫人

沙场征戍客，寒苦若为眠。战袍经手作，知落阿谁边？
蓄意多添线，含情更著绵。今生已过也，结取后生缘。

卷 797_3 【题洛苑梧叶上】

天宝宫人

旧宠悲秋扇，新恩寄早春。聊题一片叶，将寄接流人。

· 全唐诗 ·

卷 797_4 【又题】

天宝宫人

一叶题诗出禁城，谁人酬和独含情。
自嗟不及波中叶，荡漾乘春取次行。

卷 797_5 【题花叶诗】

德宗宫人

一入深宫里，无由得见春。题诗花叶上，寄与接流人。

卷 797_6 【题红叶】

宣宗宫人

流水何太急，深宫尽日闲。殷勤谢红叶，好去到人间。

卷 797_7 【金锁诗】

僖宗宫人

玉烛制袍夜，金刀呵手裁。锁寄千里客，锁心终不开。

· 全唐诗 ·

卷 797_8 【随驾游青城】

李舜弦

因随八马上仙山，顿隔尘埃物象闲。
只恐西追王母宴，却忧难得到人间。

卷 797_9 【蜀宫应制】

李舜弦

浓树禁花开后庭，饮筵中散酒微醒。
濛濛雨草瑶阶湿，钟晓愁吟独倚屏。

卷 797_10 【钓鱼不得】

李舜弦

尽日池边钓锦鳞，芰荷香里暗消魂。
依稀纵有寻香饵，知是金钩不肯吞。

· 全唐诗 ·

卷 797_11 【宫词（一作王建诗，又作花蕊夫人诗）】

李玉箫

鸳鸯瓦上瞥然声，昼寝宫娥梦里惊。
元是我王金弹子，海棠花下打流莺。

卷 797_12 【太平诗】

金真德

大唐开鸿业，巍巍皇猷昌。止戈戎衣定，修文继百王。
统天崇雨施，理物体含章。深仁谐日月，抚运迈时康。
幡旗既赫赫，钲鼓何铿锵。外夷违命者，翦覆被大殃。
和风凝宇宙，遐迩竞呈祥。四时调玉烛，七曜巡万方。
维岳降宰辅，维帝用忠良。三五咸一德，昭我皇家唐。

卷 797_13 【句】

宝历宫人

宝帐香重重，一双红芙蓉。

· 全唐诗 ·

第七百九十八卷

卷 798_1 【宫词（梨园子弟以下四十一首一作王珪诗）】

花蕊夫人

五云楼阁凤城间，花木长新日月闲。
三十六宫连内苑，太平天子住昆山。

会真广殿约宫墙，楼阁相扶倚太阳。
净甃玉阶横水岸，御炉香气扑龙床。

龙池九曲远相通，杨柳丝牵两岸风。
长似江南好风景，画船来去碧波中。

东内斜将紫禁通，龙池凤苑夹城中。
晓钟声断严妆罢，院院纱窗海日红。

殿名新立号重光，岛上亭台尽改张。
但是一人行幸处，黄金阁子锁牙床。

夹城门与内门通，朝罢巡游到苑中。
每日日高祇候处，满堤红艳立春风。

· 全唐诗 ·

厨船进食簇时新，侍宴无非列近臣。
日午殿头宣索鲙，隔花催唤打鱼人。

立春日进内园花，红蕊轻轻嫩浅霞。
跪到玉阶犹带露，一时宣赐与宫娃。

三面宫城尽夹墙，苑中池水白茫茫。
直从狮子门前入，旋见亭台绕岸傍。

离宫别院绕宫城，金版轻敲合凤笙。
夜夜月明花树底，傍池长有按歌声。

御制新翻曲子成，六宫才唱未知名。
尽将麝篆来抄谱，先按君王玉笛声。

旋移红树斫新苔，宣使龙池更凿开。
展得绿波宽似海，水心楼殿胜蓬莱。

太虚高阁凌虚殿，背倚城墙面枕池。
诸院各分娘子位，羊车到处不教知。

修仪承宠住龙池，扫地焚香日午时。
等候大家来院里，看教鹦鹉念新诗。

才人出入每参随，笔砚将行绕曲池。
能向彩笺书大字，忽防御制写新诗。

· 全唐诗 ·

六宫官职总新除，宫女安排入画图。
二十四司分六局，御前频见错相呼。

春风一面晓妆成，偷折花枝傍水行。
却被内监遥觑见，故将红豆打黄莺。

殿前排宴赏花开，宫女侵晨探几回。
斜望花开遥举袖，传声宣唤近臣来。

小球场近曲池头，宣唤勋臣试打球。
先向画楼排御幄，管弦声动立浮油。

供奉头筹不敢争，上棚等唤近臣名。
内人酌酒才宣赐，马上齐呼万岁声。

殿前宫女总纤腰，初学乘骑怯又娇。
上得马来才欲走，几回抛鞚抱鞍桥。

自教宫娥学打球，玉鞍初跨柳腰柔。
上棚知是官家认，遍遍长赢第一筹。

翔鸾阁外夕阳天，树影花光远接连。
望见内家来往处，水门斜过罨楼船。

内家追逐采莲时，惊起沙鸥两岸飞。
兰棹把来齐拍水，并船相斗湿罗衣。

· 全唐诗 ·

新秋女伴各相逢，罨画船飞别浦中。
旋折荷花伴歌舞，夕阳斜照满衣红。

少年相逐采莲回，罗帽罗衫巧制裁。
每到岸头长拍水，竞提纤手出船来。

早春杨柳引长条，倚岸沿堤一面高。
称与画船牵锦缆，暖风搓出彩丝绦。

内家宣锡生辰宴，隔夜诸宫进御花。
后殿未闻宫主入，东门先报下金车。

端午生衣进御床，赭黄罗帕覆金箱。
美人捧入南薰殿，玉腕斜封彩缕长。

选进仙韶第一人，才胜罗绮不胜春。
重教按舞桃花下，只踏残红作地裀。

侍女争挥玉弹弓，金丸飞入乱花中。
一时惊起流莺散，踏落残花满地红。

七宝阑干白玉除，新开凉殿幸金舆。
一沟泛碧流春水，四面琼钩搭绮疏。

山楼彩凤栖寒月，宴殿金麟吐御香。
蜀锦地衣呈队舞，教头先出拜君王。

· 全唐诗 ·

天外明河翻玉浪，楼西凉月涌金盆。
香销甲乙床前帐，宫锁玲珑闭殿门。

细风敲叶撼宫梧，早怯秋寒著绣繡。
玉宇无人双燕去，一弯新月上金枢。

夜寒金屋篆烟飞，灯烛分明在紫微。
漏永禁宫三十六，燕回争踏月轮归。

晓吹翩翩动翠旗，炉烟千叠瑞云飞。
何人奏对偏移刻，御史天香隔绣衣。

金井秋啼络纬声，出花宫漏报严更。
不知谁是金銮直，玉宇沉沉夜气清。

内庭秋燕玉池东，香散荷花水殿风。
阿监采菱牵锦缆，月明犹在画船中。

东宫花烛彩楼新，天上仙桥上锁春。
偏出六宫歌舞奏，嫦娥初到月虚轮。

纱幔薄垂金麦穗，帘钩纤挂玉葱条。
楼西别起长春殿，香碧红泥透蜀椒。

翠华香重玉炉添，双凤楼头晓日暹。
扇掩红鸾金殿悄，一声清跸卷珠帘。

· 全唐诗 ·

金作蟠龙绣作麟，壶中楼阁禁中春。
君王避暑来游幸，风月横秋气象新。

清晓自倾花上露，冷侵宫殿玉蟾蜍。
擘开五色销金纸，碧锁窗前学草书。

翠钿贴靥轻如笑，玉凤雕钗袅欲飞。
拂晓贺春皇帝阁，彩衣金胜近龙衣。

琐声金彻阁门环，帘卷珍珠十二间。
别殿春风呼万岁，中丞新押散朝班。

鸡人报晓传三唱，玉井金床转轳轳。
烟引御炉香绕殿，漏签初刻上铜壶。

御按横金殿幄红，扇开云表露天容。
太常奏备三千曲，乐府新调十二钟。

宫女熏香进御衣，殿门开锁请金匙。
朝阳初上黄金屋，禁夜春深昼漏迟。

三月金明柳絮飞，岸花堤草弄春时。
楼船百戏催宣赐，御辇今年不上池。

内人稀见水秋千，争擘珠帘帐殿前。
第一锦标谁夺得，右军输却小龙船。

· 全唐诗 ·

夜色楼台月数层，金猊烟穗绕觚棱。
重廊屈折连三殿，密上真珠百宝灯。

天门晏闭九重关，楼倚银河气象间。
一点星球重绛阙，五云仙仗下蓬山。

禁里春浓蝶自飞，御蚕眠处弄新丝。
碧窗尽日教鹦鹉，念得君王数首诗。

斗草深宫玉槛前，春蒲如箭荇如钱。
不知红药阑干曲，日暮何人落翠钿。

太液波清水殿凉，画船惊起宿鸳鸯。
翠眉不及池边柳，取次飞花入建章。

御座垂帘绣额单，冰山重叠贮金盘。
玉清迢递无尘到，殿角东西五月寒。

春心滴破花边漏，晓梦敲回禁里钟。
十二楚山何处是，御楼曾见两三峰。

博山夜宿沈香火，帐外时闻暖凤笙。
理遍从头新上曲，殿前龙直未交更。

春殿千官宴却归，上林莺舌报花时。
宣徽旋进新裁曲，学士争吟应诏诗。

· 全唐诗 ·

钓线沈波漾彩舟，鱼争芳饵上龙钩。
内人急捧金盘接，拨刺红鳞跃未休。

蕙炷香销烛影残，御衣熏尽辄更阑。
归来困顿眠红帐，一枕西风梦里寒。

东宫降诞挺佳辰，少海星边拥瑞云。
中尉传闻三日宴，翰林当撰洗儿文。

酒库新修近水傍，泼醅初熟五云浆。
殿前供御频宣索，追入花间一阵香。

白藤花限白银花，閤子门当寝殿斜。
近被宫中知了事，每来随驾使煎茶。

西球场里打球回，御宴先于苑内开。
宣索教坊诸伎乐，傍池催唤入船来。

昭仪侍宴足精神，玉烛抽看记饮巡。
倚赖识书为录事，灯前时复错瞞人。

后宫阿监裹罗巾，出入经过苑囿频。
承奉圣颜忧误失，就中长怕内夫人。

管弦声急满龙池，宫女藏钩夜宴时。
好是圣人亲捉得，便将浓墨扫双眉。

· 全唐诗 ·

密室红泥地火炉，内人冬日晚传呼。
今宵驾幸池头宿，排比椒房得暖无？

画船花舫总新妆，进入池心近岛傍。
松柏楼窗楠木板，暖风吹过一团香。

三清台近苑墙东，楼槛层层映水红。
尽日绮罗人度曲，管弦声在半天中。

安排诸院接行廊，外槛周回十里强。
青锦地衣红绣毯，尽铺龙脑郁金香。

安排竹栅与笆篱，养得新生鹑鸽儿。
宣受内家专喂饲，花毛间看总皆知。

年初十五最风流，新赐云鬟便上头。
按罢霓裳归院里，画楼云阁总重修。

金画香台出露盘，黄龙雕刻绕朱阑。
焚修每遇三元节，天子亲簪白玉冠。

六宫一例鸡冠子，新样交镌白玉花。
欲试澹妆兼道服，面前宣与唾盂家。

三月樱桃乍熟时，内人相引看红枝。
回头索取黄金弹，绕树藏身打雀儿。

· 全唐诗 ·

小小宫娥到内园，未梳云鬓脸如莲。
自从配与夫人后，不使寻花乱入船。

锦城上起凝烟阁，拥殿遮楼一向高。
认得圣颜遥望见，碧阑干映赭黄袍。

水车踏水上宫城，寝殿檐头滴滴鸣。
助得圣人高枕兴，夜凉长作远滩声。

平头船子小龙床，多少神仙立御旁。
旋刺篙竿令过岸，满池春水蘸红妆。

苑东天子爱巡游，御岸花堤枕碧流。
新教内人供射鸭，长将弓箭绕池头。

罗衫玉带最风流，斜插银篦慢裹头。
闲向殿前骑御马，挥鞭横过小红楼。

沉香亭子傍池斜，夏日巡游歇翠华。
帘畔玉盆盛净水，内人手里剖银瓜。

薄罗衫子透肌肤，夏日初长板阁虚。
独自凭阑无一事，水风凉处读文书。

婕妤生长帝王家，常近龙颜逐翠华。
杨柳岸长春日暮，傍池行困倚桃花。

· 全唐诗 ·

月头支给买花钱，满殿宫人近数千。
遇著唱名多不语，含羞走过御床前。

小雨霏微润绿苔，石楠红杏傍池开。
一枝插向金瓶里，捧进君王玉殿来。

锦鳞跃水出浮萍，荇草牵风翠带横。
恰似金梭擢碧沼，好题幽恨写闺情。

春天睡起晓妆成，随侍君王触处行。
画得自家梳洗样，相凭女伴把来呈。

舞头皆著画罗衣，唱得新翻御制词。
每日内庭闻教队，乐声飞上到龙墀。

春早寻花入内园，竞传宣旨欲黄昏。
明朝驾幸游蚕市，暗使毡车就苑门。

半夜摇船载内家，水门红蜡一行斜。
圣人正在宫中饮，宣使池头旋折花。

春日龙池小宴开，岸边亭子号流杯。
沈檀刻作神仙女，对捧金尊水上来。

梨园子弟簇池头，小乐携来候宴游。
旋炙银笙先按拍，海棠花下合梁州。

· 全唐诗 ·

慢梳鬟髻著轻红，春早争求芍药丛。
近日承恩移住处，夹城里面占新宫。

别色官司御辇家，黄衫束带脸如花。
深宫内院参承惯，常从金舆到日斜。

日高房里学围棋，等候官家未出时。
为赌金钱争路数，专忧女伴怪来迟。

擣菹冷澹学投壶，箭倚腰身约画图。
尽对君王称妙手，一人来射一人输。

慢揎红袖指纤纤，学钓池鱼傍水边。
忍冷不禁还自去，钓竿常被别人牵。

宣城院约池南岸，粉壁红窗画不成。
总是一人行幸处，彻宵闻奏管弦声。

丹霞亭浸池心冷，曲沼门含水脚清。
傍岸鸳鸯皆著对，时时出向浅沙行。

杨柳阴中引御沟，碧梧桐树拥朱楼。
金陵城共滕王阁，画向丹青也合羞。

晚来随驾上城游，行到东西百子楼。
回望苑中花柳色，绿阴红艳满池头。

· 全唐诗 ·

牡丹移向苑中栽，尽是藩方进入来。
未到末春缘地暖，数般颜色一时开。

明朝腊日官家出，随驾先须点内人。
回鹘衣装回鹘马，就中偏称小腰身。

盘凤鞦韆闪色妆，黄金压胯紫游缰。
自从拣得真龙种，别置东头小马坊。

翠辇每从城畔出，内人相次簇池隈。
嫩荷花里摇船去，一阵香风逐水来。

高烧红烛点银灯，秋晚花池景色澄。
今夜圣人新殿宿，后宫相竞觅祇承。

苑中排比宴秋宵，弦管争拊各自调。
日晚阁门传圣旨，明朝尽放紫宸朝。

夜深饮散月初斜，无限宫嫔乱插花。
近侍婕妤先过水，遥闻隔岸唤船家。

宫娥小小艳红妆，唱得歌声绕画梁。
缘是太妃新进入，座前颁赐小罗箱。

池心小样钓鱼船，入玩偏宜向晚天。
挂得彩帆教便放，急风吹过水门前。

· 全唐诗 ·

傍池居住有渔家，收网摇船到浅沙。
预进活鱼供日料，满筐跳跃白银花。

秋晚红妆傍水行，竞将衣袖扑蜻蜓。
回头瞥见宫中唤，几度藏身入画屏。

御沟春水碧于天，宫女寻花入内园。
汗湿红妆行渐困，岸头相唤洗花钿。

亭高百尺立春风，引得君王到此中。
床上翠屏开六扇，折枝花绽牡丹红。

内人承宠赐新房，红纸泥窗绕画廊。
种得海柑才结子，乞求自送与君王。

翡翠帘前日影斜，御沟春水浸成霞。
侍臣向晚随天步，共看池头满树花。

金碧阑干倚岸边，卷帘初听一声蝉。
殿头日午摇纨扇，宫女争来玉座前。

嫩荷香扑钓鱼亭，水面文鱼作队行。
宫女齐来池畔看，傍帘呼唤勿高声。

新翻酒令著词章，侍宴初闻忆却忙。
宣使近臣传赐本，书家院里遍抄将。

· 全唐诗 ·

寒食清明小殿旁，彩楼双夹斗鸡场。
内人对御分明看，先赌红罗被十床。

寝殿门前晓色开，红泥药树间花栽。
君王未起翠帘卷，又发宫人上直来。

海棠花发盛春天，游赏无时引御筵。
绕岸结成红锦帐，暖枝犹拂画楼船。

日晚宫人外按回，自牵骢马出林隈。
御前接得高叉手，射得山鸡喜进来。

朱雀门高花外开，球场空阔净尘埃。
预排白兔兼苍狗，等候君王按鹄来。

会仙观内玉清坛，新点宫人作女冠。
每度驾来羞不出，羽衣初著怕人看。

老大初教学道人，鹿皮冠子澹黄裙。
后宫歌舞今抛掷，每日焚香事老君。

法云寺里中元节，又是官家诞降辰。
满殿香花争供养，内园先占得铺陈。

金章紫绶选高班，每每东头近圣颜。
才艺足当恩宠别，只堪供奉一场闲。

· 全唐诗 ·

内人深夜学迷藏，遍绕花丛水岸傍。
乘兴忽来仙洞里，大家寻觅一时忙。

小院珠帘著地垂，院中排比不相知。
羡他鹦鹉能言语，窗里偷教鸂鶒儿。

岛树高低约浪痕，苑中斜日欲黄昏。
树头木刻双飞鹤，荡起晴空映水门。

大臣承宠赐新庄，栀子园东柳岸傍。
今日圣恩亲幸到，板桥头是读书堂。

树叶初成鸟护窠，石榴花里笑声多。
众中遗却金钗子，拾得从他要赎么？

小殿初成粉未干，贵妃姊妹自来看。
为逢好日先移入，续向街西索牡丹。

内人相续报花开，准拟君王便看来。
逢著五弦琴绣袋，宜春院里按歌回。

巡吹慢遍不相和，暗数看谁曲校多。
明日梨花园里见，先须逐得内家歌。

黄金合里盛红雪，重结香罗四出花。
一一傍边书敕字，中官送与大臣家。

· 全唐诗 ·

宫人早起笑相呼，不识阶前扫地夫。
乞与金钱争借问，外头还似此间无？

小随阿姊学吹笙，见好君王赐与名。
夜拂玉床朝把镜，黄金殿外不教行。

日高殿里有香烟，万岁声长动九天。
妃子院中初降诞，内人争乞洗儿钱。

宫花不共外花同，正月长生一半红。
供御樱桃看守别，直无鸦鹊到园中。

殿前铺设两边楼，寒食宫人步打球。
一半走来争跪拜，上棚先谢得头筹。

大仪前日暖房来，嘱向朝阳乞药栽。
敕赐一窠红踯躅，谢恩未了奏花开。

御前新赐紫罗襦，步步金阶上软舆。
宫局总来为喜乐，院中新拜内尚书。

鹦鹉谁教转舌关，内人手里养来奸。
语多更觉承恩泽，数对君王忆陇山。

分朋闲坐赌樱桃，收却投壶玉腕劳。
各把沈香双陆子，局中斗累阿谁高。

· 全唐诗 ·

禁寺红楼内里通，笙歌引驾夹城东。
裹头宫监堂前立，手把牙鞘竹弹弓。

舞来汗湿罗衣彻，楼上人扶下玉梯。
归到院中重洗面，金花盆里泼银泥。

宿妆残粉未明天，总立昭阳花树边。
寒食内人长白打，库中先散与金钱。

众中偏得君王笑，偷把金箱笔砚开。
书破红蛮隔子上，旋推当直美人来。

水中芹叶土中花，拾得还将避众家。
总待别人般数尽，袖中拈出郁金香。

玉箫改调箏移柱，催换红罗绣舞筵。
未戴柘枝花帽子，两行宫监在帘前。

窗窗户户院相当，总有珠帘玳瑁床。
虽道君王不来宿，帐中长是炷牙香。

卷 798_2 【述国亡诗】

花蕊夫人

君王城上竖降旗，妾在深宫那得知。

· 全唐诗 ·

十四万人齐解甲，宁无一个是男儿。

· 全唐诗 ·

第七百九十九卷

卷 799_1 【新妆诗】

杨容华

啼鸟惊眠罢，房栊乘晓开。凤钗金作缕，鸾镜玉为台。
妆似临池出，人疑向月来。自怜终不见，欲去复裴回。

卷 799_2 【赠外】

魏氏

浮萍依绿水，弱茑寄青松。与君结大义，移天得所从。
翰林无双鸟，剑水不分龙。谐和类琴瑟，坚固同胶漆。
义重恩欲深，夷险贵如一。本自身不令，积多婴痛疾。
朝夕倦床枕，形体耻巾栉。游子倦风尘，从官初解巾。
束装赴南郢，脂驾出西秦。比翼终难遂，衔雌苦未因。
徒悲枫岸远，空对柳园春。男儿不重旧，丈夫多好新。
新人喜新聘，朝朝临粉镜。两鸳固无比，双蛾谁与竞？
讵怜愁思人，衔啼嗟薄命。蕣华不足恃，松枝有余劲。
所愿好九思，勿令亏百行。

· 全唐诗 ·

卷 799_3 【咏破帘】

乔氏

已漏风声罢，绳持也不禁。一从经落后，无复有贞心。

卷 799_4 【送兄（武后召见，令赋送兄诗，应声而就）】

七岁女子

别路云初起，离亭叶正飞。所嗟人异雁，不作一行归。

卷 799_5 【送男左贬诗（一作送男彦辅左贬）】

林氏

他日初投杼，勤王在饮冰。有辞期不罚，积毁竟相仍。
谪宦今何在，衔冤犹未胜。天涯分越徼，驿骑速毗陵。
肠断腹非苦，书传写岂能。泪添江水远，心剧海云蒸。
明月珠难识，甘泉赋可称。但将忠报主，何惧点青蝇。

· 全唐诗 ·

卷 799_6 【古兴】

赵氏

郁蒸夏将半，暑气扇飞阁。骤雨满空来，当轩卷罗幕。
度云开夕霁，宇宙何清廓。明月流素光，轻风换炎铄。
孤鸾伤对影，宝瑟悲别鹤。君子去不还，遥心欲何托。

金菊延清霜，玉壶多美酒。良人犹不归，芳菲岂常有。
不惜芳菲歇，但伤别离久。含情罢斟酌，凝怨对窗牖。

霁雪舒长野，寒云半幽谷。严风振枯条，猿啼抱冰木。
所嗟游宦子，少小荷天禄。前程未云至，凄怆对车仆。
岁寒成咏歌，日暮栖林朴。不惮行险道，空悲年运促。

卷 799_7 【寄夫】

郭绍兰

我婿去重湖，临窗泣血书。殷勤凭燕翼，寄与薄情夫。

卷 799_8 【同夫游秦】

王韞秀

路扫饥寒迹，天哀志气人。休零离别泪，携手入西秦。

· 全唐诗 ·

卷 799_9 【夫人相寄姨妹（载拜相，韞秀衔宿恨，寄姨妹）】

王韞秀

相国已随麟阁贵，家风第一右丞诗。
笄年解笑鸣机妇，耻见苏秦富贵时。

卷 799_10 【喻夫阻客】

王韞秀

楚竹燕歌动画梁，春兰重换舞衣裳。
公孙开阁招嘉客，知道浮荣不久长。

卷 799_11 【古意】

张夫人

辘轳晓转素丝绠，桐声夜落苍苔砖。
涓涓吹溜若时雨，濯濯佳蔬非用天。
丈夫不解此中意，抱瓮当时徒自贤。

· 全唐诗 ·

卷 799_12 【拜新月】

张夫人

拜新月，拜月出堂前。暗魄初笼桂，虚弓未引弦。拜新月，
拜月妆楼上。鸾镜始安台，蛾眉已相向。拜新月，
拜月不胜情，庭花风露清。月临人自老，人望月长明。
东家阿母亦拜月，一拜一悲声断绝。昔年拜月逞容辉，
如今拜月双泪垂。回看众女拜新月，却忆红闺年少时。

卷 799_13 【柳絮】

张夫人

霭霭芳春朝，雪絮起青条。或值花同舞，不因风自飘。
过尊浮绿醕，拂幌缀红绡。那用持愁玩，春怀不自聊。

卷 799_14 【拾得韦氏花钿以诗寄赠】

张夫人

今朝妆阁前，拾得旧花钿。粉污痕犹在，尘侵色尚鲜。
曾经纤手里，拈向翠眉边。能助千金笑，如何忍弃捐？

· 全唐诗 ·

卷 799_15 【诮喜鹊】

张夫人

畴昔鸳鸯侣，朱门贺客多。如今无此事，好去莫相过。

卷 799_16 【句】

张夫人

游蜂乍起惊落堦，黄鸟衔来却上枝。

临风重回首，掩泪向庭花。

镜中春色老，枕前秋夜长。

卷 799_17 【书石壁】

王氏

何事潘郎恋别筵，欢情未断妾心悬。

汰王滩下相思处，猿叫山山月满船。

· 全唐诗 ·

卷 799_18 【答微之】

裴淑

侯门初拥节，御苑柳丝新。不是悲殊命，唯愁别近亲。
黄莺迁古木，朱履从清尘。想到千山外，沧江正暮春。

卷 799_19 【夫下第（一作杜羔不第，将至家寄）】

赵氏

良人的的有奇才，何事年年被放回。
如今妾面羞君面，君若来时近夜来。

卷 799_20 【杂言寄杜羔】

赵氏

君从淮海游，再过兰杜秋。归来未须臾，又欲向梁州。
梁州秦岭西，栈道与云齐。羌蛮万余落，矛戟自高低。
已念寡俦侣，复虑劳攀跻。丈夫重志气，儿女空悲啼。
临邛滞游地，肯顾浊水泥。人生赋命有厚薄，
君但遨游我寂寞。

· 全唐诗 ·

卷 799_21 【闻夫杜羔登第（一作闻杜羔登第又寄）】

赵氏

长安此去无多地，郁郁葱葱佳气浮。
良人得意正年少，今夜醉眠何处楼。

卷 799_22 【杂言】

赵氏

上林园中青青桂，折得一枝好夫婿。
杏花如雪柳垂丝，春风荡飏不同枝。

卷 799_23 【寄夫（贞元中伉登第辟江西幕不归张以诗寄之）】

张氏

久无音信到罗帏，路远迢迢遣问谁。
闻君折得东堂桂，折罢那能不暂归。

驿使今朝过五湖，殷勤为我报狂夫。
从来夸有龙泉剑，试割相思得断无。

· 全唐诗 ·

卷 799_24 【赠郑女郎（一作郑氏妹）】

薛 勣

艳阳灼灼河洛神，珠帘绣户青楼春。能弹箜篌弄纤指，
愁杀门前少年子。笑开一面红粉妆，东园几树桃花死。
朝理曲，暮理曲，独坐窗前一片玉。行也娇，坐也娇，
见之令人魂魄销。堂前锦褥红地炉，绿沈香榼倾屠苏。
解佩时时歇歌管，芙蓉帐里兰麝满。晚起罗衣香不断，
灭烛每嫌秋夜短。

卷 799_25 【古意】

薛 勣

昨夜巫山中，失却阳台女。朝来香阁里，独伴楚王语。

卷 799_26 【赠故人】

薛 勣

昔别容如玉，今来鬓若丝。泪痕应共见，肠断阿谁知？

· 全唐诗 ·

卷 799_27 【句】

薛 勣

寂寞相思处，雕梁落燕泥。

卷 799_28 【题奉慈寺】

杨德麟

日月金轮动，旃檀碧树秋。塔分鸿雁翅，钟挂凤凰楼。

卷 799_29 【述怀（校书娶崔时年已暮崔微有愠色赋诗述怀）】

崔 氏

不怨卢郎年纪大，不怨卢郎官职卑。
自恨妾身生较晚，不及卢郎年少时。

卷 799_30 【寄夫（一作王驾诗，题云古意）】

陈玉兰

夫戍边关妾在吴，西风吹妾妾忧夫。

· 全唐诗 ·

一行书信千行泪，寒到君边衣到无？

卷 799_31 【写真寄夫】

薛媛

欲下丹青笔，先拈宝镜寒。已经颜索寞，渐觉鬓凋残。
泪眼描将易，愁肠写出难。恐君浑忘却，时展画图看。

卷 799_32 【闻琴】

孙氏

玉指朱弦轧复清，湘妃愁怨最难听。初疑飒飒凉风劲，
又似萧萧暮雨零。近比流泉来碧嶂，远如玄鹤下青冥。
夜深弹罢堪惆怅，露湿丛兰月满庭。

卷 799_33 【白蜡烛诗（代夫赠人）】

孙氏

景胜银缸香比兰，一条白玉逼人寒。
他时紫禁春风夜，醉草天书仔细看。

· 全唐诗 ·

卷 799_34 【谢人送酒（一作代谢崔家郎君送酒）】

孙氏

谢将清酒寄愁人，澄澈甘香气味真。
好是绿窗风月夜，一杯摇荡满怀春。

卷 799_35 【诗】

张立本女

危冠广袖楚宫妆，独步闲庭逐夜凉。
自把玉簪敲砌竹，清歌一曲月如霜。

卷 799_36 【绣龟形诗】

侯氏

睽离已是十秋强，对镜那堪重理妆。闻雁几回修尺素，
见霜先为制衣裳。开箱叠练先垂泪，拂杵调砧更断肠。
绣作龟形献天子，愿教征客早还乡。

· 全唐诗 ·

卷 799_37 【感夫诗（一作与夫诀，一作留别）】

慎氏

当时心事已相关，雨散云飞一饷间。
便是孤帆从此去，不堪重上望夫山。

卷 799_38 【谣】

薛瑶

化云心兮思淑贞，洞寂灭兮不见人。瑶草芳兮思芬薑，
将奈何兮青春。

卷 799_39 【题唐安寺阁壁】

王霞卿

春来引步暂寻游，愁见风光倚寺楼。
正好开怀对烟月，双眉不觉自如钩。

· 全唐诗 ·

卷 799_40 【答郑殷彝】

王霞卿

君是烟霄折桂身，圣朝方切用儒珍。
正堪西上文场战，空向途中泥妇人。

卷 799_41 【喜卢郎及第】

窦梁宾

晓妆初罢眼初瞢，小玉惊人踏破裙。
手把红笺书一纸，上头名字有郎君。

卷 799_42 【雨中看牡丹】

窦梁宾

东风未放晓泥干，红药花开不奈寒。
待得天晴花已老，不如携手雨中看。

· 全唐诗 ·

卷 799_43 【书桐叶】

任氏

拭翠敛蛾眉，郁郁心中事。搦管下庭除，书成相思字。
此字不书石，此字不书纸。书在桐叶上，愿逐秋风起。
天下有心人，尽解相思死。天下负心人，不识相思字。
有心与负心，不知落何地。

卷 799_44 【下狱贡诗】

黄崇嘏

偶辞幽隐在临邛，行止坚贞比涧松。
何事政清如水镜，绊他野鹤在深笼。

卷 799_45 【辞蜀相妻女诗】

黄崇嘏

一辞拾翠碧江湄，贫守蓬茅但赋诗。自服蓝衫居郡掾，
永抛鸾镜画蛾眉。立身卓尔青松操，挺志铿然白璧姿。
幕府若容为坦腹，愿天速变作男儿。

· 全唐诗 ·

卷 799_46 【答诸姊妹戒饮】

蒋氏

平生偏好酒，劳尔劝吾餐。但得杯中满，时光度不难。

卷 799_47 【书壁】

周仲美

爱妾不爱子，为问此何理。弃官更弃妻，人情宁可已。
永诀泗之滨，遗言空在耳。三载无朝昏，孤帟泪如洗。
妇人义从夫，一节誓生死。江乡感残春，肠断晚烟起。
西望太华峰，不知几千里。

卷 799_48 【溪口云】

张文姬

溶溶溪口云，才向溪中吐。不复归溪中，还作溪中雨。

· 全唐诗 ·

卷 799_49 【池上竹】

张文姬

此君临此池，枝低水相近。碧色绿波中，日日流不尽。

卷 799_50 【沙上鹭】

张文姬

沙头一水禽，鼓翼扬清音。只待高风便，非无云汉心。

卷 799_51 【双槿树】

张文姬

绿影竞扶疏，红姿相照灼。不学桃李花，乱向春风落。

卷 799_52 【狱中书情上使君（长文为强暴所诬系狱，献诗雪冤）】

程长文

妾家本住鄱阳曲，一片贞心比孤竹。当年二八盛容仪。

· 全唐诗 ·

红笺草隶恰如飞。尽日闲窗刺绣坐，有时极浦采莲归。
谁道居贫守都邑，幽闺寂寞无人识。海燕朝归衾枕寒，
山花夜落阶墀湿。强暴之男何所为，手持白刃向帘帟。
一命任从刀下死，千金岂受暗中欺。我心匪石情难转，
志夺秋霜意不移。血溅罗衣终不恨，疮黏锦袖亦何辞。
县僚曾未知情绪，即便教人縶图圉。朱唇滴沥独衔冤，
玉箸阑干叹非所。十月寒更堪思人，一闻击柝一伤神。
高髻不梳云已散，蛾眉罢扫月仍新。三尺严章难可越，
百年心事向谁说。但看洗雪出圉扉，始信白圭无玷缺。

卷 799_53 【铜雀台怨】

程长文

君王去后行人绝，箫箏不响歌喉咽。雄剑无威光彩沈，
宝琴零落金星灭。玉阶寂寞坠秋露，月照当时歌舞处。
当时歌舞人不回，化为今日西陵灰。

卷 799_54 【春闺怨】

程长文

绮陌香飘柳如线，时光瞬息如流电。
良人何处事功名，十载相思不相见。

· 全唐诗 ·

第八百卷

卷 800_1 【答韩翃】

柳氏

杨柳枝，芳菲节，可恨年年赠离别。一叶随风忽报秋，
纵使君来岂堪折。

卷 800_2 【归李江州后寄别王氏】

程洛宾

鱼雁回时写报音，难凭锉蘖数年心。
虽然情断沙吒后，争奈平生怨恨深。

卷 800_3 【忆崔生】

红绡妓

深洞莺啼恨阮郎，偷来花下解珠珰。

· 全唐诗 ·

碧云飘断音书绝，空倚玉箫愁凤凰。

卷 800_4 【寄文茂】

晁采

花笺制叶寄郎边，的的寻鱼为妾传。
并蒂已看灵鹊报，倩郎早觅买花船。

卷 800_5 【秋日再寄】

晁采

珍簟生凉夜漏余，梦中恍惚觉来初。魂离不得空成病，
面见无由浪寄书。窗外江村钟响绝，枕边梧叶雨声疏。
此时最是思君处，肠断寒猿定不如。

卷 800_6 【春日送夫之长安】

晁采

思君远别妾心愁，踏翠江边送画舟。
欲待相看迟此别，只忧红日向西流。

· 全唐诗 ·

卷 800_7 【雨中忆夫】

晁采

窗前细雨日啾啾，妾在闺中独自愁。
何事玉郎久离别，忘忧总对岂忘忧。

春风送雨过窗东，忽忆良人在客中。
安得妾身今似雨，也随风去与郎同。

卷 800_8 【子夜歌十八首】

晁采

依既剪云鬟，郎亦分丝发。觅向无人处，绾作同心结。
夜夜不成寐，拥被啼终夕。郎不信依时，但看枕上迹。
何时得成匹，离恨不复牵。金针刺菡萏，夜夜得见莲。
相逢逐凉候，黄花忽复香。颦眉腊月露，愁杀未成霜。
明窗弄玉指，指甲如水晶。剪之特寄郎，聊当携手行。
寄语闺中娘，颜色不常好。含笑对棘实，欢娱须是枣。

· 全唐诗 ·

良会终有时，劝郎莫得怒。姜蕤畏春蚕，要绵须辛苦。
醉梦幸逢郎，无奈乌哑哑。中山如有酒，敢借千金价。
信使无虚日，玉酝寄盈觥。一年一日雨，底事太多晴。
绣房拟会郎，四窗日离离。手自施屏障，恐有女伴窥。
相思百余日，相见苦无期。褰裳摘藕花，要莲敢恨池。
金盆盥素手，焚香诵普门。来生何所愿，与郎为一身。
花池多芳水，玉杯挹赠郎。避人藏袖里，湿却素罗裳。
感郎金针赠，欲报物俱轻。一双连素缕，与郎聊定情。
寒风响枯木，通夕不得卧。早起遣问郎，昨宵何以过？
得郎日嗣音，令人不可睹。熊胆磨作墨，书来字字苦。
轻巾手自制，颜色烂含桃。先怀侬袖里，然后约郎腰。
侬赠绿丝衣，郎遗玉钩子。即欲系侬心，侬思著郎体。

· 全唐诗 ·

卷 800_9 【答张生（一作明月三五夜）】

崔莺莺

待月西厢下，迎风户半开。拂墙花影动，疑是玉人来。

卷 800_10 【寄诗（一作绝微之）】

崔莺莺

自从销瘦减容光，万转千回懒下床。
不为傍人羞不起，为郎憔悴却羞郎。

卷 800_11 【告绝诗】

崔莺莺

弃置今何道，当时且自亲。还将旧来意，怜取眼前人。

卷 800_12 【答赵子（一作寄诗答赵象）】

步非烟

绿惨双蛾不自持，只缘幽恨在新诗。

· 全唐诗 ·

郎心应似琴心怨，脉脉春情更泥谁。

卷 800_13 【又答赵象独坐（一作寄赠蝉锦香囊）】

步非烟

无力严妆倚绣枕，暗题蝉锦思难穷。
近来赢得伤春病，柳弱花欹怯晓风。

卷 800_14 【寄怀】

步非烟

画檐春燕须同宿，兰浦双鸳肯独飞。
长恨桃源诸女伴，等闲花里送郎归。

卷 800_15 【答赵象】

步非烟

相思只恨难相见，相见还愁却别君。
愿得化为松上鹤，一双飞去入行云。

· 全唐诗 ·

卷 800_16 【临行献李尚书】

崔紫云

从来学制斐然诗，不料霜台御史知。
忽见便教随命去，恋恩肠断出门时。

卷 800_17 【怨诗效徐淑体】

姚月华

妾生兮不辰，盛年兮逢屯。寒暑兮心结，夙夜兮眉颦。
循环兮不息，如彼兮车轮。车轮兮可歇，妾心兮焉伸。
杂沓兮无绪，如彼兮丝棼。丝棼兮可理，妾心兮焉分。
空闺兮岑寂，妆阁兮生尘。萱草兮徒树，兹忧兮岂泯。
幸逢兮君子，许结兮殷勤。分香兮剪发，赠玉兮共珍。
指天兮结誓，愿为兮一身。所遭兮多舛，玉体兮难亲。
损餐兮减寝，带缓兮罗裙。菱鉴兮慵启，博炉兮焉熏。
整袜兮欲举，塞路兮荆榛。逢人兮欲语，鞿匝兮顽嚚。
烦冤兮凭胸，何时兮可论。愿君兮见察，妾死兮何瞋。

卷 800_18 【制履赠杨达】

姚月华

金刀剪紫绒，与郎作轻履。愿化双仙凫，飞来入闺里。

· 全唐诗 ·

卷 800_19 【有期不至】

姚月华

银烛清尊久延伫，出门入门天欲曙。
月落星稀竟不来，烟柳胧朙鹊飞去。

卷 800_20 【怨诗寄杨达】

姚月华

春水悠悠春草绿，对此思君泪相续。
羞将离恨向东风，理尽秦筝不成曲。

与君形影分吴越，玉枕经年对离别。
登台北望烟雨深，回身泣向寥天月。

卷 800_21 【楚妃怨】

姚月华

梧桐叶下黄金井，横架辘轳牵素绠。
美人初起天未明，手拂银瓶秋水冷。

· 全唐诗 ·

卷 800_22 【独游家园】

孟氏

可惜春时节，依前独自游。无端两行泪，长只对花流。

卷 800_23 【答少年】

孟氏

谁家少年儿，心中暗自欺。不道终不可，可即恐郎知。

卷 800_24 【寄情（一作许浑代作）】

赵氏

春风白马紫丝缰，正值蚕娘未采桑。五夜有心随暮雨，
百年无节抱秋霜。重寻绣带朱藤合，却忍罗裙碧草长。
为报西游减离恨，阮郎才去嫁刘郎。

卷 800_25 【书红绡帕】

李节度姬

囊裏真香谁见窃，鲛绡滴泪染成红。

· 全唐诗 ·

殷勤遗下轻绡意，好与情郎怀袖中。

金珠富贵吾家事，常渴佳期乃寂寥。
偶用志诚求雅合，良媒未必胜红绡。

卷 800_26 【会张生述怀】

李节度姬

门前画戟寻常设，堂上犀簪取次看。
最是恼人情绪处，凤凰楼上月华寒。

卷 800_27 【别韦洵美诗】

崔素娥

妾闭闲房君路岐，妾心君恨两依依。
神魂倘遇巫娥伴，犹逐朝云暮雨归。

卷 800_28 【送韦生酒】

鲍家四弦

白露湿庭砌，皓月临前轩。此时去留恨，含思独无言。

· 全唐诗 ·

卷 800_29 【送鲍生酒】

鲍家四弦

风飏荷珠难暂圆，多情信有短姻缘。
西楼今夜三更月，还照离人泣断弦。

卷 800_30 【赠别】

严续姬

风柳摇摇无定枝，阳台云雨梦中归。
他年蓬岛音尘绝，留取尊前旧舞衣。